يوسفالسباعي

الريتية

عجعية فنل الزوجات



أمروسيسيسة

مؤلفاست پوسفانسباعی



أمر دستيسية

■ جمعية قشاالزوجات

المداء

إلى أمى العزيزة:

« الست أم يوسف »

أهدى مسرحية « أم رتبية » .

لا أحاول أن أرد بها جميلا سابقا ، فجميلها أجلُّ من

أن يرد .

ولكنى أرجو أن أهب لها لحظات ضحك تسرى بها

عن نفس بكية . فياضة الدمع . هامية المآق ..

(يوسف السباعي)

مقسيتمه

هذه محاولة في كتابة المسرحية ..

لقد أمتعتنى كتابتها ، إذ كنت أشعر وأنا أغلق باب الحجرة لأخلو بنفسى للكتابة . أنى لم أخل بها وأنى لم أكن فردا ، بل كنت محوطا بمجموعة أبطالها المضحكين الهازلين .

كنت أضحك وأنا أكتب ..

وقدأكون مجنونا .. وقد أكون مغرورا ..

ولكنى أؤكد لكم أننى أحببتها وأحببت أبطالها ، وأن كتابتها لم تكلفنى أى جهد ولا مشقة ، بل كنت في كتابتها كالسامر في جلسة سمر .

ولقد سألنى بعض الأصدقاء أن أعرضها للتمثيل على المسرح ، ولكن فضلت أن أضعها أولا في كتاب .. لأنى أثق في كتبى وأحب قرائى ، وأشعر بينهم بالطمأنينة والغبطة ، لأن بينى وبينهم رابطة أقوى مما بين كاتب وقارئ .. بينى وبينهم انسجام وصداقة وحب .

وثمة شيء أريد أن أقدم له .. وهو أنى كتبتها باللغة العامية .. إن من الجنون أن أحاول إنطاق ابطالها بالعربية .. فأرجو من أنصار اللغة العربية أن و يصهينوا شويه ، ويتسامحوا معى قليلا .. فالمسامح كريم .

وأرجو بعد كل هذا ألا تخذلنى « أم رتيبه »فتضحك القارئ كما أضحكتنى .. فإذا فشلت فليعذرنى .. لأن إبكاءه قد يكون يسيرا .. أما إضحاكه فهو أمر جد عسير .

(يوسف السباعي)

الفصيل الأولي

المنظر: صالة فى بيت عبد الصبور أفندى بها منضدة للأكل وأريكة وبوفيه .. فى المواجهة شباك يطل على حارة ضيقة ويقابله شباك المنزل المقابل وهو منزل سيد أفندى . وعلى اليمين بابان يؤديان إلى غرف النوم وعلى اليسار باب يؤدى إلى السلم وباب يؤدى إلى المطبخ .

باب يؤدى إلى السلم وباب يؤدى إلى المطبخ . تفتح الستار على أم رتيبة وقد جلست على الأريكة وأطلت بنصفها الأعلى من الشباك وأمسكت بيدها حبل تدلى منه سبت ، وسنية تجلس أمام طبلية وتخرط الملوخية .

المشهد الأول

أم رتيبة : (للبائع في الطريق) يا راجل اختشى على عرضك وحط كان بطاطايه .. هو إيه ياختى ده .. هوا انت بتوزن دهب ، الله يرحم زمان كانت الواحدة تشترى حمل البطاطه بتلاته ابيض .. اوعى بقى شيل إيدك خلينى اطلع السبت .. ما آنت أصلك كده دايما وشك عكر ، وكل ما احلف ما اشترى منك .. أرجع برضه أقول يابت نفعيه دا راجل غلبان (تأخذ في جذب الحبل ورفع السبت) .

سنية : (منهمكة في الخرط . . تلوك لبانة بين شدقيها وتغنى) سايقه عليك النبي تسمح وتحضني يا عبده ، لا والنبي يا عبده .

أم رتيبة : (تفحص البطاطا وتصيح بالبائع) مش بقول لك انك راجل غشاش وضلالى .. خد غير لى البطاطايه المعفنه دى .. طيب بس انكتم وانسد مانيش مغيره حاجه .. خد آدى صاغ حار ونار فى جتتك (تضع النقود فى

ورقة وتقذف بها من التافذة) .

سنية : (مستمرة في غنائها) سايقه عليك النبي تسمح وتقرصني يا ...

أم رتيبة : (ملتفتة إليها مقاطعة غناءها) هس اخرسي يا بت بلاش مسخره وقلة حيا . ايه الكلام اللي بتقوليه ده . مين داللي عايزاه يقرصك ؟

سنية : يوه . داعبده يا ستى .

أم رتيبة : اخرسي جاكي قطع لسانك من جوا اللغاليغ .. هوا سيدك عبده بتاع حاجات م_نردي .

سنية : وهوه يا ستى يعنى ما فيش حداسمه عبده غير سيدى عبد الصبور . . أهو فيه عبده المكوجي ، وعبده اللبان .

أم رتيبة : وكمان لك عين تقولي كنه يا بجحه .. يا قليلة الحيا .

سنية : يا ستى اهو كلام .. احنا خسرانين حاجه ، أنا بقالي سبع سنين سايقة عليهم النبي .. لاحد حضن ولا حد قرص .

(يفتح الشباك الذي في البيت المقابل وتبدو فيه أم سيد) .

المشهد الثاني

(سنية تعاود الحرط ، والغناء ، ومضغ اللبانة) ..

أم سيد : العواف يا ست ام رتيبة .

أم رتيبة: يعافيكي ويعافي بدنك.

أم سيد : ازاى بسلامته سي عبد الصبور افندى .. مش بخير ؟

أم رتيبة : بخير ياختي الحمد لله ، وازاي سي سيد افندي ؟

أم سيد : والنبي بيسأل عليكي دايما .

أم رتيبة : سألت عليه العاقية ، بقاله مده ما حدش بيشوفه ، ولا يسأل على سي عبد الصبور ولا حاجة ، ولا كأننا جيران ، ولا الشباك في الشباك .. يا اختى دا النبي وصاً على سابع جار .

أم سيد : والله يا ستى ام رتيبة .. أصله مشغول اليومين دول ، والدنيا تلاهى ، ويادوبك بيبجى من الشغل يحط راسه ينام ، وصحته مخستكه شوية ما بقاش رى الأول . كان زمان عليه عافيه زى الحصان .. دلوقت ما بقاش يستحمل حاجة أبدا ، وطول النهار شكوى م الشغل ومن الناس .

أم رتيبه: ربنا يكون فى عونه. (يسمع على الباب الخارجي طرق فتنادى على ستية) شوفى مين يا بت (ثم تعاود الحديث مع أم سيد) ما تنفضلي شوية يا ست أم سيد ، أنا خلاص ما وراييش حاجة .. الملوخيه اتخرطت والفرخة على النار .. مش ناقص غير أسقط الملوخيه فى الشوربه . والتقليه حا خليها بعدين .. أصلى متعوده ما آطشهاش الا وسى عبد الصبور داخل ، والنبى _ تيجى ندردش شويه ، أصل انا زهقانه اليومين دول ونفسى متضايقه .

أم سيد: بس بسلامته سي عبد الصبور زمانه جاي دلوقت.

أم رتيبة : لسه بدرى عليه .. دا ما يجيش إلا الساعه اثنين .. لسه واخد على مواعيد الشغل .. اللي فهشي ما يخلهشي .. أهو راح المعاش لكن برضه كل يوم الصبح ياخد الشنطه تحت باطه ويخرج ، ويفضل يسرح ما يرجعش إلا الساعة اتنين زى الموظفين .

أم سيد : طيب ياختي أنا جايالك حالا .

(تختفي أم سيد داخل الشباك) .

(يطرق الباب مرة ثانية .. وسنية مستمرة فى الخرط والغناء ومضغ ____

أم رتيبة : (مُلْمَفْتَة فى غضب) انطرشت والا إيه .. قلت قومى شوفى مين .. جاكى خابط فى ودانك ، كفايه عليك الغنا وسى عبده .

سنية : (تنهض متثاقلة) خليه مرزى على الباب ، يعنى مستعجل على إيه .. جايب القليعه ، والا جايب الديب من ديله .. مش جايب بنكله كسبره ، (تفتح الباب) خش . خلاص .. الدنيا طارت ؟ مش قادر تصبر ؟ (يدخل زينهم الحادم مندفعا ويضع قرطاسا صغيرا ويصبح في عجلة وهو

يهم بالحروج) .

المشهد الثالث

زينهم : خدوا الكسيره اهه .. الراجل قال ما فيش حاجة اسمها بنكلة اليومين دول ، جبت بالتعريفه كله ، بنكله آل ، فيه حاجة اسمها نكله .. أنا نازل بقي .

أم رتيبة : (تغادر الشباك وتصيح بزينهم) تعالى هنا ياللي تنقصف رقبتك . . رايح فين ؟

زينهم : مش وقت شرح . أصلي مستعجل قوى ، فيه خناقه على باب الحارة .

. أم رتيبة : وانت مالك بقى ومال الختاقة .

سنية : سبيه يا ستى يمكن ياخد له بطحه في نافوخه ، تريحنا منه شوية ...

زينهم : أنا رايح اتفرج .. دى خنافه هايلة ، زكيه الملدنه بتاعة القول النابت مرقده الحاج وحش الجزار على الرصيف ، وبتخبطه كل دماغ واختها .. بتخلى الشرار يطلع من الرصيف ، والناس ملمومين عليها مش عارفين يخلصوا الراجل من إيديها أبدا .

أم رتيبة : خش انجر يا واد بلاش مسخره ، ما لنا احنا ومال زكيه الملدنه والمعلم وحش ، امشى ياللا دق الكسيره .

زينهم : الحق على ، أنا برضه استاهل اللى ما وقفتش أتفرج عليها قبل ما جيب الكسبره .. عملت نفسى بنى آدم وقلت يا وادروح الأول ودى الكسبره لحسن ستك تكون مستعجله عليها وبعدين ارجع اتفرج ، برضه أنا الحق على . ابقى مره إذا جبتلكم حاجة بعد كده دوغرى .

سنية : خش انجر دق الكسيره بلا قلبة دماغ .

زينهم : أسكتى انتى لحسن والنبى أحطك ع الطبليه ، واخرطك زى الملوخيه اللى قدامك (ملتفتا إلى أم رتيبة فى توسل) أروح يا ست قبل الخناقة ما تخلص ؟

أم رتيبة : قلت لك خش ، يعني خش .

زينهم : طب خلينى اتفرج عليها م الشباك (يندفع إلى الأريكة مدليا بجسده من الشباك صائحا بسرعة) .. أهم باينين .. أدينى شايفهم كويس .. زكيه فوق .. الوحش بيفلفص ، يفلفص . كويس وحش . مسكها من شعرها .. مسكته من شنبه .. الوحش بيشد .. زكيه يتشد .. ها .. شد .. شد .. شد .. يا خساره طلع في إيدها .

أم رتيبة وسنية : هو إيه ؟

زينهم : شنب الوحش ، طلع في إيد زكيه ، الوحش لوحده ، والشنب لوحده ..
الوحش من غير شنب ، زكيه بشنب ، زكيه طبقت في زمارة رقبته ،
الوحش بيصرخ .. زكيه فأعته دماغ ، ودماغ تانيه ، وتالته .. الروسيات
بترف زى المدفع الرشاش .. الوحش انفتح حاجبه .. الوحش سخسخ ..
ول زكيه ، تعيش زكيه ، فتوة الناصريه .

أم رتيبة : (تهجم وتجره من قفاه) انزل من على الكنبه جاك نازله في قصابك .. أنا مش قلت لك ميت مره ما تطلعش على الكنبه برجليك اللي زى الطين !.

زينهم : برافو زكيه .. أنا كنت عارف انها حاتغلب ، يعنى نابك إيه يا وحش غير ضياع شنبك ، عشان تبطل الغلبه (ملتفتا إلى سنية) آدى النسوان والا بلاش ، مش زيك يا قرعه .

سنية : خليه يتلم يا ست ، لحسن والنبي اعمل فيه اللي اتعمل في الوحش .

زينهم : (مصفقا بيديه مغنيا) دانا باحبك ، بس شايله السمنه في الزلعكه .

سنية: أسكت احسن لك!..

أم رتيبة : (وهي تجلس على الكنبه وتأخذ في تفصيص رأس ثوم) امشى دق الكسيره .

زينهم : (يأخذ الكسبره ويتجه إلى المطبخ منشدا) والله بحبك بس شايله السمنه في الزلعكه (يختفى داخل المطبخ ويسمع صوته قائلا) بكره الماتش الأصلى المعتبر .. زكيه ضد على الدكر .. والله حقها تلعب كوره .. يا خسارتك يا زكيه في الفول النابت ، دانت عليك سمانات رجلين .. ولا أبو حياجه ..

المشهد الرابع

أم رتببة : يا الله يا بت يا سنيه ، شهلي شويه ، كفايه خرط بقى ، انت حاتخليها إيه ؟ عصيده ؟. احنا عايزين نوضب الصاله عشان ستك الحاجة ام سيد جايه ، وإلا عاجبك كده الكركبه اللي احنا فيها ؟

سنية : خلاص اهو يا ست ، خرطتين بس ، يا سلام عليكي يا ست ، دانت عليكي ضهر مكسم وزى الزبده .. يا خسارتك يا ستى في قلة الجواز ، هم الرجاله انصابوا في عنهم والا عميوا ؟

أم رتيبة : (تتحسس نفسها في حزن) قلة بخت يا سنيه يا بنتى . وقليلة البخت تلاقى العضم في الكرشه . . واحنا حتى العضم مش لاقيينه . . رضينا بالهم والهم مش راضي بينا . .

سنية : يا ستى ربنا يسهلها ويرزقك بابن الحلال .

أم رتيبة : يا بنتي إذا كان على .. أهو مسهلها ، وإذا كان على ولاد الحلال أهم كتير .. لكن الدور على سيدك عبد الصبور اللي معقدها في وشي .. وقاعد لي زي قرد قطع .. كل ما يبجى عريس يطفشه ، لما تعسّ حالى وميل بختى وخلا وقبتى بين النسوان زى السمسمه .. هو أنا يا بنتى قادره اورى وشي لحد .. خمسه وار بعين سنه وأنا قاعده استنى ابن الحلال . وكل ما يبجى ابن الحلال يصده بوشه العكر وكلامه اللي زى السم .. واهى السنه بتفوت ورا السنه . والعمر بيضيع ولا من درى ولا من شاف ، وادينى حاعيش واموت وحدانيه .. من غير لا ولد ولا بنت، وبس بالاسم ام رتيبه ، الله يجمعمها خالتي ام حميده بنت الشيخ معوض فضلت تقاطع على وتنق بلسانها اللي زى العقرب ، وتقول لى يا ام رتيبه ، وانا لسه بنت ما طلعتش من البيضه ، آل إيه عشان حلمت أن انا اتجوزت وخلفت بنت اسمها رتيبه ،

ومن يومها ما شفتش الجواز الافي حلم القرشانه النقاقه ام حميده.

سنية : يوه ، يا ستى ما تزعليش نفسك ، دانت لسه صبيه فى عز شبابك ، والجايات اكترم الرايحات .

أم رتيبة : ما هو بكره الجيات يبقوا ريحات ، وإلا يعنى تفتكرى الجيات حتبقى الجعص م الرايحات ، هو عبد الصبور أفندى تستعصى عليه حاجه أبدا ، بكره يضيع الجيات زى ما ضيع الرايحات ، ياما ضيع على فرص . هم اللى خطبوني شويه يا بنتي يا سنية ؟ دانا كان ليه شنه ورنه .

سنیة : والنبی یا ستی باین علیکی کنت بنت حنت ، تلعبی بالبیضه والحجر .. کام واحد والنبی یا ستی خطبوکی ؟

أم رتيبة: ما تفكرنيش بقى يا بنتى باللى مضى وتجرى ريقى . هوا انا انسى سى على العطار اللى كان دكانه قدام بيتنا لما كنا ساكنين فى حوش آدم ، وكان طول النهار عينه ما تتوربش من الشباك وانا واقفه ورا الشيش وواخده بالى . كان راجل ولا كل الرجاله . باين عليه العز والنعمه خدوده مورده ، والدم حاينط من وشه ، وطابع الحسن فى دقنه ، يساع فنجان ، وإيده متختخه وبيضه زى الفل ، وعاوج اللاسه والجلبيه سكروته عليه تشف و ترف ، والبغه الفاسى فى رجله بتضوى .. قصده ما طولشى عليكى يا سنيه يا بنتى .. كان حايتجنن على كل ما يشوف إيدى تتمدم الشباك والا يلمحنى بانشر الغسيل فوق السطوح .. لغاية ما فى يوم العصريه سمعت نقر على الباب .. بافتح اشوف مين لقيته سى على .. أنا شفته قدامى حسيت روحى ساخت ، سألته عايز مين قال عايز يقابل سى عبد الصبور .

سنية : وهوا يعني ماكنش فيه غير سي عبد الصبور اللي يقابله ؟

أم رتيبة : يعنى حايقابل مين تانى . هو انا ليه حد غيره . ما احنا اتربينا يتامى لا لى غيره ولا له غيرى . . أهو طول عمرى ما شفت لى أب ولا أم ، وكل اللى لى فى الدنيا هو عبد الصبور . قضيت عمرى فى خدمته . وهوا لا رضى يتجوز ولا يخليني اتجوز .

سنية : وبعدين يا ستى عمل إيه سي على ؟

أم رتيبة : دخل أودة المسافرين ودخلت اصحى سي عبد الصبور عشان يقوم يقابله .

سنية : وبعدين.

أم رتيبة : دخل يقابله ، ودخلت أعمل القهوة ، وأنا قلبي بيدق ، ويدق ، أصلى كنت حاسه ، وعارفه .

سنية : يوه يا ستى و هي الحاجات تخفى .

أم رتيبة: أيوه والنبى ما تخفاش أبدا .. عقبال ما دخلت اعمل القهوة وقلت للبنت تحيه ــ الخدامه اللي كانت عندنا قبلك ــ تدخلها .. بصيت لقيت سي علي خارج يبرطم ووشه أحمر زئ الجزره ، ووراه سي عبد الصبور بوشه الأصفراوى الناشف اللي زى جريد النخل .. ييقول له : مع السلامة يا سي على .. ما كانش يتعز .. الراجل خرج من بير السلم وانا مسكت سي عبد الصبور ، قلت له هوا إيه دا اللي ما كانش يتعز ؟. فقال لي طلبه .. قلت له هوا عايز إيه ؟ قال لي : جاى يخطبك .. قلت له : وبعدين . قال لي : ولا بعدين ولا قبلين. قلت ما كانش يتعز يعنى بالعربي رفضت. سألته ليه: قال لي دى حاجات ما تفهمهاش انت . سيبي لي انت الحاجات دى أنا أدرى بيها .. الستات دايما قلالات العقل ، لازم يسيبوا الحاجات اللي عايزه تفكير وتدبير للرجاله ، أمال الرجال اتخلقوا ليه .. المقصود فضلت الح عليه واحاوره واداوره واداوره لغاية ما عرفت السبب .

سنية : إيه هو بقى يا ستى السبب ؟

أم رتيبة : قال لى إن الراجل تخين قوى وأنا تخينه قوى ، وان اولادنا ، مش حايبقوا بنى آدمين ، حاييقوا فيله وإلا بالقليل أوى .. حلاليف .

سنية : له حق والنبي يا ستى .

أم رتيبة : اخرسي جاكي قطع لسانك ، دا انا كنت جبت اولاد زى القشطه ..
المقصود قعد يجيب لى فى سبب ورا سبب ، مره يقول ان ما فيش سرير
يستحملنا ، ومره يقول لى أن فيه خطوره على من جواز العطارين عشان
حافضل آكل حلبه ومفتقه وحاجات م اللى بتسمن ، لغاية ما يبجى على

وقت اطق اموت ، ويكون هو السبب عشان وافق على الجواز ، وبالطريق ده سددها في وش الراجل .

سنية : والنبي برضه يا ستى له حق .. مين يعرف لو كنت اتجوزت سي على العطار كان جر الك إيه ؟

أم رتيبة : طب وابراهيم افندي العقر .. العرضحالجي اللي قد الدنيا ؟

سنية : ماله ياستى . برضه طفشه ؟

أم رتيبة : وطفش أبوه .

سنية : ليه بقى ؟

أم رتيبة: عشان اسمه العقر. العقر. ما يقدرش بسلامته يناسب واحد اسمه العقر، أصله هو اللي بسلامته اسمه عدل قوى ، عبد الصبور عبد الغفور عبد الشكور المقزقز ، ياختى لو كان الواحد يشوف عيبه ما كانش عايب على الناس أبدا ، إلا المصيبه إن البنى آدم من دول تلاقيه بجح .. يعنى ما يعيبش على الناس إلا بالحاجه اللي فيه ، يعنى يلاقى التخين يقول لك يا سلام على قلان ده ماله تخين كده يا ساتر يارب ، وتلاقى تقيل الدم ، يقول لك أما فلان ده عليه دم يا باى ، وسى عبد الصبور المقزقز ما يقدرش يناسب واحد اسمه العقر.

سنية : وعلى كده طار العقر ؟

أم رتيبة: العقر، والسمالوطى بتاع المصبغه والشيخ عبد ربه خادم الحسين، والحاج صميده اللبان، والشيخ ابراهيم عبد اللاوى الملتزم، وزكى افندى شندى بتاع المانيفاتوره.

سنية : كل دول خطبوكي وطاروا ؟

أم رتيبة : طاروا يا سنيه يا بنتى ، طاروا كلهم ، والعمر بيطير يوم ورا يوم ، يعنى إيه فايده عيشة الست لما تخش الدنيا وتخرج منها من غير ما تتجوز ، تبقى قيمة العيشه إيه لما الواحدة ما تعملش الحاجه اللى اتخلقت عشانها . ربنا مش خالق الدنيا رجاله وستات عشان الرجاله يتجوزوا الستات . الست عملها ربنا في أم رتيبة)

عشان تتجوز وتجيب أولاد ، وانا ضيعت عمرى مع سي عبد الصبور لا جواز ولا اولاد .

سنية : الصبرطيب يا ستى !

أم رتيبة : أيوه . الصبر طيب ، وهو البنى آدم العاجز ، قدامه إيه غير الصبر ؟ أهو يعزى نفسه بأن الصبر طيب ، وهو مجبور على الصبر ، رضى والا مارضيش ، صابر ، صابر . لكن عشان يستحمل الصبر يقوم يقول ان الصبر طيب ، هوه فيه يا بنتى أمر من الصبر .

سنية : ربنا كريم يا ستى بكره يفرجها ..

أم رتيبة : أيوه يا بنتى كريم ، أنا برضه لما اقعد اراجع نفسى ، واقول الحمد لله على الستر ، الحمد لله ، على اللى اداه لنا ربنا ، دا مدينا حاجات كتير ما حناش حاسين بيها ، أصل الواحد ما بيحسش اللا بالحاجة إللى مش معاه ، لكن الحاجه اللى معاه ما يعرفهاش أبدا ، ما بيعرفهاش ولا يحس بها الا لما تضيع منه ، يقوم يعرف انه كان معاه حاجه ، احنا دايما نسخط عشان ربنا ما داناش ، لكن ما بنحمدوش على انه ادانا ، مع إنه يا بنتى دايما بيدينا .. أنا بعض ساعات اقعد افكر اقول مش برضه ربنا عوضنى يعنى هو اانا لو كنت بعض ساعات اقعد افكر اقول مش برضه ربنا عوضنى يعنى هو اانا لو كنت أهو حقيقى ، بنغزه ومهفوف ، ومانيش عارفه آخذ منه لا حتى ولا باطل .. لكن برضه مريحنى وموكلنى ، وكامينى .. ولو قلت آه ، يقول ورايا ميت آه :

سنية : أيوه والنبى يا ستى ، سيدى عبد الصبور ما فيه زيه أبدا ، ولو انه اليومين دول طالع لى فى حاجه جديده ما هياش عاجبانى أبدا ، ربنا يستر عليه منها . أم رتيبة : مش حكاية دراسة الأرواح ، وتحضير الأرواح .. ربنا يكفينا شرها ، إلهى يورينى فيك يا شيخ هباب ، انت اللي جريت رجله فيها ، هوه لا كان يعرف أرواح ، ولا عفاريت ، طول عمره غرقان فى الخط العربي ، والاقلام البسط ، واليفط ، وكراريس المشق ، من يوم ما عرف سى هباب

· الطين ، وهوا ما وراهوش غير الأرواح .

سنية : ربنا يستر عليه يا ستى ، أنا والنبى بخاف عليه لما يخش الأوده ويقفلها عليه ، ويقعد يقرا زى القطط .

أم رتيبة: تكونش الأرواح دى هي اللي خسرت أخلاقه، وخلته على دى الحال؟ سنية: والنبي يا ستى انا مش راضيه افسر، دا بقى ما ينطقش، وحكاية الصراحه اللي طالع لى فيها اليومين دول كرهت فيه طوب الأرض.

أم رتيبة : أهو كان زمان برضه طالع في حكاية انه يقول للأعور أعور في عينه .. لكن أهو برضك كان عنده شوية خشا ، لكن اليومين دول خلاص ، ما تعرف إيد اللي جراله .. العجز .. والا الهبابه الأرواح اللي طالع فيها .

سنية : تصدق يا ستى امبارح كان طالع على السلم قام قابل إدريس افندى اللى ساكن فوقنا ، الراجل بيسلم عليه بأدب ، بصيت لقيت ده من غير مناسبه . بيقول له يا إدريس افندى انت ما سمعتش على أزمة الزيت اللى ف البلد .. الراجل قال له أى والله .. الله يكون في عون الناس ، فرد عليه سى عبد الصبور بشخط ، وقال له يكون في عونهم ازاى وأمثالكم عمالين يموشوا الزيت .. الراجل استعجب قوى وقال أنا ياسى عبد الصبور .. أنا والله ما عندى نقطة زيت في بيتى . قام قال له ما عند كشى في بيتك نقطة زيت .. لكن عندك في طربوشك كيلو زيت ، لو كان كل واحد زيك يعصر الخمسه سنتى الزيت اللى في طربوشه كانت انفكت أزمة الزيت .

أم رتيبة : يا عيب الشوم ، قال الكلام ده كله للراجل ، ياما انا خايفه يعمل كده مع سيد افندي وامه ، أهى دى تبقى المصيبه السودا .

سنية : وهو ماله ومالهم ؟.

أم رتيبة : أصلى ما خبيش عليكى يا سنيه ، أنا شايفه اليومين دول من ست ام سيدريق حلو ، و دايما تقول ان سيد افندى بيسأل على ، و قلبى حاسس . إن فيه حاجه في ضميرها ، و عينى اليمين بترف و إيدى الشمال بتاكلني و عمرى ما بتحصل لى الحاجات دى الالما يكون فيه خير جاى .

سنية : خير يا ستى خير .. خير ان شاء الله .

أم رتيبة : أنا حاسه ان سيد افندى ناوى يخطبنى قريب ، وحاطه إيدى على قلبى ، لاسى عبد الصبور يلخبط الدنيا ويطيره زى ما طير اللى قبله ، وهو اليومين دول زى مانتى شايفه حاله مبرجل .

سنية : ربنا يستر . (يسمع دق على الباب) تعالى شوف الباب يا زينهم .

زينهم : (من المطبخ) قومي افتحى . أنا مش فاضى .

سنية : انت مش خلصت خلاص دق الكسيره ، بتعمل إيه عندك ؟

زينهم : وانت مالك انت ، بقرا ، حد شريكي .

سنية : انت بتعرف تقرا ؟

زينهم : أهو بتعلم ، بفك الخط .. مالك انت ومالى ، زين وفتحه زا ، ره وفتحه را ، عين وفتحه عا ، زرع ، كويسه دى والالأ ، يا خسارتك يا زينهم في قلة التعلم كان زمانك واخد الليسانس .

(الباب يدق مرة أخرى)

أم رتيبة : (في غيظ) قومي ــ يا بت اتحركي وافتحى الباب ، انفتحت في راسك طاقه ، كفايه علينا نقعد نسمع خناقكم طول النهار ، حقه بطلوا ده واسمعوا ده .

(تفتح سنيه الباب .. وتدخل أم سيد)

المشهد الخامس

أم رتيبة : يا مرحبه يا مرحبه .. أهلا وسهلا ، الدنيا نورت يا ست ام سيد .

أم سيد : الله ينور عليكي ويشرف مقدارك .

أم رتيبة : خطوه عزيزه .

أم سيد : ربنا يعزك ياختي .

أم رتيبة : أهلا وسهلا .. أهلا وسهلا .. اتفضلي يا ستى الحاجه .. تعالى هنا على الكنبه جنب الشباك .. داحنا زارنا النبي .. قومي يا بت يا سنيه فزى ..

لمى الملوخيه واركنى الطبليه وشيلى الفراخ من الشوربه واسقطى فيها الملوخيه .. قومي كده اتحركي . عدم المؤاخذه يا ستى الحاجه .

أم سيد : خدى راحتك ياختى .

أم رتيبة : واد يا زينهم ، تعال انجر لم عروق الملوخيه دى ارميها في صفيحة الزباله .. بلا زرع ، وبلا ضرب ، زرعوك زرع بصل ، وضربوك على نافوخك بالصرم .. آل بعد ما شاب ودوه الكتّاب .. ما تأخذنيش يا ستى الحاجه على النكشه اللي احنا فيها .. أنا أصلى ما عنديش خدامين . أنا عندى نوايب .. عندى كواين .

أم سيد : ياختى وهم الخدامين بقوا حدامين .. دول بقوا اسياد . (يدخل زينهم وفي يده كتاب القراءة الرشيدة) .

زينهم : (إلى سنيه مشيرا بأصبعه إلى الكتاب) ــ شايفه يا بت يا سنيه راسمين امك وابوكي في كتاب القراءة .

سنية : صحيح يا زينهم ؟ وريني كلـه ؟

زينهم : أهم ، أم قويق ، وابو جلامبو .

سنية : بتنكت يا روح امك ، جاتك نيله ، جاتك نيله حزم ، لم يا خويا العروق لم ، أم قويق وابو جلامبو ، والله ما فيه ابو جلامبو غيرك ، يا مصدّى ، يا معفّن ، يا مقشّف يا مجنزر .

أم رتيبة : اتلمى يابت انت وهوا ، انتوالسانكم ما يدخلش بقكوا أبدا ، ما تتعبوش م الخناق ، ما يتهدش حيلكم ! فوت لِمّ العروق ووضّب الصالة ، وانتى اعملى قهوه لستك ام سيد .. تشربها إيه يا حاجّه ؟

أم سيد : خليها على الريحه ، والا احسن خليهم يجيبولي الكنكه والسبرتو والبن وانا اعملها هنا ، أنا أصلى دايما أحب اعمل قهوتي بإيدى .

أم رتيبة : تسلم إيديكي يا ستى الحاجه ، أمرك (إلى سنية) هاتى عدة القهوة يا بت هنا قدام ستك ، اشهلى شويه . آنستينا يا ست الحاجه .. ازاى بسلامته سد افندى ؟

(يخرج زينهم وسنية)

أم سيد : والنبي حاله مش عاجبني اليومين دول أبدا ، شايفاه مش رايق كده ، وصحته مخستكه ، وبان عليه الهم والتعب .

أم رتيبة : ياختي بعد الشرعنه ، يمكن يكون استهوى .

أم سيد : أبدا والنبي ياختي .. داحتي دايما محرّص على نفسه .

أم رتيبة : أهو من باب الاحتياط برضك ، حقك تعملى له كاسات هوا والا اعملى له بالقدره ، أنا حابعتلك القدره اللي عندى وفتيلة الزيت تحطيها على ضهره مرتين تلاته تمص كل البرد اللي عنده وتشد وسطه وتصلب جته .

أم سيد : والله يا ست أم رتيبة أنا متهياً لى الحكاية مش حكاية برد .. دا باين عليه مهموم ، ومتضايق ، وزى اللي فيه حاجه شاغله باله .

أم رتيبة : ومتضايق ليه ومهموم ليه ؟ ربنا ما يجيب لا هم ولا ضيق .

أم سيد : أنا افتكرته في الأول مهموم من حاجه في شغله ، وقلت يمكن حد ضايقه والا داس له على طرف .

أم رتيبة : ما عاش اللي يضايق سيد افتدى والا يدوس له على طرف . الراجل أمير ، وزى السكره ، يضايقوه ليه يا ختى ؟

أم سيد : قلت يمكن حد مسه بكلمه كده والاكده ، أهو الأمر ما يسلمش ، والا يكون هوا عمل غلطه ، أصل اليومين دول الشغل بقى متعب قوى و هوا ما بير حمش نفسه .

أم رتيبة : الله يكون في عونه ، وياخد بيده .

أم سيد : أصل المعمل كبر فوى ، والإنتاج بيكتر ، والأصناف بتزيد ، وكل الشغل متوقف عليه وحده ، مفيش في البلد خبير غيره .

أم رتيبة : باين عليه ياختي باين ، هوا فيه حد زي سي سيد افندي !

أم سيد : من يومه والنبي يا ست أم رتيبه .. خمسه وأربعين سنه وهو الخبير الوحيد في المعمل ده .. ما ونّش ولا كلّش ، لما انحرق وانكوى .. حاجه تلهلب يا ختى مين يقدر يستحمل غيره ؟

أم رتبية : ربنا يحميه باختى .

أم سيد : يحميه أكتر من كده ، دا لو لا إنه راسي ع الشغلانه دى .. كان زمانه بقى حريقه ، كان زمانه لهلب وفرقع وانفجر .

أم رتيبة : يالطيف .. يالطيف يارب ، ياختى بلاش الشغلانه الوالعه دى ، ما بلاش معمل المفرقعات ده .

أم سيد : معمل إيه ؟

أم رتيبة : المفرقعات !! مش بيشتغل خبير في معمل مفرقعات !؟

أم سيد : مفرقعات إيه ياختي .. سلامة عقلك .

أم رتيبة : أمال معمل إيه يا ستى الحاجه اللي بيلهلبه ده ؟

أم سيد : معمل طرشي يا حبيبتي .

أم رتيبة : معمل طرشي ؟

أم سيد : أيوه معمل طرشي ، خبير في معمل طرشي . ما له ؟ وحش ؟

أُم رتيبة : لا ياختي مش وحش أبدا ، اسم الله عليه ربنا يحميه .

أم سيد : يوه ما بلاش ياختي حكاية يحميه دي . هوا ناقص حمو .

أم رتيبة : أبدا ياختى أبدا .. ربنا يرد جوفه .. ويسقع مصارينه .. وبسلامته سي سيد افندي الخبير بيعمل إيه في معمل الطرشي ؟

أم سيد : ياختي قلت لك خبير ، هو انتي ما بتفهميش ؟

أم رتيبة : أيوه ياختي فاهمه وعارفه .. خبير.. والخبير دا بسلامته بيعمل إيه ؟

أم سيد : يدوق .. هوا الآمر الناهي في المعمل كله .. ما فيش عينة طرشي تخرج م المعمل إلا لما تفوت عليه .. لا لفت ولا خيار ، ولا جزر ، ولا كرنب ، ولا أرنبيط ، ولا فلفل ، ولا بنجر ، ولا لمون ، ولا حاجه تخلق في عالم الطرشي والمخللات ، إلا لما يحكم عليها هوه ويوافق على خروجها .

أم رتيبة : ويحكم عليها ازاي ياختي ؟

أم سيد : يعني يشوفها ناقصه شطه . ناقصه خل . دلعه .. حادقه . حاميه .

أُمْ رتيبة : ما شَاء الله . ما شاء الله . عينى عليه بارده (يدخل زينهم حاملا معدات القهوه ويضعها على منضدة صغيرة أمام أم سيد) .

زينهم : (لأم سيد) أجيبلك ميه سقعه وإلا مية دقه ؟

أم رتيبة : اقصر لسانك جاك قطعه .. مية دقه لما تلهلب جوفك .. عدم المؤاخذه يا ست ام سيد .. أصله دايما مسحوب من لسانه ، فوت امشى انجر على المطبخ .. قول للبت سنية تاخد بالها من حلة الرز لحسن تشيطها زى ما شيطتها امبارح . (ملتفتة إلى أم سيد) أيوه يا ست الحاجه بقى بسلامته ما فيش عينة طرشي تخرج من المعمل إلا لما تفوت عليه ؟

أم سيد : أبدا ، قبل البرميل من دول ما يخرج للبيع لازم ياخدوا التصديق منه بالخروج ، هوا لوحده الآمر الناهى ، مافيش قرن فلفل يعدى من غير إذنه .

أم رتيبة : يا سلام ، يا ست ام سيد ، كل ده بيعمله سيد افندى ، ربنا يزيده من سلطانه ، وبقاله كتير في الشغلانة دى ؟

أم سيد : من يومه ياختى .. من يوم ما وعي على الدنيا وهو خبير مصر الأول في صناعة الطرشي .. عليه لسان في دوق الطرشي مينزلش الأرض .

أم رتيبة : ما شاءالله ما شاءالله . والموهبه دى جات له منين ياختى ، خلقه كده من عند ربنا ، والا و راثه ؟

أم سيد : أبدا والنبى ياختى ولا وراثه ولا حاجه ، دا حتى أبوه الله يرحمه ما كانش له فى الطرشى أبدا ، وما كانش يحب غير الحاجات المعسله ، زى العصيده ، والمفتقه . والعسل والطحينه .

أم رتيبة : أمال المحروس سيد افندى ، خد الموهبه دى ازاى ؟

أم سيد : بالتمرين .. بمضى المده .

أم رتيبة : ازاى ياختى ؟

أم سيد : المسأله ابتدت معاه وهوا لسه في اللقه ، أصلى لما كنت برضعه .. لبنى نشف ، فبقيت اديله لبن اصطناعي ، فليله من ذات الليالي صحى يصرخ بالليل وكنت متعوده دايما أول ما يصحى أروح ماده قرزازة اللبن في بقه يروح راضع شويه وتنه نايم ، ففي الليله دى مديت إيدى على الترابيز ه و انا

مغمضه وعينى فيها النوم مسكت البزازه لقيتها فاضيه ، فأعدت أحسس لقيت الكبايه اللي فيها اللبن جنب البزازه رحت دلقاها في البزازه وحطاها له في بقه ، راح مقربعها لآخرها وراح نايم .

أم رتيبة: بالهنا والشفا، صحه وعافيه على سيد افندي اللبن كويس ومغذى.

أم سيد: ما كانش لبن يا ستى ام رتيبه .

أم رتيبة : أمال كان إيه ياختى ؟

أم سيد: مية لفت.

أم رتيبة : يوه يا ندامه ، ومنين جتك مية اللفت ؟

أم سيد : أصلى كنت محضره كباية مية لفت أشربها على الريق ، وكنت حاطه الكبايتين جنب بعض على الترابيزه ، فلما مديت إيدى بالليل جت في مية اللفت .

أم رتيبة : ياختي بره وبعيد ، وجرا إيه لسيد أفندي بعد كده .. مات ؟.

أم سيد : تفي من بقك سبع تفات .. بعد الشرعنه .

أم رتيبة : ألف بعد الشر ياخالتي الحاجه ، جرا له إيه طمنيني ؟

أم سيد : صبح لا بيه و لا عليه ' ، زى القرد المسنسل ومن يومه ياختى و هو راسه وألف سيف . . ما يدوق اللبن أبدا و لا يحطه على لسانه ، كل رضاعته مية لفت ، مية جزر ، مية بنجر .

أم رتيبة: بسم الله ما شاء الله .

أم سيد : قولى معدته اتحرشت ولسانه اتودك ، وأول ما ابتدا يمشى ويلعب مع ولاد الحاره ، كنت دايما تلاقيه يحب الطرشجيه ، فتبصى تلاقى اولاد الحاره يأخدوا مصروفهم يشتروا بيه قصب والا مصاصه والا براغيت الست ، وهوا من دون الاولاد ياخد مصروفه إن كان مليم والا نكله ، وتنه رايح على الطرشجى اللي على باب الحاره .. يفضل يقربع في ميه لفت ومية دقه لما يقول بس .

أم رتيبة : يا سلام عليك يا سيد أفندى ، من يومك وانت ابن كار .

أم رتيبة : أهو تنه كده ، يقربع في مية اللفت والدقه ، تقوليش غاوى .. لغاية ما بدأ الاحتراف .

أم رتيبة : وازاى يا ختى ابتدا الاحتراف ؟

أم سيد : في يوم من ذات الايام راح عند بتاع الطرشي ، وقال له اديني بمليم مية لفت و بمليم مية دقه ، الراجل مد له إيده بكوز مية اللفت قربعه ، ومد له إيده بكوز مية اللفت قربعه ، ومد له إيده بكوز مية الدقة شرب شفطتين ورجعه ، الراجل قال إيه مالها ، قال له وحشه مش مظبوطه .. قال له ليه .. قال له ناقصه شطه والخل بتاعها مغشوش .. أنا عايز تجيب لى من البرميل التالت اللي على إيدك الشمال ، أيوه البرميل ده .. الرجل فرغ الكوز وملاه من البرميل اللي قال عليه ، راح مقربعه وقال له أيوه ، أهي دى تمام .. الراجل استعجب ، خد شفطه من البرميل ده ، وشفطه من ده ، استعجب أكثر ، لقي كلام الولد مضبوط وهوا لسه مطلعش من البيضه عمره لسه سبع سنين ، راح مرجع له النكله و رقع الصبي بتاعه علقه ، وقال لسيد اسمع ياواد ، انت تيجي كل يوم هنا تاخد لك كوزين مجانا ، وبعد جمعه كان سيد بيشتغل في دكان الطرشي ، قاعد على كرسي ما يعملش حاجه أبدا غير الدوقان ، ويفضل على كده كثير قاعده و اربعين سنه .

أم رتيبة: ما شاء الله ... ما شاء الله .

أم سيد : الدنيا اتغيرت ، والمحل كبر واتسع ، وحاله راج وبقى معمل كبير أد الدنيا ، وسى سيد هوه ، هوه ، مالوش شغله غير انه يقعد على الكرسى ويدوق ، خمسه واربعين سنه ، وهو حافظ مركزه ، خبير مصر الأول فى صناعة الطرشي .

أم رتيبة : أدها وأدود ، وهو حديقدر على كده غيره !

أم سيد : عشان كده بقول أن ضيقته وعكننته اليومين دول مش ممكن تكون م الشغل.

أم رتيبة : أمال يعنى فكرك تكون من إيه ؟

أم سيد : والله يا ختى أنا بقول ان فيه حاجه شاغله باله .

أم رتيبة : زى إيه ؟

أم سيد : بقى ياست آم رتيبة انت مش غريبه وانا مش حاخبى عليكى ، بقى انا طول عمرى اقول له أنا نفسى اجوزك وافرح بك ، وهو كل ما اجيب له السيره دى ألاقيه كشر ولوى بوزه ، وقال لى انا مش عاوز اتجوز .. أنا مبسوط من عيشتى كده ، لكن اليومين دول ، شايفاه كده لما نجيب له سيرة الجواز ، ما يكشرش ولا يلويش بوزه ، وحتى فى بعض ساعات هوا يقعد يقوللى .. والله يا ام يا ريتنى سمعت كلامك واتجوزت من زمان .. أهو الواحد ضيع عمره فشوش .. و دلوقت لوحب يتجوز ما يلاقيش اللى ترضى به .

أم رتيبة : ليه ياختي ألف من ترضى به . . هوا فيه احسن من سيد افندى ؟

أم سيد : برضه انا قلت له كدا .. لكن لقيت زى ما يكون فيه حاجه فى فكره عايز يقولها لكن مش قادر .. زى ما يكون كدا مكسوف .. مستعيب .. خايف .

أم رتيبة : وياختى مش قادر ليه .. هى الحاجات دى عيب .. والاحد يختشى منها ؟. أم سيد : المقصود .. فضلت آخد منه وادى ، واحاوره وداوره ، لغاية ما ابتدا يفضفض باللي في قلبه .

أم رتيبة : وطلع إيه ؟!!

أم سيد : كلمه من هنا ، وكلمه من هنا ، قال لي .

أم رتيبة: قال لك أيه ؟.

أم سيد : يوه ياختى يا ست ام رتيبه . صبرك على ، خليني آخد نفسى ، هي الدنيا طارت !.

أم رتيبة : على مهلك أوى ياختى ، خدى نفسك بالراحه خالص .. هيه .. قال ايه ؟.

أم سيد : كلمه من هنا ، وكلمه من هنا .. يا سيد قول ما تخبيش على انا مش غريبه ، قال لى يا ام نفسى اخش دنيا ومش لاق حد يوافقنى ، قلت له يا بنى الدنيا الواسعه دى كلها ما فيهاش حد يوافقك .. بصيت لقيته وطا رأسه فى

الأرض وقال لى بوشوشه ، فيه واحده بس يا أم ، واحده ما فيش غيرها .. هى النص التانى بتاعى ، النص اللى قعدت طول عمرى أدور عليه .. انتى مش عارفه ان البنى آدم منا زى ما يكون لفته وانشقت نصين وانه طول عمره يفضل تعبان لغاية ما يلاقى نص اللفته التانيه ، ياختى هوه قال لى كده وآنا اتلخبطت .. لفتة إيه وخيارة إيه .. قلت له إيه الكلام الفارغ اللى بتقوله ده يا سيد يا بنى .. إنت يا بنى عاوز تتجوز والا بتدور على نص لفته ، هو البنى آدم ده ما يقنعش . ما فيش حاجه تملاعينه أبدا ، كل اللفت اللى انت غارقان فيه طول عمرك وبعدين تقول لى ان ناقصك نص لفته !.

أم رتيبة : يا ست ام سيد مش قصده نص لفته . نص لفته . . دا قصده نصه التانى . . أصل كل واحد كده لازم له نص يكمله يعنى انا ناقصنى مثلا ، نص كرنبه . نص بطيخه .

سنية : (مقبلة من المطبخ تحمل ملعقة وطبق) وانا يا ستى ناقصني إيه ؟.

أم رتيبة : نصحيه ، وإلا نص عقربه .

زينهم : (من داخل المطبخ) وانا يا ست ؟.

أم رتيبة : نص نعل ، يا مرقع يا بولوزه ، يا فردة شمال ، شوف شغلك بقى وبلاش لماضه ، حاكم دايما تتداخل في اللي مالكش فيه .

سنية : (تحديدها بالملعقة) شوفي حدقها كده ياست ؟.

أم رتيبة : (بعد أن تتدوقها) أهى كويسه، بس هدى الوابور شويه من تحت حلة الرز (موجهة الحديث إلى أم سيد) فهمت بقى يا ست أم سيد؟ أهو ده قصده.

أم سيد : ما هو برضه قال لى كده ، فهمنى أن نص اللفته بتاعته ، يعنى الست اللي نفسه فيها .

أم رتيبة: ولقاها ؟

أم سيد : أيوه يا ستى لقاها ، بس ما طلعتش لفته أبدا طلعت زى ما بتقولى كرنبه ، كرنبه عجالى .

أم رتيبة : حقيقي .. حقيقي كرنبه ؟.

أم سيد : ياختي اصبري .. مالك مسروعه كده .

أُم رتيبة : وبعدين يا خالتي ام سيد لما قال لك انه لقى نص اللفته .. قصدى نص الكرنبه ؟.

أم سيد : قلت يا بني ، وهو نص اللفته برضه يوافق نص الكرنبه ؟.

أم رتيبة : يوه يا حاجه .. ما توافقش ليه .. قادر ربك يجمعهم سوا في برميل واحد .

أم سيد : ما هو برضه قال لي كده .

أم رتيبة : من فهمه وتقديره ، وبعدين يا خالتي أم سيد قال إيه ؟ ما طلبش نص الكرنبه ؟.

أم سيد : طلبها ياختى .. وقاللي يا ام انا خايف احسن ماترضاش بي .. قلت له ازاى يابنى يا سيد .. دا انت أدها وأدود ، قال لى طيب روحى جسى النبض ، لقيت الحكاية مش عايزه بد .. أخدت بعضى وتنى جايالك .. إيه رأيك ياختى ؟.

أم رتيبة : رأيي ؟ آل رأيي آل ، يا سلام يأست أم سيد دا انت خليتي جتني تنمل . . دا انا طول عمري احب اللفت ، أموت في اللفت ومية اللفت .

أم سيد : أصيله والنبي . . أصيله يا ست ام رتيبه . . أنا برضه كنت عارفه أن أملى مش حايخيب فيكي أبدا .

زينهم : (يدخل وفي يده مقشة) اسمعي يا بت يا سنيه . أنا على الكنس وانتي عليكي المسح .

سنية : (وفى يدها جردل المسح) لأكل واحد مناعليه أوده كنس ومسح، أنت أصلك ضلالى ما عندكش ذمه .. ما بتقرطش على المقشه، وتسبب كل التراب، ولا بتمدش إيدك تحت الكنبه .. وادوخ انا بعدك في المسح ..

زينهم : يا سنيه ياختى ما تبقيش مناكفه .. أنا حاقش لك كويس خالص ، وامد ايدى زى مانتى عايزه .. أمد إيدى تحت الكنبه .. وتحت الملايه ، وتحت القميص .. بس ما تبقيش تقوليلي شيل إيدك .

سنية : شاهده يا ستى على قلة الأدب ؟.

أم رتيبة : اخرس يا واد يا زينهم ، واختشى على دمك وخلى عندك تربيه .

زينهم : خرست . . هوه انا ما اعرفش اتكلم كلمه في البيت ده ؟.

أم رتيبة : كلمتك اجنابك (لأم سيد) خطوه عزيزه يا ست ام سيد . داحنا زارنا النبي . دايوم المنا . دايوم الهنا .

أم سيد : خلاص يا ستى ام رتيبه .. موافقه ؟.

أم رتيبة : موافقه وبس ، وهوا انا الاقى أحسن من سيد أفندى .

أم سيد : استبينا ؟

أم رتيبة : استبينا .

أم سيد : طيب واخليه ييجي يقابل سي عبد الصبور إمتى ؟

أم رتيبة : (فى فزع) عبد الصبور !.. يا مصبتى .. يا وقعتى .. يا خيبتى .. يا نستى .. يا

أم سيد : ليه ياختي كفا الله الشر ؟.

أم رتيبة : يا فرحه ما تمت خدها الغراب وطار .

أم سيد : يوه يا ندامه .. حصل إيه ياختي ما توجعيش بطني ؟.

أم رتيبة : عبد الصبور .. مفرق الأحباب .. وهادم اللذات .. يا خيبة أملك يا أم رتيبه . أم رتيبه .. يا ميلة بختك يا أم رتيبه .

أم سيد : هو إيه أصله ياختي ده .. ما تقوليلي إيه الحكاية وقعت قلبي ؟.

أم رتيبة : ما فيش فايده يا ست ام سيد . ما دام حا يدخل فيها سي عبد الصبور باظت واتفركشت . . أناكنت ناسياه خالص . . كان رايح عن بالى . . الفرحه نستني أن فيه شيء اسمه عبد الصبور . . وشه يقطع الخميرة م

أم سيد : ياختي ليه بس . . دا سي عبد الصبور باين عليه عاقل وابن حلال .

أم رتيبة : عاقل في كل حاجه .. ما عدا الحكايه دى . مفيش فايده .. أنا عارفه ما فيش فايده ..

أم سيد : طب بس فهميني ليه ؟.

أم رتيبة : أهو كده ، خلقته كده .. طبعه كده .. شغلته انه يضيع منسى العرسان .. اللي خلاه رفض العشرين عريس اللي فاتوا .. يعني حا يستعصي عليه سي سيد .

أم سيد : ياختى قادر وكريم .. مين يعرف .. يمكن ربنا يهدى سره ويعقله .. ويخليه يوافق .. هوا فيه حاجه بعيده على ربنا ؟.

أم رتيبة : مش بعيده على ربنا .. لكن بعيده على أنا حاسه وعارفه .

أم سيد : طيب خليها على الله ياختى ، اسكتى انت وربنا حا يجيبها سليمه .. إن شاء الله الله ه دى حا تصيب .. أنا قلبي حاسس كده .

أم رتيبة : يسمع منك ربنا .. ولو اني عارفه انه ما بيرضاش يسمع الحكايه دي أبدا .

أم سيد : ما تقوليش كده يا ام رتيبه .. أستغفر الله العظيم من كل ذنب عظيم .. بكره كل حاجه تنصلح .. أخلى سيد ييجي يزوره إمتى ؟.

أم رتيبة : ياما انا خايفه م الزيارة دى .

أم سيد : ياختى جمّدى قلبك ، ما تخافيش .. كل حاجه حاتيجى سليمه ، هو سيد فيه حاجه تتعاب ، دا على الفرّازه ، وأدب وأخلاق ، وكال وذوق ، هوا فيه احسن من كده ؟.

أم رتيبة : ما هم اللي فاتوا كلهم كانوا كويسين ، لكن كان بيطلع فيهم القطط الفطسه .

أم سيد : لا .. بس اطمنى ، دامش حا يلاق فيه عيب أبدا ، إن شاء الله ربنا حيتمم بخير .

أم رتيبة : من بقك لباب السما ، ربنا يهديه ويكمل سيد افندى في عينه ، بس على فكره يا ست ام سيد لازم نعمل استحراصنا على كل حاجه ، عشان المقابله تتم على خير ، وعشان ما يحصلش حاجه تعكر مزاج سي عبد الصبور و يخسر لنا الشغلانه .

أم سيد : اللي انت عايزاه منا يا ست آم رتيبه نعمله . بس أأمرى .

أم رتيبة : أول كل حاجه .. اسم سي سيد افندي الكامل إيه .. لحسن يكون فيه حالاجه كده وإلا كده ، أصله يهتم بالاسم أوى .

أم سيد : اسمه سيد افندي بنجر .

زينهم : (**ضاحكا**) بتجر .. هأ .. أو .

أم رتيبة : (بيأس) بنجر ؟ يادى المصيبه الحمرا .

أم سيد : ماله بنجر .. وحش ؟.

أم رتيبة : لأحلو .

زينهم : (مصفقا بيديه مغازلا سنية) حلو .. يا حلو .. مش حا تنجوزيني بقي يا بت يا سنيه ، أموت ولا رحش التمن .

سنية : يا خويه إلهى تموت وتروح التمن .. يا بجح يا ضلالى ، أنا اتجوزك انت .. خلاص الدنيا خلصت منن الرجاله لما اتجوزك أنت .

أم رتيبة : (تضرب كف على كف) حلو ، حلو أوى .. يا خسارة الجوازه ، يا ميلة بختك يا ام رتيبه .

أم سيد : ياختى .. هوا إيه أصله ده .. ميلة بختك ليه بس .. هو اسم بنجر عيب ؟.

أم رتيبة : اللي ما رضي بالعقر يرضي بالبنجر .

أم سيد : يا ستى هوه ماله ومال الاسم .. هوه الاسم بيعض .. كل واحد حرفي اسمه ، بنجر ، خيار ، جزر .

أم رتيبة : ما فيش فايده يا ست أم سبد ، مش ممكن مش ممكن .

أم سيد : وعلى العموم الاسم في إيدينا .. ده حاجه سهل .. من بكره يروح المحكمه الشرعية يغيره .

أم رتيبة : حقيقي يا ست ام سيد ؟ ممكن يغير اسمه ؟.

أم سيد : مش ممكن ليه ؟ ممكن قوى . هوا يعني كان لزق .

أم رتيبة : ما لزقش و لا حاجه . بس هوا يعني حا يرضي يغير اسمه ؟.

أم سيد : يرضي قوى .. عشان خاطر عيونك . من بكره يروح يغيره ، وبعد

بكره يكون هنا من غيره .. مبسوطه يا ستى ؟.

أم رتيبة : كتر خيرك يا ست ام سيد . ما عدمكيش أبدا .

أم سيد : خلاص . . اتفقنا . بعد بكره أقول له ينجى يقابل سي عبد الصبور ؟ .

أم رتيبة : خلاص أوى . بس قولى له . يستحمله ولا يزعلش منه . يعنى إن قال له كلمه كده والاكده ما ياخدش على خاطره . قولى له ياخده على أد عقله . حاكم هوا اليومين دول . عقله يعلم به ربنا .

(يسمع طرق على الباب بعصا)

أم رتيبة : (مرتبكة) يوه . دى دقته . يا ترى إيه اللي جابه بدرى كده ؟. (يطرق الباب ثانية) .

أم رتيبة : طيب ، طيب ، افتحى يا بت يا سنيه ، تعالى بنا يا ست ام سيد نخش في أو دة الضيوف .

أم سيد : لا ياختي أنا خاقوم بقى عشان اشوف ورايه إيه . واسيبك يمكن يكون سي عبد الصبور عايز حاجه .

(تفتح سنيه الباب ، ويدخل عبد الصبور . أم سيد تغطى وجهها بالملاءة)

عبد الصبور : إيه ده . هوا انتوا نايمين نومة أهل الكهف.ساعه وانا عمال اخبط ما حدش راضي يفتح .. انطرشتم .

أم رتيبة : (مشيرة إلى أم سيد) خالتي ام سيد جارتنا يا سي عبد الصبور .

عبد الصبور: طيب . طيب . مش وقته دلوقت . قوموا ياللا من هنا . انحلو لنا الصبور: طيب . عشان خاطر عندنا جلسه مستعجله . عندنا حاجه خطيره عايزين نشوفها . ياللا اتفضائوا .

أم رتيبة : يوه .. هوا انت دايما كل حاجتك مستعجله ، جلسة إيه اللي حاتعملها هنا ؟.

عبد الصبور: جلسة أرواح ، يعنى حا تكون جلسة إيه ، جلسة مجلس وزراء!. أم سيد: (تلتف في ملاءتها وتنهض) طيب يا ست ام رتيبه أستأذن آنا ..

(أمرتيبة)

خليتك بعافيه . . إن شاء الله بعد بكره زي ما اتفقنا ؟ .

أم رتيبة : إن شاء الله ، بس ما تنسيش اللي قلت لك عليه ، إو عي ييجي بيه ؟.

أم سيد : ما تخافيش ياختي ، اطنمني . حطى في بطنك بطيخه صيفي ، أنا اخليه

يغيره ويغير أبوه ، ما يكونش عندك فكره أبدا .

(تنصرف أم سيد ، وتودعها أم رتيبه حتى باب البيت) .

المشهد السادس

عبد الصبور: (صائحا) زينهم .. يا حلُّوف ، يا بجم يا لوح .. انت فين ؟.

زينهم : (من داخل المطبخ) يا ستار يارب .. ادحنا جينا للشخط والنطر

(بنغم طويل) حاضر .

عبد الصبور: (مستمرا في ثورته لسنية وأم رتيبة) وانتم واقفين كده ليه ؟ يا الله التحلحوا شويه مافبش وقت . الجلسه حا تنعقد الساعة ١٢ ، والساعة دلوقت اتناشر الا ربع ، عايز الصاله تكون جاهزه حالا (مشيرا إلى أكوام عروق الملوخية وقشر التوم والبطاطا) ياللا شيلوا البلاوى المتلتلة على دماغكم دى . عروق ملوخية وفصوص توم ، إيه الحاجات الأرضية دى .. ملوخية وتوم وبطاطا .. احنا رايحين نحضر أرواح ، أرواح سماوية ، أثيرية .. انتوا عايزين الأرواح تنزل بين الملوخية والبطاطا والتوم ، دى تنقى فضيحة في عالم الأرواح ، دى تبقى كارثة .

أم رتيبة : ليه يا خويا بس .. نكبه وكارثه على إيه !! يمكن أرواح تحب البطاطا . عبد الصبور : أرواح تحب البطاطا ؟ انتى يا وليه مجنونه ؟ بتخرف ؟ أنا طول عمرى اقول ان عقلك على قدك ، أرواح تحب البطاطا ؟.

أم رتيبة : ليه ؟ عيب ؟ قباحه ؟ مالها البطاطه ؟. دى حتى بطاطه حمرا من بطاطة سيدى جابر زى الشهد .

عبد الصبور: بطاطا، بطاطا.. انتي ياوليه جنسك إيه. أرواح تحب البطاطا؟.

أم رتيبة : لا .. تحب الألمازيه ، يعنى هوا انت ضامن أن الأرواح اللي حا تنزل أرواح من جاردن ستى والا من الزمالك ، يمكن برضه تكون زى حالتنا كده من حوش آدم .

عبد الصبور: أرواح إيه يا شيخه اللي حا تنزل من جاردن ستى ، والا من حوش آدم ، دى نازله من طبقات الأثير ، من العالم الآخر المجهول ، أرواح ياوليه ، أرواح .

أم رتيبة : أرواح والا بستليه .. أنا مالي .. تنزل من مطرح ما تنزل .

عبد الصبور: تنزل من السما، لا تاكل بطاطا .. ولا ألمازية .. دى أرواح .. عارفه يعنى إيه أرواح ؟ يعنى مثلا لما تطلع روحك ..

أم رتيبة : (مقاطعة) بره وبعيد . . تف من بقك سبع تفات . إيه الكلام دا اللي بتقوله اللي زى السم .

عبد الصبور: يا ستى يقول مثلا، مثلا .. وعلى كل حال انتى زعلانه ليه ، ما هى مسيرها تطلع .. وتنطلق حره فى طبقات الأثير .. وربنا يتوب عليها من السجن اللى هيه فيه .

أم رتيبة : سجن ؟ فين يا خويا السجن دا اللي هيه فيه ؟

عبد الصبور: (يشير إلى جسدها) ده .. ده .. السجن السفلى ، الدنيوى ، الجته اللي زى جتة الخنازير .. اللي زى كيس الغسيل .. بكره تفارقه و تنطلق منه .. وتمشى في السموات السبع حره .. تطير زى الفراشة .. تصورى انك تبقى طايره زى الفراشه ، خفيفه لطيفه ، بترفرف بأجنحتك . مش احسن من البرميل اللي انت محشوره فيه .. مش احسن من القدرة اللي عماله تدبى فيها أكل .. بطاطا ، وتوم .. وملوخيه ، ومفتقه .. وتكلفتيها في خرق و هلاهيل ، إيشى قميص وايشى لباس وايشى شراب .. والنهارده بردت وبكره سخنت ، ومره طلع لها خراج ، ومره وقعت انكسر لها إيد والا رجل .. مش

هي دى الجنه اللي انتى مسجونه فيها ، واللي مورياك الويل والعذاب .. مش احسن لك تفارقيها .. مش أحسن إن روحك تطلع منها ؟

أم رتيبة

: روحك انت اللي تطلع . أنا عجباني جتني . إذا كان مش عاجباك جتنك الناشفه المقدده . . اطلع انت منها . . أهو باب السما واسع ، آل جتني آل . . مالها جتني ؟ عوجه . . عارجه . . خمسه و خميسه . . وحصوه في عين اللي ما يصلي على النبي .

عبد الصبور: لسه بدرى عليكى عشان تفهمى .. لسه قدامك كتير .. كستير خالص ، ومين يعرف يمكن ما تفهميش أبدا .. اللى زيك انتى مش ممكن يفهم .. ومش ضرورى يفهم ، وعلى كل حال ده مش وقته ، ياللا ياللا .. شيلوا البلاوى دى .. الناس زمانهم جايين .. وله يا زينهم الكلب يابوز الإخص ، انت مش عايز تيجى والا إيه ؟

زينهم : ما تصبر عليه شويه ، والا أجيلك كده زى مانا ؟

عبد الصبور: تعال بسرعه .. احنا مستعجلين .

(زينهم يدخل مترددا ، فلا يكاد عبد الصبور يرى وجهه حتى يفزع ويصيح به وهو يبصق عليه) .

عبد الصبور: ارجع .. ارجع تانى .. ارجع بقول لك ، مقدرش ابص فى وشك ، شكلك بيلبشنى .. وشك نحس .. عينيك كلها سفاله .. نظراتك كلها مكر ولؤم .. ارجع .. ارجع احسن لك .. أنا قلت لك ميت مره ما خشش على بوشك مكشوف غطيه بسرعه .. يا ساتر .. يا مغث .

زينهم : (يتراجع) ما قلت كده ، ما عجبكشي .

أم رتيبة : مالوا يا خويه وشه ؟ مش خلقة ربنا ؟ مش زى وش البنى آدمين اللى ف الشارع .؟ حقه بطلوا ده واسمعوا ده . آهو ده اسمه كهن .. اسمه بدع .

عبد الصبور: خبوه . خبوه بسرعه . أنا قلت له ما يطلعليش بوشه مكشوف أبدا .

: (من المطبخ) _ فين يا بت يا سنيه الوش ؟. الله يخرب بيتك . زينهم : (بخوج من إحدى الحجرات) بلاش زعيق كده . دور عليه عندك سنية في صفيحة الزبالة (**لعبد الصبور**) الطرطور والعبايه وعلبة النشوق والمنشه جاهزين على الكنبه . أحضر لك الطشت ؟ عبد الصبور: لأ مش دلوقت ، أنا مش حاقلع دلوقت لسه ورايه جلسه ، وجاي لي ضيوف . (زينهم يدخل وقد ارتدى وجها من الوجوه الورق المضحكة) . : كده يعجبك يا سي عبد الصبور ؟ كده حلو ؟ دلوقت ما بيلبشكش أمرتيبة ولا حاجه ، راحت السفاله والخساسه ؟ عبد الصبور: أيوه كده ، كده أحسن كتير ، كده كويس خالص . (تخرج سنية من إحدى الحجرات وتأخذ في لم عروق الملوخيه) : حكمته !! (تلاخل في إحدى الحجرات) . أم رتيبة عبد الصبور : يا الله يا زينهم جهز الترابيزة للشغل ، شيل المفرش وامسحها كويس ، وجهز الكبايه ، ورص الكراسي . انت عارف التوضيب كله ؟ : عارفه ، عارفه ، أوعوا بقي وسعوا لنا عشان نشوف شغلنا ، اوعي زينهم كده يا بت يا سنية .. وابعدي صدرك من سكتي لحسن زاحم الدنيا ﴿ يَأْخُذُ فَي تَجْهِيزُ الْمُنْصَدَةُ وَرَصَ الْكُرَاسِي حَوْلُهَا ﴾ . : ﴿ وَهِي تَجْمَعُ عُرُوقَ الْمُلُوخِيةُ وَالْبِطَاطَا ﴾ سامع يا سيدى بيقول إيه ؟ سنية عبد الصبور: أنا مش قلت لك ياود يا زينهم أقصر لسانك الزفر عنها ، يعني أعمل ايه فيك اكتر ما انا ملبسك وش ، ألبسك كمامه ؟ أربط لسانك ؟ مش حرمتك ميت مره شغل البصبصه ، وزوغان العين . : وانا اعمل لها إيه .. إذا كانت زاحمه الطريق بصدرها ، مش تلمه زينهم شويه ، بص كده واحكم شوف مين فينا الغلطان ؟ عبد الصبور : (يلتفت إلى سنية) أبوه حقيقي ، لك حق لمي صدرك يــا بت

واحتشمي جاكي خابط في نافوخك ، أنا مش قلت لك ميت مره بطلي

المسخره دي وقلة الحيا ؟

سنية : يوه يا سيدى . . وانا اعمل إيه ما هوه اللي طالع كده خلقة ربنا .

عبد الصبور : أيوه حقيقى .. خلقة ربنا ، معذوره ، حاتعملى إيه .. الله يكون فى عونك ، ربنا ياخد بصدرك .. يا اللا ياواد يا زينهم اشهل شويه ، الكبايه فين بتاعة كل مره ؟ (سنية تنتهى من جمع عروق الملوخيه وقشر التوم وزينهم ينتهى من تجهيز المنضدة وإحضار الكوب الفارغة) .

عبد الصبور : أول ما يبجوا الضيوف تعملي قهوه يا سنيه وتدخليها ، وبعدين مش عايز أشوف خلقة حد منكم أبدا .. سامعه ؟. قولي لستك كده ، وانت يا واد يا زينهم تقف على باب المطبخ لحسن يمكن نعوز حاجه .. وتلم لسانك .. ولا تتداخلش في اللي ما لكشي فيه . واوعى تقلع الوش .

زينهم : علم يا سى عبد الصبور علم ، حافض كل حاجه . (يسمع صوت أقدام تقترب من باب الشقة ثم صوت طرق على الباب) .

عبد الصبور: س .. بس .. ياللا يا يت يا سنيه شيلي اللي في إيدك ده واطلعي بره . (يتجه إلى الباب ويفتحه) .

(يدخل الشيخ جاد الله ، والأستاذ زكى حنجل ، والأستــاذ محجوب الور الذى يرتذى بدلة سوداء وكرافته سوداء) .

المشهد السابع

عبد الصبور: أهلا وسهلا .. (ينظر إلى ساعته) الساعه اتناشر وتلات دقايق ، يعنى جيين متأخرين تـلات دقايـق .. لكـن معلــهش .. خشوا وخلاص ..ابقوا خدوا بالكم من المواعيد بعد كده .

الشيخ جاد : (يخرج ساعة الجيب)الساعه عندى اتناشر بالضبط .

عبد الصبور: ساعتك مخرفه .. لكن قلنا خلاص .. اتناشر .. اتناشر الا تلاته .. اتناشر و تلاته .. مش مهم ، يا الله خدوا مطارحكم على الترابيزه لحسن ما عندناش وقت ، عايزين نخلص الجلسه .. ونتهى بسرعه .. أمال فين علوان افندى ؟

زكى : اعتذر .. علشان راح ياحد حقنه .

عبد الصبور: حقنة إيه ؟

محجوب: حقنة كلب.

عبد الصبور: ليه ؟

محجوب : حماته عضته .

الشيخ جاد : مسكين .. أنا طول عمرى اقول له على الوليه دى انها سعرانه ، مكانش مصدقني .. يستاهل .

عبد الصبور : يا للا يا جماعه بقى اقعدوا كل واحد ياخد مطرحه .. زينهم .. زينهم .. هات ورقة التحضير من على المكتب .

(يدخل زينهم من المطبخ إلى إحدى الحجرات .. ويدهش الجميع من منظره ، ولكن عبد الصبور يهدئهم قائلا) :

عبد الصبور: اسمعوا كلامي .. كده أحلى كتير .

(زكى يضع طربوشه على الشماعه ويضع محجوب طربوشه بجواره) .

زكى : ابعد طربوشك لحسن يتلخبط مع طربوشي .

محجوب : إى والله انا حاسس برضك انهم حا يتلخبطوا سوا وما حدش فينا حا يعرف طربوشه أنهو .

زكى : أقول لك (يأخذ طربوش محجوب ويجذب زره فيقطعه ثم يرده له قائلا في ارتياح) دلوقت نعرف نميزهم كويس .. طربوشك اللي من غير زر .

(زينهم يدخل ويقف لمشاهدتهم)

عجوب : (ينفعل ثم يجذب زر طربوش زكى فيخلعه) نبقى خالصين .

زكى : (متأسفا) كويس كده ؟. أهم حا يتلخبطوا تانى (يهم بأن يأخد

طربوش محجوب لينزع خوصته ولكن زينهم يتداخل في الأمر) .

زينهم : ليه ؟ وعلى إيه ؟. انتوا حا تعملوا زى الاتنين البرابره اللي اشترى كل واحد منهم معزه و خافوا لا المعزتين يتلخبطوا مع بعض .

محجوب : وعملوا إيه ؟

زينهم : ولا حاجه .. عثمان بص لمحمدين .. قال له يا مهمدين .. المئزه بتأتى هاتتلهبط مأ المئزه بتاءك .. إيه الأمل . محمدين بص لعثمان .. وقال له

هاتتلهبط مأ المتزه بتاءك .. إيه الأمل . محمدين بص لعنمان .. وقال له دى بسيطه هالص يا أتمان . . نقطع ودن واهد منهم . . تبقى اللي بودن بتأتى واللي بتنين بتأتك ، عثمان بص لمحمدين وهز راسه بانبساط وقال له يا سلام أليك يا مهمدين وألى أفكارك النيره دي هاجه تمام هالص ، وعنها وراحوا قاطعين ودن معزه من المعزتين .. كان فيه واحد ابن حلال واقف بيتفرج عليهم حب يلخبطهم راح مسهيهم وقاطع ودن التانيه جم كل واحد ياخد معزته لقوهم الاتنين بودن واحده ، بصوا لبعض كده وهزوا دماغهم بزعل ومصمصوا شفايفهم وعثمان قال لمحمدين : وبأدين إيه الأمل .. المئيز اتلهبطوا تاني ؟ محمدين قال له : يا سلام يا أتمان .. ودا هاجه تزأل .. نقطع رجل واحد واللي بتلاته يبقى بتأتى واللي باربعه يبقى بتأتك ، بص عثمان لمحمدين وهز رأسه بمنتهى إلاعجاب وقال له يا سلام يا مهمدين . أما أليك هته دين نح ، وعنها وراحوا قاطعين رجل معزه من المعزتين ، ابن الحلال كان واحد باله برضه خلاهم بيتلفتوا كده وراح قاطع رجل التانية ، وبعدين جه كل واحد ياخد معزته اتلخبطوا تاني ، عثمان قال لمحمدين : وبأ دين بأه يا مهمدين دي حاجه تلهبط خالص . محمدين قال له ولا يكون أندك فكر ، وعنها وراح خازق عين واحده ، ابن الحلال سهاهم تاني وخرق عين التانيه .. فضلوا على كده ، محمدين يقطع رجل وابن الحلال يقطع رجل ، لغاية ما المعزتين صفصفوا خالص ، ما بقاش فيهم حاجه أبدا ، والآخر قعد محمدين على الدكه وهز رأسه بزعل كده وقال لعثان : أقولكش يا أتمان .. عثان قال له : إيه ؟ محمدين قال له : أهسن طريقة أشان أدم اللهبطه . انت تاهد البيضة وأنا آهد السوده .

الشيخ جاد : (مقهقها) يا سلام على الذكاء وعلى المخ النضيف .

زكى : طب دلوقت حا تعمل ايه في الطرابيش ؟

زينهم : (يمسك أحد الطرابيش ويقذف به من الشباك) حاجه بسيطه قوى ، دلوقت ما فضلش غير طربوش واحد ، أظن مش ممكن يتلخبط .

عبد الصبور: (هائجا ثائرا) إيه دا يا حلوف يا ابن الحرام .

. زينهم : أعمل لهم إيه ما هي أصلها حاجه تلخبط خالص .

زكى : (يأخذ الطربوش ويلبسه غير أنه يسقط على أذنيــه) ده مش طربوشي .

زينهم : خلاص . . يبقى طربوشك اللي تحت .

(يجلس الأربعة حول المائدة)

عبد الصبور : أظن دي أول جلسة أرواح تحضرها يا شيخ جاد ؟

الشيخ جاد: تقريبا .

عبد الصبور: يعنى إيه تقريبا ؟

الشيخ جاد : سبق قبل كده ان انا رحت مع آمى الله يرحمها عند الشيخ الكومى فى سيدنا الحسين .. أصل الأسياد كانت تعباها .. وكان واحد منهم متسلط عليها اسمه الويشى وبعدين الشيخ الكومى طلعه وطلع على جتته البلا الأزرق بعد ما جبنا له راس هدهد وفرخه باربع أجنحه ، ومره تانيه حضرت معاها الزار عند سيده الكوديه ، واللى كان عليها برضه هوه الويشى نفسه .

عبد الصبور: زار إيه ، وكودية إيه ، وويشي إيه .. دا اللي كان على امك .. دا شغل

دجل ، شعوذه ، نصب واحتيال ، بيضحكوا بيه على المهافيف والخابيل ، إحنا هنا مش بندجل ، ومش بنعمل شغل مسخره من اللي كان بيعمله الشيخ الكومى اللي بتقول عليه .. إحنا هنا مش حا نجيب العفريت اللي كان على امك الله يرحمها .. إحنا حا نجيب امك نفسها . فاهم و الالأ ؟

الشيخ جاد : أمي !! أمي نفسها !؟ أمي أنا ؟ يا شيخ قول كلام غير ده ؟

عبد الصبور: أمال احنا جايين هنا ليه ، يا بجم ، دى جلسة تحضير أرواح ، يعنى حا ننزل الأرواح من السما السابعه ، هنا عندنا .. نكلمها وتكلمنا ، أى روح عايزين نجيبها نقدر نجيبها .. ومن ضمنها روح المرحومه آمك ، والا يعنى فاكر انها جعيصه ؟

الشيخ جاد : ولا جعيصه ولا حاجه .. بس هيه كانت دايما دماغها ناشفه .. الله يرحمها كانت عنيده خالص يمكن تعصلج معاكم شويه .

عبد الصبور: ما فيش حاجه هنا اسمه عنيد ولا دماغه ناشفه .. احنا حا نجيبا ونجيب أبوها كان ، أنا دلوقت حالا اجيبها لك يا شيخ جاد .

الشيخ جاد : حالا !! حالا ؟! من غير راس هدهد ولا ديك برجل واحده ؟

عبد الصبور : دا كلام فارغ ، دا نصب يا شيخ جاد ، دا احتيال ، قلت ميت مره ، احنا هنا حا ننزلها بمنتهى البساطة .. إنت شايف الكبايه اللي قدامك دى ؟

الشيخ جاد : طبعا شايفها .. بس يعني يقول

زينهم : (مقاطعا) ليه.. هيه المرحومه كانت حبايه في كبايه تطلع وردايه والا إيه؟

عبد الصبور: اسكت انت يا زينهم الكلب.

زينهم : طب عن إذنك ، اقلع الوش بقى لحسن حافطس ؟

عبد الصبور: إوعى ، إوعى ، إياك .

زينهم : هوه إيه أصله ده ! عاوز اشم نفسي شويه يا عالم !

عبد الصبور : (في غضب) روح جوا المطبخ شم نفسك شويه وتعالى ، (إلى المسبور : (في غضب) خد بالك بقى يا شيخ جاد . شايف الكبايه دى ؟

الشيخ جاد: شايفها.

عبد الصبور: أهو دلوقت حانحطها فى وسط الترابيزه ونحط تحتها الورقه المدوره دى اللي مكتوب عليها الحروف الهجائيه كلها والأرقام من ١ إلى ١٠ ومكتوب عليها لا ونعم ولا أجيب ، من باب مساعدة الأرواح .. فاهم ؟

الشيخ جاد : ولا إنا فاهم حاجه .

عبد الصبور: لك حق . . فهمك على قدك . . زي اسم الله عليها اختى ام رتيبه .

الشيخ جاد : يا أخى انا مش فاهم إيه دخل الأرواح بالكبايه ، وإيه دخل الكبايه بالحروف الهجائيه والأرقام ، وإيه دخل لا ونعم ولا أجيب ، في مساعدة الأرواح .. فهمني .. اشرح لي .

عبد الصبور: حا شرح لك وافهمك كل حاجه ، بس اديني عقلك الوسخ شويه ، حاول انك تفهم .. دلوقت تلاته منا حا يحطوا صوابعهم السبابه على حرف قاع الكبايه وهي مقلوبه ، يعني كده ، بشويش خالص ، مجرد

الشيخ جاد : وبعدين ؟

زكى : ولا قبلين .. الكبايه حا تتحرك ، يمين وشمال ، وتتنقل من الحرف ده إلى الحرف ده ، وتحدد لنا الكلمات اللي حا تجاوب بها على الأسئله بتاعتنا . فاهم ؟

الشيخ جاد : ولا انا فاهم حاجه .

عبد الصبور : بعدداكله ما نتش فاهم ؟

الشيخ جاد : حلمك شويه يا سي عبد الصبور ، ما لى أنا ومال الكبايه لما تتحرك يمين وشمال .. وإيه دخل الكبايه عشان تجاوب لنا على أسئلتنا ، وأنا ليه حا سأل الكبايه ، بس فهموني يا اخوانا، إيه حكاية الكبايه ؟ محجوب : ما هي الروح هي اللي حا تحرك الكبايه .

الشيخ جاد : يعنى الروح جوا الكبايه ، امى انا ؟ الست صالحه ؟ حا تخش جوا الكبايه (يضحك بشدة) امى انا جوه هنا .. (مشيرا إلى الكوب ، ومستمرا في الضحك) وبرضك تقول لى فاهم والا لا ، طبعا مش فاهم .

زكى : ليه يا شيخ جاد ، الله لا يسيئك ، مانتش فاهم ليه !

الشيخ جاد : أمي انا جوا الكبايه ! (يضحك بشدة) .

عبد الصبور : أيوه امك جوا الكبايه ، فيها إييه اكتيره !! معضله !

الشيخ جاد : (مستمرا في الضحك) أصلك لو كنت شفت أمى ما كنتش قلت كده .. دى مرّه حبينا تدخلها في أوده ما عرفناش ، انحشرت بين الاربع حيطان .. تقوم بسلامتك عايز تدخلها في كبايه (مستمرا في الضحك) .

عبد الصبور: شيخ جاد، يا شيخ حلوف ، يا شيخ قرد، يا عرة المشايخ .. أمك الله يرحمها ، حا تنزل بروحها مش بجسمها .. حا تنزل كده زى الفراشه ، تشف وترف .. مش حا تنزل بالبراشوت زى صناديق الذخيره والتموين ، أمك اللي كانت بتتحشر في أوده ، بقت دلوقت زى انسمه الطايره .. أمك اللي كانت ما تنفدش من الباب ، بقت تنفد من الحيطه ، تنفد من السقف . أمك اللي كانت في العش .. طارت . فاهم ؟.

الشيخ جاد : ولا أنا فاهم حاجه .

عبد الصبور: عنك ما فهمت ، أمك حا تجيلك دلوقت وخلاص.

محجوب : سيبك منه بقى يا أستاذ عبد الصبور .. بلاش تضييع وقت ، ياللا بينا نبتدى .

عبد الصبور: أهم حاجه عايز سكون تام .. لا كلمه ولا حركه .. عايز نفوسكم تصفو وتفكيركم يسمو. عايز بعد عن الماديات، وارتفاع إلى

السماويات والروحانيات.. كلنا نركز أذهاننا في الأرواح اللي حا نستدعيها. في الأشياء الساميه الصافيه الأثيريه غير المنظوره. إنتو التلاته كل واحد يمد السبابه بتاعه ويحطه على طرف الكبايه.. أيوه كده، لمس.. مد صباعك يا شيخ جاد ما تخافش، الكبايه مش حا تلسعك. سكون عميق. مالك بتترعش كده له يا شيخ جاد؟ الله يخرب بيتك.

الشيخ جاد : (مرتعشا) هيه نزلت ؟

عبد الصبور: إيه هي اللي نزلت ؟

الشيخ جاد : روح امي ا

عبد الصبور: روح امك لا نزلت ولا طلعت ، لسه ما فيش حاجه لغاية دلوقت ، ما فيش داعي للرعشه دى . . والخوف ده . . انت إيه ! جنسك إيه !

زكى : شد حيلك يا شيخ جاد ، شد . . دا حتى عيب عليك . انت عمرك ما

قابلتش روح ؟

الشيخ جاد : أبدا .. أبدا .

محجوب : أديك حا تقابل .

الشيخ جاد : ما هو دا اللي مخوفني ، أنا طول عمري اخاف م الضلمه والعفاريت .

عبد الصبور: انت مهفوف ، لسه برضه بتجيب سيرة العفاريت . احنا هنا مش حا نطلع عفاريت ، مش حا نحضر جن . . حا نستدعى أرواح ، أرواح ، يعنى لو كنت بسلامتك مت ، كنا جبناك ، بغباو تك و سخافتك كده زى ما انت .

الشيخ جاد : طيب .. طيب .. ما تزعلش كده .. آدى صباعي أهه .

عبد الصبور: بشویش .. ما تحطش صباعك أوى كده دامش طبق علی لوز ، دى روح ، خلی إیدك خفیفه .. لمس یدوبك لمس .. مفهوم ؟

الشيخ جاد : مفهوم .

عبد الصبور : أيوه كده ، دلوقت . كل واحد يسبل عنيه . وياخد شوية شهيق طويل ، وبعدين زفير . اطرد معاه كل الأرضيات اللي في نـفسك

والشوائب والرواسب المادية اللى فى ذهنك .. عايز صفاء وسمو .. مفهوم يما شيخ جماد ؟ مما تفكسرش فى حاجمه غير الأرواح والسماويات .

الشيخ جاد : والترب والقرافات والأموات .. فاهم .. أنا الدمعة قربت تفر من عيني .

عبد الصبور: دا اللي انا عايزه. مش عايز ماديات أبدا أبدا .. و دلوقت تحبوا نبتدى بمين . أنهى روح تحبوا نستدعيها الأول ؟

زكى : نبتدى بروح ام الشيخ جاد .

عبد الصبور: فليكن . أمك اسمها إيه يا شيخ جاد ؟

الشيخ جاد : صالحه .. وشهرتها ابو جلمبو .

عبد الصبور: صالحه وخلاص . ما فيش داعي لاسم الشهره دلوقت ، وخصوصا انه أرضى خالص . واسم أبوها ؟

الشيخ جاد : النمس .. المفش .

عبد الصبور: كفايه التمس ما فيش داعى للمفش دى. زمانه فش في السما و شبع فششان .. اسم امها ؟

الشيخ جاد : أنا فاكر ! انت حا تفتحلها محضر ! ما دام ناوى تجيبها ابقى اسألها هي .

عبد الصبور: اسم امها يا شيخ جاد .. أنا مش بهزر معاك .

الشيخ جاد : والله ما اعرف .. أنا فاكر ان أبويا كان بيقول لها امك .. ام قويق .. يقى لازم اسمها ام قويق . وعلى كل حال لما تنزل تبقى تتأكد ما دام دا شيء يهمك أوى .

عبد الصبور : صالحه بنت النمس وام قويق (فاظرا إلى السقف) يا ست صالحه ، أرجوك تتفضلي شويه .

الشيخ جاد : (ناظرا إلى السقف في ذعر) هي حا تتفضل من السقف ؟

زكى : (يزغده بكوعه) اثبت يا شيخ حنش .. اثبت ما تضحكشي علينا

الأرواح .

الشيخ جاد : طيب بس فهموني يا ناس ، فهموني ، حا تيجي منين ؟

محجوب : دلوقت تشوف ، حط صباعك واسكت ، ودخـل لسانك جــوا

بقك ..

عبد الصبور : (مستمرا في النظر إلى السقف) يا ست صالحه ، اتفضلي شويه من فضلك ، ابنك جاد عايزك .

الشيخ جاد : أيوه يا ام ، عايزك يا ام .

عبد الصبور: (يزغده) اسكت انت ، صوتك وحش قوى ، بيطفش الأرواح .

الشيخ جاد : (هامسا) أمال اعمل إيه ؟

عبد الصبور: حط صباعك على الكبايه واسكت .. وفكر في امك ، تفكير سماوى نقى .

الشيخ جاد : إيه يا خويا اللخبطه دي ، إيه أصله ده !

محجوب : لخبطة إيه يا شيخ قرد!

الشيخ جاد : مانتاش سامع بيقول لي إيه ا

زكى : ماله ! بيقول لك إيه ؟ بيقول لك فكر في امك تفكير سماوى مرتفع .

الشيخ جاد : وهوه دا معقول بسياناس !

عبد الصبور: مش معقول ليه يا بلا .. مش معقول ليه ؟

الشيخ جاد : عشان التفكير السماوى المرتفع مش ممكن يجتمع مع امسى فى مخ واحد .. لأنى لما بافكر فى امى بتصورها قاعدة قدام الماجور وبتطب فى العجين .. طب . طب . أو ماسكه المنفضه وبتنفض فى الكليم ، طاخ طاخ ، أو طابقه فى زمارة رقبة ابويا ، وعلى دماغه ، دى ، دى .. بالذمه يبقى ده فيه إيه من السماويه والارتفاع .

عبد الصبور: طب بس، بس .. إيه الأصوات المنكره دى .. دى أصوات تطفش سما يحالها .

الشيخ جاد : وانا مالي ، ما هي دي الأصوات اللي كانت بتعملها في حياتها ، عايزني

افتکرها ازای امال ، ماسکه کانجه و بتضرب تقاسیم حجاز ، تن ، تن ، ماسکه مروحه و بتهوی بها بخفه و دلال ، هش ، هش .. عایزنی اتصورها بترقص بصاجات تم ، تم .

عبد الصبور: ليه لا!

الشيخ جاد : لا ، اتصورها انت ، أصلك ما تعرفهاش أنا عارفها كويس . . دلوقت تنزل لك بالحنجل والمنجل . . وتشوف ، وتقول يا ريت اللي جرا ما كان .

زكى : وبعدين معاك يا شيخ جاد ، الوقت حا يروح واحنا ما عملناش حاجه . أرجوك تسكت ، اسكت خالص وسيبنا على امك . . واحنا غيبها لك من تحت طقاطيق السما ، بس انسد انت .

الشيخ جاد : (يضع كفه على فمه) هاب ، سكت انا .

عبد الصبور: (مستمرا في النظر إلى السقف) يا صالحه يا بنت النمس وام قويق ، أرجوك تتفضلي شويه .. كلمتين ورد غطاهم (ينظر إلى الكوب الذي لا يتحرك ، ثم يستمر) يالله بقى يا ست صالحه احنا مش فاضين لك ، عندنا شغا (يبدأ الكوب في قلقلة خفيفة) .

زكى : بس . بس . أهى جت .

عبد الصبور: (هامسا للثلاثة) سكون ، ولا حركة ، (ناظرا إلى الكوب) أهلا وسهلا . . العواف يا ست صالحه .

الشيخ جاد : (مرتعشا) هي نزلت . هي فين ؟ هي فين ؟

محجوب : (يضربه بكوعه) اثبت . اثبت يا شيخ جاد . (الكوب يأخذ في المحبوب المختلفة) . الحركة يمينا وشمالا في اتجاه الحروف المختلفة) .

عبد الصبور: (يقرأ الحروف ويجمعها ويقول ببطء) الله يعافى بدنك .. (مخاطبا الروح) حضرتك الست صالحه بنت النمس بنت أم قويق ؟

عبد الصبور: (الكوب يتحرك وعبد الصبور يقرأ) لا . (عبد الصبور للروح في عبد الصبور : (الكوب يتحرك وعبد الصبور يقرئا) أنا صالحه قاصين (متحدثا

للجماعة) صالحه قاصين ؟! هي امك اسمها صالحه قاصين يا شيخ جاد ؟

الشيخ جاد : (مرتجفا) أبدا .. أبدا ، ولا امي ولا اعرفها .

عبد الصبور: (للروح) عدم المؤاخذه يا ست صالحه . الظاهر ان فيه غلط حصل .. (قارئا) يعنى ما حدش عايزنى (للروح) ما نستغناش يا ست ، لكن احنا الحقيقه كنا عايزين الست صالحه النمس أم الشيخ جاد ، عشان كان عايز يسألها على كام سؤال . (قارئا) تانى مرة تبقى تاخد بالك وتطلب الروح كويس . دى مسخره وقلة حيا .. (للروح) متأسفين خالص .. عدم المؤاخذه .. (قارئا) يعنى امشى ؟ (للروح) اتفضلى من غير مطرود ، بسإذا كنت تسمحى ولو فيها رذالة تبعتى لنا الست صالحه النمس (قارئا) من عنيه وللروح) تسلم عنيكي (للشيخ جاد) راحت تجيبها .

الشيخ جاد : تفتكر حا تلاقيها يعني ؟

عبد الصبور: ما تلاقيهاش ليه ؟ ضرورى تلاقيها .

الشيخ جاد : أصل الله يرحمها كان لها غطسات كده فى الغوريه وتحت الربع وسيدى ابو السعود . ما حدش يعرف يعتر لها على أثر ، ربنا يسهل وتلاقيها . (الكوب يأخذ فى الحركة)

عبد الصبور: بس. بس سكون (للروح) أهلا وسهلا حضرتك مين (قارئا) برضه صالحه قاصين (للروح) أمال ما بعتيش الست صالحه النمس ليه ، ما لا قيتيهاش ؟ (قارئا) لا .. لقيتها (للروح) أمال ما بعتيهاش ليه (قارئا) ما قدرتشي تيجي (للروح) ليه كفي الله الشر ؟ تعبانه والا حاجه ؟ (قارئا) لأ إيدها مش فاضيه (للروح) مشغوله بايه ؟ (قارئا) بزمارة رقبة ابو جاد .

الشيخ جاد : (صائحا فجأة) هي ما فيش غيرها ، هي بعينها . مفيش حد إيده مشغوله برقبة ابويا غيرها ، طول عمرها طابقه فيها ، مش مخلياها تفلفص ، هي بعينها .. ازيك ياام ؟

(أم رتيبة)

عبد الصبور: (ثائرا) اسكت يا شيخ هباب ، انسد ، لحسن تطفش السروح (للروح) لا مؤاخذه يا ست صالحه .. ده الشيخ جاد ، أصل عنده شوية خبل ، عقله على أده ، لسه ما تعلمش الأدب والصلاح فى حضرة الأرواح ، لا مؤاخذه (الكوب يتحرك وعبد الصبور يهز رأسه آسفا) . معاك حق ، معاك حق ، هوا كده برضه زى ما بتقولى .

الشيخ جاد : بتقول إيه ؟

عبد الصبور : بتقول انك مدب ، وغبي ، وقليل الأدب . زي امك .

الشيخ جاد : غورى غارك حنش ، وليّه هزؤ ما تختشيش ، أنا اللي مدب وغبى يا بوز الإخص يا وش النحس .. ما سمعتكيش امى كانت فصصتك و فرجت عليكى اللي ما يتفرج . أم .. أم .. عاجبك يا ام .. الحقيني يا ام . انزلى بسرعة يا ام . الوليه بتشتمني .

عبد الصبور: عيب يا شيخ جاد ما يصحش. اعقل. ما تفضحناش قدام الأرواح. (الكوب يهتز بشدة والترابيزه تتأرجح وتتايل).

عبد الصبور: (منزعجا) يا نهار اسود ، الظاهر ان امك نزلت لها زى الـقضا المستعجل .. تلاقيهم دلوقت مسكوا فى بعض ، والحنــاق شغـــال والضرب نازل يرف .

الشيخ جاد : (فرحا) ول يا ام . اديها يا ام . . كان يا ام . ركبه م اللي بالك فيهم ، أيوه كده ، كان دماغ ، يا سلام عليك يام .

(الكوب مستمرا في الاهتزاز بشدة ثم يطير من المتضدة متهشما) .

عبد الصبور: (صائحا فى عجلة) وله يا زينهم ، كبايه تانيه بسرعه يكملوا فيها الحناقه . . بسرعه يا وله . .

(زينهم يتقدم بكوب آخر ووضعه على المنضدة .. فيضعون عليه أصابعهم ولكن الكوب لا يتحرك) . عبد الصبور : الظاهر ان الخناقه خلصت .

الشيخ جاد: لازم صالحه قاصين هربت.

عبد الصبور: استنوا كده لما نشوف حدمنهم موجود ؟ سكون . سكون . ارتفاع عن الماديات وسمو عن الأرضيات . سمو . سمو . سماويــات . روحانيات .

الشيخ جاد : سماويات إيه بس يا سي عبد الصبور ، هوا بعد اللي حصل يبقى فيه سماويات . بلاش تضييع وقت يا شيخ ، اسألها باختصار .. مين انت ؟.

عبد الصبور: انت مين ؟ (يقوأ) مين إيه .. يا عومر . انتوا حاتتلمسوا والا اضلمهالكو ، وادشد شلكوا الكبايه على نفوخكو ونفوخ اللى يشددلكو (للمشيخ جاد) لا .. دى حاجه ما تنطاقش أبدا .. دى روح شلق قوى .

الشيخ جاد : هي أمي ما فيش غيرها (صائحا بأعلى صوته) ازيك يا ام ، سلامات يا ام ، وحشتيني يا ام (لعبد الصبور) اطلع انت منها بقي وسيبني مني لها .

عبدالصبور : (فى ثورة) ــ دى بقت حاجه هزؤ خالص . دى ما بقتش جلسة أرواح ، دى بقت جلسة أو دباتيه . (الكوب يهتز بشدة) طب بس خلاص اسكتى . حقك علينا . عدم المؤاخذه .. اتفضل يا سيدى كلمها . كلم ست صالحه النمس .

الشيخ جاد: سلامات يا ام ، عامله إيه في السما يا ام ؟

عبد الصبور: (يقوأ) برضك ماشيه بالدراع زى ما كنت فى الأرض، ما فيش روح تقدر تدوس لى على طرف، مدوخاهم روح روح .. لو كنت شفت العلقه اللى هبدتها لصالحه قاصين كنت عرفت ان امك برضه راجل زى ماهيه .

الشيخ جاد : وازاى ابويا ؟.

عبد الصبور: (يقرأ) مدوخنى فى السما زى ما كان مدوخنى فى الأرض .. فلاتى وبصباص وعينه فارغه .. كنت زمان فى الأرض بعرف اعفقه . لكن دلوقت سايب على حل شعره ، طول النهار يعط فى السما ، ما انا عارفه له قرار ، راح فين ولا جه منين ، لكن لما ييقع فى إيدى عينيك ما تشوف الا النور .. لسه اقربها دلوقت كنت طابقه فى زمارة رقبته ، مخلصوش منى غير الوليه صالحه قاصين .. ما علينا .. إيه أخبار كم انتم . ازاى أختك خديجه ؟.

الشيخ جاد : مبسوطه وأشيتها رضا .. من يوم ما متى ، وجوزها مهنيها وباسطها وما تخنقش معاها ولا خناقه .

عبد الصبور: (يقرأ) الضلالى ابن الضلالى .. هوا انا يعنى كنت ضبابه على عينه ، والا راكزه على نفسه ، يا حبيبتى يا بنتى ، لازم مفيش حد قادر يسودلك عيشته زى ماكنت باعمل ، لازم راكبك وموريك الويل ، وازاى خالتك زنوبه ؟.

الشيخ جاد : بتدعى عليكى ان ربنا يجحمك .. وكل ما تشوفنى تقول : جاتها داهيه امك مطرح ما راحت .. من يوم ما ماتت والدنيا رايقه بلوزه .. وانا مش قادر اكلمها و لا اهب فيها .

عبد الصبور: (يقرأ) أصلك مره طالع لابوك .. وبتسكت لها ليه ؟ خايف منها ؟. الشيخ جاد: لا .

عبد الصبور: (يقرأ) أمال إيه ؟.

الشيخ جاد : الحقيقه انى شايف انها على حق .. أصل انت يا ام كان لسانك زفر قوى ، ما كانش حد يطيقك . فاكره لما دلقتى حلة الملوخيه الحامضه على دماغ الشيخ شوشه ؟.

عبد الصبور: (يقرأ) ما هو كان كان يستاهل اكترم اللي جراله ، مش كان هوا اللي خسر ابوك ، ومعلمه السهر والبصبصه ؟.

زكى : (متململا) يا الله بقى يا أخى قول لها تنصرف ، احنا ما عندناش

وقت للكلام الفارغ ده (الكوب يهتز بشدة) .

عبد الصبور : طيب ، طيب ، ما تزعليش حقك على .

زكى : (خائفا)مالها ! بتقول إيه ؟

عبد الصبور : (يقرأ) بتقول قول للواد الاقرع اللي ينقرص في لسانه يثلم ، لحسن والنبي ، واللي نبا النبي تدشدش الكبايه على نفوخك .

زكى : لا. مفيش لزوم، وعلى إيه؟. قل لها انا راجل غلبان، وصاحب عيال. الشيخ جاد : عايزه حاجه يا ام ؟.

عبد الصُبور : (يقرأ) عايزاك تطلع القرافه على روحى بحلتين مفتقه وحلة حلبه وربطة حنا بغدادى .

الشيخ جاد : من عنيه يا ام ، بس المفتقه بقت غاليه أو ى اليومين دول ، ما تخليهم حله واحده ، هو انتى مبطلتيش الفجعه دى ؟.

عبد الصبور: (يقوأ) لسه برضك مقرم .. وتموت ع المليم ؟ هوا انا خساره فيه حلتين مفتقه .. ؟ إن شا الله تنطس فى عنيك ، ياما شلتك وياما ربيتك .. آدى آخرة ترييتى وتعبى ، تستخسر فيه حلة مفتقه !.

محجوب : (وقد ضاق ذرعا) يا أخى أرجوك .. أنا حاطُّلع عليها باربع حلل .. بس قول لها تتفضل بقى .. وتروح لحالها .. كفايه ، عايزين نشوف شغلنا .

الشيخ جاد : طيب يا ام ، اتفضلي انتي بقى .. ابقى سلمي على ابويا ، وقولي له : التعميره اللي كان مخبيها في الطقيسي .. لقيتها مغشوشه ومخلوطه بحنه وتراب .. هي دى اللي جابت أجله .. الله يرحمه ويحسن إليه .. مع السلامه يا ام .

عبد الصبور : (يقرأ) مع السلامه .

زكى : (متنهدا بارتياح) مع ألف سلامه ، حلى عنا بقى دى أم دى يا شيخ جاد . . الله يكون في عون عزرائيل اللي قبض روحها .

عبد الصبور : دلوقت خلونانخش بقي ع المهم .. هيه . نبتدي ٢٠.

محجوب : (بلهجه حزينة) أيوه .. نبتدى .

الشیخ جاد : (یفرك یدیه مسرورا) أیوه نبتدی .. دی الحكایه سهل أوی .. قولوا بس أنهی روح عایزین تنزلوها ، وانسا انزلهالكسو زی العصفوره .. طلباتكم ؟.

عبد الصبور: اسكت انت يا شيخ جاد .. كل اللي عليك انك تحط صباعك وتسكت . اوعى تتكلم والا تتنفس لحسن تطرد الأرواح .

الشيخ جاد: أنا بطرد الأرواح. أمال امي نزلت لي ليه ؟.

عبد الصبور : علشان امك من نفس النوع الواطى بتاعك .. يعنى فيه توافق بين أرواحكم .. يعنى زى المتعوس وخايب الرجا .. فاهم ؟.

الشيخ جاد : عيب يا سي عبد الصبور .. تجيب سيرة أمي .. دى برضه حرمه وميته .. وانا ما احبش حد يجيب سيرة امي أبدا .

زكى: لا .. باين عليك متربي وابن ناس!.

عبد الصبور: دلوقتی حطوا صوابعکم علی الکبایه .. عایز صمت .. وسکون .. سکون .. سکون .. ارتفعوا بأذهانکم .. حلقوا بأرواحکـــم .. سمو .. وارتفاع .. لا مادیات ولا أرضیات .

(يسمع فجأة صوت دقات شديدة بالهون في المطبخ)

عبد الصبور: (فرعا) إيه ده ؟ إيه الدق الفظيع ده ؟ إيه الضجه المزعجه دى ؟ واد يا زينهم . . بت يا سنيه ؟ .

(تدخل سنيه وهي تحمل إيد الهون)

سنية : يوه مالك يا سيدى .. بتصرخ كده ليه .. حصل إيه ؟

عبد الصبور: انتم وحوش .. انتم مجانين .. ايه الدق المريع ده ؟!.

سنية : هو إيه أصله ده .. دانا بدق الكفته .

عبد الصبور : (صائحا) كفته إيه .. وزفت إيه .. وبلا أزرق إيه .. ده وقت كفته !!.. فيه أرواح تنزل على دق الكفته ؟.. انتوا إيه .. جنسكوا إيه ؟

الشيخ جاد: وما تنزلش ليه على دق الكفته ؟.. أمال روح العجاتى .. وروح الشيمى حايبقوا ينزلوا على إيه .. على دق الطبل .. واللا على دق الزار .. كل شيلله ويشبهلله ، كل شيخ وله طريقه .

عبد الصبور: اسكت يا شيخ هباب . مين قال لك انى عايز انزل روح العجاتى والا روح الشيمي . . إحنا عايزين روح ناعمه . روح رقيقه .

الشيخ جاد : طب خلاص . فهمنا كده ، روحى يا بت دق على واحده ونص . (سنية تختفى .. بعد حين يسمع دق مثل طبل الرقص على واحدة ونص) .

عبد الصبور: (هائجا) بس يا بنت الصرمه .. بلاش مسخره فارغه .. عايزين سكون مطبق ، سكون خالص .. ما فيش كفته ، ما فيش تقليه ، ما فيش ملوخيه ، ما فيش ماده ، فيه سمو ، فيه ارتفاع ، فيه إحساسات فياضه .. فيه عواطف رقيقه .. فيه تفكير سماوى ، سكون ، سكون ، ياللا حطوا صوابعكم .. وارتفعوا بأرواحكم .. اسم الروح اللي انت عايزها إيه يا أستاذ محجوب ؟

محجوب : (يتنهله بحزن)نعيمه .

عبد الصبور : أبوها ؟.

محجوب : محمد .

عبد الصبور : (فى ضيق) محمد إيه .. لازم يكون محمد حاجه .. هو فيه حد ما اسموش محمد .. دا اسم مشاع .. زى سى .. وزى حضرة .. اسمه الكامل إيه ؟

محجوب: محمد محمد.

عبد الصبور: محمد محمد !..

عجوب : أيوه عمد محمد .. اسمه كده محمد محمد ..

عبد الصبور : محمد محمد كده حاف ، ما فيش المنفلوطي، الأسيوطي ، الفيومي ، حاجه كده مميزه ، ما فيش اسم تالت ؟ محجوب : الاسم التالت مقدرش اقوله .

عبد الصبور: ليه اعيب !.

محجوب: مشعيب ولاحاجه.

عبد الصبور: أمال إيه ! فيه إيه ؟.

محجوب : لاولاحاجه ، بس برضك محمد ، اسمه محمد محمد .. أنا ما ليش دعوه ، انت اللي قلت لي قول !.

عبد الصبور: طيب خلاص .. حصل خير ، اسمه محمد محمد محمد .. ويمكن لو بحثت شويه كان في تاريخ العيله تلاقي الاسم الرابع محمد والخامس برضه محمد ، على كل حال من باب الاختصار نسميه محمد دايره .

الشيخ جاد : أيوه محمد بن الدايره .

عبد الصبور: اللم يا شيخ قطران . اسكت انت بالتي هي أحسن . . اسم امها ؟ .

محجوب : عديله .

عبد الصبور: نعيمه بنت محمد دايره بنت عديله . كده مضبوط ؟

محجوب: أيوه مضبوط.

عبد الصبور: (ناظرا إلى السقف) يا سيده نعيمه يا بنت محمد دايره بنت عديله .

محجوب : آنسه يا أستاذ ، ماتت قبل ما تتجوز .

عبد الصبور : عدم المؤاخذه .. يا آنسه نعيمه يا بنت محمد دايره يا بنت عديله ، تسمحي بكلمه .

(الكوب لا يتحرك) .

عبد الصبور: يا ست نعيمه.

محجوب : (في حدة) آنسه با أخى قلت لك !.

عبد الصبور: آنسه ، ست ، أهو كله محصل بعضه .. يمكن يا أخى بقت ست في السما .

محجوب : لا أنا واثق منها كويس .

عبد الصبور: طيب حقك على ، يا آنسه نعيمه .. اتفضلي ، محمس دقائق ، عايزينك

فی کلمه بسیطه ، لو سمحت .

(الكوب لا يتحرك) .

عبد الصبور : وبعدين يعنى .. يا ست نعيمه لحظه واحده .. مش حا نأخسرك كتير .. (إلى الشيخ جاد) خف صباعك شويه يا شيخ جاد ما تتقلش ع الكبايه .. بس لمس . مفيش اكتر من كده .

الشيخ جاد : أنا يدوبك لا مسها .

عبد الصبور: يا ست نعيمه ، يا آنسه نعيمه ، أرجوك ما عندناش وقت . (الكوب يتحوك ببطء) .

عبد الصبور: بس .. الظاهر انها جت ، ركزوا تفكيركم فيها .. ابتعدوا بذهنكم عن الماديات (يقوأ) حاكمبوش خاناكيك (يتكلم) ده إيه الكلام الفمارغ ده .

الشيخ جاد : (لمحجوب) هي المرحومه كانت بتتكلم بالجريجي .

محجوب : جریجی إیه یا جدع . . دی مصریه من ضهر مصری .

عبد الصبور: دى لازم روح شريره بتأوز. أصل فيه أرواح كده فاضيه وتحب اللعب والمعاكسه.

الشيخ جاد : يا أخى وفيها إيه ، خليها تأوز من نفسها شويه ، لازم مضيقين عليها فى السما . الظاهر انهم جد قوى فوق ، هات الروح الملعبانيه دى ، نلعب معاها شويه خلينا نفرفش ، حد واخد منها حاجه .

زكمى : هوا ده وقت لعب يا شيخ جاد ، احنا ف إيه والا ف إيه ؟

عبدالصبور : نجرب تانی ، رکزوا أذهانکم کویس . اسموا بتفکیرکم ، فکروا فی الآخرة والملایکه والجنه والنار .. سکون ، سکون .

سنية : (من المطبخ) آى .. آى .

عبد الصبور: مالك يا بت بتصرخي ليه ؟

سنيه : زينهم قرصني .

عبد الصبور: اتلم يا زينهم لحسن اقوم اقرصك في نافوخك ، اتلم احسن لك . أنا

قلت ميت مره ما لكش دعوه بسنيه ، لحسن ادبحك .

زینهم : (مندفعا من المطبخ) هوا إیه ده ، تدبحنی ازای ! هوا ما فیش دینهم .

عبد الصبور: إيه هي الحريه الخامسه دي يا سي زينهم ؟

زينهم : حرية البصبصة ، حرية تلعيب الحواجب ، والضرب باللسان ، ومع كلا أنا غرضي شريف . . يعني بصبصتي شريفه . . أنا عايز اتجوزها . آه .

عبد الصبور: الظاهر انك عايز أجلك ينتهى ، أنا قلت ميت مره مش عايزك تجيب السيره دى على لسائك ، أنا مش عايز سيرة جواز هنا فى البيت ده أبدا ، فوت انجر من قدامى ، حلوف ابن حلوف .

(زينهم يتجه إلى المطبخ) .

عبد الصبور : عدم المؤاخذه ، نبتدي من جديد سكون ، سكون .

الشيخ جاد : سكون ، روحانيات ، سماويات ، أبوك السقا مات ، عارفين المنيخ جاد : المنولوج كله ، ياللابقى خشعلى الجد ، انده لها وخلصنا ، هي إيه ؟ السفيره عزيزه ؟!!.

عبد الصبور: انت يا شيخ قطران اسكت بلسانك. انت السبب في العطله دى ، الروح لازم مش عايزه تنزل من تحت راسك ، لازم تفكيرك مش ولا يد .. كده و الالأ ؟

الشيخ جاد : والله من جهة مش ولا بد ، فهو صحيح مش ولا بد .

عبد الصبور : بتفكر في إيه ؟ قولي لي ؟.

الشيخ جاد : عايز الحق والا ابن عمه ، أنا أصلى ما حبش الكدب .. بصراحه كده كنت بافكر في البت هانم .

عبد الصبور: هانم . هانم إيه ؟.

الشيخ جاد : هانم زبده ، هانم قشطه ، هانم حلويات ، هانم سكر نبات .. يا خساره ، يا ألف خساره .

عبد الصبور: إيه بس جراايه ؟.

الشيخ جاد : كان ميعادها امبارح تيجي تشطف حتين الغسيل ، والبيت كان فاضي مفهش حد غيرى ، وقلت يا واد احسن طريقه عشان تبلفها ، اقعدع الطشت خد لك فمين معاها .. وقعدت ، وهات يا دعك لما إيدى بقبقت ، وبعدين طلعت تنشر الهدمتين ، واستناها تنزل ما نزلتش .. أتابيها زاغت من سطوح الجيران .. أنا أصلي غلطان ، الحق علي . أستاهل ألف صرمه .. كان لازم اطلع انشر معاها ، مش اسيبها تضحك على و تزوغ مني .. أهو أنا عمال افكر . لو كنت طلعت ونشرت معاها ، مكانتش قدرت تزوغ مني و كانت نزلت معايا ،

عبد الصبور: اخص ، اخص ، اخص على التفكير السافل المنحط .. شيل صباعك من على الكبايه ، جاك قطعه دا السمو والارتفاع اللي باطلبه منك يادنى يا رمرام . هانم زبده ، وهانم قشطه ، وفمين غسيـــل ! اخص . اخص . اخص . شيل صباعك . يا دون يا بأف .

الشيخ جاد : طب خلاص شلته ، دا ماله محموق كده ليه ، هي الدنيا طارت ، هوا الغسيل حرم ، دا غسيل ، داحتي ربنا قال النظافة من الإيمان وانا كنت بعمل مع هانم شوية إيمان ، هو إيه ، حرام ؟

محجوب : (إلى الشيخ جاد) خلاص .. خلاص .. انتهينا ، شيل صباعك واسكت .

عبد الصبور : أنا حا حط صباعي معاكم .. ابعد يا شيخ جاد ؟

الشيخ جاد : بعدت . اما اشوف كده حا تعملوا إيه بشطار تكم وتفكير كم السامى ، يا الله اتفضلوا .

عبدالصبور : سكون ، سكون .

الشيخ جاد: سماويات .. روحانيات .. يا خسارتك يا هانم يا سكر نبات .

عبد الصبور: سكون ، سكون . سمو وارتفاع .. (ناظرا إلى السقف) يا نعيمه يا

بنت محمد محمد يا بنت عديله اتفضلى انزلى شويه من فضلك وإحسانك (الكوب لا يتحرك) . يا ست نعيمه وحياة والدك تنزلى شويه ، كلمه واحده بس مفيش غيرها (الكوب لا يتحرك) طبإذا كنتى مش فاضيه قولى لنا انك مش فاضيه (الكوب لا يتحرك) لا ، دى حاجه تفور الدم خالص (للجماعة) لازم فينا واحد وسيط مش كيس .

الشيخ جاد : اوعى يا شيخ كده ، شيل صباعك شيل ، أنا حافر جك ازاى تنزلها .. آل من فضلك آل .. ده مره يا سى عبد الصبور ، والنسوان ما يجوش الا بالدق على دماغهم آل إيه كلمه واحده من فضلك .. اوعى كده ، شيل إيدك من على الكبايه يا سى محجوب ، وانت عمال بتترعش ووشك اصفر زى الكركم .. سيبنى عليها بلا مياعه (يضع أصبعه على الكوب بدل محجوب وينظر إلى الكوب صائحا) انت يا بنت يا نعيمة انزلى جاكى نزله فى ركبك .. انزلى وحياة امك بلا مرقعه فارغه .. انزلى بقول لك يا بت لحسن اخلى امى تجيبك من شوشتك . فارغه .. انزلى بقول لك يا بت لحسن اخلى امى تجيبك من شوشتك . محجوب : لا .. أنا ما سمحشى .. دى وقاحه .. دى قلة أدب .. أنا ما سمحشى ..

الشيخ جاد : طب بس اتلهى انت واسكت (للروح)يا الله يا بابت انزلى بالتى هى أحسن بدل ما خلى امى تجرجرك على ملا وشك و تفرج عليكى اللى ما يتفرج ! (الكوب يهتز) شفتم مش قلت لكم النسوان ما يجوش الا بالدق (للروح) ازيك يا بت .. ازاى امك .. انتى نعيمه بنت عديله .. (الكوب يتحرك يمينا وشمالا ، والشيخ جاد يقرأ) .. أيوه .. وانت مين ؟ (للروح) محسوبك الشيخ جاد .. مأذون الصنادقيه و درب عجور وما بينهما (يقرأ) وعايز منى إيه ؟ المروح) عايز سلامتك .. عايز نتسامر شويه .. فيه مانع ؟ (للروح) ما تستلموها انتوا بقى يا جماعه أنا نزلتهالكم وانتوا

عليكوا الباق.

عبد الصبور : (للروح) يا ست نعيمه .. فيه هنا واحد قريب منك جدا .. عايز يكلمك (يقرأ) عايز منى إيه (للروح) والله عايز يقول لك شوية كلام كده (محجوب) انفضل يا أستاذ محجوب .. كلم الست نعيمه .

عجوب : (موتجفا) هى دى نعيمه ؟! حقيقى نعيمه !! أنا مش مصدق .. أنا خايف قوى .. أنا مش حاقدر اكلمها ، أنا كنت ما بقدرش اكلمها وهى فى الأرض .. كنت لما بقعد معاها لسانى ينعقد .. وقلبى يدق .. زى اللى حا ينط من صدرى .. ازاى اقدر اكلمها دلوقت .. مش مكن .. مقدرش اكلمها .. أبدا .. أبدا .

عبد الصبور: (في تبرم) كلمها ياسي محجوب ما تخليهاش واقفه ملطوعه .. كلمها · ما يصحش .

الشيخ جاد : كلمها كلمتك اجنابك .. أمال كنت مسروع عليها ليه . لما انت بسلامتك مش قادر تكلمها ! خايف من إيه ؟.. يعنى هي حا تكون اقوى من امي .. كلمها بلا نسونه .

محجوب : طب بس استنوا على شويه .. خلوني اشم نفسي وابلع ريقي .. حرام عليكوا يا ناس . دانا في حال يعلم بها ربنا .. (هامسا) نعيمه .

عبد الصبور: زعق شويه .. بلاوي إيه دي !.

محجوب : (للروح) نعيمه . (الكوب يتحوك) .

عبد الصبور: بتقول ما له كده بيصوصو .. زى ما يكون بيتكلم من تحت الأرض .. اتكلم زى البني آدمين .

محجوب: نعيمه.

الشيخ جاد : (في معخرية) إيه اللي نعيمه .. نعيمه .. ما حنا عارفين انها نعيمه .. الشيخ جاد : وهي عارفه نفسها نعيمه .. انطق قول لها عايز إيه .. انت فاكر انها

فاضيه لك .

محجوب : (للروح) أحبك يا نعيمه .

عبد الصبور: (يقرأ) حبك برص.

الشيخ جاد : تعجبيني يا بت يا نعيمه يسلم فمك .. آل احبك آل ، ياخي حبك الشيخ جاد :

محجوب : إيه ؟. هي بتقول لك كده ؟ مش ممكن .. هي ما تقولش كده أبدا !.

عبد الصبور: أنا ما جبتش حاجه من عندى يا غبى ، ابقى اقرا بنفسك الحروف. ياللا كلمها . هي مش فاضيه لك .

محجوب : حاضر . حاضر . حاكلمها (للروح) نعيمه أنا مش طايق الحياة بعدك يا حبيبتي ، مش قادر اعيش في الدنيا من غيرك ياختي .

عبد الصبور: (يقوأ) طيب وإيه اللي مقعدك في الدنيا إيه اللي ما نعك من الموت.

الشيخ جاد : آه حقيقي .. لها حق . إيه اللي ما نعك ؟.

محجوب : (مرتبكا) اللي ما نعني ، اللي ما نعني (الشيخ جاد) أقول لها إيه ، إيه اللي ما نعني ؟.

الشيخ جاد : قول لها أي حاجه ، ما دام حضرتك لازم تتفلسف وتقول لها انك مش قادر تعيش من غيرها ، قول لها الغلا ؟.

محجوب : الغلا ؟!! غلا إيه!

الشيخ جاد : غلا الحانوتيه .. غلا الموت . هوا فى حاجه مصبرَّه الواحد على غلا المعيشه غير غلا الموت .. كل حاجه دلوقت بقت متعذره .. الزيت والفول والسكن والموت .. قول لها كده ..

محجوب : ازای أقول لها کده ، عشان تفتکرنی فقیر .. شحات .. ؟ وبعدین تحتقرنی ، أنا طول عمری مفهمها ان انا راجل متیسر ، ومبحبح ، ومتریش .

الشيخ جاد : طيب خلاص ، حقك على ، قول لها اللي يعجبك ، قول لها انك متريش .

عبد الصبور : اتكلم بقي يا أخي خليت الروح زهقت . انت أصلك إيه ! انطق !.

محجوب : (للروح) مش قادر اموت يا حبيبتي .. عشا عايش على ذكراك .. اللي مهون على عيشتي إني بشوف طيفك في المنام .

عبد الصبور: (يقرأ) بيقول إيه يا ختى ده ؟.

الشيخ جاد : سيبك منه دا بيخرف .

محجوب : (للروح) ذكراك هى كل حاجه لى ، طيفك هــو اللي مصبرنى ومسلينى ، بافتكرك ليل ونهار ، بافتكر عنيك وبـقك وكـــــلامك الحلو .

عبد الصبور: (الكوب يهتز) ما فيش لزوم .

محجوب: بتقول إيه ؟.

عبد الصبور: بتقول يا سم .. يا دم .. يا كبه .

محجوب : كذاب ما بتقولش كده .. هى بتحبنى زى ما بحبها (للروح) بفتكر كلموت كلامك الحلو و بفتكر تحدفيه فوقى والتفافه اللى كنت بتفيها على .. كان هزارك لطيف .

(الكوب يهتز) .

محجوب : بتقول إيه ؟.

عبد الصبور: بتقول ما كانش هزار .. ده كان جد .

عجوب : كداب ما بتقولش كده (للروح) بفتكر في الايام الحلوه اللي قضيناها سوى .. وفي الايام اللي كنت بحلم بيكي ، وبفتكر ازاى سهنيني ، وموتى نفسك ، وسيبتيني في الدنيا لوحدى .. ليه يا نعيمه .. تتسرعى ، حقيقى الظروف ما كانتش ملائمه لجوازنا ، حقيقى الأحوال العائلية كانت بطاله .. لكن كل شيء كان مسيره يتصلح ، وكنا برضه مسيرنا نتجوز ، ليه تنتحرى عشان خاطرى ، وانا حياتى كانت فداكى .. ليه يا نعيمه !؟

(الكوب يهتز)

محجوب : إيه ؟.. فيه إيه ؟ بتقول إيه ؟.

عبد الصبور: بتقول المغفل دا بيخرف بيقول ايه ؟.

محجوب : لا .. دی دسیسه . انتوا عایزین توقعوا بینا و هی حیه .. انتوا کمان بتوقعوا بینا و هی میته ؟ حرام .. حرام علیکم .

(الكوب يهتز) .

عبد الصبور : (يقرأ) حرام إيه .. حرمت عليك عيشتك .. حب إيه وهباب إيه الل كان بينا . أنا انتحرت عشان خاطرك ؟.. يا أخي هزلت يا سي محجوب ليه الرجاله خلصم ، والا عدم .. أنا اللي زهمت مسن عيشتى ، أنا اللي لقيت الدنيا ما تستاهلشي .. أنا اللي يئست من كل حاجه مش لاقيه فيه عدل ولا رحمه حواليه أبدا في الدنيا بتاعتكم .. العدل فيها باللسان بس والرحمه بالكلام . لاقيه نفسي محرومه من كل حاجه . أبويه بيربي تمانيه زيي وبياخد اتناشر جنيه .. يعني لو كان بيربي ثمان معيز ما كانش قضاهم أكل .. تمان معيز .. واحنا تمان بنات ، لنا بق عايز ياكل ، وجسم عاوز يتغطى ، وعنين بتسبص وتشوف وتقرا المجلات وتتفرج ع الصور ، وتشوف الهدوم والصيغه والفلوس اللي بتتبعتر ، وتشوف بني آدمين زينا متخومين ، واحنا يدوبك بنلاقي اللقمة .. كنت عايشه محرومه إلا من النظر والإحساس .. ياريت ما كانش عندي نظر ولا إحساس ما كنتش حسيت بالحرمان اللي انا ميه ، ولما كان الحال يفيض بي كنت اقول يمكن تفرج بالجواز .. لكن لما افكر كنت الاق ان جواز المحرومين حا يكتر المحرومين ويزود الحرمان .. وكنت الاق ان انا حاجني على او لادي زي ما جنوا علي أهلي .. قلت يا بت احسن حاجه .. سيبي الدنيا ، ونقصى المحرومين عروم .

الشيخ جاد : لكي حق يا نعيمه يا بنتي . الله يرحمك .

محجوب : (للروح) يعني ما متيش علشاني؟. يعني ما كنتيش بتحبيني يا خاينه؟.

الشيخ جاد : بلاش لماضه بقى .. قالت لك ماتت من الجوع .. يعنى ماتت م الجوع .

محجوب : (للروح) وانا اللي كنت فاكر انك انت انتحرت عشان خاطر مش قادر اتجوزك ، أنا اللي كنت مخدوع فيكي وفاكر انك مت من حبى .. أنا اللي لابس عليكي بدله سوده وكرافته سوده ، وحالف ما اقلعهم أبدا .

عبد الصبور: (يقوأ) كرافته سوده ، وبدله سوده . إنت فاكر ان احنا هنا حاسين بالكرافته السوده والبدله السوده .. دى تفاهة أحياء ، وهيافة بنى آدمين .. روح يا خويا امضغهم .

زنيهم : (يغني **داخل المطبخ بصوت مسموع**) .

في ليله شفت الحبيب ساهي وباكي العين

وع الرصيف ماشي بيطوح على الجنسبين قـلت الهوى عذبـه والبعـد كان لــه فين

خبطته ورده لقيته طب مــات م الجوع

يا ريتني يا حلو شقه وطعميه وقرص منين

محجوب : (للروح) اخص عليكى (يخلع الكرافته السوداء) اخص عليكى يا خاينه .. يا خسارة حزنى عليكى .. يا خسارة الكرافته السوده .. شاريها بنص ريال .. خدى أهى .. (يقذف بالكرافته السوداء على الأرض ثم يغمى عليه)

عبد الصبور: (صائحا) زينهم .. سنيه .. الحقونا بكباية ميه .. الحقونا بنشادر .. يا ناس .. يا هوه .. الراجل سخسخ الحقوه .. حا يموت .

القصيلالسشاني

المنظر : حجرة جلوس عتيقة بها بعض الأرائك والكراسي ، ومكتب قديم في الركن ، وعلى جدرانها صور قديمة وآيات قرآنية ، وعلى اليسار باب يفضى إلى الصالة وعلى اليمين شباك وفي المواجهة باب زجاجي كبير ذو أربع ضلفات تبدو منه حجرة نوم عبد الصبور افندى ، في منتصفها سرير حديد ذو أربع أعمدة وضع كل عمود في صفيحة ، وأمام السرير كرسي وعلى الحائط مشجب ورف عليه كتب صفراء وعلى أعلى الباب الزجاجي علقت ساعة حائط تشير إلى الثالثة والنصف .

المشهد الأول

- سنیة : (تغنی) وان کنت خایف من امی دی امی علی ستوره .. وان کنت خایف من ابویا دا ابویا عدی المنصوره .
- زينهم : (يدخل مندفعًا حاملا في يده مكنسه) انا اخاف من ابوكى .. ليه ؟. هفيه .. دانا لو خبطته خبطه حا جيبه الأرض .. آل عدى المنصوره آل .. ما يعدى واللا ينفلق ، أنا يهمنى .. دانا زينهم والأجر على الله .. أنا زينهم صبى زكيه الملدنه .. قاهرة الوحش .. إيدك بقى يا بت يا سنيه .. قربى على يا سنسن يا للى زى اللوز ،
- سنية : خليك عندك بالتي هي أحسن .. اوعي تقرب لحسن وسيدنا الحسين اخبطك بالزهريه اللي في إيدي أفتح قرنك .
- زينهم : (في غزل) خشى على خشى .. يا سنسن يا للي زى المشبك اللي بيخر

- عسل .. اخبطینی بالزهریه .. افتحی قرنی .. موتینی .. ادبحینسی .. (مغنیا) وان دبحتینی بایدیکی عیب علی ان قلت آه .. آه .
- سنية : ابعد يا زينهم واقصر الشر .. وقول اللهم احزيك يا شيطان ، ابعد احسن لك .. لحسن والنبي أرقع بالصوت .. أجيبلك سيدي عبد الصبور
- زینهم : یا بای .. یا لطیف .. طب بس اخفیها سیره بقی .. سیدك عبد الصبور .. جاتك نیله على سیدك عبد الصبور .. ابقى خلیه ینفعك .. بكره یضیع عمر المغفله الكبری .
 - سنية : هي مين دى المغفله الكبرى ؟
- زنيهم : يعنى حا تكون مين غير ستك ام رتيبه .. فضل يضيع منها العريس ورا العريس .. لغاية ما بلغت ارذل العمر .. وحا تطلع من الدنيا قفاها يقمر عيش .. خليكى انت وراسى عبد الصبور لغاية ما تحصلى ام رتببه .. يا پت اعقلى .. حطى عقلك فى راسك واسمعى كلامى .. طاوعينى يا سنيه لحسن تندمى ؟
- سنية : أطاوعه في إيه المنيل على عينه ده ؟. ما نيش عارفه اطاوعك في إيه .. واسمع كلامك في إيه ؟
- زينهم : الكلام اللي قولتهولك الجمعه اللي فاتت لما كنت بتنشرى الغسيل فوق السطوح .
- سنية : ما نيش فاكره قلت لى إيه .. أديك طول النهار بتقول كلام فارغ زيك .. هوا انت وراك ايه غير الكلام الفارغ!
- زينهم : لا يا سنية دا ما كانش كلام فارغ .. دا كان كلام جد .. كلام صحيح .
 - سنية : قولهولى تانى ، ما نيش فاكره .
 - زينهم : طلبت منك تتجوزيني .
- سنية : أنا ؟ أتجوزك انت ؟ ليه .. انطسيت في عنيه انخبطت في نافوخيي ، اتجننت .. خلاص .. الدنيا صفصفت عليك يا سي زينهم ، الرجالـه خلصم يا روح امك ، ومع كلا انت حقيقي بتتكلم جد ، والا هزار ؟

زيهم : هزار ازاى يا سنسن ، هى الحاجات دى فيها هزار .. الدنيا دى فيها حاجتين الواحد ما يقدرش يهزر فيهم أبدا .

سنية : ايه هما ؟

زينهم : أول حاجه الجواز .

سنية : والتانيه ؟

زينهم : الموت .

سنية : يا باى على ملافظك الوحشه ، صدق من قال الملافظ سعد . . و لما انت عارف ان الجواز وحش كده زى الموت . . حتتجوز ليه ؟

زينهم : وحنموت ليه ؟!!

سنية : قضا .

زينهم : أهو دا برضك قضا .. لا بد منه ، بس قضا عن قضا يفترق ، قضا يحط في إيدك الكلبش .

سنية : والقضا التاني ؟

زينهم : يخلصك منه .

سنية : و لما انت عارف كده ، بتجرى و را الكلبش ليه ؟

زينهم : (يقترب منها) أموت في الكلبش .. أموت في طره .. يا وعدى ع العسل النحل اللي بيخر .. حاتحطي الكلبش في إيديه إمتى يا سنيه ؟

سنية : ابعد عنى كده .. كلبش لما يطبق على زمارة رقبتك .. آل كلبش آل .. حقه بطلوا آل .. ليه قالوا لك على مأمور ابو زعبل ، آل كلبش آل .. حقه بطلوا ده واسمعوا ده ، ومع كل .. انت بتتكلم جد ، ولا بتهزر ؟

زینهم : قولتلك یا حبیبتی یا سنیه .. الكلام دا ما فیهش هزار . دا جد و ابن جد . أدى إیدی حطی فیها الكلبشات .

سنية : ما كانش ينعز يا خويا.. يا ريت كان عندنا يا سي زينهم، ومع كل سيبني

أشاور عقلي . خليني أفكر . . هي المسأله كده سبهللي . . دا جواز . . دا عمر .

زينهم : تعجبينى كده .. أهو كده بقيتى بت عاقله .. مش .. أتجوزك ليه ؟ انطسيت فى عنيه ، انخبطت فى نافوخى ما يصحش الكلام ده يا سنسن .. أنا برضه بنى آدم ، ولى قيمه عند نفسى ، والاحا تعملى زى المخبول الأكبر !

سنية : دا يبقى مين ده ؟

زينهم : أخو المغفله الكبرى .

سنية : بس .. عرفته ، والنبي راجل طيب ويستاهل كل خير .

زینهم : طیب . طیب . لکن مخبول مخبول (مقلدا عبد الصبور) خبی وشك لحسن ما بطیقوش . . غطی وشك بسرعة . . شكلك بیلبشنی . . بخاف من عینیك . . بالذمه دا كلام یتقال . أنا وشی ما ینطقش ؟ . عینیه وحشین ! (ینظر إلی نفسه فی مرآة فی الحائط . . ویلعب حواجه) .

المشهد الثاني

(تدخل أم رتيبه) …

أم رتيبة : كان .. كان .. يا سي زينهم .. أدى اللي كان ناقصنا . تقف في المرايا وتلعب حواجبك في وتلعب حواجبك في المرايا .. عاجبك أوى شكلك اللي زى بوز الإخص . قال لو كان القرد شاف ...

زینهم : (مقاطعا) خلاص مفیش لزوم ، یعنی لازم تصدی نفسی .. قرد و ما قردش .. هوا یعنی الواحد کفر .. لما یشوف وشه فی المرایه !؟

أم رتيبة : ما كفرش ولا حاجه .. بس قلبي عليك ، تغم قلبك وتسد نفسك . كان نفسي تتفرج على حاجه عدله . ما علينا . فوت انجر شوف شغلك .. اوصل لعم شرف هات منه قزازة كازوزه للضيف اللي جي .. ياللا فوت .

(يخرج زينهم بعد أن يقذف بقبلة في الهواء لسنية)

زينهم : (لأم رتيبه وهو يهم بالانصراف) لا مؤاخذه يا ست . دى حاجه كده ع الماشى .. دى دفعه أولى من إيجار السجن .. دى عربون لتمن الكلبش (يصفق بيديه) أموت فى ابو زعبل عقبال عندك يا ست .

أم رتيبة : قطع لسانك .. قليل الحيا ما تختشيش .. إن شا الله انت وعشره زيك .. يستسلوك من رقبتك ويحدفوك فى أسفل سافلين .. سجن آل .. وكلبش آل .. بره وبعيد .

زينهم : (لسنيه وهو بجوار الباب) بقول لك على نياتها .. ما لهاش فى الطيب نصيب . (لأم رتيبه) انت لو عرفت السجن اللي قصدى عليه .. والكلبتش اللي بالى فيه .. لوديتى نفسك في طوكر .. آل بره و بعيد .. قولى ان شاء الله النش الشا الله . عقبال الحبايب . (يخرج زينهم)

المشهد الثالث

أم رتيبة : قصده إيه المهفوف في عقله ده .؟

سنية : ما تاخديش على كلامه يا ست .. أهو عمال بيخرف .. حدو اخد منه حاجه غير كده .

أم رتيبة : امال كلبش إيه ، وسجن إيه اللي حياً جره ويدفع عربونه ؟

سنية : (تضحك) ربنا يديكي يا ستى .

أم رتيبة : انت كمان بتقولى كده ؟

سنية : أيوه والنبي يا ستى ، لو عرفت السجن اللي عايز يخش فيه ، والكلبش اللي ناوى يحطه في إيديه .. لتدعى بيه على الحبايب .

أم رتيبة : ولا انا فاهمه حاجه .

: زينهم قصده بالكلبش والسجن ، الخطوبه والجواز . سنية : طيب وهوا ماله ومال الخطوبه والجواز .. هوا ماله وش الفقر ده . أم رتيبة : (تضحك) أصله يا ستى عقبال عندك خطبني ، والنبي يا ستى بقاله سنية كام شهر و هو ابيزن على وداني . : (تبدو عليها الفرحة) بقى كده .. المنيل على عينه أبو تعسونه كان أم رتيبة بيخطب ويتجوز .. وقلت له إيه ؟ : قلت له .. لا . سنية : لا تسيب مفاصلك ، فيه حد تيجي له النعمه لغاية عنده ويرفضها ، أم رتيبة حد في الدنيا يجيه عريس ويقول لا ؟ : مش يتقولي عليه المنيل على عينه أبو تعسونه ؟ سنية : طيب وفيها إيه ، دي حاجه ودي حاجه .. دي بشقه ودي بشقه ، أم رتيبة مشراجل ؟ كفايه ؟ : بس يا ستى حاله على أده . سئية : بكره ربنا يعدل حاله ، والا يعني حاتكتر على ربنا ؟ أم رتيبة : أنا برضه يا ست ما قلتش لا .. يعني لا .. قلت سيبني لما افكر . سنية : وتفكري في إيه ؟ وليه ؟ هي دي حاجه عايزه تفكير ، ارضي يا أم رتيبة بت . . ارضى به ، دا اللي ما يرضى بالخوخ يرضى بشرابه . . وعريس في اليد ، أحسن من عشرة عند الخاطبه . : بس يا ستى خايفه من سى عبد الصبور . سئبة أم رتيبة : وماله سيدك هباب ؟ : خايفه لا ما يو افقش. سنية : وهوا ماله .. له عندك حاجه .. أبوكي ! أمك !.. حقه بطلوا ده أم رتيبة واسمعوا ده . : أنا أصلي شايفاه دايما ساخط على زينهم وما يطيقش يشوفه .. ودايما

يقول لي اوعي منه يا بت دا أصله خسيس و خبيث.

سئية

أم رتيبة : هوا فيه حد عنده مش خسيس وخبيث .. هوا كده دايما يكره العرسان ويطلع فيهم القطط الفاطسه .. الود وده الجواز يحرم على العالم .. والناس تقعد كلها زيه كده عزاب حقه عجايب .. مش كفايه ميل بختى .. هوا عايز بميل بخت اللي يعرفه واللي ما يعرفوش .. ارضي يا بت ارضی واسمعی کلامی .. ارضی دا العمر مش بعزقه ، والایام بتجري زي ما يكون حدوراها بالكرباج . سنية

: واذا ما رضاش ؟

: هوا مين دا اللي ما يرضاش إ. أم رتيبة

سنية : سيدى عبد الصبور .

أم رتيبة : ولا يهمك .. كل واحد بيقول يا الله نفسي . آل يا روحي ما بعدك روح . . شوفي مصلحتك يا بنتي . . بكره لا ينفعك ست ولا سيد . . ما حدش له عندك حاجه .. الدور على اللي مسنسلني معاه ومجرجرني وراه .. وسادد طريقي ومميل بختي .. وبيطفش مني العرسان بوشه اللي يقطع الخميره م البيت . . ربك يستر النهارده . . قادر يا كريم تعقله وتهديه ، وتحلي في عينه سي سيد افندي .. وتجعل الخير على قدوم الواردين وتخلى نهارنا لبن.

: ان شِاء الله يا ستى سليمه . سنية

: سليمه يا بنتي بإذن الله . أم رتيبة

> : ربنا يتمم بخير . سنية

: خير وألف خير .. أنا عيني الشمال بترف ، وعمرها ما رفت الا على أم رتيبة

: خير يا ستى خير . سنية

: وحكاية جوازك دا كمان فال كويس .. خلاني استبشر خير .. هوا أم رتيبة ياختى اتأخر ليه !

: ما تقلقیش یا ستی .. أهو زمانه جای .. هوا معاده کام ؟ سنبة أم رتيبة : ست ام سيد قالتلي حاييجي الساعه اربعه .

سنية : لسه بدرى قدامه ربع ساعه .. يكون سيدى عبد الصبور شرب القهوة و شم النشوق و و زن دماغه .. يقابله و هو فايق و رايق .

(يسمع صوت عبد الصبور افندى وتدور المناقشة بينه وبين زينهم من الخارج) .

عبد الصبور: (صارحا) القبقاب.

زينهم : (يجيبه من الخارج أيضا) حاضر . حاضر حا جبهولك .

عبد الصبور : يا باى .. يا باى . يا حفيظ يا مغيث .. خبى وشك يا خسيس يا إبليس يا خبيث يا منحوس .. خبى وشك لحسن بتلبش جنتي .

زينهم : امال حا جيبلك القبقاب ازاى وانا مش لاق الوش قدامي عشان البسه ، خيى و شك انت لغاية ما جيبهولك .

عبد الصبور: اناحا غمض عنيه ؟

زينهم : يكون أحسن .

عبد الصبور : خلاص .

زينهم : لسه.

عبد الصبور: خلاص ؟

زينهم : لسه .

آم رتيبة : الحقيه بالقبقاب يا سنيه يا حبيبتى .. الحقيه قبل ما يتلبش ويخلى يومنا زى بعضه .. شوفيهوله تحت الكنبه اللى قاعد عليها ، ولا دورى عليه في رجليه .. ما هو اليومين دول خلاص عمى .. تبقى الحاجه في إيده والا في رجله ويقلب الدنيا عليها .

زينهم : (صائحا من الخارج) يا سلام . يا سلام . امال إيه اللي في رجلك ده ؟

(عبد الصبور يدخل من باب حجرة النوم وهو يطرقع بالقبقاب وقد ارتدى جلبابا وطرطورا وظهرت أرجل السروال الطويل من

أسفل الجلباب) .

عبد الصبور: مش قصدى على القبقاب ده .. قصدى على القبقاب ابو جلاجل.. القبقاب الموسيقى .. هو اللي بيهدى أعصابي ويريح جتتى .

أم رتيبة : روحى يا حبيبتى يا سنيه شوفى له الحاجه اللي هوا عايزها. طيبى خاطره شويه يا سنيه يا بنتى . هديه لاجل خاطرى ، وابعدى عنه المقروص زينهم ما دام بيلبش جتته .

(أم رتيبه تخرج من باب الصالون .. وسنيه تدخل إلى حجرة النوم من الباب المتسع حبث يجلس عبد الصبور افندى على فوتيل أمام السرير وبجواره منضدة صغيرة) .

المشهد الرابع

عبد الصبور: القبقاب ابو جلاجل.

سنية : عنيَّه يا سيدي . أبو جلاجل وابو صاجات ، وابو سنه دهب لولي .

عبد الصبور: اخلصي بسرعه.

سنية : بس صبرك على ياسيدى ، اناحا جيبهولك من تحت طقاطيق الأرض . (سنية تبحث تحت المقعد وتحت السرير . . ثم تخرج قبقاب منقوش بجلاجل) .

سنية : اتفضل يا سيدى . . قبقاب العافيه . . قبقاب السعد والهنا .

عبد الصبور: ومخبيبته ليه تحت السرير، هوا معيبه والامعيره!

سنية : أبدا .. يا سيدى أبدا .. دا زينة القباقيب .. احنا بس خايفين عليه م العين (تصدر حركة منع الحسد وتدور يأصابعها متجمعة فوق القبقاب) .

عبد الصبور: كلام فارغ ، أنا ما صدقش في العين .. أنا عايزه ينحط دايما وبوزه باين من تحت السرير ، عايز اشوفه قدامي واتملي منه . سنية : اسم الله على بوزه . من عنيه يا سيدى .

عبد الصبور : دلوقتی سیبهولی قدامی ، وروحی هاتی لی القروانه ، وابعتی لی ستك ام رتیبه عشان اقرا لها شویه .. أنور مخها .

سنیة : حاضر یا سیدی (تخرج وهی تنادی) ستی . ستی . کلمی سیدی عشان عایز ینور مخل شویه .. الله ینور علیه .. ویهدیه کان و کان . (تدخل آم رتیبه) .

المشهد الخامس

عبد الصبور: اقعدى .. قدامى .

أم رتيبة : عايز إيه .. انا مش فاضيه لك .

عبد الصبور: اقعدى يا جاهله ، اقعدى يا مسكينه ، يا مضيعه عمرك في ظلمات الجهل ، يا تايهه في دياجير الحياه .. اقعدى لما افتح ذهنك شويه يا بائسه .. يا تعسه . اقعدى لما اديك شوية نور .. يخففوا عنك العتمه اللي انت فيها اقعدى يا غلبانه .

أم رتيبة : يا خويه اعتقنى شويه لوجه الله .. كفايه بقى فلبت دماغى باللت والعجن اللي كل يوم تصدعنى بيه ، انا مش عايزه نورك ده .. انا مبسوطه كده من العتمه اللي انا فيها .

عبد الصبور: طبعا . طبعا . زى كل جاهل ، وأخو الجهالة فى الشقاوة ينعم . . ولكن انا لازم انورك غصب عنك ، انا مسئول عن إخراجك من الشقاوه اللى انتى بتر تعى فيها ، دا واجب على . . انا لازم اعلمك كل حاجه عشام حا حتاجلك فى وقت الزنقه ، من سوء البخت ، انك أقرب الناس لى ، ولا فيش حد حاعتمد عليه فى المهمه الكيرى غيرك . . اقعدى .

أم رتيبة : (تجلس متربعة على سجادة صغيرة على الأرض) حل عنى شويه

بقى .. مهمه كبرى إيه يا خويا وصغرى إيه!

عيد الصبور: بكره تعرفى ، بعدين تعرفى ، انت حا تكونى شريكه فى أكبر حدث فى التاريخ ، انت حا تقومى بدور ، ما نتش قده ، ولا حمله ، لكن اعمل إيه مفيش غيرك .. انت حا تخلدى فى التاريخ رغم أنفك .. حا تبقى عظيمه غصبن عنك .. يدى الحلق للى بلا و دان .

أم رتيبة : يا خويا اللي يفرقه العويل يسفه .. أنا لا عاوزه منك لا حلق ولا إسوره . هوا انت من يوم ما جبت لي الكردان الفالصو ، هان عليك تجيب لي حاجه بعده ؟.

عبد الصبور: كردان إيه ، وإسورة إيه ، ياوليه يا جاهله دا مثل ، دا مجاز .. انا قصدى انك حا يبقى لك شأن ، وانت بلا شأن ، حا تبقى حاجه ، وانت تور الله فى حاجه ، وانت مش حاجه . حا تبقى عظيمه ، وانت تور الله فى برسيمه ، فهمت والا لا .. عشان كده انا عايز آنورك شويه عايز اخليكى تور ، لكن متنور شويه . عايزك تفهمى حاجه عشان خاطر تساعديني .

أم رتيبة : أساعدك في ايه بس يا خويا يا عبد الصبور ؟

عبد الصبور: بعدين تفهمي . بعدين حا تعرفي كل حاجه .

أم رتيبة : أنا ورايا شغل .. لازم اشوفه عشان فيه ناس ضيوف جايين لك دلوقت .. وانت لازم تقوم تلبس علشان تستقبلهم .

عبد الصبور: ضيوف ؟ ضيوف مين ؟

أم رتيبة : جارنا سي سيد افندى . . الست ام سيد قالت لي انه حا ييجي يزورك .

عبد الصبور: عشان إيه . عايز مني إيه ؟

أم رتيبة : أنا عارفه .. وهي الناس بيزوروا بعض عشان إيه ، يمكن عايز يأتنس بيك .

عبد الصبور: أنامش عاوز حدياً تنس بيه ، أنا كده كويس .. مثتنس بنفسى .. أكتر من أى حد تانى .. خلاص .. مش عايز اقابل حد .

أم رتيبة : والضيف اللي جاى ده نطرده ؟. مفيش داعى يا خويا للحاجات دى ، أهو قابله برضك واقعد معاه شويه ، واجبر بخاطره .

عبد الصبور: ع العموم .. مش وقته دلوقت ، المهم انى اقرا لك دلوقت بقية الباب الرابع ، وبعدين يبقى يُعلها ربنا دلوقت اسمعي كويس ، وخلى مخك معايا .. احنا كنا بنقرا فى باب « أشباح (الأحياء » .. وقفنا لغاية « البحث النفساني » .

أم رتيبة : حاضر يا خويا ، سامعاك كويس قوى .. اقرا في عفساريت الأحياء .

عبد الصبور: (يمسك كتاب ويأخذ في القراءة . وأم رتيبه تنعس أتنساء القراءة) : « ولا يجب أن ننسى ، من جهة أخرى ، أن المكان هو الذى يوجد التقسيمات الواضحة .. فأجسامنا خارجية بعضها عن بعض في المكان ، ونفوسنا من حيث هي مرتبطة بهذه الأجسام ، تفصلها بعضها عن يعض مسافات ولكن إذا لم تكن النفوس ملتحمة بالجسد إلا في جزء منها كان من الممكن أن نعتبر أن يكون ثمة تداخل متبادل فيما عدا ذلك الجزء ، وكان الممكن أن يتم بين النفوس المختلفة تبادلات شبيهة بظاهرات التداخل ، وإذا صح وجود هذا التواصل كان لا بد أن الطبيعة قد اتخذت الاحتياطات التي تحول دون ضرره ، ولعل هذه هو موضوع : « البحث النفساني » لعل الرؤية الصادقة تتم على هذا النحو وكذلك تظهر أشباح الأحياء » فاهمه يا أم رتيبه ؟

أم رتيبة : (مستيقظة) أبدا ، مش فاهمه حاجه أبدا . عبد الصبور : ولا انا . . على العموم الفهم مش مهم ، الكتب دى معموله مخصوص عشان ما تتفهمش ، دا تـلاقى اللي كاتبها نــفسه ، مش فاهمها .. فيه ناس اختصاصيين في الكتابه اللي ما تتفهمش .

(تدخل سنيه حاملة قروانه نحاس وإبريق ملئ بالماء الساخن) .

سنية : كلمى يا ست . ست ام سيد عايزاك من الشباك .

(أمرتيبة تنهض)

عبد الصبور: (بإصوار) خليكي قاعده لما اكمل لك الفصل.

أم رتيبة : (تهرول خارجه) هوا إيه أصله ده .. هوا حكم قراقوش ، الوليه و اقفه ع الشباك . دا حتى ما يصحش .

عبد الصبور: (يضع الكتاب جانبا) طيب بس ما تغبيش كلمه ورد غطاها .. أصل انا عارفك وليه رغايه .. اللي انشال من مخك انحط في لسانك .

(يرفع عبد الصبور طرف جلبابه ، ويشمر سرواله ويضع ساقيه في القروان) .

المشهد السادس

عبد الصبور: يا للا ادلقي .

سنية : دى ناريا سيدى . لما تبرد شويه .

عبد الصبور: مش مهم النار .. أنا احب النار اللي في الأرض.

سنية : ليه بس يا سيدى ؟. بعد الشر.

عبد الصبور: ما بعدش ولا حاجه .. لو ما دقناش النار في الأرض حا ندقها في السما .. بني آدم لازم يدوق النار .. يا نار الحرمان في الأرض .. يا نار العذاب في السما .. ربنا قال كده يا سنيه .. حا نعمل ايه ؟ اهو الواحد منا قدامه خمره و نسوان و فرفشه في الأرض ، و خمره و نسوان و فرفشه في السما يا يا خد اللي في الأرض .. يا يا خد اللي في السما .. فيه ناس بينسر عوا على اللي في الأرض و ينسوا اللي في السما .. فيه ناس بينسر عوا على اللي في الأرض و ينسوا اللي في

السما .

سنية : وانت يا سيدى ؟

عبد الصبور: أنا معشم نفسى باللى فى السما .. أصل العمر فى الأرض قصير يا سنيه .. دى فركة كعب . النهارده بنتولد وبكره بنموت .. أنا فاكر نفسى امبارح لسه فى اللفه . وانتى يا سنيه .. ناويه تفرفشى فى الأرض والا فى السما ؟

سنية : (تضحك) هي ، هي ، .. في الأرض يا سيدي .. السما بعيده قوى .. وما حدش عارف إيه اللي فيها .. بعيده بعيده .. واللي قبلنا ما حدش عرف مصيرهم إيه .. بيفرفشوا في السما حقيقي والا بيدوبوا في التراب .

عبد الصبور: الجسد هوا اللي بيدوب في التراب .. لكن الروح بتنطلق حره .. طليقه زي النسمه الساريه ..

سنية : مين يعرف أهو كلام بيقولوه .. حدراح هناك وقال لك ؟ عبد الصبور: أهى دى المشكله .. دى الحاجه اللى تبدد الإيمان .. البنى آدم عايز حاجه ملموسه قدامه .. دى العقده اللى عايز احلها .. دى المسأله المستعصيه اللى انا عايز اوصل لها .. أنا لازم اعملها .

سنية : تعمل إيه يا سيدى بعد الشر ؟.

عبد الصبور: مش وقته ، بكره تعرفوا ، بكره حاعمل لكم المعجزه الكبرى ، بكره حاحكى لكم على العالم الواسع المجهول ، واكشف لكم خبايا الظلمات المحيطه بأجسادكم الفانيه .. ما علينا .. مش وقته ده .. حطى كان شويه ميه .. فين علبه النشوق .. انا مش قلت لك دايما حطيهالى على الترابيزه جنبى .

سنية : والنبى يا سيدى كنت حطاها مطرحها .. يمكن حد شالها فى الدولاب .

(تذهب لإحضار علبة النشوق من الدولاب) .

عبد الصبور: ما فيش غير زينهم .. هوا ما فيش غيره اللي بيدعبس في حاجاتي .. هوا اللي معكنن على عيشستي .. هوا الخنيس الخبيث .

سنیه : والنبی زینهم مظلوم یا سیدی . . دا أمیر وطیب و ابن حلال و قلبه أبیض و یحیك قوی .

عبد الصبور: لكن انا ماحبوش، منظره بيلبش جنتي ..

سنية : والنبى يا سيدى دا دايما يشكر فيك قوى ، والنهار ده كان قاعد يقول ان هوه ما لوش حد غيرك ، وكلمنى في موضوع وكنت عايزه استشيرك فيه ، حاكم انا مقدرش اعمل حاجه الالما آخد رأيك يا سيدى . . أصل عقلك يعجبني أوى .

عبد الصبور: إيه هوا الموضوع ده ؟.

سنية : أصل زينهم قاللي ..

عبد الصبور: (مقاطعا) قال لك ايه ؟.

سنية : قال لي إنه كان عايز ..

عبد الصبور: (مقاطعا في دهش) عايز ايه ما تنطقي ؟.

سنية: أنا أصل مكسوفه أوى يا سيدى .

عبد الصبور: أنا مانا عارفه ماوراهش غير الكسوف والسفاله وقلة الحيا.

سنية : أبدايا سيدى المره دى ما قالش حاجه فيها سفاله و لا قلة حيا . . دا قاللي انه عايز يتجوزني على سنة الله ورسوله .

عبد الصبور: (منتفضا من الغضب) يتجوزك 11 ؟٩. الهفيه .. ابن الهفيسه .. الضايع ابن الضايع ، والله عال يا سي زينهم ، بقيت بني آدم وعايز تتجوز ، والنبي لاقطع دابرك وابطلك تجيب السيره دى .. تتجوز .. يا مقطوع ، يالمام السبارس . يا عسرة ياخي جاك جنازه حره .. يا مقطوع ، يالمام السبارس . يا عسرة العرر .. ما بقاش الاسي زينهم كان اللي يجيب سيرة الجواز في الببت ده .. أهو ده اللي كان ناقص .. لكن معلهش أنا برضك استاهل الل

خليته يشم نفسه ، ويفتكر نفسه راجل . لو كنت خليته زى ما كان داير بشرشين الجزر وعودين الملانه وعرقين الحلبه الخضرا .. ما كانش اتفرعن وقال اتجوز .

سنیه : یوه یا سیدی هدی نفسك هدی .. ما تعكرش دمك كده .. دا عشره زی زینهم فی ضفر رجلیك .. خدلك تنشیقه وصلی علی النبی .

عبد الصبور: (يتناول تنشيقه ويعطس) سي زينهم عايز يتجوز .. الاقرع النزهي عايز يتجوز ؟. ياخي ينسم .. وانتي قلتي له إيه ؟.. ما تفتيش في وشه ؟. ما رقعتهش صرمتين على نافوخه ؟. ما بلغتيش القسم ؟.

سنیة : یوه یا سیدی .. لیه بس دا کله .. هوا کفر . أنا قلت له سیبنی لما افکر ، وقلت لنفسی یا بت استشیری سیدك عبد الصبور ، راجل صاحب شوره و کله عقل .

عبد الصبور: هي دى عايزه شوره ؟ هوا الجواز ده عايز شوره ، هوا فيه حاجه جايده المصايب والمتاعب لخلق الله أجمعين غير الجواز .. صحيح النبي قال « تناكحوا تناسلوا ، فإنى مباه بكم الأمم يوم القيامه » ولكن مش عشان سي زينهم يتجوز والا الوحش والا زكيه الملدنه ، هم دول يتباهي بيهم ؟

سنية : ليه كده يا سيدى .. ناقصين رجل والا ناقصين عين !. ما كل الخلق كده وحشين زينا . ما فيش حد احسن من حد .

عبد الصبور: أبدا إحنا أوحش كتير من بقية الخلق .. يعنى لو بقية الخلف فيهم خمسه في المايه وحاشه ، احنا كده بالقليل خالص ، عندنا خمسه وتسعين وحاشه .. ثم نفرض ان احنا وحشين زى بقية الخلق ، ليه نتكاثر ونتناسل ونعمل عقلنا بعقل بقية الخلق .. ليه نزود الدنيا بلاوى .. كل المصايب جايه من الجواز .

(أمرتية)

سنية : يا سيدى دا نص الدين .

عبد الصبور: نص أنهي دين ؟ الدين اللي نسيناه ؟ الدين اللي مش موجود ؟. يعني نص المفيش .. يعنى مفيش .. اسمعي يا سنيه .. انت زى بنتي ، و لازم ارسيكي .. انت زي كل النسوان قللات العقل ، انتم معذورين لأن ربنا خلقكم كده من غير عقل ، لأن مفيش حاجه بتعملوها عايزه عقل، اسمعي نصيحتي.. أنا راجل عندي عقل، شوفي.. أنا حا شرح لك حالتك قبل الجواز وبعد الجواز حاجيبها لك على بلاطه .. انت دلوقت بنت شايفه كيفك ، فرحانه يروحك ، خفيفه لطيفه ، شمه نفسك ، راسك لفوق ، صدرك لقدام ، بطنك لجوه ، مفيش عليكم ، حمل ولا عبء ، بعد الجواز حا تبقى إيه ؟. نفسك اللي كنت شماه حا ينقطع ، حا تبقى وليه غلبانه كحيانه ، صدرك لتحت ، بطنك لقدام . شايله فيها أول حمل تقبل بارك على نفسك ، وهادد حيلك ، ومميل خالك . . و بعدين تخلفي . . يعني تشيل الحمل اللي في بطنك تحطيه على كتفك .. وصدرك اللي كان لفوق ، حا يبقى زى الكتينه تلفيه على صباعك ، وبعدين تفضلي كده ما لكيش شغله غير تجيبي حمل تحطيه في بطنك وبعدين تنقلي الحمل من بطنك تحطيسه على كتفك ، لا نوم تشوفي ، ولا راحه تدوقي . النهارده الولد عيبي .. النهارده عطس .. النهارده كح . النهارده بيسنن . النهارده سهل . النهارده حصبه . النهارده سعال ديكي . يا لطيف ، يا لطيف . . و بعد دا كله ، جوزك اللي كان بيجري وراكي ، وبيدوب في دباديب رجليكي ، يبقى طهقان منك وزهقان من خلقتك وتبقى أي واحده من الشارع أجمل منك في عينه الفارغه اللي ما يملهاش غير التراب. آدی یا ستی الجواز . آدی الهباب ، اللی بتجری وراه کل واحده ، مبسوطه منه ؟.

: لكن يا سيدى دا واجب لازم نأديه ، إذا كان كل واحد حا يتهرب

منه .. الدنيا تعمر ازاي .. والولاد ييجوا منين ؟.

عبد الصبور: يا ستى عنهم ما جم . ما فيش داعي بيجوا أبدا .

سنية : و لما نموت احنا والدنيا تخلص ؟.

عبد الصبور: يا ستى تخلص .. يعنى فيها إيه غير العذاب .. هوا احنا مش حاسين بالعذاب اللي فيها ، هوا مش احنا اللي قايلين (تعب كلها الحياه) .. هوا مش احنا اللي قايلين ان (هذا جناه أبي على) .. ليه نجنى على أو لادنا اذا كنا عارفين ان مجايبهم في الدنيا جنايه ؟.

سنية : لكن يعنى قصدك كده . الدنيا تخلص و لا يبقاش فيها ناس ؟.

عبد الصبور : أيوه .. ما يبقاش فيها ناس .. ويبقى هوا يشوف له تصريفه فيها .

سنية : هو مين ده ؟.

عبد الصبور: ربنا .. اللي نظمها وخلقنا فيها ، خلانا عرضه لعذابها ، وعــذاب الآخره .. ما فيش داعى يسيبنا فيها حيرانين ، لاحنا عارفين جينا منين ولا رايحين فين ، وورانا الخير وانشر ، وقال اختاروا بين الاتنين .. نختار ازاى واحنا نفوسنا كلها سفاله وقلوبنا كلها ش ؟

سنية : أستغفر الله العظيم .. من كل ذنب عظيم .. انت جراك. ايمه يما سيدى .. انت ما كنتش كده أبدا ؟. انت طول عمرك مؤمن وموحد بالله !.

عبد الصبور : هوا انا قلت مش مؤمن . أنا بس حيران قلقان . فيه حاجات كتيره عايز اعرفها ومش عارفها . أنا مش فاهم ؟.

سنية . ي مش فاهم إيه ع.

عبد الصبور: مش فاهم الحاجات اللي انت ما بنحاوليش تفهميها .. وعشان كده انت مستريحه ومبسوطه ، أصل الحاجات دى مش عايزه فهم ، دى عايزه جهل ، أو تجاهل ، عايزه الواحد ياخدها كده عمياني .. يؤمن بها بقلبه مش بذهنه .

سنية : والله ما انا فاهمه حاجه م اللي بتقوله ؟.

عبد الصبور: أحسن ، أحسن كتير ، على العموم سيبك م الكلام ده كله ، المهم عندى انك ما تتجوزيش ، وخصوصا زينهم الكلب ، الخسيس الخبيث ، السافل المنحط ، بوز الإخص .

(يدخل زينهم مصفقا بيديه طربا من باب حجرة الجلوس منشدا) .

زينهم : ياتلتميت مرحبه وسلامات ياخللي ، يـاللي تكيـد العــوازل وانت داخللي .

عبد الصبور: يا باي ، يا لطيف . برضك داخللي عريان ؟.

زينهم : لا عريان و لا مكسى .. اللى مش عاجبه وشى يغمض ، الوش الورق الست حطت فيه الملح ، ومع كل ، أنا حاقفل الباب اللى بينى وبينك . عدم المؤاخذه أصل فيه ضيوف جايين ، والست بتقول لك كفاياك بقى نقع رجلين .. دول لو كانوا حجر كانوا باشوا .. قوم اتفضل قابل الضيوف .. (يغلق الباب الزجاجي) .

عبد الصبور: (من وراء الباب) ما باقابلش ضيوف ، أنا مش فاضى للحاجات الأرضيه دى ، أنا مشغول في حاجات أكبر ...

زينهم : الله يكون في عونك . . الحقيقه مشغول قوى بتتعب خالص من قروانة الميه السخنه ، وعلية النشوق .

(یسمع طرق علی الباب الخارجی وصوت سید افندی من الخارج) .

سید افندی : (یتحنح) یا ساتر .

أم رتيبة : (من بعيد) يا واديا زينهم ، شوف مين على الباب .

زينهم : (لنفسه) يعنى حا يكون مين غير عريس الهنا (بصوت عالى) اتفضل .

(يدخل سيد افندي منتفخا وهو مستمر في قوله يا ساتر) .

المشهد السابع

زينهم : يا ساتر على إيه . خش يا سيد افندى خش .. دا البيت بيتك . أهلا وسهلا .. داحنا زارنا النبى (لنفسه) ماله كده نافش زى الديك الرومى .

سيد : (يجلس) أمال سي عبد الصبور افندي فين ؟.

(تسمع عطسة عالية من عبد الصبور).

رينهم : (مشيراً إلى اتجاه العطسة) أهو .. هوه بعينه سى عبد الصبور .. دى البشاير بتاعته .. أهلا وسهلا .. أشرقت الأنوار .. أجيب لحضرتك إيه .. قهوه مظبوط ؟.

سيد : لا :

زينهم : سكر زيادة ؟

سيد : لا.

زينهم : سادة توزن دماغك ؟

سيد : برضه لا ,

زينهم : كازوزه ؟

سيد : لا.

زينهم : كركديه .

سيد : لا.

زینهم : شای . قرفه . . پنسون . کراویه . حلبه ؟ .

سيد : لا. لا. لا. لا. لا.

زينهم : أجيب لك لقمه بجبنه ؟

سيد : متغدى .

زينهم . ما هو لازم اجيب لك حاجه . . لحسن الست ام رتيبه تدبحني .

سيد : إذا كان و لا بد . . هاتلي . (ويشير بإصبعيه السبابة و الإبهام إشارة إلى كوب) .

زينهم : لا . لا . لا . داسي عبد الصبور يخرب بيتي . دا ما يطقش الحاجات دى أبدا ، دا عمره ما دخل البيت نقطة ويسكى .

سيد : ويسكي إيه يا بني آدم .

زينهم : شمبانيا .. فرموت .. نبيت .. زبيب .. أمال يعنى قصدك إيه بــ (ويشير بيده نفس الإشارة) .

سيد : شوية مية دقه .. بس حاميه خالص .. لحسن كلت في الغدا شوية مفتقه عامله حرقان على قلبي وعايز أضيعه .

زينهم : عايز تضيع الحرقان بمية الدقه .

سيد: أيوه.

زينهم : الحرقان يضيع بمية الدقه ؟ حقه بطلواده واسمعوده .

سيد : أيوه يا أخى .. أنا كده ، خلقتى كده ، معدتى كده . الحرقان ما يضيعش عندى إلا بمبة الدقه .. على طريقة المصل الواقى .. أو على طريقة و داوها بالتي كانت هي الداء .

زينهم : حاضر .. عينيّ الاتنين ، وعايز مية الدقه كده ساده والا جنبها حتتين خيار .. حتتين جزر ؟.

سيد : لا . لا . كفايه قوى الميه ، أنا معدتي مليانه خالص .

زينهم : وفيها إيه . تهضم بالخيار واللفت .

سيد : مافيش لزوم .

(تسمع عطسة من الداخل)

زينهم : فاضل كان عطسه ، ويهل علينا .. عن إذنك .

(يسمع صوت أم رتيبه تنادى على زينهم ، فيخرج لها ... وينهض سيد أفندى لمشاهدة الصور ويقف أمام صورة صبى وصبية) .

سيد : (لنفسه) يا سلام .. هي بعينها . النص التاني ، نص اللفته ، نص

الخياره ، لازم دلوقت استوت ، وبقيت حاجه طعمه .. حاجمه تتاكل .. يا سلام عليكي باست ام رتيبه ، وعلى وقفتك الحلوه .. بس الورده اللي في إيدك ما كانش لها لزوم . لو كان بدالها حزمة جرجير . أو فجل . حاجه كده تفتح النفس مش كانت بقت أفكه ؟.

(زينهم يعود وعليه سيماء الاهتمام والعجلة) .

زينهم : سيد افندى . سيد افندى . فيه حاجه مهمه خالص .

سيد : حاجه إيه ؟.

زينهم : حاجه مهمه خالص .. حاجه خطيره . حاجه يتوقف عليها مستقبلك .

سيد : مستقبل أنا ؟.

زينهم : أيوه مستقبلك انت وهي .

سيد : هي مين ؟

زينهم : الست ام رتيبه .

سيد : آه .. مستقبلنا المشترك .. مستقبلنا الجميل ... مستقبلنا المنظر ، مش تقول كده يا غيى عشان افهم .

زينهم : معلهش ، عدم المؤاخذه .. ما كنتش عارف انك واقع بالشكل ده .

سيد : إيه هي الحاجه المهمه دى . قول . انطق !

زينهم : الست عاوزه تطمن .

سيد : على إيه ؟.

زينهم : على اسمك . اسم الله عليك . اسم النبي حارسك .

سيد : ماله اسمى .. عايزه تطمن عليه ليه .. هوا كان وقع اتكسر ، والا قالوا لكِ اتشرخ منه حرف ، ولا انصاب بشَدِّه ، والا همزه .. مالسه اسمى !.

زينهم : طب بس وطى صوتك لحسن سى عبد الصبور يسمعك .. الست ام رتيبه كانت وصت الست والدتك خالتي ام سيد .. انها تقول لك عشان تغیر إسمك .. أصل سى عبد الصبور ده دماغه ترللی . و بعض ساعات له تلاكیك علی حاجات فارغه ، فهی خافت لا ما بعجبوش اسم السید بنجر .. یقوم یتلكك علیه ، و الحكایه كلها تبوظ من تحت راس حاجه لا راحت و لا جت . حقیقی السید بنجر بینی و بینك اسم مش حاجه . لكن فیها إیه یعنی . یاما فیه أسامی أبوخ من كده ، فقالت من باب الاستحراص تغیر اسمك عشان ما ندیلوش فرصه يحرن فیها ، و یقول كانی و مانی . و هی باعتانی دلوقت عایزه تطمن غیرت الاسم و الا لا ؟ .

سيد : وهوا أنا أقدر أخالفها في طلب ؟. أنا ارفض لها حاجه ؟ آل اسم آل . ميت إسم في ضفرها . ست رتيتب الحلوه .

زينهم : يعنى غيرته ؟.

سيد : طبعا ودى عايزه كلام .. امبارح ما كانش لى شغله غير كده ، طول اليوم في المحكمه الشرعيه . لعمل الترتيبات اللازمه .

زينهم : الحمد لله . الله يطمئك .. لا والله شهم وذو همه ، أهو كده الخطاب والا بلاش .. عن إذنك بقى اما اروح اطمن الست .. لحسن دى قلقانه أوى .

سيد : روح طمنها خليها تحط فى بطنها بطيخه صيفى .. قول لها ان السيد بنجر ، اللى قعد طول عمر السيد بنجر ، و بقاله خمسه و اربعين سنه .. الناس يقولوا له سيد بنجر خلاص ما بقاش سيد بنجر .

زينهم : امال بقى إيه ؟.

سید : بقی .. علی بنجر .

زينهم : (صائحا في دهشة) على .. إيه ؟!!.

سید : علی بنجر .. فیها إیه .. مالك بتصرخ كده زی ما تكون قرصتك حیه ؟.

زينهم : على بنجر ؟!!.

سيد : أيوه .. كنت سيد بنجر .. وبقيت على بنجر .. فيها إيه ؟ عجيه ؟!!.

زينهم : لا .. ولا حاجه !.

سيد : أمال مالك كده بتبحلق فيه ؟.

زينهم : وانا مالى يا عم حا بحلق فيك وتبحلق في .. أنا اروح اقول لصاحبة الشأن .. وذنبها على جنبها .. لو وقعت من طولها والا صابها حاجه انا مش مسؤول !.

سید : وقعت من طولها و الاصابها حاجه ؟ إیه الکلام اللی زی السم ده .. عشان إیه دا کله ؟. قلنا سید وحش . کخه .. کان علی مش حا یعجب .. أمال یعنی کنت اخلیه إیه ! زنوبه !. زنوبه بنجر !. کان یعجب کده ؟.

زينهم : يا أستاذ مش مسألة محمد ولا سيد ولا زنوبه ولا خدوجه .

: أمال مسألة ايه ؟.

زينهم : مسألة بنجر .. بنجر .. يا سي على بنجر .

سيد : بنجر ؟.

سيد

زينهم : أيوه بنجر !!.

سيد : ماله بنجر !. فيه أحلى و لا أغلى و لا أطعم من البنجر .. أنا اغير بنجر .. ليه ! مجنون ؟ حد في الدنيا يبقى اسمه بنجر ويغيره .. إنت عارف طبق البنجر يقف بكام ؟.

زينهم : إيه يعني . . مش بالكتير قوى بقرش ابيض ؟ .

سيد : اخرص .. دا البنجر المغشوش .. دا اللفت المصبوغ اللي بيبيعوه على إنه بنجر ـــ لكن البنجر الأصلي ..

زينهم : (مقاطعا) يا أستاذ احنا مالنا ومال البنجر الأصلى والبنجر المغشوش .. إحنا عايزين عريس .. مش سلطنية طرشي .. البنجر يمكن له قيمه وسط الطرشي .. لكن وسط البني آدمين .. حاجه تبقي

ما لهاش معنى . : يعنى إيه . . ما نيش فاهم . . يعنى كنت عايزين اغير إسمى ، بدل سيد سيد بنجر ، يبقى سيد جزر ، سيد لفت ، سيد جرجير ، سيد قشطه ؟. : وهوا يعنى الدنيا ضاقت بالأسامي . اشمعني فصيلة المخلل دي اللي انت زينهم ماسك فيها ، أصل ما فيش لزوم أبدا يبقى بني آدم إسمه على أسماء آصناف المخلل ، دى حاجه ودى حاجه . : أمال يعني فيه لزوم علشان بني آدم يبقى اسمه خشبه ، والاحمام . والا الجمل ، والاظاظا ، والاالفار . كل دى يعنى حاجات لها لزوم ، والا لها علاقة بالبني آدمين ؟ على الأقل البنجر حاجه لها قيمه في عالم الحلو، وعالم الحادق . انت ما تعرفش ان البنجر يبقى . . : (مقاطعا) يبقى والا ما يبقاش .. انا مالي .. ذنبك على جنبك .. زينهم خليك بنجر بنجر .. ابقى قول لسى عبد الصبور ان اسمك بنجر . : يعني يعمل فيه إيه ؟. سيد : ولا حاجه . بالقليل خالص . حايتف في وشك . زينهم : إيه الكلام البارد ده . . اللي يسم البدن . . هوه ماله إذا كان اسمى بنجر سيد والاعفريت أزرق !؟ : آديني قلت لك بقى . خليك على كيفك . الظاهر ان دماغك ناشفه زينهم قوى . : على العموم احنا فيها .. خلاص إذا كان مش عايز بنجــر ، مش سيد ضروري بنجر ، ما دام ما لوش في الطيب نصيب . حا نعمل له إيه .. خلينا كده سيد حاف .. والا سيد على .. والا سيد قشطه .. والا سيدأى حاجه .. كده كويس ؟

: تعجبني .. أهو كده بقيت راجل عاقل .. بناقص البنجر ده .. اللي

تغلبه العبه .. بس فيه حاجه تانيه عايز اوصيك عليها .. علشان الشغلانه ما تبوظش و تطلع فشوش .. الراجل سي عبد الصبور زى ما

زينهم

قلت لك، بنغزه .. فخده على هواه ، وطاوعه أوى .. إوعى تقول حاجه كده والاكده .. تلبشه وتفور دمه . : يعنى إيه حاجه كده والاكده ؟ ما نيش فاهم ؟ : يعنى مثلا هوه ما يحبش الكرنب المحشى .. فمتجيبش سيرته قدامه ..

: يعنى مثلا هوه ما يحبش الحرنب المحشى .. فمتجيبش سيرته قدامه .. و اذا جت سيرته اعمل انك ما تقدرش تدوقه على لسانك .

سيد : لكن انا بحب الكرنب المحشى خالص .

سيد

زينهم

زينهم : يا أخى معلهش . استحمل . . ابقى حبه بره لكن قدامه اعمل انك ما تحبوش .

سید : بسیطه .. حاجه مش صعب .. و ایه کان سی عبد الصبور ما یحبوش ؟ زینهم : ترمای نمره ه .

سيد : ترماى نمره ٥ ؟ إيه المناسبه ؟ يكره الكرنب المحشى معقول ، كل واحد وكيفه ، أنا مثلا ما حبش السبانخ ولا احبش التقليم على البصاره ، لكن ترماى نمره ٥ ده .. إيه العلاقه بينه وبين سي عبد الصبور ؟ يحبه ليه ويكرهه ليه ؟ هوا داقه ؟ قطم حته من السلم مثلا لقاها متفله . والا داق السنجه لقاها دلعه ؟.

زينهم : سلم إيه اللي لقاه متفل ، وسنجة ايه اللي لقاها دلعه ، فيه حد ياكل تر ماي ؟

سید : یمکن ، ما هو سی عبد الصبور بتاعك ده ما یستبعدش علیه حاجه أبدا .

زينهم : لامش للدرجه دى .

سيد : أمال إيه المناسبه ، انه يكره ترماى نمره ٥ بالذات ؟

زينهم : ما فيش استلطاف . . العلاقه بينهم وبين بعض سيئه ، أصل سيدى عبد الصبور دايما يحب يركب الترماى من غير مؤاخذه ، سفلقه ، طول عمره بارع ، في التزويغ من الكمساريه ، يفضل سنين وايام ، يتنقل من ترماى ، ١ لـ ٢٢ لـ ٣ ، ما فيش حد يقول له انت فين ، هوا يحط

رجله فی نمره د والکمساری والمفتش یکبسوا علی أنفاسه ، عشان کده ما يحبش حد يجيب سيرة الترماي نمره د أبدا .

سید : لامعذور ، و إیه کان ما يحبوش سي عبد الصبور، فيه حاجه تانيه العلاقه بينه و بينها متوتره أو مقطوعه ، غير الكرنب المحشي وترماي نمره ٥ ؟

زينهم : راس العبد .

سيد : برضك بينها وبين سيدك عدم استلطاف ؟

زينهم : لا ، دي بقي عداوه مستحكمه ، حرب دايمه ، خصومه مخيفه .

سید : وعلشان إیه ؟، وبمناسبة إیه ؟، یعادی سی عبد الصبور افندی راس العبد ، ویعمل عقله بعقلها ؟

زينهم : الحقيقة ، في الحكايه دي ، هوه من غلطان ، هي السبب .

سید: ازای بقی یا سی زینهم ؟

زينهم : هي دايما المعتديه ، كل ما يكون رايح كده ، والا جاى كله . تروح متزحلقه من على الأرض وواقعه على نافوخه .

سيد : طيب يا أخى ما يعمل معاها معاهدة عدم اعتداء .

زينهم : عمل .

سيد : والنتيجة ؟

زينهم : زى كل معاهدة عدم اعتداء ، بعد المعاهده على طول راحت واقعه على نافو خه مسيخه دمه .

سيد : يستاهل .. فين هي راس العبد دي عشان ابوسها من هنا ومن هنا .. دي مش راس عبد ، دي راس منصر . اللي قدرنت تعمل في سي عبد الصبور كده ، وفيه إيه كان ما يحبوش سي عبد الصبور غير الكرنب المحشي و ترماى نمره ٥ و راس العبد ؟

زينهم : العدس اللي من غير جبه .

سيد : وابو جبه ؟

زينهم : يحبه .

سيد : وإيه كان خصوم سيدك عبد الصبور . قلهم مره واحده وخلصنا .

زينهم : زكيه الملدنه ، وسنيه القرعه ، وابو على الاحول والكسبه ، والريت الحار ، وابو قردان ، والسمك البكلاه وبراغيت الست ، وعبد الحليم القرد ، والكرات ابو شوشه والسجق اللي من غير فلفل .

سيد : وأبو فلفل ؟

زينهم : يموت فيه ، والكسبريه ، وحشيش الأرانب .

سيد : وغير الأرانب ؟

زينهم : يتعاطاه أحيانا ، والمنجه ، والفيل ابو زلومه ، واللبـان الدكـــر ، والحلاوه السمسميه .

سيد : ديهده .. دبهده .. دا ماله عامل زى الحكومه المصريه .. مخاصم طوب الأرض .

زينهم : والرز ابو شعريه . وسكارش بتاع الجاز ، وقسم السيده ..و ...

سيد : (مقاطعا) طيب .. بس ، وانا حا جيب دماغ منين احفض كل الخصوم دول .. أنا أحسن طريقه اقعد ساكت ما فتحش بقى لا بطيب ولا بردى .

زينهم : ماينفعش.

سيد : ليه بقى ؟

زينهم : ينام منك .

سید : ینام منی ازای ؟

زينهم : أيوه ينام منك .. لو سيبته شويه كده من غير كلام .. تلاقيه فقر ونام , ولو نام منك يا حظ ، لازم تفضل متسمر في مطرحك .. لا حس و لاحركه .. الحسن تقلقه .

سيد . : أفضل قاعد كده قدامه ؟

زينهم : لغاية ما يصحى من نفسه .

سيد : ودى مصيبة إيه اللي طبلت على دماغى .

زينهم : اهو على أد ما تقدر ما تجييش سيرة الحاجات اللي قلتها لك .

سيد : على العموم . . بسيطه . ما فتكرش ان حا يبقى فيه أى مناسبه لها . يعنى مش شايف ان الواحد حا ينزنق لها قوى .

زيهم : وفيه حاجه تانيه .

سيد : حاجة إيه كان ؟

زينهم : شكلك ، وقيافتك .. وريني كسمك .. اعدل الكرافته شويه .. والطربوش ميله لقدام شويه .. أصل هوا دقيق قوى في حكاية الملابس دى ، دايما يحب القيافه والحفلطه .

(تسمع عطسة من داخل حجرة النوم فيقفز زينهم من محله ويفتح الباب الزجاجي ويدخل عبد الصبور وقد شمر الجلباب ووضع ذيله في عبه وشمر أرجل السروال ولبس القبقاب ذو الجلاجل والطرطور وهل في يده كتابا ضخما وفي الأخرى علبة النشوق ووراءه سنيه تحمل القروانه بالماء الساخن).

المشهد الثامن

سيد : الحقيقه باين عليه يحب القيافه قوى .

عبد الصبور : (يصرخ فى زينهم) يا لطيف يا مغيث .. برضه واقف بـوشك عريان .. اخرج بره يا خسيس .. دم لما يلهفك .. دم لما يلحس بك قعره .. عايز اتجوز .. آدى اللى انت فالح فيه .. تتجوز بوشك العكر ده . تودى نفسك من ربنا فين ؟.. يا حيوان يا حلوف (يخرج زينهم ويدو كأن القول موجه إلى سيد افندى فيز داد خجله وارتباكه) آل يتجوز آل . ياخى جاك جنازه .. جاك مصيبه .. جاك وكسه .: حاك نيله حزم .

سيد : (لنفسه) لا .. دى مش حاله دى .

عبد الصبور: آل جواز آل . . هي الدنيا ناقصه مصايب (يلتفت إلى سيد) . وانت إيه ؟

سنيه : دا الضيف يا سيدى . جارنا سي السيد افندى بنجر .

سيد : ما بنجرش ولا حاجه .. بنجر ما فيش .. خلاص راح ، عليــه العوض .

عبد الصبور: (باشمئزاز) بنجر .. انت بنجر .. اسمك بنجر ؟ بنسى آدم اسمه بنجر ؟ أمال البنجر الحقيقي يسموه ايه !! على ؟ والخيار يسموه عمد ؟

سيد : قلنا مش بنجر . . انا مش بنجر . . يا سيدنا أنا سيد ، سيد بس ، سيد سيد عاف ، متبرى من البنجر .

عبد الصبور: وتتبرى منه ليه .. بينك وبينه إيه ؟

سيد : علاقات مش و لا بد ، من نوع العلاقات اللي بينك وبين الكرنب المحشى والترماى نمره ه ، وراس العبد ، ما فيش استلطاف أبدا كده الله في الله .

(يجلس عبد الصبور وتضع سنية القروانة أمامه ويضع قدميه في الماء وتأخذ سنيه في تدليكهما) .

عبد الصبور: اقعد يا سي سيد افندى . يا عدو البنجر . اقعد . اتفضل (يمد يده بعلبة النشوق) تاخد تنشيقه ؟

سيد : متشكر ما بتعاطهوش ؟

عبد الصبور : علشان إيه ما بتتعاطهوش ؟

سيد : والله ما جربتوش .

عبد الصبور : وليه ما بتجربوش . يخسّ عليك إيه ! مش ممكن تلاقيه كويس وتقعد نادم على العمر اللي ضيعته دا كله من غير نشوق ؟

سید : وانلهٔ ما افتکرشی .

عبد الصبور : (بغضب) يعني إيه ما تفتكرش ؟ انت باين عليك مقاوح !

سيد : (يستدرك نادما) أبدا أبدا ، أنا بس مناخيري تعبانه شويه .

عبد الصبور: أهو دا اللى يسلكها لك ويفوقك ويجلى راسك. أهو دا الحاجه الوحيده اللى تعدلك. كان لازم انت تقول لى هات تنشيئه، انت مش صغير عشان اوريك مصلحة نفسك، وانا مش ولى أمرك. انت راجل كيير.

سید : ما فیش لزوم للزعل .. أنا غلطان ، هات تنشیئه یا سی عبد الصبور ... هات .

عبد الصبور : (ينظر إلى العلبة فاحصا ويقلب شفته السفلي) مفيش ، متأسف . اللي فاضل يدوبك تنشئتين ليه . طلبك متأخر . ما لكش في الطيب نصيب .

سيد : معلهش معلهش خصل خير . (بصوت منخفض) ربنا ستر .

عبد الصبور: (يعيد النظر في العلبة) والا اقول لك .. تقدر تاخد لك تنشيئه .. بس صغيره ، ما تكترش .. خدى يا سنيه و دى له العلبه .

(سيد افندى يتناول العلبة خائفا ويأخذ تنشيقة فتصيبه نوبة عطس مزعجة)

عبد الصبور : عضمك طرى . لسه بدرى عليك ، دى حاجه عايزه تمرين . مش كل واحد يقدر عليها .

المشهد التاسع

(يدخل زينهم وهو مرتديا الوجه ومحاملا بين يدية صينية عمليها كوبتين بهما مشروب أحمر اللون ويتقدم إلى سيد افندى) .

سيد : (مندهشا ومذعورا) إيه ده بسم الله الرحمن الرحيم ! إنت إنس والا جن ؟

زينهم : لا إنس ولا جن .. أنا زينهم .. اتفضل اشرب .

سيد : (مستغرقا في الضحك) زينهم ، ومالك عامل كده ليه في نفسك ؟ يا سلام يا زينهم . . دا انت بقيت زينهم حقيقي ، أهو كده الجمال .

زينهم : اشرب يا سيد افندى . اشرب بلاش نقوره .

(يشرب سيد افندى الكوب مستمتعا مستطعما ويمس شفتيه في لذة) .

سيد : يا سلام . حاجه حلوه . بديعه .

(يتقدم زينهم بالكوب الآخر إلى عبد الصبور فيأخذه ويوفعه إلى فمه ولا يكاد يتناول منه رشفة حتى يقفز من مكانه ملسوعا وهو يتأوه وينفخ) .

عبد الصبور: إيه ده؟. دى مية نار ؟!!

زينهم : .. مية دقه .

عبد الصبور: مية إيه ؟

زينهم : دقه .

عبد الصبور: دقه ؟.

زينهم : أيوه مية دقه . عمرك ما سمعت على مية الدقه .

عبد الصبور : وايه اللي يخليك تقدم مية الدقه للضيوف . يا حلـوف ؛ يـا ابــن الحِنت .!

زينهم : اتجنن ليه ، وانا مالى . أنا عبد مأمور .. يقولوا لى هات مية دقه ، اجيب سية دقه . . هات سيم هارى اجيب سيم هارى ، وانا مالى .

عبد الصبور: سم لما يهرى جوفك. انا لازم اشوف قصدك إيه. انا لازم اكشف نواياك الإجرامية. انا لازم اوديك في داهيه. مين الحيوان اللي أمرك تحرق جوفنا بمية الدقه ؟

زينهم : الحيوان اللي بتسأل عنه قاعد جنبك لزق . هوا سيد افندى .. هوا الضيف بتاعك .

عبد الصبور: هوا اللي طلب منك مية الدقه (إلى سيد) انت اللي طلبت ميـة (أم رتيبة)

الدقه .. يا اخينا ؟

سيد : أيوه انا ، أصل كان فيه حرقان على قلبى ، وخلاص راح ، والحمد لله .. الحقيقة نوع ممتاز .. نوع إكسترا .

عبد الصبور: إيه هوا اللي ممتاز! وإيه هوا اللي اكسترا! النار الآيده دى .. فيها ممتاز وفيها لمحسترا ؟. ليه . هوا انت من زباين جهنم والا من صبيان إبليس . وإذا كنت انت عندك حرقان بتطفيه بمية النار دى . أنا ذنبي إيه ! اسمع وحياة والدك يا سي سيد افندى ، اذا كنت ناوى تيجى هنا تانى ، وناوى تحس بحرقان على قلبك ، ابقى اشرب مية اللهاليب دى بره . مفهوم ؟

سيد: على العموم الحرقان دا ما بيجيلش كتير.

. عبد الصبور : كتير والاقليل ، المهم تضيعه قبل ما تيجي . فاهم ؟

سيد : حاضر ، من عنيه يا سي عبد الصبور ولا يكون عندك فكر من نواحي مية الدقه ، مع إنك لو اخدت عليها مش حا تسلاها أبدا ، زي النشوق تمام ، تروق المخ وتسلك الزور .

عبد الصبور: إيه دايا أخى الكلام الفارغ ده . حديقول مية الدقه زى النشوق ، دى دقه و دى دقه .

سید : أیوه برضك معاك حق . إیش جاب دى لدى ، أنا غلطان خالص ، غلطان قوى .

عبد الصبور : معلهش حصل خير ، انت شرفتنا يا سي ..

سيد : (مقاطعا) سيد ، محسوبك سيد .

عبد الصبور: سيد إيه ؟

سيد : اللي يعجبك ، اللي يبجي على مزاجك ، أنا سايبها مفتوحه .

عبد الصبور : يعني إيه . ما نيش فاهم ، السيد والدك ما لوش إسم ؟

سيد : أبدا . نزل كده ، من غير إسم . ما رضيوش يسموه ، لغاية ما تسميه التي يريحك !!

عبد الصبور: انا اسمَّى أبوك ؟ وهوه انا فاضى عشان بسلامته أبوك يقعد لى خمسين سنه من غير إسم . . وييجى دلوقت عشان اسميه . . أنا فاضى للهيافات دى ؟ . أنا ورايا حاجات كتيره أهم من كده .

سيد : على العموم .. ما تتعبش نفسك ، دى حاجه مش مستعجله .. أنا كفايه على سيد بس .. سيد حاف ، أهى حاجه مأمونه وما منهاش ضرر .. واللي خلاه يقعد خمسين سنه من غير إسم . يقعد ...

عبد الصبور : (مقاطعا) طيب .. طيب .. فضينا بقى من حكاية إسمك دى .. إنت شرفتنا .

سيد : الله يشرف مقدارك .

عبد الصبور: فيه حاجه اقدر اعملها لك ؟ عايز مشوره في علم الروح ؟ عايز تحضر . جلسه .. عايز ...

سید : (مقاطعا) لا . لا . أبدا . . كتر ألف خيرك . أنا مش عايز حاجه من دى أبدا . . أنا كنت عايز . اقول . . اقول . . أسلى كنت عايز اقول . . .

عبد الصبور : تقول ایه ؟ اتفضل . وقول وخلصنی یا سی سید وحیاة ابوك اللی ما یتسماشی .

سید : أنا أصلی كنت عایز اقول ، أنا طول عمری . عایش كده عازب . ووحدانی ..

عبد الصبور : (مقاطعا في حدة) خير ما عملت ، عين العقل . ربنا يديمها عليك نعمه .

سيد : لكن أنا شايف العمر ييفوت والحياه بتنقضى والشيب ملا راس الواحد ، والعجز دب في مفاصله .

عبد الصبور: شيء لأبد منه وبكره كان تشيب اكتر وتعجز اكتر، الزمن بيدوب الحجر مش عايز يدوب البني آدم، لازم تشيب، ولازم تعجز. هي دي حاجه غريه!

سيد : لا مش غريبه ، بس الغريبه ان الواحد كده يخرج من الدنيا ، صفر

اليدين .

عبد الصبور: وهوافيه واحديا أخينا ما بيخرحش منها صفر اليدين ، الدنيا عامله زى البلد الموبوءه ، وباب الآخره زى باب الحجر الصحى . لازم يجردوك فيه من كل حاجه ، لازم تخرج من الدنيا زى ما دخلت فيها ، صفر اليدين والرجلين والراس والعينين ، ما نتاش شايل معاك غير ذنوبك ، دى الحاجه الوحيده اللي ما تقدرش تسيبها .

سيد : مفهوم ، مفهوم ، يا سي عبد الصبور .. لكن الواحد برضه ، لازم يكمل نص دينه .

عبد الصبور: نص دين إيه يا خويه اللي طالعين لي فيه ، هوا نص الدين ما يكملشي الا بالجواز ؟ دا لو كان عندك نص دين ، الجواز حا يطيره . الجواز اللي انتوا فاكرين انه يكمل نص دين يضيع دين بحاله . . دا يكفر بلد ، إنتم ايه ! مغفلين ، مهافيف ، ملاحيس ؟ ومع كلا ، أنا مالي انا ومال نص دينك ، تكمله ما تكملوش ، أنا ما ليش دعوه ، دى حاجات متخصنيش .

سيد : لا ، من جهة الاختصاص ، ما فيش حد مختص غيرك ، إنت لوحدك جهة الاختصاص المسئولة عن تكملة ديني .

عبد الصبور: يعنى إيه .. ما نيش فاهم ؟

سید : یعنی نص دینی موجود عندك هنا . معاك . : إنت المتحكم فیه ، إنت الآمر الناهی فیه ، أرجوك رده لی ، رد لی نص دینی ، ینوبك ثواب فی .

عبد الصبور: إنت إيه يا جدع انت ؟ انت مجنون ؟ اختصاصي إيه ؟ ودين إيه ؟ إحنا هنا مش مشيخة الازهر . . ارجوك قول لي قصدك إيه ؟

سيد : قسدى اتجوز .

عبد الصبور: يا مغيث يا لطيف . أنا اصطبحت بوش مين النهارده ؟ كل ما اقابل حد يقول لى عاوز اتجوز، ما فيش غير زينهم الكلب، هوا صبحنى بوشه ، اللى زى القطران ، اسمع يا بسى سيد افندى . انا عايز اعرف ، إذا كان انت بعد طول العمر اللى ضيعته فى هنا وراحه اتخبطت فى راسك وعايز تتجوز ، تقدر تقولى لى انا ذنبى إيه تعكنن مزاجى وتضيع وقتى فى المسألة البايخه دى !! إنت عايز تتجوز ، وانا مالى ؟

سيد : أصلي عايز اتجوز . اتجوز ...

عبد الصبور : (في حدة) تتجوز إيه .. انطق ؟ فلقتني ؟

سيد : عايز اتجوز أم رتيبه .

عبد الصبور: بتقول لميه ؟ أم إيه ؟ إنت لازم مجنون. أنا نظرتى ما تخيبش أبدا. من ساعة ما شفتك وشفت عينيك المبحلقه وراسك المبططه ووشك المناويشي قلت الراجل ده مجنون.

سيد : ليه بس يا سي عبد الصبور ؟ مجنون ليه ؟ عشان جي اخطب الست المصونة أختك . عشان جاى اتشرف بقربك . هما برضه الناس يعملوا في جيرانهم كده ! النبي دا وصاعلي سابع جار .

عبد الصبور: النبي حريوصي زي ما هو عايز .. على سابع جار .. على تامن جار ..
إن شا الله على عاشر جار . لكن انا ما احبش الكلام في موضوع الجواز
ده أبدا ، خلاص ، انتهينا .

سید : طیب بس حلمك على . خدودی معایا شویه , اسمع كلامی كله يمكن تقتنع .

عبد الصبور: ولزومه إيه ! وعشان إيه ؟. إنت تبقى مين علشان اضيع وقتى الثمين مبد الصبور: معاكف في كلام مالوش فايده ؟

سید : أیوه .. كده تعجبنی .. قلت لى تبقی مین .. أنا محسوبك سید .. باشخبیر فنی معمل شبرا .

عبد الصبور : باش ليه ؟

سيد : باشخبير .. يعني كبير الخبراء .

عبد الصبور: طيب يا أخى مش تفهمني كده من الصبح أنا فاهم انك راجل ، على

أدك . فاهم انك حمار . . من ضمن الحمير اللي ماليا البلد ، ما عنديش أقل فكره عن انك راجل خبير ، فني ، بتفهم . يا سلام . . ليه تسييني كده على عماى يا سي سيد يا باشخير . وحضرتك درست فين ؟ اكتسبت الحبره الفنيه بتاعتك دى منين ؟ من أنهى جامعه ؟

سيد : أنا ما درستش في جامعات ، خبرتي موهبه إلهيه من عند ربنا .

عبد الصبور: ما شاء الله ، ما شاء الله . يعني خبير بالفطره ، يعني عبقري !

سيد : بالظبط .

عبد الصبور: يا سلام ، أنا من زمان وانا عايز اشوف واحد عبقرى ، أصل انا كان عبقرى ، ودايما العبقرى يحب العبقرى .

سيد : مظبوط ، مظبوط ،

عبد الصبور: وحضرتك خبير فتي في إيه ؟

سيد : خبير في الذوق .

عبد الصبور: فني في إيه ؟

سيد : فى الذوق (ويخرج لسانه) عندى لسان ، ما يخطيش ابدا ، ما ينزلش الأرض .

عبد الصبور : وهوا فيه لسان ينزل الأرض يا سى سيد يا باشخبير ، غير لسان الكلاب ، لكن أنا برضه ما نيش فاهم . حضرتك خبير باللسان ؟

سيد : مظبوط ، أدوق باللسان وحكمي لا يعلى عليه .

عبد الصبور : وحضرِ تك يتدوق ايه ؟ إيه المواد الرفيعه اللي بتحتاج لذوقك الحكيم ؟

سيد : كل الأصناف .

عبد الصبور: ما نيش فاهم ، يعنى مثلا بتدوق الشربات النايلون . بتدوق الحرسانه المسلحه ؟

سيد : لا . لا . مختص بس في صنف الحادق . صنف المخلل .

عبد الصبور : يعني حضرتك باشخبير فني في الطرشي ؟

سبد : تمام . مظبوط .

عبد الصبور: باشخبير فنى فى الطرشى ؟ ياحى دم لما يلهفك .. باشخبير طرشى ، وجى تناسبنى ، ليه قالوا لك على وقيع ، هفيه . قليل الأصل .. خلاص ، هى ضاقت على الدنيا ، ما لقيتش غير انت اللى اناسبك ! ليه اتجننت ، اتخبط فى عقلى ، أنا ادخل بيتى باشخبير طرشى ، وانا ما طيقش طعم الطرشى ، دنا لما بشوف دكان طرشى من بعيد بيغمى على ، دا انا بينى وبين الطرشجيه تار بايت وعداوه متأصله .. أقوم آجى على آخر الزمن ، أناسب باشخبير طرشى! أنا اللى محرم عليهم ما يدخلوش فى البيت حتة لفت اقوم ادخل برميل طرشى متحرك!

سيد : طيب بس حلمك شويه يا سي عبد الصبور .. ما تتحمقش كده ، هدى نفسك وخلينا نتفاهم .

عبد الصبور: نتفاهم على إيه ! وهي دى حاجه عايزه تفاهم ! أنا والطرشي عدّوان لدودان ، يبقى نتفاهم على إيه ؟ المسأله مالهاش الاحل واحد .

سيد : (بلهفة) إيه هوه الحقني بيه .

عبد الصبور : إنك تقلب .

سيد : أقلب ؟

عبد الصبور: أيوه تقلب.

سيد : أقلب ازاى مانيش فاهم ؟

عبد الصبور: زى الناس .. يعنى بدل ما انت باشخبير فنى طرشى .. تبقى باشخبير فنى ، حلاوه طحينيه مثلا .. أو باشخبير فنى غزل البنات ، أو باشخبير فنى براغيت الست أو باشخبير فنى حلاوة زمان .

سيد : حلاوة زمان ؟

عبد الصبور: ايوه حلاوة زمان ، مانتاش عارفها !! الحلاوه اللي يلفوها على حتة خشبه طويله في آخرها كوز زى الشخشيخة والراجل يشد فيها ويمط ، ويعمل لك حصان وعروسه زى ما انت عايز ..؟

سيد : أنّا ابقى باشخبير فني حلاوة زمان ؟

عبد الصبور : فيها إيه !. يعنى مش احسن ما تبقى باشخبير فنى فلفل .. أقل ما فيها تبقى تبقى خبير في حاجه حلوه .. ما تحرقشى .. ما تشويش .. مش خبير فاليب .

سيد : لكن دى ...

عبد الصبور : (مقاطعا) ما لكنش ولا حاجه ، انا بحب غزل البنات ، وبراغيت الست ، والحلاوه الطحينيه ، حلاوة زمان ..

: أنا ما قولتش حاجه حب اللى تحبه بس انا ما قدرش بعد خمسه واربعين سنه خبره فى الطرشى ، اقلب فى آخر الزمان ، وابقى خبير حلاوة زمان ، والاحتى حلاوة دلوقت . دى حاجه ما تعقلش ، دى تمام زى ما تقول للفسخانى اللى طول عمره فسخانى .. تعالى بيسع روايح عطريه ، يموت منك ، الريحه اللى انت فاكرها كويسه تأثير على نخاشيشه اللى واخده على ريحة الفسيخ تموته . والا مثلا زى لما تاخد الفحام ، اللى قاعد طول عمره زى حتة الهبابه ، وتقول له اشتغل فى

حمام ، يدوب منك ، يبوش في الميه زى فص الملح ، الوساخه اللي على جنته اللي هني حلت محل اللحم تنزل ويسيح وما يبقاش فيه حاجه .

عبد الصبور: فحام ، حمامى ، فسخانى ، دا كله ما يهمنيش كلمه واحده ما فيش غيرها ، انا ما احبش صنف الطرشى أبدا ، حلاوه معلهش ، عندك جميع أصناف الحلويات ، كلها مقبول ، أنا ما بدقش إن شا الله تبقى خبير فى المصاصه ، كله ينفع .

سيد : ياسي غبد الصبور الله لا يسيئك .

عبد الصبور : (في حدة) خلاص انتهينا .

سيد : (ثائرا) هوا إيه اصله ده ! دا استبداد . دا ظلم . دا تحكم !

عبد الصبور: تحكم مشِ تحكم ، أنا قلت كلمتي خلاص ما فيش غيرها .

سيد : ده حرام . اتقى الله يا شيخ . دا ربنا ما يرضاش بكده أبدا .

عبد الصبور : إذا كان ما يرضاش ، خليه يجوزها لك أهي قدامه ، لكن انا مش حا

جوزها لك أبدا .

سيد : ده جبر . . دي قسوه . . دا انت ربنا مش حا يوريك نصفه .

عبد الصبور : مش مهم ، النصفه اللي عنده .. ابقي خدها انت .

سید : روح یا شیخ ، ربنا یرزقك بحلة کرنب محشی .

عبد الصبور: (في فزع) آي .. اخرج بره .

سيد : والا بمفتش نمره ٥ يكبس على أنفاسك .

عبد الصبور: الحقوني يا هوه .

سيد : والا براس عبد تطب على نفوخك .

عبد الصبور: جاى يا عالم.

سيد : (مستموا) زكيه الملدنه ، سنيه القرعه ، أبو على الاحول ، كسبة

زیت حار ، أبو قردان ، سمك بكلاه . .

عبد الصبور : جاى . جاى . الحقونى .. ابعدوا المجرم ده .. اخرج بره يا مجرم

(يتشنج ويغمى عليه) .

﴿ سيد يَهرول هاربا إلى الحارج . تدخل أم رتيبه والحدم وراءها ﴾ .

أُم رتيبة : فيه إيه ! جراإيه كفا الله الشر ؟

سيد : (وهو يهرول إلى الحارج) آل باشخبير حلاوه طحينيه آل .. دا انا حتى ابقى قليل الأصل ، بعد العمر اللى قضيته مع الطرشي .. أنضم ف الآخر .. لمعسكر الأعداء . دى تبقى خيانة ، دى تبقى نداله .. آل

إيه باشخبير مصاصه ، أصلها هزلت .. حدالله بيني وبينكم .

(أم رتيبه منهمكة في تفويق عبد الصبور ، وزينهم يهجم عليه بكوب ماء ويضربه في وجهه) .

عبد الصبور : المجرم . ابعدوه . باشخبير الطرشي المولع . إوعوا تدخلوه بيتي . آل كرنب محشي ، وراس عبد ، السافل المجرم .

سنية : سلامتك يا سيدي ألف سلامه ، روق دمك ما عاش اللي يزعلك .

زينهم : شفت .. عشان ما تبقاش تعايب على وشي .. اللي ما يرضي بالخوخ

يرضي بشرابه ، اهو جالك اللي جابلك الكافيه (يغادر الحجرة) .

المشهد العاشر

: إيه يا خويا ! . جرى إيه بس فهمني ؟ . إيه بس اللي لهلبها كده ؟ أم رتيبة

عبد الصبور : باشخبير الطرشي ، الدون ، المنحط . ما يعتبش بيتي أُبدا .

: بس اهدى يا خويا ، وقول لي إيه اللي جرى ؟ أم رتيبة

عيد الصبور: آل عايز يتجوزك آل!

: ودى فيها حاجه تزعل ، دى حاجه نشرح حاجه تبسط . أم رتيبة

عبد الصبور: دا باشخبير طرشي ؟

أم رتيبة : وفيها إيه!

عبد الصبور: طرشي حراق؟

: حراق والامش حراق ، هوه قال لك تعال دوق بدالي ؟ أم رتيبة

عبد الصبور: خلاص، أنا قلت كلمه واحده .. أنا ما حبش لا الطرشي ولا ريحة الطرشي و لا سيرة الطرشي قلت كلمه و احده و انتهينا.

> : يا ميلة بختك يا ام رتيبه (تنهنه) . أم رتيبة

: معلهش ياست . ما تزعليش ياست . سنية

عبد الصبور : بس خلاص ، بلاش عياط . اقعدى قدامي هنا . لما اقول لك على المهمه الكبرى . أنا حاسس ان وقتها جه . اقعدى قدامي ، وفتحي ودانك كويس ، أنا نازل على الإلهام ، والوحم بيقولل عشان استعد من دلوقت وافهمك كل حاجه .

أم رتيبة : يا خويا سيبني في حالى . كفايه ميلة البخت اللي انت جايبهالي ، مهمه كبرى إيه ؟ وسخام إيه ؟ وهباب إيه ؟.

عبد الصبور: اقعدى يعني اقعدى ، دا مش وقت أخد وعطا .. الوقت ضيق .. اقعدى وفتحي ودانك .. واسمعي كويس الكلام اللي حا قولهولك

. 03

(تجلس أم رتيبه أمامه وهي تتنهد يائسة) .

أم رتيبة : يارب .. توب علي بقى م الغلب ده .

سنية : (تجلس على الأرض) معلهش يا ست . استحملي يا ست .

عبد الصبور : خدى بالك كويس م اللي حا قولهولك ، فتحمى ودانك خــالص

وحضري ذهنك ، ما تخلهش بتشتت لا هنا ولا هنا .. أنا عارف انك

غبيه ، لكن حاولي انك تفهمي ..

أم رتيبة : يا خويا قول ، علتني .

عبد الصبور: بقى انا عايز اعقد اتفاق بيني وبينك.

أم رتيبة : اتفاق ؟

عبد الصبور: ايوه .. اتفاق .

أم وتبية : بيني أنا ، وبينك انت ؟

عبد الصبور : أيوه ، اتفاق بيني أنا وبينك انتي ، حاجه غريبه ؟.

أم زتيبة : أبدا . هوا فيه حاجه منك غريبه ، بس إيه المناسبه ، تعمل اتفاق بيني وبينك . . ليه ! وعلى إيه ؟

عبد الصبور : أيوه . قلتى لى ليه ، وعلى إيه ! بقى يا ام رتيبه يا ختى أنا حاسس ان الأجل قريب.

سنية : بعد الشريا سيدى .

أم رتيبة : بقى اسمع يا عبد الصبور يا خويا ، إذا كت بتقعدنى عشان تقول لى الكلام الفارغ ده . أنا مش فاضيالك انت بقالك عشر سنين وانت تقول انك حاسس ان أجلك قرب واديك قاعد زى قرد قطع ، لا بيك ولا عليك .

عبد الصبور: لا ، المره دي حاسس انه قرب قوي .

أم رتيبة : قرب والا ما قربش ، اللي انت عايزه ايه ؟

عبد الصبور: عايز نعمل اتفاق مع بعض ان اللي يموت قبل التاني ينزل يقول له شاف

إيد فوق .

أم رتيبة : هوا إيه أصله التخريف ده ؟

عبد الصبور: معلهش ، واحده ، واحده ، أنا عارف انك غبيه ، ولازم افهمك حته ، حته ، بقى يا ام رتيبه يا اختى .. الواحد منا لما يموت .. روحه بتطلع في السما و جتنه بتفضل في الأرض تعفن و تتاكل و تدوب . يعنى لما انت تموتى مش حا يفضل منك غير روحك .

أم رتيبة : يا باى على كلامك اللي زى الضرب .

عبد الصبور: فروحك. وبقية الأرواح بتطلع فى السما وتبقى عايشه فى عالم كبير خالص أكبر من العالم اللى احنا عايشين فيه ده وتبقى مقسمه لدرجات، واحنا دلوقت بنقدر نستدعى بعض الأرواح، وتتكلم معاها، إما بطريقة الكتابه والإشاره، أو بالصوت، يعنى الروح تحتل جسم بنى آدم اسمه الوسيط. أو فى الأحيان النادره تتجسد الروح، فأنا عايز اللى يموت منا قبل التانى، يقى يتجسد وينزل ويتفاهم معاه ويديله المعلومات اللى يعرفها عن عالم الأرواح.

أم رتيبة : اسمع ياخويه يا عبد الصبور ، بلاش الكلام ده انت لبشت جتتى ، أنا لا اموت لا اقدر لا انزل ولا اطلع عافينى ياخويه م الاتفاق ده .. أنا لما اموت حاستكن في تربتي لا حاهوب لا هنا ولا هنا . كل اللي انا عايزاه انكم تبقوا تزرعوا على تربتي صباره ولبلابه .. حاكم انا احب اللبلاب .

عبد الصبور: لبلابة إيه وبتاع إيه . إيه الكلام الفارغ اللي انتي بتقوليه ده . . إنت مش حاتبقي في التربه . إنتي حاتبقي هايمه في السما ولازم تنزلي .

أم رتيبة : ما نزلش ولا روحش ولا جي . بلا قلبة دماغ ، هوا انت ورايا في الحيا وفي الموت .

عبد الصبور: عنك ما جيتى ، انت اصلك راسك ناشفة. على العموم انا متأكد ان أنا اللي حاموت قبلك. لأن حاسس ان أجلى قرب خالص، يعنى يمكن أموت الليله دى . سنية : يوه يا سيدى . . تف من بقك سبع تفات .

عبد الصبور: لا سبع تفات ولا تمانيه. الواحد لما قضاه بييجي، ما ينفع في رده حاجه.. على العموم أنا مش زعلان ان انا حاموت لأن دى مسألة مفروغ منها.. لانا أول اللي حا يموتوا ولا آخر اللي حا يموتوا.. الحياة قنطره، أو نفق، والزمن دا زى القطر الاكسبريس. الروح تركب فيه شويه لغاية ما تعدى من ناحيه للناحيه التانيه، عمر الاكسبريس ما كسكس ولا هدى ولا وقف. يعنى واصلين للنهاية عزنا والا ما عزناش. كل حاجه في الدنيا بتحلص، اشمعنا احنا اللي مش عايزين نخلص. أنا حاموت ومش زعلان اللي انا حاموت، انا مش خايف من الموت، لكن اللي انا خايف منه، ان انا اروح كده هدر، زى كل الحمير اللي ما توا قبلى.. أنا عايز استغل موتى، عايز اعمل حاجه ما عملهاش حد قبلى .. عايز ارجع تائى ، عايز اموت وارجع ، أروح وآجى .

أم رتيبة : (تضرب بيدها على صدرها) يا مصيبتي !

عبد الصبور : مالك كده .. بتضربی علی صدرك ، زی المخابیل . خضتینی . یا مصیبتك لیه ؟ عشان حا موت ؟

أم رتيبة : لا .. عشان حاترجع . موتك حقيقى مصيبه . لكن رجوعك مصيبه أكثر . عايز تموت ويرجع عفريتك ينط لنا كل شوية ، يا لطيف . يا لطيف . ودى مين تستحمل الغلب ده .. اللي ماحنا طايقينك وانت بني آدم . . نطيقك وانت عفريت ؟.

عبد الصبور: برضه الوليه بتقول عفريت، افهمى يا غ راكب. يا بجم. أنا مش حارجع عفريت. انا حارجع زى ما انا كده. حا ارجع روح مجسده، زى ما انت شايفانى تمام، بس أكون بقى عرفت كل حاجه، أكون كشفت الستار وهتكت الحجاب، ونورت العتمه اللى بتخبى العالم الواسع.. أكون لفيت فى السما شوية، واطلعت على المستخبى، وعرفت الأمرار المخفيه، وعرفت تركيب السموات ووضع الكون،

وجليت سر الموت ، والروح .. كل ده اللي حار فيه الفلاسف و العلماء . بشوية لف في السما ، حا عرفه ، وبعدين حارجع لكوا ، واكشف لكوا المستخبى ، واشرح لكلوا المستتر .

: يعنى حا تعرف مثلا .. انا حا تجوز إمتى ؟

أم رتيبة

عبد الصبور: انتى جنسك إيه ؟ مخلوقه من إيه ؟ أقول لك أسرار الكون ، والعالم المجهول .. تقوليلي حا تجوز إمتى ؟ يا بجحه يا ام عين فارغه ؟. إيش يكون جوازك ، في المهمات الكبرى اللي حا تكون ورايا .. إنتى فاكراني حاشتغل في السما خاطبه ؟. إنت فاكراني حاكون فاضى للكلام الفارغ بتاعك ده ؟ ثم انت مالك ملهوفه على الجواز كده ؟.. أنا قلت لك انك مش حا تتجوزى يعنى مش حا تتجوزى لا وانا حى و لا و انا ميت .. مبسوطه .

أم رتيبة : يا باى على ملافظك اللى تسد النفس .. طيب عرفنا وانت حى مش حا تجوز ، طيب و لما تموت .. ييقى شأنك إيه بقى فى جوازى ؟ هوا انا حافضل مربوطه لك كده حى وميت ؟ حافضل متسنسله فيك ؟. حقد دى مصيبه وطبلت على دماغى .

عبد الصبور: اللي حاصل. قسمتك كده، بختك كده. المهم خلينا في اللي احنا فيه، بلاش السفاسف دى، خلينا في الحاجه المهمة، بقى انا قلت لك ان انا لما اموت حاضرب بلطه في السما وابرم فيها برمتين، وارجع.

أم رتيبة : ترجع ازاى بس ياخويا ؟

عبد الصبور: أيوه .. كده عجبتينى ، قولتيلى حا ترجع ازاى ، بقى احنا دلوقت بنقدر نستدعى الروح اللى احنا عايزينها وبتتفاهم معانا وتقول لنا على اللى احنا عايزينه يا إما بواسطة الإشاره .. أو بواسطة الصوت ، عن طريق وسيط شاطر ، فأنا دلوقت حاطلع وانا مصمم على الرجوع . بس عايز وسيط اتفاهم معاه على الرجوع ، وسيط يكون بين أرواحنا تجاذب وتفاهم ، وما افتكرش فيه تفاهم وتجاذب بين روحى وروح تانيه أكتر من روحك ، حقيقى روحك غبيه وحماره ، وروحى زكيه

وراسيه وعاقله .. لكن دا ما يمنعش التجاذب والتوافق اللي بينهم .. إنتى أقرب الناس وأحبهم لى ، رغم السخافه اللى أنت فيها ، واحنا الاتنين بقالنا خمسه وأربعين سنه مافارقناش بعض ، وعمر روحى ما تطمن وتهدى الا لروحك ، وعشان كده حا خليكى الوسيط .. اللى حانزل بواسطته ..

أم رتيبة : (تتنهد بيأس) ولا انا فاهمه حاجه ؟ وسيط إيه وتوافق إيه ؟ وكلام فارغ ايه ؟

عبد الصبور: عارف .. عارف انك مش حاتفهمى حاجه أبدا .. لكن اصبرى على لغاية ما فهمك كل اللي انا عايزه منك . أنا مش حاطلب منك حاجه اكتر من طاقتك . إنت حايكون دورك بسيط خالص ، وانا حايكون على على كل الحمل .. اللي انا عايزه منك .. انك تستعدى لاستقبالي في يوم معين .. في ساعة معينه ، ويكون اليوم دا يوم الاربعين في نص الليل مثلا .

أم رتيبة : (تهز رأسها أسفا)قصدك تقول انك حا تموت وترجع في يــوم الاربعين .. يعني حا ترجع تاخد بخاطرنا ؟

عبد الصبور: لا .. بس الفكره انكم تدونى وقت عشان الف شوية فوق ، أنا مش عايز ابقى مكروش ، وأظن اربعين يوم مش كتير علشان جوله في السما .. يمكن احب اروح هنا والا اروح هنا ، حد من الأهل يعرفنى .. يعمل حفلة تكريم بمناسبة صعودى للسما .. برضه الواحد لازم يعمل حسابه على المشاوير اللي زى دى .

أم رتيبة : (في سخرية) أيوه برضك لازم تعمل حسابك .

عبد الصبور: المهم ان احنا نتفق مع بعض من دلوقت. عايزك تستنى ليلة الاربعين الساعة ١٢ بالليل، وتهيئ الجو الملائم لاستقبالي. يعنى تقعدى لوحدك في أو دتى في صمت وسكون .. لا حس ولا حركه، وعايز كل حاجه في الأوده تبقى زى ما هي .. كل حاجاتي تبقى حاضره،

الطرطور بتاعي والعبايه وعلبة النشوق ، والطشت والابريق والميه السخنه ، والكتب اللي على الرف ، وما تنسيش القبقاب أبو جناجل .

أم رتيبة : حاضر من عينى الاتنين .. مش خلاص بقى ؟ أقوم اشوف شغلى ؟ عبد الصبور : استنى شويه .. مستعجله على إيه ؟ بكره تقعدى لوحــدك لما تشبعى .. فيه حاجه كمان عايز اقولها لك .

أم رتيبة : إيه تاني ؟.

عبد الصبور: انا عايز التلامذه بتوعى زى الشيخ جاد والأستاذ زكى والأستاذ المحجوب، يكونوا موجودين عشان يشوفوا التجربه وينشروها على العالم .. بس يقعدوا هنا، وما يخشوش الأوده دى إلا لما انزل .. علشان ما يشوشوش علينا . إنت لوحدك بس اللي تستنى في الأودة بتاعتى . أنا أصلى ما عنديش فكره حانزل ازاى ، يمكن أنزل بجتنى عريان مثلا ، تبقى عباره قدام الناس الغرب ، عشان كده بقول من باب الاحتياط تحضرى لى غيار .. وانت قاعده مستنياني . عايزك تركزى ذهنك في ما تخليش حاجه في فكرك غيرى .

أم رتيبة : حاضر ، مش حاخلي في فكرى غيرك .. سيبني بقي .. اعتقني لوجه الله .

عبد الصبور : إخص عليكي يا خاينه .. بعد العشرة الطويله ، اقول لْكُ انا حا موت الليله دي .. تقوليلي سيبني بقي اعتقني لوجه الله !

أم رتيبة : ياخويا أصل انا شبعت من موتك ده .. بقى لك اتناشر سنه وانت تقول انك حاتموت .

عبد الصبور: (في تأثر) لا .. المره دي يظهر انه جد ، صحيح ، مش هزار .

أم رتيبة : (يبدو عليها الفزع) يا ندامه ! إيه الكلام اللي انت بتقوله ده .. إنت حاسس بحاجه . اجيب لك دكتور ؟.

(تنهض وتضع يدها على جبينه) .

عبد الصبور: ما فيش لزوم للدكتور ، عمر الدكتور ما يمنع الموت .. الا لما يكون

المريض من نفسه ، مش ناوى يموت . لكن انا قلت لكم خلاص ، أنا ناوى اموت .. أنا دلوقت حافوم ادخل فى السرير وارخى الناموسيه ، واذا كنتم تحبوا تقروا الفاتحه على روحى ، ما فيش مانع . يمكن تفيد . (ينهض ويتجه إلى السريو) .

سنية : (تنهنه) يا عينى عليك يا سيدى ، بعد الشر عنك يا سيدى ، ما كان بدرى عليك يا سيدى .

(يدخل زينهم منزعجا) .

زينهم : فيه إيه ؟ جرا إيه ؟ فيه إيه يا بت يا سنيه ؟ كفا الله الشر ؟.

سنية : سيدى عبد الصبور حايموت .

زينهم : يموت ؟ ها أو ، أنا كان أموت في المهلبيه .

(سنيه مستمرة في البكاء) .

أم رتيبة : بس يا بت بلاش كهن وبدع .. إيه المسخره دى ؟. دا بقاله ..
اربعتاشر سنه ناوى يموت .. ما بيموتش .. دا عمر الشقى بقى .

(يصعد عبد الصبور إلى السرير) .

(تقف ام رتيبه وزينهم بجوار السرير .. ويحدقان بأنظارهما إلى عبد الصبور) .

سنیة : (وهی تبکی) ما کانش یومك یا سیدی .. والله حا توحشنا یا سیدی !.

عبد الصبور: نشوف وشكم يخير، حدش لازمه حاجه من فوق، حدش له حبيب عايز يبلغ له السلام.

(يشيرييديه تحية الوداع ويرخى الناموسية).

يسدل الستار

(أمرتبية)

القصيلالثالث

المنظر

نفس منظر الفصل الثالى بعد أربعين يوما ، الساعة تشير إلى الثانية عشرة إلا ثلث ، وحجرة الاستقبال رصت بها مقاعد خيـزران ومنظرها غير مرتب بعد أن انفض المعزون فى الأربعين ، الباب الزجاجى المفضى إلى حجرة نوم عبد الصبور مغلق ، يبدو زينهم وقد أمسك بمقشة يد وأخذ يكنس الحجرة ويجمع المقاعد الخيزران فى أحد الأركان .

المشهد الأول

زينهم

والله عملتها و خلت يا سى عبد الصبور .. هوا انا كان داخل عقلى انك حا تموت حقيقى . أربعتاشر سنه على رأى ام رتيبه وانت كل يوم بتقول انك حاسس ان أجلك قرب ، وتصبح زى الحصان . صاغ سليم . يعنى اشمعنى المره دى اللى حليت عنا لازم فيها سر ، لازم محضر لنا مكيده ، لازم مدبر لنا مقلب . إنت مش ممكن تسيبنا كده بالساهل ، مش ممكن تحل عنا كنه الله في الله .. ياما انا حايف لتكون ناوى ترجع حقيقى .. ما انت أصلك ما تستبعدش عليك حاجه أبدا ، أهو كده تبان طيب وعلى نياتك .. لكن في الحقيقة قرم ابن قرم ، مين يعرف يمكن تعملها من دون الأموات ، وتقل عقلك وترجع لنا تاني ، وانت أصلك بنغزه ، وتعملها صحيح .. وتزوغ من عزرائيل زى الحربايه .. أنا بقالى خس سنين معاشرك . ما شفتلكش حاجه كده تفوت زى بقية الخلق حتى موته دى موته دى . تفضل ملبشنا كده أربعين يوم ، وكابس على موته دى . تفضل ملبشنا كده أربعين يوم ، وكابس على

أنفاسنا ولا كإنك مت .. كنا عايزين نشم نفسنا .. كنا عايزين نحس انك مت حقيقي .

(تدخل سنية وقد ارتدت ملابس سوداء) .

سنية : ماتيا الله تشهل شويه يا زينهم . . إنت عمال تحسوك في إيه ؟ .

زينهم : مش لما اوضب الأوده ، عشان اللي بيتسمموا دول يرجعوا يقعدوا تاني .. أنا مش عارف لزومه إيه الأكل في الميتم ؟

سنية : وأكل إيه ! هوا أكل بعقل ! دا انت لو شفت الشيخ جاد وهو هابش في حتة الفخده اللي فوق الفته تقول دا عمره ما حضر ميتم أبدا ، والا الأستاذ محجوب وهوا يبلحس السمن اللي في صوابعه ، وباين عليه الفرحه كده ، زى اللي نفسه كل يوم يكون في ميتم .

زينهم : الحق مش عليهم . الحق على اللي سممهم ، ما كانش ضروري نعمل لهم اللي عملناه ده .

سنية : أمال يعنى فكرك كده يبجوا يعزوا مجانا .. يقعدوا يسمعوا القرآن كده لوجه الله ، على العموم . أهى رحمه ونور على روح المرحوم .

زينهم : مرحوم ؟ أنهى مرحوم ده ؟ هوا ده تنفع فيه رحمه والا نور . دا تلاقيه دلوقت مشاكل طوب السما . تلاقيه مخلاش حد ما تخانقش معاه . أنا متأكد انه وهوا طالع مع عزرائيل خلا عزرائيل ندم على أحده ، وانه لو رجع لنا زى ما بيقول مش حا يكون راجع بكيفه أبدا ، دا يكون راجع مطرود بناء على طلب الأرواح ، حا يكون راجع مضروب تلاتين ألف برطوشه ومكسور وراه أربعين ألف قله . لكن لزومه إيه يرجع ؟ وهوا سابنا لما يرجع لنا . . بذمتك انتى حاسه انه مات ؟.

سنية : أبدا والنبي يا خويا يا زينهم ، أنا متهياً لى انه في كل ساعه قاعد قدامنا ، وكل ما ماجي أخش أو دته ألاقيه مدلدل رجليه في الطشت زي عوايده ، وكل ما بص لطرطوريتهياً لى انه قاعد تحته .

زينهم : إنت برضه كده ؟ دا انا كنت فاكر انا لوحدى . أنا كل ما فكر .. يتهيأ لي

انه هوا ما طلعش لا سما ولا حاجه وانه قاعد تحت الناموسيه زى ما شفناه آخر مره ، وكل ما اسمع عطسه .. تتهيأ لى انها بتاعته .

سنية : وستى ام رتيبه . ألعن وألعن ، متلبشه ومرعوشه وعاملا له حساب زى ما يكون حى . . أصل حكاية رجوعه تانى مخلياها زى الفرخة الدايخه . . مش مصدقه أبدا انه خلاص مات ، وانها حره تعمل اللي هى عايزاه . حاسه انه زى ما يكون في سفر وراجع ، وانه لسه بارك على أنفاسنا .

زينهم : على العموم .. كلها نص ساعه ، وننتهى .. والمسأله تفوت بالطول والا بالعرض ، واذا كان ناوى ينزل حقيقى .. أهو ينزل له شويه من نفسه ويحل عنا ما يورناش خلقته بعد كده أبدا .. نص ساعه ، ونبقى أحرار .. نص ساعه ونخلص منه خالص ، ونقطع دابره من هنا ، ونعمل زى ما احنا عايزين .. انتى فاكره يا سنيه الطلب اللي طلبته منك ؟.

سنية : فاكره يا خويا .. بس المرحوم .. خوفني م الجواز قوى ..

زينهم : وهوه المرحوم كان وراه حاجه غير كده .. أنا عارفه كويس . نوع أنانى ما يجبش الا نفسه . فضل مقعد اخته كده من غير جواز لغاية ما ضيع عمرها . عشان عارف انه ما يقدرش يعيش من غيرها .

سنية : طبوانا ؟ ماله ومالى ؟.

زینهم : نفسه فیکی و مش طایلك .. نفسه یتجوز و مش قادر .. خایف و موهوم ، وعشان كده ضیع عمره عازب .. وعایز كل الناس تقعد زیه .

سنية : لا يا زينهم حرام عليك .. الراجل كان بيقول انه صاحب مبدأ ..

زینهم : مبدأ .. سلامات یا مبدأ .. مبدأ إیه بقی یا ست سنیه .. دانتی علی نیاتك قوى .

سنية : كان بيقول البنى آدم قدامه نعيمين ، نعيم الأرض ونعيم السما ، وانه هوا حارم نفسه من نعيم الأرض عشان قصير وزايل ، ومستنى نعيم السما عشان باقى و دايم .

زينهم : هأأو ، هأأو أو أو ، دا قصر ديل يا ازعر . كلهم بيقولوا كده .. الواحد لما

ما يطولش النعمه ، يقول عليها زايله ، ويعزى نفسه بالدايمه اللى فى السما .. خليه يقى يقابلنى فى السما . فيه حد يزهد فى النعيم بكيفه ! ما يزهد فى الحلق الا اللى بلا ودان . مافيش فى الأرض زهد .. الا بالإكراه .. والزهد فى النعمه كفر ، دا انا لما اديكى حتة ملبن و ترفضيها اتكسف ، تبقى عيبه فى حقى . أنا البنى آدم الغلبان ، إيش حال بقى ربنا ؟ يصح يدينا حاجه و نقول لا !! يصح نكسف ربنا ؟.

سنية : أستغفر الله العظم .

زينهم : تستغفرى ليه ، هوا انا قلت كفر ؟ الكفر هوا اللى قالوه لك الله يرحمه سى عبد الصبور . أنا لازم اتجوزك ، ربنا ادانى حتة ملبن . حتة قشطه . أكسفه ! أقول لا أنا عايز من اللى في السما .. دى تبقى لماضه .

(يفتح الباب الزجاجي وتبدو منه أم رتيبه متشحة بالسواد ويبدو الفراش والمقعد والطرطور وعلبة النشوق ، وكل الاستعدادات لاستحضار روح عبد الصبور) .

أم رتيبة : مش تخلصوا بقى وتخلوها ليله تفوت على خير الساعة قربت على اتناشر ، مش تقولوا للمزاغيف اللى بيتسمموا بيجوا يقعدوا بقى .. مش كفايه أكل . هم إيه بياكلوا في آخر زادهم .. ما شافوش مياتم قبل كده .. (ترفع رأسها إلى السما) يارب انهينا بقى .. خلصنا م الدوخه اللى احنا فيها . الناس كلهم بيموت لهم أموات ويحزنوا عليهم ويخلصوا .. ما فيش حد موته عجب غيرنا احنا ، لازم سي عبد الصبور يروح وييجى .. أصله واخد السكه قياسه . إلهي يعدلها له .

(يدخل سيد افندى من باب الصالة وهو يمصمص بشفتيه وبسلك أسنانه ويفاجأ بوجود أم رتيبة فيتراجع) .

المشهد الثاني

: يا ساتر عدم المؤاخذه .	سيد
: (يبدُو عليها الخجل وتحجب وجهها بطرف الطرحه) اتفضل يا	أم رتيبة
خويا ما فيش حد غريب . اتفضل .	
: (يتقدم ويصافحها وهو يتعثر من الكسوف) أهلا ، وسهلا أهلا	سيد
وسهلا .	
(يخرج زينهم وسنيه ويتركان سيد افندى وأم رتيبة في الحجرة) .	
: أهلا بك يا سي سيد ، والنبي يا خويا مش عارفه اودي جميلك	أم رتيبة
فين .	
: على إيه يا ست على إيه ؟	سيد
: على التعب اللي تعبته في جنازة المرحوم . هوا انت تعبت شويه ؟	أم رتيبة
: دا الواجب يا ست احنا ما عملناش حاجه اكتر م الواجب .	سيد
: أبدا والنبي يا سي سيد افندي دا انت عملت أكتر واكتر انت	أم رتيبة
أصلك طيب وابن حلال ربنا يقدرني على رد جميلك .	
: يا ستى ما فيش فرق إحنا برضك أهل أنا مش غريب .	سيد
: غریب ازای یا سی سید دا البیت بیتك . هوا احنا فاضل لنا مین بعد	أم رتيبة
سي عبد الصبور غيرك انت والست أم سيد .	
: أنا تحت أمرك أنا خدامك أأمرى يا ست ام رتيبه أنا مالياش	سيد
بركه الاانت هوه لو كان الله يرحمه حط عقله في راسه ، ووافق على	
المسألة اياها . مش كان بقى زيتنا فى دقيقنا ، وكان هدى سرنا .	_
: ربنا يتمم بخير يا سي سيد ربنا ما يخييش رجا مؤمن احنا برضه	أم رتيبة
مسيرنا لبعضنا .	
: أيوه . برضه مسيرنا لبعضنا أنا مؤمن وربنا ما بيخييليش رجما	سيد

أبدا .. إن شاء الله أحلامنا حا تتحقق وحا نتجوز وبسرعة أسرع مما نتصور .

أم رتيبة : ازاى ؟..

سيد : زى الناس . هوا فيه مانع اننا نتجوز دلوقت ؟ العقبه اللي كانت موجوده زالت . السداللي كان بيننا انشال .

أم رتيبة : ما نشالشي ولا حاجه .. دا السد حا ينزل تاني الساعه اتناشر .

سيد : انت برضك بتصدق كلام الجماعه بتوع الأرواح دول . هوا برضه معقول انه ينزل ! وينزل ليه ؟ وعلشان إيه ؟

أم رتيبة : قال عشان يكشف لنا السر .

سيد : سر ؟ سر بتاع إيه ؟

أم رتيبة : أنا عارفه يا خويا .. أهو قعد يقول لى كلام كتير ما فهمتش منه حاجه أبدا .. غير انه حاينزل تانى الساعة ١٢ ليلة الاربعين ، وان انا لازم الحضر كل حاجه واقعد لاستقباله فى أودته ما فيش حد معايه أبدا .. علشان يقول لنا على اللى شافه فوق .

سيد : وهوه كان حدطلب منه يقول ع اللي شافه فوق .. حد كان سأله ؟. أما عجيبه على الجدع ده !

أم رتيبة : معلهش يا سيد افندى . . فات الكتير ما بقاش الا القليل .

سید : أنا مقدرش استنی .. أنا حاسس بفرحه عجیبه .. أنا حاخرج ادور علی مأذون .

أم رتيبة : يادى النايبه يا سيد افندى ، الناس يقولوا ايه ؟ اتجوزت ليلة الاربعين بتاع اخوها وهوا لو نزل وشاف المأذون حايخلي ليلتنا تفوت كده بالساهل ؟. دايخليها ليله زى الطين .

سيد : طيب معلهش .. انا حاصبر علشان خاطرك .. حاقعد استنى اشوف بسلامته حا يعمل إيه بنزوله ، حا يجيب الديب من ديله !

أمرتيبة : والنبي دنا حتى خايفه من قعادك ساعة نزوله .. أصل الله يرحمه ما

كانش يطيقك أبدا . كان بيقول عليك فيك شبه من الخرتيت .

سيد : الإيه ؟

أم رتيبة : الخرتيت .

سيد : والخرتيت ده يبقى ايه ؟

أم رتيبة : لازم حاجه شكلها وحش قوى .

سيد : انت شفتيه ؟

أم رتيبة : لا .. أبدا ، وانا مالي اشوفه .

سيد : هوا شافه ؟

أم رتيبة : ماظنيش .

سيد : أمال يعني منين عرف ان انا شبه الخرتيت ؟

أم رتيبة : ما انا برضه سألته نفس السؤال فقال لى انه هو لما يحاول يتصور الحرتيت ما فيش صوره تيجى فى دماغه غير صورتك .. وما دام كده يبقى لازم يكون الحرتيت شبهك ، وما دام الحرتيت شبهك يبقى لازم انت شبه الحرتيت .

سید : ما شاء الله .. اما استنتاج بدیع ، معلهش .. الله یسامحه ، كانت علیه لسان زی العقربه ، و كان .. لكن على إیه . النبى قال اذكروا محاسن موتاكم .. الله يرحمه مطرح ما راح .

(يسمع صوت الشيخ جاد من الخارج يصيح) .

الشيخ جاد : ماتيالله بقى يا جماعه .. دى الساعه قربت على اتناشر .

محجوب: أيوه .. ياللابينا .

أم رتيبة : طيب اسيبك انا بقى يا سى سيد .. لحسن الجماعه جايين .. أنا حا خش اقعد استنا . ياما انا خايفه قوى ، كل ما الساعه بتقرب أحس ان روحى سايخه وركبى ملخلخه .. أنا أصلى عمرى ما قابلت أرواح قبل كده .

سيد : شدى حيلك ، ما تخافيش . انا قاعد لك بره ، لو كان ناوى على أزيه

ابقى ازعقى على وانا اخش اكسر لك نافوخه .. أنا عارفه جنس بطال ما يجيش غير بضرب الصرم .

(تنصرف أم رتيبه وتفلق وراءها الباب الزجاجي ثم يدخل الشيخ جاد وزكي ومحجوب تباعا من باب الصالة) .

المشهد الثالث

محجوب : (ينظر إلى ساعة الحائط) الساعة اتناشر الا عشره . فاضل عشر دقائق .

(يجلس كل منهم على مقعد وعيونهم متنقلة ما بين الساعة والباب الزجاجي) .

زكى : لوكان صحيح الأستاذ عبد الصبور حا يقدر يوفى بوعده وينزل !. يبقى معجزة ترنه !

محجوب : قرنه بس ! دا يبقى معجزة ميت قرن ، لو كان يقدر ينزل بجسمه زى ما كان بيقول دايما فى الجلسات بتاعتنا ، ويقول لنا عمل إيه فى الاربعين يوم ، وشاف إيه .. دا يبقى الحدث الأكبر من عهد آدم .

سيد : عبد الصبور يبقى معجزة قرنه ؟ يبقى حدث أكبر ؟ دا إيه الكلام ده ؟ زكى : أمال .. هوا فيه حاجه محيره البنى آدم ، غير جهله باللى بعد الحياه .. البنى آدم اللى طار في السما .. البنى آدم اللى غاص في البحر ، البنى آدم اللى اتكلم في لندن سمعوه في القاهره ، واللى اتحرك في أمريكا شافوه في

طوكيو .. البنى آدم اللى نطق الجماد وحرك الحجر . البنى آدم اللى ما عجزش عن شيء أبدا . البنى آدم اللى فهم كل حاجه وكشف كل سر .. عجز عن أبسط الأشياء وأقربها له ، عجز عن فهم نفسه . جى منين . ورايح فين ! أصله إيه ؟ وفصله إيه ؟ بيتولد ليه ؟ وبيموت ليه ؟ البنى آدم عرف كل حاجه في الدنيا الانفسه .

محجوب : مظبوط . فهم الشمس والكواكب .. فهم فيه إيه في باطن الأرض ، وفيه إيه ورا السماوات .. لكن ما فهمش فيه إيه في بطنه . والافيه إيه ورا نفسه .

زکی : فهم کل حاجه .. ما عدا روحه .. روحه .. اللی هی کل حاجه عنده ما عرفش عنها حاجه أبدا ، بتطلع ازای ؟ بتنزل ازای ؟ بتعمل إیه ؟ بتروح فین ؟

ز کی

: حقيقى معاكم حق .. لكن لزومه إيه يعرف .. وحا يعمل إيه لما يعرف ؟. ما دام ما يملكش من أمر روحه حاجه .. ليه عايز يعرف عنها حاجه ؟ لا هوا اللي بيجيب روحه ولا هوا اللي بيطلعها ، يبقى ماله هوه ومالها . هوا كل اللي عليه انه يعيش ، إنه يمشى ، إنه يسيب نفسه للي خلقه ، هوا اللي منزله ، وهوا اللي بياخده . ماله هوه ومال روحه! عرف والا ما عرفش . لا حا يقدر يوقف طلوعها ولا يمنع نزولها . يا شيخ انت وهوه ريحوا نفسكم بلاش فلسفه فارغمه . كان غيركم اشطى .

: هوه حقیقی مش حا یقدر یوقف طلوعها ، لکن علی الأقل یبقی عارف هی طالعه فین ، یبقی عنده فکره ... مش یفضل فی حیاته دایر تایه حیران ، کل اللی یعرفه عن روحه حاجات ما یقبلهاش عقله ، ویضطر یصدقها من غیر تفکیر ، لأنه لو فکر مش حا یصدق ، وهوه حاسس انه لازم یصدق فی حاجه ، ولازم یؤمن بحاجه ، لیه ما یبقاش المصیر واضح ومعروف ؟ لیه ما نعرفش انه لما حانموت حانبقی کدا ، وحا ننتهی، کدا .. ما دام مصیرنا متقرر ومعروف .. لیه یستخبر علینا ؟ لیه نفضل فی ضلاله و فی ظلام ؟

محجوب : ايوه حقيقى ليه العالم الواسع دا كله ، اللي بتتفاوت عليه الأجيال ، ما يعرفوش معمول ليه وفايدتهم فيه ايه ؟ ليه يفضلوا يتخبطوا في عقائد مختلفة ، وأوهام متناقضة ، واجيال تروح ، واجيال تيجى ، ولا حد

عارف ده راح فين ولا ده جه منين ، والا إيه فايدة وجوده في العالم . ولمصلحة مين العالم موجود ؟ . إذا كان اللي عايشين فيه هم أشقى ما فيه من ساعة ما يتولدوا و هم مهددين بالموت ، وإيه هوا الموت ما هماش عارفين . . يقولوا لهم ده انتقال من حياتهم الوحشه الفانيه لحياه حلوه ، حياه دايمه ، حياه خالده ، طيب امال جم للحياه الفانيه الوحشه ليه ، لما فيه حياه حلوه ، وحياه دايمه ، وحياه خالده ؟ لزومه إيه التعب والشقا في الحياه الفانيه دى ؟ الحياه اللي بياكل فيها الكبير الصغير ، واللي عمره ما داق فيها الإنسان سلام ولا شاف هدوء ، ولا استريح باله . . إيه قيمة الفتره القصيره اللي بيقضيها الإنسان في الحياة الأولى ، مغمور في الشقا و التعاسه و الظلم ؟

زكي

: مين يعرف ؟ يمكن لو كان عرف الإنسان مصيره المجهول ، وتأكد ان الفتره اللي بيقضيها في الحياه دى فتره مؤقتة ، وان له مصير طويل آخر . ما كانش طمع في الدنيا وجرى ورا المتع وانكب على الملذات ، وحب ياخد أكبر كميه ممكنه منها قبل ما يموت ويضيع كل شيء من إيده في الآخر .. لو كان حقيقي يعرف إن حياته لسه لها بقيه طويله ، كان صبر في الحياه دى واستحمل وكان كل الناس حبوا بعض وتقاسموا اللقمة سوا ، بدل ما كل واحد يخطفها من بق التاني يا أخى دا الواحد منا لما يكون وراه عزومه ما بيرضاش يرمرم عشان نفسه ما تنسدش .. ليه ؟ لأنه ضامن العزومه .. وكان لو كانت العزومه الموعود بيها في الآخر مش ممكن كان يرمرم في الدنيا .. لكن المصيبه انه حاسس انه مش ضامن حاجه .

سيد

: أيوه تمام . لو كأن الواحد ضامن ان الدنيا ـــ زى ما قال سيدنا على ـــ سفر ، والآخره غايه ، كان قضى السفره زى ما تكون .

زكى

: لكن هوا مش شايف الغايه أبدا ، هوا فاكر ان السفر هوه كل حاجه ، شايف الغايه غامضه ومجهوله .. مش عارف هوا رايح فين ، وعشان كده بيقول يفوز بالسفره أحسن له ، وعصفور قدامه خير من عشره مش شايفهم .. بيقولوا له ان في آخر السفره حا تلاقي كل الحاجات احلوه اللي انت بتشوفها في المحطات وأحلى منها ، إذا كنت بتلاقي في انحطات جبنه وسميط ، حا تلاقي في آخر السفره كنافه وقطايـف وشهد ، ولبن ، لكن أهو كلام بيقولوه له .. حدوصل لآخر السفره وجه قال له ، أبدا .. ومع ده كله كان تلاقي و احد مثلا ميحبش الكنافه والقطايف والشهد واللبن ، واحد نفسه حلوه بيحب الطعميـــه السخنه ، والبني آدم بيتغير والناس أذواق .. مش معقول انه حا يفضل باستمرار كل أمانيه ، لبن وشهد وخمر ، وكل حاجه ولها أوان .. كان زمان ركوب الحمير زينه .. لكن دلوقت بقى مهزأه .. عشان إيه ؟ عشان فيه جنب الحمير كاديلاك وبكار.

: ، ليه اللف دا كله يا أخي ، البني آدم دلوقت بيلاقي في المحطات اللي انت بتقول عليها حاجات أحسن من اللي بيتوعد بيها في آخر السفره ، دلوقت الناس ، اللي بيقولوا عليهم كفار ، ولا هماش مسلمين ، ولا عايشين في أرض الرسول ، عايشين عيشه أحسن من اللي اتو عدو ابيها المؤمنين والمسلمين اللي دلوقت بيتمرغوا في التراب .. دلوقت كل واحد منهم عنده فريجيدير فيه الشهد واللبن والخمر ، وكان فوقها جاتوه ، ومرتدلا ، وبسطرمه ، وديك رومي ، وعنده تلفزيون وعنده حاجات كتير قوى . . إخواننا المسلمين لسه ما عندهمش فكره عنها ، وعمرهم ما ينتظروها حتى ولا في آخر السفره .

الشيخ جاد : (وهو منهمك في تسليك أسنانه) وحدوه يا جماعه .. إيه أصل الكلام اللي بتقولوه ده .. (ينادى زينهم الذى ظهر بجوار الباب) شوف كده يا زينهم وحياة أبوك قشايه اسلك بها سناني .. حتة اللحمه اللي كلتها كانت متفله قوى . إيه أصل الكلام اللي عمالين تكفروا بيه ده .. أسرار إيه اللي عايزين تكشفوها دى ! هوه كل من أنعم عليه ربنا

بحتة غ ، خلاص صابه الغرور ، واستكبر على خالقه .. دا فيه حاجه اسمها ربنا ، سيدى وسيدك ، وسيد الكون .. اللي منظمه ، واللي مساويه .. هوا العامل اللي في المصنع ، مش بيشتغل الحاجه اللي في إيده ؟ وريس المصنع ، مش بيديره كله وهوه قاعد في الأوده القزاز الصغيره بتاعته ؟ يعنى لو كان كل عامل ساب اللي ف إيده ، وقال أنا عايز اعرف المصنع ده ماشي ازاى ، والحته اللي يعملها رايحه فين وحا يعمل بيها إيه ، والخامات دى بيجيبوها منين ، وأصلها إيه ، كان عمل المصنع ؟. أبدا وحياتكم . كان خرب . بقى إذا كان الكلام ده صحيح في المصنع اللي قد كده ، يبقى مش صحيح في العالم الواسع صحيح في المصنع اللي قد كده ، يبقى مش صحيح في العالم الواسع ده . إذا كنا مستكترين على العامل إنه يتدخل في شؤون ريس المصنع اللي هوه بني آدم زيه ، يبقى ما نستكترش على المخلوق الضعيف انه يتدخل في شؤون ربنا .. إذا كان العامل بيخفي عليه سر المصنع ، يبقى ما يخفاش على البني آدم سر الكون ؟ يا جدع انت وهوه عبب اختشي .

زينهم

: أيوه والله يا شيخ جاد ، يسلم بقك ، ها العبد بوضه له حدود . أسرار إله وبلاوى إيه اللى عايز يعرفها ؟ كفايه عليه يعرف ربنا كويس . كفايه عليه يؤمن بضميره ، وبقلبه .. دا الواحد مهما اتفرعن ، وكفر ، ونسى ربنا ، لما بتصيبه مصيبه أو تجراله حاجه ، غصبن عنه ، ومن غير ما يفكر ، بيقول يارب ، يارب .

(يذهب زينهم ليحضر المقشه).

الشيخ جاد : أصل البنى آدم ضعيف ومغرور ، وعقله مهما كبر برضك عاجز ، ولا يمان كده ربنا وضع الإيمان في القلوب ، القلوب بتهدى أكتر من العقول ، والمغرور مهما اتنفخ ، حيبقى برضك زى البلونه أقل شكه تنزله على فشوش .

محجوب : (ينظر إلى الساعة وبيدو عليه الاهتام) بس بقى يا جماعه ، كفايه

كلام ، خلونا ننتظر الساعه قربت على الاتناشر ما فضلش غير دقيقة والا دقيقتين ، والأستاذ عبد الصبور ينزل ، يعنى زمان روحه دلوقت عماله تحوم حوالينا .

سيد : إنتوا برضك مصدقين انه حا ينزل! برضك بتصدقوا الكلام الفارغ ده ؟

زكى : (إلى سيد) إيه ده يا سيدنا ، وطى صوتك كده وانت زى المدب ، حد يقول كده والروح نازله . إنت عايز تطرد الروح ، دى حاجات محربه و مدروسه فى أكبر الجامعات ده فيه عندهم صور لأرواح . عايز إيه أكتر من كده ؟

سید : وانا مالی تنزل تنزل ، آهی عندکوا . امضغوها واشبعوا بیها .. بلوها واشربوا میتها .

محجوب : بس بقى يا جماعه ، كفايه كلام . أرجوكم عايزين سكون خالص .

الشيخ جاد : وبرضه ، سماويات ، روحانيات ؟

محجوب : طبعا ، طبعا ، ركزوا فكركم في الأستاذ عبد الصبور ، ما حدش يفكر في حاجه تانيه .

سید : ودی مصیبة ایه دی کمان !. أفکر فیه بتاع ایه ؟ هوا دل حد یفکر فیه ؟

محجوب : یا أخینا .. یا بنی آدم ، وطی صوتك ، اتكلم بهدوء .. إذا كنت مش عایز تفكر فیه .. عنك ما فكرت ، بس اقعد ساكت .

سید : سکت یا سیدی .

زينهم : (يدخل حاملا المقشة على كتفه منشدا) اللبارق ، اللبارق ، اللبلالا بالابارق ..

عبد الصبور الله يجازيك ما تقول لى بس لمين اشكيك ما لحقتش أبدا افرح فيك تموت وترجم تسانى تنسق اللبارق .

محجوب : (ناهرا زينهم) إيه ده يا حيوان ده ! إنت عايز تطفش الروح ؟

زينهم : ما تخافش . دا كان يحب الغنيوه دى قوى . دى يمكن هى دى اللي حا تنزله . قولوا معايه قولوا ، اللبارق . اللبارق .

محجوب : إنت حاتسكت والااقوم اكسر دماغك ؟

زينهم : ما فيش لزوم . خلاص سكت . خد يا شيخ جاد المقشه ، سلك سنانك زى ما انت عايز .

زكى : بس يا جماعه ، اسكتوا ، خلاص ، دى كلها دقيقه بس .

(يسود السكون وتمضى فترة دقيقة فى صمت عميق . . والكل واجم ساهم محملق فى الساعه التى أخذ يقترب عقرب الدقائق فيها من ١٢) .

(تدق الساعة ٢ ٢ دقه ، وفى كل دقه يزداد توتر أعصاب الجميع ، · ويزداد إرهافهم ، ويثبتوا فى أماكنهم كالتماثيل) .

(تمضى دقيقة أخرى بعد دقات الساعة . ثم يسمع صوت جر الطشت على الأرض وسكب المياه من الإبريق فيه) .

زينهم : (يبدو عليه فزع شديد ويمسك بيده كتف سيد أفندى وهو أقرب الموجودين اليه ويهمس في خوف) يا نهار اسود دا بينه عملها ونزل ؟

سيد : (هامسا في فزع) هوا مين ؟

زينهم : هوا ، هوا بعينه .. سامعين رجليه بتتحرك في الطشت ، يا نهار مهبب وزى الطين سامعين يا جدعان ؟

(الجميع ينصتون ويعلو وجوههم الفزع)

محجوب : (فی خوف) سامعین .

الشيخ جاد : أنا سامع كويس . . صوت الطشت بيتجرجر على الأرض .

زكى : اصبروا شويه يا جماعه بلاش قلق ، إيه اصله ده اسكتوا خلونا نسمع ، دى مصايب إيه دى ؟

﴿ يسمع صوت وقع أقدام القبقاب ذو الجلاجل ، وتبدو سنية على

الباب مصفرة الوجه).

: (هامسه لزينهم) سامع يا زينهم . سنية

> : سامع ياختى . زينهم

: سامع القبقاب ابو جناجل ؟ سنية

> : سامعه کویس . زينهم

: ﴿ فَوْ عَ ﴾ أَنَا خَلَاصِ يَا زَيْنِهِم ، ركبي سابت ، مش قادره اقف ، أَنَا سنية

كنت فاكره الحكايه كلها تهويش في تهويش.

: أنا كان كنت فاكر كده .. لكن ابن الأروبه عملها صحيح . زينهم

الشيخ جاد : فيه إيه ؟ يتتوشوشوا بتقولوا إيه ؟

: ما نتش سامع ؟ زينهم

الشيخ جاد : سامع إيه ؟

: القبقاب ابو جناجل ؟ زينهم

الشيخ جاد : ماله القبقاب ابو جناجل ؟

: هوه فيه حد كان يقدر يلبسه غيره! زينهم

: أهه .. أنا سامعه كويس ، وسامع شخشخة الجناجل . محجو ب

: لا .. أنا ما قدرش على كده أبدا ، دى الحكايه بقت جد خالص .. سيد

دى مصيبه وطبلت ، وبعدين نعمل إيه لو عملها وبلط هنا ولا رضيش يطلع تاني ؟

: طيب بس ما تفسرش بقى .. أهى دى تبقى حقيقى المصيبه الكبرى . زينهم

: الله يكون في عونك يا ستى .. يا ترى عامله إيه معاه دلوقت ؟ سنية

(يسمع صوت تصفيق)

: يانهار اسود ، أنا مالياش دعوه ، ولا انا منقول من هنا ، خشي له انت زينهم يا سنيه ، بينده لك انتي ، الصقفتين دول يعني لكي ؟

: أخش ! ليه ؟ اتجننت ؟ أنا أخش ؟ دانا عقبال ما اوصل للباب .. سنية

يكون دمي نشف.

(يعاد صوت التصفيق) .

زينهم : خشى بقه يا سنيه ، إنتى بتعرفى تهديه .

سنية : أبدا .

(يعاد التصفيق) .

زينهم : خشى يا سنيه ، لازم عايز علبة النشوق .

سنية : وانا مالي ، أهي عنده اخته تجيبها له .

(يسود الصمت فترة)

الشيخ جاد : لازم لقاها .

تصدر عطسة عالية).

سید افندی : (وهو یحتضن الشیخ جاد) یالطیف ، هوا بعینه ، ما فیش غیره (ییدو الخوف علی الجمیع) هی عطسته ، اللی تطلع تشرخ الودن ، یا مغیث ، یا ناس الحقونی ، حد یشیلنی یطلعنی بره ، ودی کانت وقعة إیه المهببه دی ، یا ناس حرام علیکم ، دانا بینی و بینه تار بایت ، أنا حاکون أول ضحیه له ، دا مش ممکن ینسالی حکایة الکرنب المحشی و راس العبد ..

زينهم : طب بس بقى اخفيها سيره ، لحسن يسمعك ، يطلع يمرمط بك الأرض .

(تستمر الجماعة فترة جالسين فى أماكنهم بلا حراك ، وكلما صدرت عطسة انتفضوا فى أماكنهم وظهرت عليهم علامات الرعب والفزع) .

محجوب : وبعدين يا جماعة ! وإيه آخرتها ! احناحا نفضل كده متلبشين .. مش نشوف إيه اللي حصل ، دا حتى حرام علينا نسيب الوليه الغلبانه جوه كده لوحدها ، دى مش رجوله ، دا احنا دلوقت بنعمل تجربه ، والتجربه في طريقها للنجاح ، فإيه اللي مخوفكوا كده ! هوا احنا مش كنا أكتر ما بنتمناه إن الأستاذ عبد الصبور ينزل لنا روحه متجسده ،

طيب أهو ده اللي حصل ، يا الله واحد منا يقوم يشوفه ويسلم عليه و يكلمه .. يا الله يا شيخ جاد .

تشیخ جاد : أَنَا ؟ ولا اعرفه ، ولا لى دعوه بيه . حدالله بيني وبينه ، أنا لا انا عايز أرواح ، ولا لى دعوه بالأرواح .

يز هن ويسيبنا وتنه طالع . ويزموا على بعض لغاية ما الراجل يزهن ويسيبنا وتنه طالع .

سيد : يا ريت ، ربنا يسمع منك .

زكى : أيوه دلوقت نقول ياريت ، وبعدين نرجع نندم ، خليكوا قاعدين ، أنا حاقوم أشوفه (ينهض مترددا ويأخذ في الاقتراب من البساب الزجاجي) .

الشيخ جاد : حاسب على نفسك .

زكى : (يتقدم) العمر واحد والرب واحد ، إحنا لازم نستمر في التجربه إلى النهايه .

(يقف أمام الباب مترددا ، ثم ينحنى ويضع إحدى عينيه على ثقب المفتاح فلا يكاد ينظر ما وراءه حتى يتراجع مبهوتا مذعورا)

زكى : يا لطيف ، يا لطيف ، الطف بنا يارب . هوه بعينه ، بطرطوره ، بعبايته ، بنضارته . يالطيف يالطيف .

سید : (وقد تراخت أعضاؤه) یا ناس حرام علیکم .. حد یشیلنی یرمینی بره ، أنا جتنی نملت ، ومفاصلی خلاص سابت .

الشيخ جاد : وانا زيك ، ما بقاش في نفس .

زينهم : بس كان مالنا ومال الغم ده . (سنيه تنهاوي إلى الأرض)

عجوب : (ينهض واقفا) وبعدين يا جماعه ، والوليه اللي جوه دى نعمل فيها

إيه ؟. دى ذنبها فى رقبتنا .. إذا كان احنا واحنا بره الأوده جرا لنا كده ، إيش حال هى بقى .. اللى معاه فى أوده واحده .. هى دى برضه أصول ؟ خمس رجاله طوال عراض يقعدوا كده زى الولايا ، ويسييوا الوليه الغلبانه دى لوحدها جوه .

زينهم : أيوه حقيقي ما يصحش ، دى أمور نسوان اللي احنا عملينها دى .

سنية : يا عيني عليكي يا ستى .

الشيخ جاد : أنا ما لياش دعوه ، لو قتلتونى ما انتقلش من مطرحى .. أنا لا قلت له انزل ولا اطلع .

سيد : وانا زيك .. لو كان على كنت وصيت عزرائيل يسنسله في السما بحديد .

محجوب : أقول لكم أحسن طريقه .. ولا انت ولا هوه (يتقدم بجرأة ويدفع الباب الزجاجي فيفتحه على مصراعيه)

(تبدو حجرة النوم في ضوء باهت تماما كما كانت في الفصل السابق . وعلى المقعد أمام الفراش جلس شبح يرتدى الطرطور والعباءة والمنظار على أرنبة أنفه وقد وضع ساقيه في الطشت) .

(الجميع يصيبهم فزع ويحدقون في الشبح في دهش شديد)

زكى : (هامسا إلى سنيه) بسم الله الرحمن الرحيم .. هوه بعينه الخالــق الناطق ، بس باين عليه تخن شويه .. الظاهر إن صحته جت على السما .

سنية : لكن امال فين ستى ام رتيبه ؟ راحت فين ؟

سيد : لازم أكلها .. هوا دا تستبعد عليه حاجه أبدا .

محجوب : ما تكلمه يا سي زكي .. ما تسأله .

زكى: اسأله يا شيخ جاد.

الشيخ جاد : أنا اسأله ؟ بتاع إيه ؟ وعشان إيه ؟ أنا ما كلمش الأرواح شفوى ؟ مقدرش عليها الالما تكون في الكباية بس ، لكن كده ساييه . . حدالله بيني وبينها .

محجوب : طيب بس . بس . اسكت انت وهوه . أنا حاكلمه (للشبيع)

السلام عليكم يا سيد عبد الصبور عبد الغفور عبد الشكور المقزقز.

سيد : إيه ؟ عبد إلايه ؟ إيه ؟ صبور وغفور وشكور ومقزقز ، ومكانش عاجبه سيد بنجر ، ياخي جتك نيله .

(يرفع الشبح رأسه ، ويغادر مقعده ، فإذا به أم رتيبه نفسها وقد ارتدت ملابس عبد الصبور) .

أم رتيبة : (بلهجة عبد الصبور وهي تتقدم تجاه سيد) سيد إيه ؟.. سيد بنجر .. إنت هنا يابوز الإخص . ياوش الخرتيت .. يالمامة اللمامه . (يكاد الجميع يصعقون من فرط الدهش) .

زينهم : إيه ده ؟ مين دى ؟.

سنية : دى ستى ام رتيبه . اسم الله عليكى يا ستى . . إيه اللي جرا لعقلك يا ستى ؟.

سيد : إيه ده ؟.. أنا بوز الإخص ؟.. أنا وش الخرتيت ؟ أم رتيبه تقول على كده .. مش ممكن ، إحنا اللي كنا متفقين حا نتجوز دلوقت ، تقوم تقابلني المقابلة دى ؟.

أم رتيبة : تنجوز ؟ ياخى جاك جنازه حاره . . مين قال لك تخش هنا يا باشخبير الولعه ، يا باشخبير اللهاليب ، لما تبقى باشخبير الحلاوه ، ابقى تعالى هنا . . يا للاقوم ورينا عرض اكتافك .

سيد : ما يمكنش ، مش ممكن أبدا تكون دى ام رتيبه . أقطع دراعى ان ما كانش دا عبد الصبور ، هو بعينه عبد الصبور .. أم رتيبه الأميره ، اللي زى السكره ، تقول كلام زى كده ؟ تقول على خرتيت ؟.

زينهم : حقيقي ، لك حق . الجكايه لازم حصل فيها لخبطه .

أم رتيبة : (تنظر إلى زينهم فى اشمئزاز) وانت إيه اللى جابك هنا قدامى بوشك العريان ده .. يا خسيس يا خبيث ، يا إبليس .. أنا مش ميت مره قلت لك ان و شك بيلبش جنتى ، مش حرجت عليك تيجى قدامى من غير وش .

زينهم : ولاكلمه ، هوه بعينه .

أم رتيبة : (**لزكى ومحجوب والشيخ جاد**) وانتوا إيه ؟. قاعدين لغاية دلـوقت تعملوا إيه ! ياللا ورونى عرض كتافكم .

محجوب: یادی الخساره .. الولیه انصابت ، یا مسکینه یا ام رتیبه ، عقلها راح بلاش ، وهی دی حاجه بسبطه .. دا انا کنت بره و حاتجنن ، إیش حال هی ، هی المسکینه العبیطه الطیبه اللی لا تعرف لا روح ولا عفاریت .. روحتی بلاش یا ام رتیبه ، الله یجازیك یا عبد الصبور یا للی کنت السبب .

سيد : يعنى خلاص . أخرج كده من المولد بلا حمص . ما فيش جواز ولا حاجه ، ده برضه يرضى ربنا !.

أم رتيبة : جواز في عينيك يا خلبوص يا وش الخرتيت يا وحش . . إياك اشوفك تعتب هنا تاني .

(یخرج سید و هو یضرب کفا بکف) . .

(أم رتيبه تجلس على المقعد وتضع ساقيها فى الميـاه وتشـاول علبــة النشوق) .

سنية : وبعدين يا زينهم .. نعمل إيه في المسكينه دى اللي عقلها راح ؟.

زينهم : راح ؟ ولا راح ولا حاجه ، أنا عارف الحكايه . عارف اللى جرا (ينظر إلى اله وتيبه ويهز رأسه) آه يا عبد الصبور افندى يا نمس .. برضك عرفت تستكرد الوليه الغلبانه وتنزل مطرحها أنا عارفك كويس وعارف ألاعيبك .. طول عمرك واكل عقلها وضاحك عليها ، طبعا نزلت وقعدت تدردش معاها وتاخد وتدى ورحت مسهيها ونازل بروحك في جتها ومطلع روحها . الله يرحمك يا ست ام رتيبه . منك لله يا سي عبد الصبور .. يا مغالط عزرائيل ، طبعا مبسوط عشان فسخت الجوازه بتاعتها ، مش دى اللي كنت بتحرب عليها ، طفشت الراجل بلسانك اللي زى المبرد و فضلت تقول له .. وش الخرتيت ، وبوز الإخص ، وطبعا عايز تفسخ جوازتي انا كان ، لكن بعينك . والنبي لنا متجوزها غصب عن

عنيك .. وابقى تعالى بقى خدها منى بجتنك المفشوله .. جنة ام رتيبه ، جتة الوليه ، تاخدها منى ؟ تقدر تنجوزها ؟ بعينك . (إلى سنيه) خشى على يا سنسن يا للى زى اللوز ، تنجوزينى والالأيابت ؟

سنية : أتجوزك يا زينهم .

زينهم : سامع يا سي عبد الصبور ، حا تجوزها ، غصبن عن عنيك لتنين .

أم رتيبة : (فى غضب) اخرص ، يا خسيس ، يا إبليس يا تعيس يا منحوس .

زينهم : ولو .. برضه حا تجوزها .. ابقى خلى جنة ام رتيبه تنفعك .

الشيخ جاد : ايه اصله دا يا جماعه! انتوا حا تجننونا معاكم زى الوليه ما تجننت، إيه أصله ده يا وله يا زينهم ما تسبب الوليه فى حالها ، عبد الصبور دا إيه وبتاع إيه ؟ مش كفايه اللي جرالها . كله دا من المسخره اللي انتوا عاملينها . مالكم ومال الأرواح ، والأسرار .. يعنى لو كان كل واحد يمشى على أده ، ويعرف اللي على أده . مش يبقى احسن . دا لازم يكون فيه فرق بين اللي يعرفه ربنا واللي يعرفه العبد .. دا اللي ماشى على الأرض ما يشوفش زى اللي فوق السطوح ، إيش حال امال اللي فوق ، فوق فوق ، يا أخى منك له ، فوق اللي لله لله ، واتقى الله .. واخش الله ، وقل هو الله أحد ، الله الصمد ، لم يلد و لم يولد ، و لم يكن له كفوا أحد (بصوت عال ممدود) وحدوه .

الجميع: (بما فيهم أم رتيبه) لا إله إلا الله .

(أم رتيبه تهز رأسها منتفضة وتتمتم بضع كلمات غير مفهومة ثم تغمض عينها برهة .. وتفيق إلى نفسها وترمى الطرطور والنظاره) .

أم رتيبة : يا ندامه .. يا عيب الشوم .. أنا إيه اللي لبسنى اللبس المشوم ده ؟، أمال فين سيد افندى ؟ راح فين ؟ الحقوني بسيد افندى .

زينهم : (متجها إلى الباب) سيد افندى ، سيد افندى .

سيد : (يعود مهرولا ويقبل على أم رتيبة) أم رتيبه .. مالك ياختى . قلبى عليك ، حمد الله على سلامتك . يا ألف نهار أبيض . زينهم : أيوه كده .. أهى طلعت روحه تانى .. ونزلت ام رتيبه مطرحها .. هى إيه ؟ سايبه . (ناظرا إلى السقف) اطلع يا عبد الصبور الكلب ، خليك فوق عندك ، إياك تهوب هنا ، الحقونا يا جماعه بمأذون قبل ما ينزل يفشكلها تانى .

الشيخ جاد : ويلحقك ليه.. أمال انا هنا باعمل ايه؟ دانا أدها و أدود، هاتوا إيديكم في إيدى .. قال يا بخت من وفق راسين في الحلال ، وانا حاوفق اربع روس ، منهم راسين عجالي (يجلس الجميع وتسمع زغاريد) المأذون لما يسعد ، تجيله جوازتين في ليله .

تسدل الستار

(تمت) .

جمعية قنل الزوجات

الإمداء

إلى النقاد الذين أثارتهم « أم رتيبة ، ..

واتهموني بالإسفاف والتهريج ..

. أهدى مزيدا من الإسفاف والتهريج ..

يوسف السباعي

أحب قبل أن يقدم القارئ على قراءة هذه المسرحية .. أن أجعله على بينة من أمره وأمرى وأمر هذه المسرحية التي يوشك أن يضيع في قراءتها بضع ساعات ثمينة ـــ أو غير ثمينة ـــ من عمره .

أنا لست واعظا ولا فيلسوفا ولا حكيما ولا مرشدا .. ولا .. ولا شيء أبدا من هذه الصفات الفاخرة .. التي قد يتوهمها القارئ في الكاتب في نفسه .

أنا عند ما أكتب أحس بمتعة من الكتابة ، وعند ما أقدم ما كتبت للقارئ أحاول أن أدعوه لمشاركتي تلك المتعة ، وتزداد متعتى عند ما أحس أنني نجحت في أن أسبب له نوعا من المتعة . . وأنى هيأت له خلال أيامه المرهقة المتعبة التي تزدخر بها حياته ساعات من المتعة الذهنية وإياى في كتابى .

هذا هو كل ما أقصده وأحب أن أبلغه بكتابتي .. فإذا صادف بها القارئ ما توهم فيه عظة أو حكمة أو أى شيء آخر من هذه المسميات المحترمة فأؤكد له أنى لم أقصدها .. وأنها زجت بنفسها بين الكتابة عفوا بلا قصد منى أو تدبير .

فإذا كنت يا أخى القارئ . (غلبانا) مثلى ومثل بقية الناس الذين أرهقتهم أيامهم من أمرهم نصبا وعسرا ووددت أن تخفف عنك بعض هذا النصب والعسر فاقرأ هذه المسرحية . . فقد تفلح في منحك بعض الراحة والتسلية .

وإذا كنت قارئا (قنزوحا) تضن بوقتك أن يصرف إلا بين آيات بينات من الحكم والعظات فلا تضع وقتك معي عبثا .. أمامك كتب الأخلاق والتهذيب والتربية و نفلسفة .. أو .. لم أذهب بعيدا .. أمامك الكتب السماوية .. خذ منها ما شئت من المتصح والعظة .. و لا أظن كاتبا مهما بلغ من الحكمة والعقل والبلاغة والقدرة بقادر عبى أن يأتي لك بخير منها .

أما أنا فرسالتي كما قلت لك أن أخفف عنك بعض ضيقك ونصبك فإذا نجحت . . فيها وبعمت . . وإذا لم . . فاعذرني . . إنما الأعمال بالنيات .

والسلام عليكم ورحمة الله

يوسف السباعي

الفصل الأول

المنظر

اليمين قطاع حجرة يقطنها سيد الفنط ومحمود جاب الله .
اليمين قطاع حجرة يقطنها سيد الفنط ومحمود جاب الله .
في مواجهتها باب يؤدى إلى الحمام والمطبخ وسرير حديد بأربعة أعمدة يرقد تحته محمود وسيد وقد أسدلت عليهما ملاءة السرير فأخفتهما .. وعلى اليسار أريكة بالية تعلوها نافذة وضع بدل زجاجها المكسور ورق جرائد .. وفي الوسط منضدة صاج عليها لمبة زجاج وبقايا طعام وأوراق ومنبه وعود . وعلى اليسار الباب المؤدى إلى السطح ، وقد كومت وراءه صناديق وسلال وشوالات وأثاث قديم حتى لا يمكن فتحه من الخارج ومعلق على الحائط مشجب ومرآة مشروخة . وفي يسار السطح يبدو الباب الخارجي ومرآة مشروجة خشبية صغيرة منخفضة وبجوارها تقفيصة فراخ .. وفي المواجهة مدخل السطح وحبال غسيل ممتدة بطول السطح . الوقت قبل الفجر في أواخر الشتاء .

المشهد الأول

(تمر فترة صمت .. تسمع خلالها دقات المنبه وصياح الديكة دون أن يبدو على المسرح أحد .. وفجأة يدق جرس المنبه فيندفع سيد من أسفل السرير ويسكت المنبه .. ثم يتسلل على

أطراف أصابعه فيرتدى البنطلون والجاكتة فوق الجلباب ويدس قدميه في الحدّاء ثم يقف أمام المرآة ليمشط شعره ويتزين ويدندن . محمود يمد رأسه من أسفل السرير وينظر إليه في دهشة) .

: ديهده .. ديهده .. إيه الحكايه يا خال ؟.

عمود : (مأخوذا يبقظة محمود) .. حكاية إيه ؟! ما فيش حاجه أبدا . سيد

: أبدا ؟! أبدا ؟!.

محمود

: أره . أبدا . أبدا . شايف في حاجه غربيه ؟ . سيد

: لا أبدا .. ولا غريبه ولا حاجه .. بس يعني مش زي عوايدك عمود تتسحب كده لوحدك من تحت السرير .. وتسيبني أروح ضحية النوم و اقابل لوحدي القضا المستعجل . انت ناوي تِخلي بيه ١٠.

: أخلى بيك ازاى ؟!. أنا ما انا واقف اهو قدامك . . مين قال لك ان أنا حاسيبك رايح في النوم وانزل .. نام نام .. لسه بدري .. أنا مش حانزل دلوقت .. و لما آجي أنزل حاصحيك (مستمرا في الدندنة والتزين أمام المرآة) يا الله إرخى الستاره و نام .

: أنام ؟! ازاى (يخرج من تحت السرير) ما يمكنش .. لازم اعرف محمود إيه سر الحنتفة والسبسبه اللي بتعملها في روحك دى .. أنا اعرف ان بينك وبين المرايه تنافر شديد .. وخصومه مستحكمه .. كل واحد منكم ما يطقش التاني .. ازاي قادر تقف قدامها الوقفه الطويله دي ؟.

: مُكرة خالك لا بطل .

: وإيه اللي يكرهك على العذاب ده ؟! إيه اللي يرغمك على الاصطباح محمود والبحلقه فيما تكره ؟!.

: محتاج لها يا محمود يابني .. مزنوق فيها . لازم اهندمها واسبسها سيد لأنى حاستعملها .. حاعرضها للأبصار .

> : هي إيه دي ؟!. محمود

: خلقتي . . اللخبطه اللي انا شايفها في مراية النحس . . لازم أساويها شويه .. لازم احتتفها .. واسبسبها .. واساويها .. واهندمهـــا علشان تبقى مقبوله شويه .. ان كان على أنا ما يهمنيش .. أنا خلاص خدت عليها ، ما بقتش اخاف منها قوى .. لكن هم .. : هم مين ؟!. محمود : اللي حا يشوفوها .. لازم اوضبها لهم ، لازم اهيأها لهم شويه . سيد : إيه أصله ده يا خال ؟! هي إيه اللي توضبها لهم وتهيأها لهم .. هي محمود لحمة راس ؟! بس مين دول اللي خايف عليهم قوى من خلقتك ؟! انت ما انت طول النهار ماشي بها كده عريانه .. وسايبها على خلق الله .. اشمعني دول يعني اللي لازم توضبها لهم .. وتهيأها لهم .. يبقو ا إيه دول ؟ يطلعوا إيه ؟ : يطلعوا ؟ . ما يطلعوش أبدا . . بيرموا سهامهم كده وهمم قاعدين .. بيصوبوا سحرهم كده وهما نعسانين . : ولا انا فاهم حاجه .. هم إيه دول اللي بيرموا السهام ويوزعوا محمود السحر .. يكونوش هنود حمر ؟!. : حمر ؟. يا غبي . دول سود . سوادهم عجب . سيد : هنود ، سود . إيه الكلام ده ؟. محمود : هنود ؟. هنود إيه يا جدع . مين قال هنود سود ؟. سيد : أمال يبقوا إيه دول اللي قاعدين يسحروا ويضربوا بالسهام ، واللي محمود انت عمال توضب لهم لحمة الراس بتاعتك ؟. : عيون .. عيون سود .. مش هنود سود يا مغفل ، عيون المها ، سيد عيون ، في طرفها حور ، عينون من اللي قبال فيها الشاعسر : و يصرعن ذا اللب حتى لا حراك به ، . : وانت بقى ذا اللب الذى لا حراك به ؟!. محمود : لاحراك ، ولا روح ، ولا نفس ، ولا حتى .. لب .. سيد

(أمرتيبة)

: يعنى بالاختصار . انت بتحب ؟!. محمود

> : أيبه. سيذ

: قدعه . عمود

محمود

: إيه هم الل قديمه دى ؟!. سيد

محمود

: مسألة الحب بتاعك ، طول عمرك وانت بتحب . من يوم ما وعيت عليك وانت عاشق مستهام . أنا فاكر وانا صغيريوم ما جيت لنا البيت و هدو مك تحت باطك ، لما ابوك طردك و حرم عليك تخش البيت من تحت راس قصايد الحب اللي كنت بتعملها في مرات الشيخ علوان ، يعني من يومك وانت حبيب ومستندات الحب بتاعتك ، لا تعدولا تحصى .

: مستندات الحب ؟. إيه هي دي ؟.

: الخيابه ، والفقر . وتلتميت قصيده ، وخمسين قصه . واربعين غنوه . محبوسه بين اربع جدران فوق سطوح ام عبده ، ما سمعهاش غيرك ، وغيرى . والغلبان شندى عبد الجليل الجرجاوى . هو الحب دا حاجه جدت عليك . . طوى عمرى وانا اوعى عليك ، تبص لنجوم السما وتتنهد ، وتبص لغروب الشمس وتتحسر . وتبص لطلعة القمرة وتتأوه . ما فيش حاجه من الحاجات دي تعدى عليك من سكات أبدا ، لكن كل ده ما كانش له صله بخلقتك أبدا . كل الحب اللي انت غرقان فيه ده ما خلاكش مره و احده تبص في المرايه . ولا تسبسب شعرك ولا تهندم نفسك . إيه اللي جد عليك ؟!.

> : ماكانش حب يا محمود . سيد

: أمال كان إيه يا خال ؟!. محمود

: كان هيامان . كان إفراط في الحساسية . كان انتظار لحب . كان سيد حب من طرف واحد ، كان حب ، والحبيب مجهول .

: يعنى كده ، زى الجنايه . لما تتقيد ضد مجهول .

محمود

سيد

محمود

سيد

محمود

سيد

: كان عندى فيض من الحب ، لكن ما كانش متركز في حاجه مخصوصه . كنت ابص للنجوم واحس انى بحلق بينها وادور على حاجه ناقصانى . كنت اسمع صوت الكروان سارى مع نسيم الفجر ، واحس انه بيحمل لى رساله من حبيب نائى . كنت ابص للقمر ويتهيأ لى ان فى وشه ابتسامه حلوه بتحيينى . كنت امسك العود بتاعى واحس بصوابعى بتجرى عليه ، مش بنغم ولالحن ، لكن بمناجاة . للحبيب الهايم الغايب . كنت بحب . لكن ما كنتش عارف با احب مين . لغاية ما ليله من الليالى ، سمعت صوت لذيذ يدندن ، بغنوة : (فى الليل لما خلى ، إلا من الباكى » ، (النوح على اللوح حلى ، للصارخ الشاكى » (ما تعرف المبتلى فى الليل من الحاكى » وكنت قاعد مره على سور السطح ، وسمعت الدندنة وسط سكون الليل الخالى . حسيت جسمى بيرتعش . ولقيت دموعى نازله بتجرى زى السيل .

: وعرفت مين صاحبة الصوت ١٤.

: عرفتها .. ليله .. ورا ليله .. بقيت اقعد لوحدى اسمع الدندنه .. ولقيت الإحساس الفياض والشعور الهايم والقلب التايه .. ابتدوا يتركزوا في الصوت وفي صاحبة الصوت .. واتجمع كل الحب الحيران بين النجوم والسما والقمر والغروب والبلابل .. واتحط كله في صاحبتنا دى .

: بس مين هي ؟!.

: وبقيت احس ان الأمانى بتاعتى فى الدنيا كلها انحصرت .. فى حاجه واحده .. مش انى أبقى فنان شهير ، ولا صاحب ثروة ولا سلطان .. بل فى إنى أقعد كل ليله واستنى لغاية ما تخرج فى البلكونه .. كل سعادتى

كانت متركزة في اللحظات القصيره دي .

محمود : همى مين بس يا خال ما تقوللي وتريح قلبى .. شفتها بالنهار والا لا ؟!.

: شفتها .. وحسبت زى اما اكون بقالى تلاتين سنه ماشى فى صحرا فى عز الشمس .. ولقيت شجره خضرا تحتها ميه وأكل .. حسيت زى اما اكون لقيت حاجه بتاعتى .. مش غريمه على .. إنت بجريتش الحب يا محمود ؟ اما تعرفش حاجه عن الحب ؟ أ.

: والله يا خال .. الحب بتاع الصحرا والشجره الخضرا .. وهات لى معالث يقره .. دا مجربتوش .. أنا أصلى ما كلش كتير من جكاية سكون الليل .. والنسيم والحاجات دى .. أنا بقالى سنتين ماشي مع البنت و زكيه ولعه ١٠. ومريحانى خالص.. كل ليله ألاقيها محضرالى الكاسين والعشا .. أشرب الكاسين وآكل اللقمتين .. وانام لى شويه .. وتانى نازل .. حاجه ألسطه خالص .. لا تعب .. ولا صرف .. ولو انها اليومين دول موغوشانى شويه .. من حكايه كده .. ربنا يستر .

: إنت ما تعرفش الحب ، الحب اللي انا بقول لك عليه ، بينك وبينه ما ين السما والأرض ، الفرق بين اللي بتعمله وبين الحب ، زى الفرق بين الكلب اللي بينهش حتة لحمه ، والبني آدم السابح في روضة بين الزهر والبلابل .

محمود : والله يا خال ، انا با احب اللحمه .

محمود

: كل إنسان وله طبيعته ، وكل طبيعه ولها الحاجه اللي ترضيها ، إنت تحس انه يرضيك كاسين وحضنين ، أى كاسين وأى حضنين ، وانا با احس إنه يرضيني مجرد صوت أو كلمه أو لمسه ، بس من مخلوق معين وإنسان مخصوص ، يمكن يمر على العمر بطوله وانا مش لاتيه ، ويمكن يخلص العمر واخرج من الدنيا وانا بقول مع اللي قال و عبئا خلقت ، ولكن دلوقت حسيت ان انا ما تخلقتش عبث ، وان فيه حاجه تستاهل الحياه والوجود ، وان العمر ما راحش ، ومش حا يروح أو نطه ، حاسس ان انا لاقيت الحاجه اللي اتخلقت علشانها ، ولو خلصت الحياه بعد كده ، مش حاندم . . لأني شاعر اني خدت اللي انا عايزه منها .

: ديهده ، ديهده ، إيه دا كله ؟! الظاهر انك واقع قوى !!.

: قوى ، قوى ، قوى ، إذا كان الحب اسمه في لغتك وقوع .

محمود : ومين هي اللي عملت فيك كده ؟! قوللي مين هي دى بنت الأروبه عليم والله الله الله بتقوله عليم والالا أ ، مين هي دى صاحبة العيون السود اللي (يصرعن ذا اللب) ، أعرفها انا ؟!.

سيد : أيوه .

محمو د

سيد

محمود : وشفتها ؟!.

سيد : أيوه .

محمود : طيب يا أخى قوللي مين هي وريحني ؟١.

سيد : بهيه ،

محمود : بهيه ؟ بنت ام عبده ؟.

سيد : أيوه .

عمود : كده مره واحده ؟. يا نهارك اسود يا خال ، ودى تقدر عليها ازاى ؟! البنت من ناحية الحلاوه حلوه ، بت زى اللوز ، بس جد قوى ، وانا ما احبش الجد ، وما احبش الهوى العذرى ، وما تنساش انها بنت ام عبده كان ، يعنى ما يمكنش تقدر تقرب لها ، دى ساكنه فى منطقة الخطر ، فى المنطقه الحرام ، ودى وصلت معاها لغاية إيه ، حب من جانب واحد زى عوايدك ، من بعيد لبعيد ، والاحصل حاجه ؟!.

سيد : فضلت مده طويله ، والحب من جانب واحد وانا سعيد بيه جدا ..

كل اللي أتمناه انى أنحها بالليل واسمع صوتها وما كانش عندى فكره أبدا انها يمكن تحس بى ، لغاية ماليله من ذات الليالي قعدت ادندن أنا بالناى ، فدندنت هى معايا ، وبعدين في الآخر رفعت راسها لفوق وضحكت وشاورت بالسلام .

محمود : وعملت إيه انت ؟.

سيد

سيد

: حسيت ان انا مش ماشي على الأرض ، حسيت ان انا بطير في السما ، حسيت ان الدنيا مش سايعانى . ما تتصورش أد إيه تكون سعادة انحب لما يحس ان اللي بيحبه ميزه من دون الناس ، وإنه خصه من دون الخلق دول بابتسامه أو بإشاره أو بكلمه ، سعاده عجيبه جدا ، وبقيت بااحس وأنا بستناها بالليل ، انها حاسه يه ، وانها بتغني لى أنا .

محمود : و بعدين فضلت كده تغنى لك بالليل و انت تصفر لها ؟ أمال إيه اللي خمود خلاك صابح تسبسب أوى كده ؟.

: امبارح حسيت بحنين عجيب لها، وكان نفسى ادفع نص عمرى والمسها أو أمسك إيدها، فبعد ما خلصت الدندنه رحت متحرأ ومكلمها، قولتلها باللشويش، ان نفسى اشوفها... فضلت واقفه ساكته شويه وانا كأنى منتظر حكم بالإعدام لغاية فى الآخر ما قالت لى انها ما تقدرش تطلع دلوقت، ولكن بكره الصبح بدرى حا تطلع لى الساعه 7، (يرهف السمع) سامع حاجه؟، فيه صوت رجلين؟!.

محمود : (ينصت) لامش سامع .

سيد : (ينظر إلى المنبه) على العموم لسه فاضل عشر دقائق ، يا سلام ، تصور ان انا ما نمتش نص ساعه على بعضها طول الليله اللي فاتت .

محمود : ليه ؟! بخيخة الفليت ما هي محطوطه جنبك .

: فليت إيه يا أخى ، أنا ما نمتش من الفرحه ، مش من الناموس ، أنا مش مصدق ان انا حاكلمها وحا سلم عليها ، أقول لها إيه مش عارف ، حضرت كلام كتير قوى عشان اقوله ، شعر ونثر ومواويل ، لكن انا عارف كل حاجه حا تطير من مخى ساعة ما اقف قدامها ، أنا باتلخبط قوام لما عينيها تيجى فى عينى . . أظن يدوبك بقى لما استعد للخروج .

(يبدأ في رفع الأشياء المكومة وراء الباب) .

: (منزعجا) إيه ده ؟! إيه اللي بتعمله ده ؟!.

: بشيل الحاجات دى علشان افتح الباب .

محمود

سيد

سيد

محمود : (يسرع بإعادة الاشياء مكانها) إنت مجنون .. عايز تشيل المتاريس والحصون اللي ببدافع بيها عن كياننا .. عايز تزيل الخطوط الدفاعية وتسيبنا كده مكشوفين قدام الأعداء ؟.

سيد : الأعداء زمانهم نايمين في سابع نومه .. ما فيش في السطوح دلوقت الا الأحبه .

محمود : والله انا خايف من الأحبه بتوعك دول ليجيبوا لنا الكافيه .. خايف ليكونوا حلفاء مع العدو . ما بلاش يا خال خروج من الباب دلوقت .. خلينا مستورين .. أنا طول الليل احلم بالوليه ام عبده . وانها كبست علينا زى عزرائيل الموت .

سيد : طب بس ما تفسرش .. فال الله و لا فالك .

محمود : ما فسرش ازای .. وانت بتفتح علینا باب جهنم .. قال الباب اللی یجیلك منه الریح سده واستریح .. واحنا مش بیجیلنا منسه ریح وبس .. بیجیلنا سموم .. هبوب .. عواصف .

سيد : يا ستار .. طب بس اخفيها سيره .. ندرن عليّه يوم ما اتلم على قرشين اسدد بيها الأجره المتأخره .. لاحطهم لها على أقدم برطوشه .. واخزأ حبابي عينيها .

محمود : قرشين ؟ منين دول ؟!. من القصائد .. والا من الأغاني ؟!.

: یا سیدی ربك كريم .. یعنی هوا احنا حا نفضل علی طول كده

على الحديده . مسير الجواهر اللي في الوحل ، يعرفوا الناس قيمتها . محمود : طب وحياة أبوك . تسيينا من الجواهر اللي في الوحل ، إذا كنا حا نقضل معتمدين عليهم ، حانتنا مدفونين معاهم في الوحل . لا احنا طالعين و لا هم طالعين ، إحنا كل أملنا دلوقت في او لاد الصرم اللي في البلد يبعتو لنا حاجه .

يد : لا .. أنا يئست منهم خالص . تلات تشهر ما يبعتوش نكله . وهى الوليه أمك دى مش عارفه ان لها ابن بيتعلم ، ويهيص ، ويفرفش ، وأخ بيشقى ليل ونهار فى الفن اللي ما حدش بيقدره . (يأخذ فى شيل الأشياء من وراء الباب) خلينا نخرج لحسن يدوبك فاضل خمس دقايق .

محمود : (في استاتة ويمسك بالأشياء) ما يمكنش ، أنا قبيل الباب ده . سيد : أمال أخرج لها منين ؟.

: زى ما بتخرج كل مره .. من الباب الخلفى (يشير إلى النافذة الزجاجية) إحنا مش بقالنا شهر بننزل ونطلع على مواسير الميه ، زى النسانيس ، والوليه مش حاسه بينا . عايز تخرج من الباب وتضيعنا فى شربة ميه . بقلنا شهر متمتعين بالأوده ، والوليه مش قادره تقفشنا ، تصور لو اتلمت على واحد منا . حا تجيب خبره .. أنا سامعها امبارح من ورا الباب وهى بتقول لقرقر ، آه يا تارى لو أتلم على واحد منهم الضلاليه النصابين ، أربع تشهر ما يدفعوش الأجرة والنبى لاطلعها على جتهم .

سيد : يا ساتر !! سمعتها بتقول كده ؟!.

محمود

محمود : بودنی دی ، والواد قرقر الله یستره ، قال لها والله یا ست ما حد بیعتر لهم علی أثر ، أنا عارف دول اختفوا فین ، زی اما تکون الأرض انشقت وبلعتهم ، یمکن سافر م یجیبوا فلوس .

سبد : طب ودلوقت اخرج ازاى ؟! دى الحكايه كلها فاضل ثلات اربع

دقايق وتطب.

سيد

محمود

محمود : يعنى كان لازم تدييلك مواعيد في السطوح ؟ لازم تحديد مواعيد الغرام ، في مناطق الخطر ؟.

سيد : أهو اللي حصل ، ما خطرش ببالي أبدا حكاية ام عبده دى ، أنا ساعتها كنت بحلق بأجنحة الحب في سماء السعاده .

محمود : طيب وحياة أبوك تخلى أجنحة الحب تنزلك لغاية تحت ، يا الله ورينا ، الشباك اهو ، ما دام خايف من المواسير .

: أنا مش خايف من المواسير ، هوا انا بعد الشهر اللى فات دا اللى خدت فيه السكه قياسه على المواسير ، بقيت اخاف من المواسير . لكن الفكره ان انا لما انزل تحت حاضطر اطلع تانى على السلم علشان اوصل للسطوح ، ولازم حا فوت عليها ، يبقى ما عملناش حاجه ، نبقى عملنا زى جحا لما قالوا له ودنك منين . اسمع انا حا خرج من الباب واللى يحصل يحصل . اوعى (يقذف بالأشياء بعيدا عن الباب) هى موته والا اكتر ، انا لو جت على شنقى لازم اخرج ، بقى معقول هى تطلع لى وتآيس وانا اقف زى الجبان ورا الباب ، خايف من امها ؟! اوعى يا شيخ بلا مسخره ، (تبدو بهية الباب ، خايف من امها ؟! اوعى يا شيخ بلا مسخره ، (تبدو بهية من مدخل السطح ويسمع وقع أقدامها) سامع ، الظاهر انها حت . يا سلام ، انا حاسس ان قلبى بيطب ، انا مش قادر اقف على رجلى ، مين يصدق ان انا حا كلمها وحط إيدى في إيدها ؟!.

: (يدفعه) طب بس اخرج .. اخرج .. ان شاء الله حا تجيب لك الكافيه .. أنا يا عم حا خش فى المخبأ اكمل نومى .. و لما تخلص من التحليق بأجنحة الحب فى سماء السعاده .. ابقسى طب على صحينى .. اتفضل .

(يدخل محمود أسفل السرير ويخرج سيد متسللا فيلمح بهية فيقترب منها مترددا) .

المشهد الثاني

سيد : (لنفسه) يا سلام . انا متهياً لى ان انا فى حلم . مش مصدق انها حقيقة بتحبنى وانها تخاطر بنفسها وسمعتها .. علشانى أنا .. دى نعمه ما استحقهاش .. دى سعادة انا مش أدها ، دا كرم من ربنا ما استهلوش . فيه فى الدنيا سعادة أكتر من سعادة المحب لما يلاقى نفسه محبوب .

(يصل إلى بهية فتبدو عليها الدهشة عندما تميزه)

بهية : مين ؟ اسيد افتدى ؟.

سيد : أيوه أنا سيد .. أنا .. أنا .. أنا مش عارف اقول لك إيه .. فيه حاجات كتير قوى عايز اقول لها لك .. لكن محتار ابتدى ازاى .

بهية : (ما زالت في نهشتها) .. انت ؟! انت !!.

بهية : لكن .. لكن ..

سيد : لكن إيه ؟! انت خايفه من إيه ؟.

بهية : أنا مش خايفه .. لكن .. أمال ..

سيد : أمال إيه ؟.

بهية : أمال فين محمود ؟!.

سيد : محمود ١٤.

بهیة : أیوه محمود .. كان لازم یقابلنی دلوقت .. امبارح باللیل بعد ما صفر بالنای قال لی اطلعی فقلت له انی ما اقدرش اطلع باللیل أبدا وادیت له میعاد دلوقت .

سيد : (مرددا في ذهول) محمود ؟! محمود !!.

بهية : ماله ؟! هو جراله حاجه ؟!.

سيد : (في يأس شديد) أبدا .. أبدا ما جرالوش حاجه (لنفسه) أنا اللي جرالي .. أنا اللي اتحلقت بأمل واهي .. أنا اللي اتحطم قلبي ، وضاع أملي .. أنا اللي طمعت نفسي بسعاده ما تخلقتلهاش .

بهية : مالك يا سيد افندى سكت ليه .. قوللي !! طمني ! هو محمود جراله حاجه ؟.

سيد : أد كده بتخافي عليه ؟!.

بهية : طبعا .. طمني .. قوللي فيه إيه ؟!.

: بتحبيه قوى ؟!.

بهية : قوى .. قوى .

سيد : بتحبى فيه إيه ؟.

بهية : كل حاجه فيه .. أحب الهوا اللي بيتنفسه .. والأرض اللي بيمشي عليها .. من أول ما شفته حسيت ان فيه حاجه شدتني له .

سيد : (لنفسه) أنا كان با احبك كده ، واكتر من كده لكن انتى مش حاسب يبكى .. دنيا عجيبه .. تحب اللخبطة ؟1.

بهية : ما تقوللي يا أخي . . طمني . . فيه إيه ؟! .

سيد : ولا حاجه ، ولا حاجه أبدا .

بهية : أمال ما جاش ليه ؟!.

سيد

: ما جاش ليه ؟ (لنفسه) أقول لها إيه ؟! أقول لها انه مش حاسس بها ، أقول لها انه ماشي مع « زكيه ولغه » وانه ما يحبش الهوى العذرى ؟! أقول لها ان أنا اللي با اعبدها و انا اللي كنت با اضرب لها الناى ؟! لكن إيه الفايده ؟ هي بتحيه هوه .. مش بتحب الناى .. هي حبت الناى علشانه هوه .. مش حبته علشان الناى .. إيه الفايده لما احطم قلها زي ما حطمت قلبي .. ما يحش اخذلها ..

لأني باحبها مقدرش اشوفها زعلانه .	
: ما تقوللي يا أخيى ما جاش ليه ؟	بهية
: أيوه ما جاش علشان علشان أصلمه	سید
تعبّان شویه .	
: ماله ؟ فيه إيه تعبان ازاى ؟.	بهية
: لا ولا حاجه بس عنده شوية	سيد
: شوية إيه ؟ انطق !.	بهية
: (لنفسه) شوية إيه ابن الصرمه ، دا انا سايبه زى الحصان	سيد
(لبيية) عنده شوية مغص .	
: مغص ؟ مسكين لحسن يكون عنده المصران الاعور لازم	بهية
تجیب له دکتور ، ازای تسیبه کده ؟.	
: لا لا ما فيش أعور ولا حاجه ، ما فيش لزوم للدكتور دا	سيد
مغص بسيط .	
: بسيط ازاى ؟! ازاى تسيبه كده ، مش حرام علسيك لازم	بهية
اشوفه .	
: تشوفیه ؟ لا لا ما فیش لزوم ما فیش داعی	سيد
: لازم اطمن عليه (ت تقدم نحو الباب) .	بهية
: (لنفسه) یا نهار اسود دلوقت تعرف کل حاجمه (سادا	سيد
الطریق إلی الباب) یا ستی اطمنی دا زمانه بقسی کسویس	
خالص .	
	*

بهية : لازم اشوفه بعيني .

سيد : طيب بس استنى شويه .. اما ادى له خبر .. استنى ثانية و احده (يندفع إلى داخل الحجرة ويغلق الباب وراءه ، ويمد يده تحت السرير ليخرج محمود) محمود .. محمود ، قوم قوام .

محمود : (في ذعر من أسفل السرير) إيه .. فيه إيه ؟ هي جت ؟

هي جت؟.

سيد : هي مين دي .

محمود : أم عبده ؟.

سيد : لا ما جتش ولا حاجه .. بس اطلع بسرعه ، بسرعه .. (يخرج محمود)نام فوق السرير .. يا الله يا أخى اتغطى بسرعة ، وقول آه .

محمود : أقول آه ازاى ؟.

سيد : قول آه . الله يخرب بيتك . انت عندك مغص .

نحمود : هو إيه أصله ده ؟! أنا ما عنديش مغص 1.

سيد : عندك مغص .. قول آه .. قول يا جدع .. قول وبس .

محمود : آه .. آه .

(تدخل بهية) .

بهية : ماله .. مالك يا محمود ؟.

سيد : ما تكلمهش كتير لحسن المغص اتحرك عليه .. لكن ان شاء الله حا يروح حالا .. دا برد بسيط .. ما فيش خوف منه .

(محمود ينظر بطرف عينيه إلى بهية في دهشة وإعجاب فيقرصه سيد فيصيح آه) .

بهية : مسكين .. سلامتك .. ألف سلامه .

سيد : يا الله بينا بقى . . لحسن حد يطب .

بهية : لازم تحط له حاجه سخنه على معدته .

سيد : أيوه .. أيوه .. أنا حا اعمل له اللازم .

(يجرها من يدها نحو الباب) .

بهية : لازم تجيب له دكتور .. انا حا طلع اطل عليه بالليل .. لما تيجوا تناموا .

سيد : طيب .. طيب .. بس يا الله بينا بقى .

بهية : خد بالك منه قوى ، علشان خاطرى .

سيد : علشان خاطرك ؟! علشان خاطرك حا اعمل كل حاجه .. كل حاجه في الدنيا .. مستعد اعملها علشانك .

(تخرج بهیة ، ویعود سید مطرقا حزینا ویرتمی علی مقعد ویطرق برأسه علی کفه ویتنهد) .

المشهد الثالث

محمود : (مستمرا في تأوهه وقد أخفى رأسه تحت الملاءة) آه .. آه .

سيد: بسخلاص . كفايه . (يتأوه في يأس) آه .

محمود : (يرفع رأسه من تحت الملاءة) هيه خلاص مشيت . (يقفز واقفا) إيه الحكايه ؟ فهمني ؟! ايه اللي جرى ؟!.

سيد : (وهو مستمر في إطراقه وإخفاء وجهه بكفه) ولا حاجه .

عمود : ولا حاجه ازاى !! كل ده وولا حاجه ! تصحيني من عز النوم ، و تجرجرني من تحت السرير و ترميني فوقه ، تقوللي قول آه ، آه ، و أسألك دلوقتي تقوللي ولا حاجه ، فهمني إيه اللي حصل ؟ إيه اللي دخلها هنا وإيه اللي خلاك تقول لها ان انا عندي مغص ، وانا صاغ سليم ، فهمني يا خال ، إيه اللي جرى ؟!.

سيد : (في ضيق ويأس) قولتلك يا أخى ولا حاجه ، سيبني دلوقت . محمود : ما يمكنش اسيبلك الالما اعرف إيه اللي جرى ، وريس و شك كد

: ما يمكنش اسيبلك الالما اعرف إيه اللي جرى ، وريني وشك كده (يزيج كف سيد عن وجهه ، فيرى عبرات صامته تنساب على خديه ، فيدو عليه التأثر والدهشة) الله إيه ده ، انت بتعيط . مالك يا خال ؟! قوللي جرى إيه ؟! . قوللي الحقيقه . إيه اللي زعلك كده . أنا عمرى ما شفتك بتعيط أبدا . كلمني يا خال ، أنا ما طيقش أشوفك كده ؟ قوللي إيه اللي حصل . أنا مستعد اعمل لك

كل حاجه علشان اضيع زعلك .. بس فهمني .

سيد : (يتنهد تنهيده طويلة) ولا حاجه . ما فيش حاجه .

محمود : مش ممكن ، لازم فيه حاجه حصلت .

سيد : حصل حاجه مالهاش علاج ، لا انت ، ولا انا . ولا أى و احد يقدر يصلحها . سخريه بسيطه من سخريات الدنيا . عبث هايف من عبث الأقدار ، (وافعا كتفيه مادا شفته السفلي) حا نعمل فيها إيه ، ما فيش غير اننا نستحملها و نسكت .

مجمود : إيه هوا ده ؟! أنا مش فاهم حاجه أبدا . انت صابح مبسوط وعمال تسبسب فى شعرك وتهيأ فى نفسك ويتقول انك بتحلق بأجنحة الحب فى سماء السعاده . ويتقول ما فيش على وش الأرض مخلوق أسعد منك . لأنك محب محبوب . وعندك موعد حب ، وخرجت علشان تقابل اللى بتحبها وتحبك .

سيد : كنت فاكر كده .

محمود : وبعدين ؟١.

سيد : وبعدين طلعت انها بتحب واحد تاني .

محمود : واحد تانى ؟! أمال كانت بتشاور لك وتضحك لك . وادتك الميعاد ليه ؟

سيد : ما كانش ليه دا كله .. كان لواحد تاني .

محمود : واحدتانی ۱۴. ازای ۹۱.

سيد : كانت يتحب واحد تانى ، وافتكرت ان اللي واقف في الضلمه وبيصفر لها بالناي هو الشخص اللي بتخبه ، فشاورت له وسلمت عليه ، وادَّت له ميعاد .

محمود : وعرفته يبقى مين ؟!.

سيد : يبقى اللي يبقاه ؟

محمود : ازاى الكلام ده ، مين ابن الأروبه دا ، وانا اجيب لك خبره ،

أمحيهولك من على وش الأرض ؟.

سيد : ما فيش لزوم .

محمود : نما فيش لزوم ازاى ! لازم اعرفه ؟.

سید : ضروری یعنی ؟.

محمود : طبعا ,

سيد : انت ؟.

محمود: أنا ؟. أنا ؟. (مستغرقا في نوبة من الضحك) ، أنــا ؟. مش مكن ، انت بتضحك عليّ يا خال ؟.

سيد : باكلمك جديا محمود .

محمود : قول كلام غير ده يا خال !!.

سيد : دى الحقيقه ، إنت عارف انا بحبها ازاى ؟ إ.

محمود : ميت صبابه .

سيد : أهي هي كان كده .

محمود : بتحبني أنا ؟ ليه ، وبتاع إيه ؟! وعلشان إيه ؟!.

سيد : اللي حصل .

محمود : لكن أنا ما عنديش أى شعور ناحيتها ، دى مش النوع اللي يدحل مزاجى أبدا ، دى واحده شريفه وعذراء ، وأنا لا أحب الشرفا ، ولا العذارى .

: ماهى دى المصيبه .. ماهى دى السخريه .. لو كنا احنا الاتنين بنحبها وانت اللى فزت بيها كانت بقت حاجه معقوله .. لكن أنا أحبها ، وهى مش حاسه بيه ، وهى تعبدك ، وانت مش حاسس يبها ، دى سخرية القدر اللى على أصولها .. دى مهارة الأقدار فى تعذيب الإنسان وإيلامه .. لكن على العموم أنا مش عايزها تحس باللى أنا حاسس بيه .. مش عايزها تتصدم الصدمه اللى انا اتصدمتها . مش عايزها تناً لم زى ماأنا بتاً لم .. أنا بحرب الشعور ده وعارفه ، وأنا لغاية دلوقت با احبها ، وحا فضل احبها طول عمري ، وما اقدرش افكر انها تتألم .. ما طيقش .

: (مندهشا) إيه يا خويه ده ، والعمل ؟.

: العمل ما تكسفهاش .. زى ما كسفتني ؟.

: يعني إيه ؟!.

: يعني عايزك تحبها ، وكان تخلص في حبك لها .

: إيه ؟! أحبها ؟! واخلص في حبى لها ؟! إيه أصل ده يا خال ؟! انت محمود جرالك حاجه ؟١.

: اسمع يا محمود . أنا باتكلم جد . البنت دى مش بني آدمه عاديه ، دى ملاك ، وهي بتحبك حب ، ما تستهاوش أبدا .. لو كانت، بتحبني ربع الحب اللي بتحبهولك ده .. كنت حاسيت ان انا أسعد

مخلوق على ظهر الأرض ، ولو كنت اعرف ان الحب دا ممكن الإنسان ينقله بسهوله كنت نقلته ، لكن انا عارف ان ما فيش فايده . أنا يائس من حبها . لكن حاسس ان انا عايز اسعدها ، ولو كنت

انا اقدر اسعدها بنفسي كنت سعدتها لكن المصيبه اللي يقدر يسعدها انت ، وعشان كده لازم تسعدها .. لازم تحبها ، لازم

تكون كويس معاها علشان تستاهل حبها .. لازم تبقى إنسان

جد ، وتستقم في الدراسة علشان تبقى شخص محترم ولك مركز .

: يفتح الله .. أنا لا انا عايز احبها ولا استاهل حبها .. أنا مبسوط كده خالص ، كفايه على « زكيه ولعه » على أد إيدى ، وبسطانى

ومهيآني ، والأشيارضا . ابعد عني يا خال وحياة ابوك أنا لا بتاع

حب ، ولا بتاع جد .. انت عارف من زمان ان انا ما ليش في الكلام ده . . وما تنساش ان البت زكيه نفعانا برضه لولاها كتا متنا

من الجوع ، أهى برضه بتنفعنا بقرشين بأكلتين ، وحكايــة

الاستقامه في المدرسه دي عارف معنها إيه ؟ اني انجح واتخرج ،

(أمرتيبة)

محمو د

سيل

محمود

سيد

محمو د

وتنقطع الفلوس اللي بيبعتوها لنام البلد ، ولا يبقى عندنا مصاريف مدرسه نضيعها ، ولا رسوم امتحان نتشبرق بيها ، ولا تحن كتب نسدد بيها ديوننا ، واقعد معاك كده على باب الله . لا شغله ولا مشغله ، انت عارف ان انا بتاع شغل ؟ وحياة أبوك يا خال سيبنا من السيرة دى ، خلينا كافيين خيرنا شرنا .. كفايه ام عبده واللي عاملاه فينا ، انت راجل بتاع حب .. حب زاى ما انت عايز ، ما حدش قال لك حاجه .. لكن تجرجرني معاك ، وتقول عايزك تجب ، وعايزك تبقى أهل للحب ، وعايزك تبقى جد ، وتستقيم .. كفايه كده . يفتح الله . حد الله يبنى وبينك .

(يسمع فجأة صوت صياح فراخ وضجة فى حجرة الفراخ .. ثم يفتح باب حجرة الفراخ ويخرج قرقر من الحجرة وهو يسب ويلعن محاولا حبس الفراخ فى الغرفة وفى يده قلة ، وفى الوقت نفسه يصيب الذعر محمود وسيد فيقفان ويجمعان الأشياء وراء الباب) .

محمود : أنا مش قلت لك انا طول الليل احلم بيها .. هات .. هات .. حط الترابير ه كان .

سيد : بس يا أخينا .. كفايه كده .. هي كانت دبابه .. كفايه خالص . محمود : والعن من الدبابه .. دى صاروخ .. دى ديناميت ، يا باى ، أنا يا عم حا خش المطبخ .. كان فيه حتة جبنه رومي قديمه . اياك يكون الفار ساب لنا منها حاجه .

سيد : وانا اما خبش اتوضا . (يخرج الاثنان من الباب المؤدى للمطبخ ويقف قرقر فى السطوح) .

المشهد الرابع

قرقر

: (بعد أن ينتهي من غلق الباب على الفراخ) يا ناس يا هوه ، يا عالم ، حد في الدنيا يرضى بكده ، طول الليل ما اشوفش النوم . أنا قرقر المسيُّط ، ويحكم علَّى الزمان ، وانام في عشة فراخ !! لكن معلهش ، علشان يرضى الست ام عبده ، وعلشان ينبسط شيخ السو ، الشيخ عجايب ، اللي طول النهار يزلط ف حمام وفراخ وكباب ، ويعزم له تعزيمتين ويتهز له هزتين ، وآل إيه يطلع العمل ، ياخي عملك اسود ومهبب على دماغك ، أنا قرقر ، انطرد من أودتى ، واترمى في أودة الفراخ ، وطول الليل ديك الكلب ده ، ينقر لي في بطن رجلي .. وانا بغير من رجلي موت . خلاني بايت مسخسخ م الضحك ، حد في الدنيا يقول كده ، واحد ما ينامش من كتر الضحك ، طول الليل سهران اضحك ، وانا حالي يستاهل البكا ، وكل ما عيني تغفل شويه ، والا افكر شويه يزعل ، ويروح نقرني في بطن رجلي أروح مفرهدم الضحك . إلهي تنقصف رقبته الشيخ زفت ، اللي نايم يشخر في الأوده وسايبني اناقر طول الليل مع الفراخ . ويا ريت بلاق ثانيه استريح فيها بالنهار ، الاطول النهار ما تفرغلوش طلبات ، اطلع يا قرقر ، انزل يا قرقر ، روح يا قرقر ، تعالى يا قرقر ، وياريت طلبات زي طلبات البني آدمين ، الاطلبات لها العجب ، وآخر تقليعه طالع لي فيها حكاية القله ، علشان ادوخ ، علشان اموت ، أنا عارف هو مشحا يستريح الالما يجيب أجلي . (يضع القله على كف يده ويتحرك في السطوح وهو يوازنها . تدخل عديله الخادمه وقمد حملت الغسيـل وكــيس المشايك) .

·	
: إَلْهِي يَعْدُهُمَا لَكَ ، إِيَّهِ اللَّيِّ انْتَ عَامِلُهُ دَا يَا وَادْ يَا قَرْقُرْ ، انْتَ حَا	عديله
تشتغل مع بتوع النقرزان ؟!	
: (يقف ويمسك القلة من عنقها) اصطبحي وقول يا صبح ، أنا	قوقو
مش ناقصك ، إيه طلعك كده من النجمه ؟!	
: أنشر الهدمتين اللي غسلتهم امبارح العشا وبيتهم طول الليـــل	عديله
منقوعين ، إذا كتتش اعمل كده ، حا يضيع منى النهار .	
: ما يضيع ، يعنى وراكى إيه ، مؤتمر سان فرنسسكو .	قرقر
: سان إيه ؟! والله اتعدلت ولسانك مشى ، الله يرحم زمان ، أيام	عديله
التريترو ، وجنينة الحوانات ، بقى انا ورايا إيه ؟ الشغل اللي مطربق	
على دماغي ده كله وورايا إيه ؟! الكنس والمسح والغسيل والطبيخ	
والمناكفه والمناقره والمهابره، كل ده وماوراييش حاجه ؟ ياخي خلى	
حد يقول كده غيرك ، ليه هوا اما زيك ؟ طول النهار قاعد لي	
فوق السطوح زي تنابلة السلطان لا شغله ولا مشغله .	
: اللي هوا انا ؟ طيب معلهش ، انشرى الهدمتين وانزلي ، خليه نهار	قرقر
يفوت أنا اللي قاعد فوق السطوح ، ولا شغله ولا مشغله	
حاقول إيه ؟	
(يضع القله على كفه ثم يأخذ في السير بها كما كان يفعل) .	
· (فى دهشه) : هو إيه أصله ده ما تفهمني بس إيه اللي بتعمله	عديله
انت جرالك إيه ؟	
: مالكيش دعوه انتي مش بتقولي لا شغله ولا مشغله سيبني	قرقر
بقى في حالى كفايه القرف اللي انا شايفه .	
: طيب ما تزعلش حقك عليه بس قوللي إيه اللي بتعمله ده ؟	عديله
: زى مانتى شايفه كده باتمرن .	قر قر
: تتمرن على إيه ؟	ر ر عدیله
: ع الشغل .	۔ قرقر
	<i>F F</i>

عدیله : شغل ؟! سلامات یا شغل !! شغل ایه اللی بتتمرن علیه ده یاسی قرقر . یا ابن ام قرقر .. تکونشی بتشتغل فی سیرك ولا حناش عارفین ؟

قرقر : ومش عارفين ليه ؟ ما هو قدامكوا اهو .. على عينك يا تاجر .. فيه سيرك اكتر من السيرك اللي بشتغل فيه ده .

عديله : سيرك إيه ؟

قرقر: سيرك أم عبده .. أم عبده والشيخ عجايب .

عديله : انت بتهزر ؟

قرُقر : بتكلم جد .. شوفى شغلك بقى خلينا نشوف شغلنا . (يعاود سيره بالقله) .

عدیله : (مغتاظه) بقی اسمع بقی یا قرقر ، والنبی واللی نبی النبی نبی ... والولی واللی ولی الولی ولی . وال ..

قرقر : (يقف في ضيق) إيه بس عايزة إيه بلا نبي بلا ولي ؟

عديلة : إذا ما كنتش تقول لى إيه اللي بتعمله ده .

قرقر : حاتعملي إيه ؟

عديله : حارقع بالصوت.

قرقر: مفيش لزوم ، حاقول لك .

عديله : قول .

قرقر : بقى انت عارفه ان الشيخ عجايب مفهم ستك ام عبده ان معمول لها عمل .. وان العمل ده هو اللي مطفش نوح افندى منها .. واللي عليه مش طايقها .

عديله: معقول .. له حق .

قرقر: حق . يا اخى انشا الله ينكسر خُقك .

عديلة : ان شاالله انت .

قرقر : هي ستك ام عبده ناقصه عمل .. دي هي نفسها عمل .. دي مش

تطفش نوح افندى وبس .. دى تطفش بلد .. أنا مش فاهم الحكومه تايهه عنها فين .. دى لو سابوها فى القنال .. حا تطفش الانجليز فى ليله .. دى كانت تجيب لنا الجلاء فى ثانيه .

عديلة : المهم ، خلينا في اللي احنا فيه هنا ، بتقوللي ان الشيخ عجايب مفهم ستى ان معمول لها عمل ؟

قرقر : أيوه .

عديلة : وبعدين ؟

قرقر : ولا قبلين ، عايز يطلعه .

عديلة : له حق لازم يطلعه .

قرقر: بس دا حا يطلعه على عنيه .

عديلة : وانت مالك .. إيش حشرك ؟

قرقر : مالى ازاى ؟ ما هو كله على دماغى ، هوا بيخلينى اون ثانيه ، أنا المسئول عن كل الطلبات البايخه اللى بيطلبها ، ما هو لو كان العمل دا حا يطلع كده زى كل حاجه ما بتطلع ، كانت هانت ، الا العمل بتاع ستك ام عبده مش عايز يطلع ، الا بحاجات ما وردتش ، ما هاش نظير ، ما سمعتش عنها عمرى .

عديلة : زي إيه كده ؟!

قرقر : خدى عندك ، أول حاجه طلبها ، جدى احول .

عديلة : وماله .

قرقر : وماله ازاى ؟!

عديلة : هات له جدى أحول .

قرقر: وهوافيه جدى احول يا مغفله ؟.

عيدلة : يوه ، ما فيش ليه ، هو مش فيه بني آدم احول ؟

قرقر : فيه .

عديلة : يبقى لازم فيه جدى احول ، زى ما فيه بنى آدم اعمى وجدى

اعمى ، وبني آدم اعور وجدي اعور .

قرقر : أصل الاعمى والاعور دى في إيدينا ، أقدر أجيب له جدى سلم واخزق له عينه يبقى اعمى ، والا عين واحده يبقى اعور ، لكن الاحول ده أحوله ازاى ؟!

عديلة : زى الناس .

قرقر: يعنى إيه زى الناس ؟!

عديله : يعنى جيب له معزه على يمينه ومعزه على شماله تبص تلاقيه يحول ، هو البنى آدم بيحول من إيه ، من كتر البصبصه يمين وشمال ، من فروغية عينه .

قرقر: طب افرضي طلع جدى ، تقى ، جدى مطمطم ؟!

عديلة : حا يحول أكتر .

قرقر : طب انتهينا م الجدى ، والفرخه الزعلانه ، دى أجيبها له منين ؟!

عديلة : فرخه إيه ؟

قرقر : زعلانه ، ابن الرفضى ، لازم يعقدها ، يعنى إذا كانت مبسوطه ما تنفعش ، ما يطلعش العمل ، أجيب لـه الزعلانـه دى مـنين بذمتك ؟!

عديلة : بسيطه خالص .

قرقر: برضك أجيب لها ديكين ؟!

عديلة : لأديك واحد.

قرقر : تقوم تزعل ؟

عديلة : حاتنبسط في الأول .

قرقر: تبقى مش نافعه .

عديلة : اصبر عليه شويه .

قرقر : صبرنا ـ

عديلة : تجيب لها ديك وتسيبه معاها .

قرقر: سبناه معاها .

عديلة : حاتفرفش.

قرقر : فرفشت .

عديلة : تكبس عليها بتلات فرخات ، مره واحده . وتسيبهم مع الديك .

قرقر : حاتزعل ؟

عدیله : تزعل و پس ، دی یمکن تنزل علیها نقطه .

قرقر : يا سلام عليكى يا بت يا عديله ، ياللى مفيش منك ، يسلم بقك ، (يضع القله على كفه ويعاود السير) عن إذنك بقى اما اكمل السير .

عديلة : (في غيظ) ينيلك ، بقى بعد دا كله ، وما تقوليش بتعمل إيه ؟!

: أيوه والله كنت حانسي ، حا اقول لك اهه .

عديلة : قول .

قر قر

قرقر : بقى يا ستى .. الراجل الضلالى طول النهار ما كفاهوش الطلبات المعقده اللى بيطلبها ، واللى مدوخنى بيها ، لا ، آخر المتمه ، قال ان العمل ده مش حا نعرف هو موجود فين الا بطريقة القله .

عديلة : طريقة القله ؟

قرقر: اينوه يا ستى طريقة القله.

عديلة : و دَى تبقى إيه دى كان ؟!

قرقر : قال نملا قله للآخر .

عديلة : وبعدين ؟!

قرقر : واحد يحطها على كفه ، كده .

عديلة : بسيطه .

قرقر : لا مش بسيطه ، يفضل فارد دراعه بيها .

عديلة : حاجه سهله ، انا اقدر اعملها .

قرقر: يا ستى اصبرى على لما اكملك.

عديلة : طيب كمل ، أنا أصلى عارفاك قليل الحيله .

قرقر : یفضل فارد دراعه کده ، وماشی بیها ، ماشی ، ماشی . (**یأخذ فی السیر**) .

عديلة : وبعدين.

قرقر: يفضل ماشي ، (ويأخذ في السير).

عديلة : خلاص ، فهمنا ، وآخرة المشي ؟!

قرقر : لحد ما تتدغدغ رجليه ، ويتقطم وسطه . ويتخدل دراعه ، وتقع القله تتكسر .

عديلة : طب وبدال ما يفضل ماشي لغاية ما يجراله كل اللي حا يجراله ده مايدشدشها من الأول ويريح نفسه .

قرقر: ما پنفعشی ، لازم یسیبها لحد ما تقع من نفسها .

عديلة : طيب وقعت من نفسها .

قرقر : يطب وراها في الأرض ، والحته اللي تقع فيها ، يفضل يحفر فيها لغاية ما يطلع العمل .

عديلة : يا سلام ، أما طريقه مدهشه ، وجربتوها دي يا قرقر ؟!

: جربناها .

قر قر

قر قر

عديلة : ازاى .. احكى لى احكى ، حصل إيه ؟!.

: خرجت أول امبارح العصر . بعد ما مليت القله لتمت عينها ، وفردت إيدى بيها كده ، ونزلت السلم . وخرجت من الباب ، أقول لك الحق ، أنا كنت مكسوف وعارف ان الناس حا تضحك عليه ، وقلت أخرج بيها كده قدام الست ام عبده ، أهو برو عتب ، وبعدين آدشها في أقرب حته بدل ما مشى بيها في الشارع وافرج الناس عليه ، لكن لما نزلت الشارع الفار لعب في عبى ، وقلت يكن تكون الحكايه صحيح ، ولو وقعتها بالعنيه يمكن ما يطلعشى العمل ، قولي الشهامه مسكتني وضميري أنبني وقلت يا واد امشى العمل ، قولي الشهامه مسكتني وضميري أنبني وقلت يا واد امشي

واستحمل.

عديلة : لك حق ، طول عمرك شهم .

قرقر : مشیت ، من شارع السد علی میدان السیده ، والعیال حوالیه والنقوره دایره ، شقع بقع یارب تقع . و کل من هب و دب یرقعنی بکلمه ، لحد ما وصلت شارع خیرت علی عابدین ، حسیت ان دراعی خلاص ابتدا یتصلب و کتفی حا ینخلع ، ضغطت علی نفسی . وفضلت ماشی ، ماشی ، لغایة ، ما حسیت زی اما یکون دراعی انشل ، ما بقینش حاسس بیه خالص ، ومره واحده ، القله طبت انکسرت .

عديلة : وبعدين، عملت إيه ؟!

قرقر : رحت طابب وراها على الأرض ، ورافع الفاس اللي شايله في إيدى التانيه ، وهات يا حفر . فضلت احفر ، احفر ، احفر .

عديلة : لغاية ما طلعت العمل ؟

قرفر : لا ، لغاية ما جم العساكر وودونى القسم ، وبيتونى ليلــه على الأسفلت .

عديلة : ليه ؟!

قرقر : لأنى كنت بحفر في وسط ميدان العتبه ومعطل حركة المرور كلها .

عديلة : يا خساره ، والعمل ؟!

قرقر: عمل اسود ، لازم سفلتو فوقوا تاني .

عديلة : والشيخ عجايب قال لك إيه ؟!

قرقر : ولا حاجه .. هو خاسس عليه إيه ، قاللي اطلع تاني مره ، وامشي حسب القله ما توديني يعني مش زي ما أنا عايز .. أميل مطرح ما تميل .. مالت في عطفه ، مالت في زقاق ادخل في عطفه ، مالت في زقاق ادخل في رقاق ، دخلت في بيت ادخل في بيت .. عشان المره دي .. مش يودوني قره ميدان على طول ، إياك يودوني قره ميدان على طول ، إياك

ينبسط الشيخ السو .. إياك يرضيه ، أنا عارف هو مش حا يستريح الالما يجيب داغى . لكن أنا مش حا سكت له ، مش كل الطير اللي يتاكل لحمه ، لازم اجيب داغه قبل ما يجيب داغى .. لازم اطربقها عليه .

(يندفع فى ثورة من الغضب ويرفع يده بالقلة ويهوى بها على سقف الحجرة التى ينام فيها الشيخ عجايب فتنكسر القلة وينزل ما بها من مياه على الشيخ عجايب من خلال فتحات السقف الحشبى ويسمع استغاثات الشيخ عجايب وتأففه من المياه النازلة فوقه).

: يا منيل على عينك ، انت اتجننت والا جرى لعقلك حاجه .. الراجل يقول إيه دلوقت ؟!

الراجل يقون إيه دنوف :

قرقر : ولاحاجه .. نطره .

عديلة : نطره ؟!

عديلة

قر قر

قرقر : أيوه نطره .. حاجه عجيبه ، السما ما بتنطرش أبدا ...

عديلة : والسما اللي نطرت دي مش بتنظر في كل حته ؟!.

عديلة : يعنى النطره ما عجبتهاش حته تنزل عليها في كل الدنيا الواسعه دى غير أو دة الشيخ عجايب ؟

: أيوه .. لأن ده السطح البارد الوحيد اللي قابلته .. دى نظريات علميه ما تفهميهاش .. حاجات عرفتها زمان لما كنت في كتاب الشيخ زكى ، وعلى العموم علشان نسبكها عليه نعمل لها شوية تحاييش .

(يخرج من جيبه بطارية ثم يضيئها عدة مرّات سريعة متوالية) دا برق (يدق ضربات فوق سطح الحجرة أشبه بالرعد) ودا رعد (يصفر صفيرا أشبه بالريح) ودى العاصفه . . أظن بعد كده يبقى

ما لناش ذنب ، وإذا ما صدقش انها نطره عنه ما صدق ، أنا	
عملت اللي عليه يعني هي السما بتعمل إيه أكتر من كده .	
(يسمع صوت أم عبده من بير السلم) .	
: بت يا عديله بت يا عديله ، انت نمتي فوق والا إيه ؟!.	م عبده
: يا حفيظ زمارة الخطر .	فوقو
: أيوه يا ست ، أصل الحبال كانوا وسخين قوى وكنت بامسحهم .	عديلة
(يسمع صوت أقدام صاعدة بالقبقاب) .	
: يا نهار اسود ، دى طالعه القضا المستعجل طالع اخلصي يا	قوقو
عديله ، دلوقت تخش للشيخ عجايب علشان يرقيها فتعرف اللي	
حصل ، وتشوف القله المكسوره اسمعي أنا لازم استخبي .	
: خش في أودة الفراخ .	عديلة
: ما فيش فايده حا تدور عليه وتقفشني ، اقول لك أحسن	قوقو
حاجه أخش عند الجماعه دول (يشير إلى حجرة سيد ومحمود) .	
: لكن دول ساكين الأودة وبقالهم مده ما بيجوش .	عديلة
: لا أنا عارف انهم موجودين بس بيطلعوا على مواسير الميه وبيدخلوا	نو ق و
من الشباك علشان ام عبده ما تقفشهمش وتطالبهم بالأجرة	
المتأخره .	
: طب وحا يرضوا يفتحوا لك ؟!	عديلة
: طبعا إحنافيه بيننا وبين بعض عمار ، فيه موده انا وهم على ام	نوقو
عبده . (تنهمك عديله في النشر ويستمر صوت القبقاب في	
الاقتراب) .	
(يطوق قرقر الباب وفي هذا الوقت يكون سيد خارجا من دورة	
المياه يجفف وجهد استعدادا للصلاة) .	
(سيد يقف متسمرا في حالة فزع قرقر يعاود الطرق دون أن	
يجيب عليه أحد) .	
•	

قرقر : افتح یا سی سید افندی .. افتح انا قرقر ، افتح بسرعه .. انا فی عرضك .

(سيد يزيح ما وراء الباب ثم يفتحه ، فيدخل قرقر ويغلق الباب وراءه) .

سيد : إيه ؟ فيه إيه ؟.

قرقر : القضا المستعجل طالع .

سيد : القضا المستعجل ؟

قرقر : أيوه أم عبده .

سيد ،

سيد : يا نهار اسود ؟! طالعه هنا ؟

قرقر : أيوه ، في السطوح .. طالعه للشيخ عجايب عِشان يبخرها ويرقيها ويلبسها الحجاب .

سيد : طيب وانت خايف ليه ؟!

قرقر : أصل عملت في الراجل خازوق ، وخايف لا تطلعه من عنيّه ؟

: طيب اقعد لما اصلي ركعتين .

(سيد يبدأ الصلاة ، ويجلس قرقر وراء الباب ينظر من خلال الثقب) .

(تظهر أم عبده صاعدة من السلم في السطوح) .

المشهد الخامس

أم عبده : مش خلاص والاحاتفضلي تنشري في الهدمتين طول النهار .. أمال فين قرقر ، لمه ما صحيش ؟!

عديلة : ما اعرفش والنبي يا ستى ، انا من ساعة ما طلعت ما شفتلوش أثر .

أم عبده : لازم لسه بيشخر .. هوا دا عنده دم ، عايز الخدامين بتوع أبوه يصحوه ، لازم ينام لى لغاية الضحى . (تقترب من عشة

عديلة : انا عارفه يا ستى .. هوا حد عارف له قرار ، أهو داير ينط زى فرقع لوز .

أم عبده : يمكن نايم مع الشيخ عجايب ، مع ان انا قلت له يسيب له الأوده و لا يعتبش جواها علشان ما يضايقش الراجل ويعطله .. الراجل وراه شغله .. طول الليل ما يبطلش قرايه و كتابه و تعزيم .. ربنا ينجحه ، ويطلع لى العمل اللي ملبش لى الراجل ، ومهججه .

(تنقر بسبابتها على باب حجرة الشيخ عجايب) .

الشيخ عجايب : (من الداخل) ها .. مين ؟

أم عبده : (بصوت رقيق) أنا .

الشيخ عجايب : (لا يسمع) مين اللي بيخبط ع الصبح مش كفايه التعب والسهر والدوشه اللي شايفينها طول الليل ؟

عديلة : افتح يا سيدنا الشيخ دى الست ام عبده .

الشيخ عجايب : طيب يا ست ام عبده .. لا مؤاخذه ، حالا .

(يفتح الباب ويبدو مبتل الوجه والثياب) .

الشيخ عجايب : عدم المؤاخذه .. أنا افتكرت .. الواد قرقر .

أم عبده : أنا صحيتك م النوم ؟

الشيخ عجايب : هوا انا باشوف النوم .. وآخر الليل جيت اغفل شويه .. لقيت النطره نازله ترخ .

أم عبده : نطره ؟! نطرة إيه ؟! هي الدنيا نطرت يا بت يا عديله ؟

عديلة : (موتبكة) والله يا ستى مانا عارفه .. يمكن قبل ما اطلع .

الشيخ عجايب: لا .. لا .. دى نطرت حالا دلوقت السقف خر على غرفتي .

أم عبده : يمكن ندا يا سيدنا الشيخ ؟

الشيخ عجايب: ازاي . . دي نطره . . برعد ، وبرق ، وعواصف .

أم عبده : كان ؟

عديلة : يمكن يا ستى من عمايل الجن والعفاريت .. ما هو سيدنا الشيخ طول الليل بيحضر فيهم .. اللهم اخفظنا .

الشيخ عجايب : على العموم يا ست هانم أحسن حاجه تشوفى لنا أوده تانيه يكون سقفها كويس ، علشان لما النطره ترخ علينا تانى ما تبقاش تنزل تغرقنا و تتلف شغلنا .

أم عبده : أنا برضه بفكر في كده .. بقول انى اديك أودة الجماعة النصابين دول اللي بقى لهم تلات تشهر ما بيدفعوش الأجره .. أحسن حاجه ان انا اعزلهم وافضيهالك .

الشيخ عجايب: كتر خيرك يا ست هانم .. علشان نعرف نشوف شغلنا كويس .. الحاجات دى عايزه تعب ، وعايزه سهر اتفضلى جوه .. أما اوريكى أنا عملت إيه طول الليل .. اتفضلى (تدخل أم عبده فى الحجرة ، وتحمل عديله السبت و تببط به) .

المشهد السادس

(سيد ينتهى من الصلاة .. محمود يدخل من المطبخ ... قرقر يوقب من ثقب الباب) .

محمود : الله !! إيه ده ؟! إيه اللي جابك يهنا يا قرقر ؟!

سيد : لاجيء سياسي .. هارب من العدو المشترك .

محمود : يعنى إيه مش فاهم ؟!

قر قر ناوليه قاعده بره . : طب بس ما تعليش صوتك ، الوليه قاعده بره .

: يا نهار اسود !! بره .. بره ! يعني في السطوح ؟!

: على العموم هي دخلت دلوقت في الأوده بتاعتي عنـد الشيسيخ

عجايب ، ودلوقت زمانها ملخومه في الأحجبة والبخور ، وزمان

: يا لطيف ، وقاعدين كده ساكتين ؟!

: ولية مين ؟

: أم عبده .

: أيوه .

محمود

قرقر

عمو د

قر قر

محمود

قرقر

الراجل عمال يرقى فيها . : يعني ما فيش خوف ؟! فيه حال أمان ؟! محمود : أمان مؤقت .. وبعده .. الخراب المستعجل .. فيه أنباء سيئه جدا قرقر عرفتها دلوقت. : إيه هي ؟ سيد : بعد عشر دقائق بالكتير . حا تصبحوا بلا مأوى .. حا تبقوا كده قر قر زى حالاتى. : يعني إيه ؟! محمود : يعنى حا تنظردوا ، الشيخ عجايب ، حا ينتقل في الأوده بتاعتكم قرقر لأن الأوده بتاعتي اللي هو فيها دلوقتي سقفها بيخر. : بيخرايه ؟! هوا ؟! سيد : لا .. ميه . قر قر : ومنين جات له الميه ؟! سيد : نطره . قر قر : نطره ؟! مش محكن ، الدنيا ما نطرتش أبدا . محمود : مطر صناعی .. مطر قناوی . قر قر : إيه يا سيدنا الكلام اللي بتقوله ده . . مطر في الصيف ؟! سيد : لا .. أصل انا اتغظت منه وكسرت القله على نفوخه .. المهم ان قر قر

القضا المستعجل قال انه حا ينقله في الأوده بتاعتكم دلوقت فإيه	
العمل ؟!	
: إيه العمل ؟. دي تبقي كارثه دي تبقى نكبه حا نروح فين وننام	سيد
فين ، ونودى العفش دا فين داحنا ما معناش اللضا .	
: على العموم بسيطه ، نقعد سوا في الأوده بتاعتي . والا تناموا فيها	قرقر
وانا انام في أودة الفراخ ، وعوضي على الله . بس المهم انكم تزوغوا	
دلوقت قبل ما تقفشكم .	
: لكن ازاى تاخد الأوده بتاعتنا دى ما لهاش حق قانونى احنا	محمود
مأجرين منها أجره بالسته ولنا الحق ان احنا نقعد لغاية آخر	
السنه .	
: أيوه يا أستاذ لك الحق لو كنت بتدفع الأجرة أو لو كان معك	سيد
فلوس دلوقت تدفعها لكن عايز تقعد ولا تدفعش حاجه مش	
معقوله . إذا كنا عايزين نقاوح ونتبت في الأوده لازم اقل ما فيها	
نكون دافعين الأجرة المتأخره بس لو تسيبنا يوم والا يومين ،	
كان الواحد قدر يدبر المبلغ .	
: ما فيش فايده ، بعد نص ساعه حا تكون مستوليه على الأوده ، أنا	قرقر
عارفها كويس دماغها ناشفه .	
: والاحَدبس يشوف لنا سلفيه !	سيد
: سلفيه منين يا خال ، داحنا مديونين للشارع كله ، المكوجي ،	محمود
والبقال ، والخضرى ، والجزار ، وبتاع البسبوسه ، وبتاع لحمة	
الراس ، وبتاع الفول والبليله السخنه ، يعني مفيش حديآ منا أبدا .	
: بس يا جماعه آنا سامع صوت رجلين .	قرقر ·
﴿ يبدُو فِي السطوح عم على بائع الفول ويتجه إلى باب الحجرة	
ويطرقها) .	
(الجميع يصغون يزداد الطرق) .	
(أم رتيبة)	

: هو إيه أصله ده ، ده اسمه نصب ، انتوا عايزين تا كلوا بلاش ، بقالي عم على خمس تيام وانا آجي علشان الشلن اللي انتوا واخدين بيه .. دا حتى حرام ما يرضيش ربنا. (يقف برهة .. ولكن دون مجيب .. بيأس الرجل وينصرف) . : (ينظر من ثقب الباب . . هامسا) داعم على بناع الفول ، مشى قر قر خلاص . (الأثنان يتنفسان الصعداء) . : ها .. و بعدين .. العمل إيه ؟ : ولا قبلين .. ما فيش قدامنا غير الطريق الوحيد ده (يشير إلى محمود التافذة). : أيوه بس حانبات فين بعد كده ؟! والعفش والحاجه بتاعتنا حا نعمل سيد فيها إيه ؟ : يا أخى يبقى يحلها ربنا . محمود : هس .. فيه صوت رجل تانيه . قر قر (يدخل عم إبراهم باتع لحمة الراس . . ويطرق الباب) . : لا .. ما هو ما ينفعش ده .. أنا ما فياش نفس اطلع كل يوم السلالم عم إبراهيم

أباوه .. كلوا كرشه .. معلهش مسيركو تقعوا في إيديه ، وانا اوضبكوا كويس . (ينظر برهة ولكنه ييأس فينصرف) .

علشان الريال من غير فايده .. دانتوا أفنديه محترمين امال خليتوا إيه للهلافيت .. لما انتوا مش أد الجواهر .. تا كلوا جواهر ليه ؟! كلوا

قرقر : (ينظر من ثقب الباب هامسا) دا عم إبراهيم .. يا جابر ..

محمود : يا ساتر .. هو لسه واقف ؟!

قرقر: لا .. مشبي والحمد لله .

ىيد	: (متنهدا) الذي لا يحمد على مكروه سواه .
فمود	: ودلوقت يا الله بنا يا خال نزوغ بسرعه من الشباك قبل ما الوليه
	تطب علينا و نروح في شربة ميه .
ميد	: مش بس يا أخي تفكر في الحكايه كويس ، حا نبات فين ، ونودي
	الحاجه بتاعتنا دي فين ؟!
فمود	: بعدين نفكر في الحاجات دي كلها ، المهم اننا نزوغ دلوقت .
	ر يأخذان في ارتداء ملابسهما) .
	رُ يسمع صوت أقدام أخرى تقترب ويبدو في السطوح الشيخ
	زين يرتدي جلبابا بلديا يطرق باب الحجرة) .
ىيد	: ودا مین دا کان ؟
رق ر	: (من ثقب الباب) مش باين ، ما عرفش يبقى مين شحط كبير
	قوى سادد الباب .
محمود	: يعنى حا يطلع مين ؟ مندوب البنك الأهلى ؟ أهو لازم واحد من
	الديانه ، تلاقيه عم حلاوه بتاع البسبوسه ، والا الحاج عضمه
	الجزار .
سيد	: لكن دا ما بيتكلمش .
	(زين يستمر في الطر ق على الباب) .
محمود	: لازم ناوى على الشر ، لازم بيخمن لنا على حاجه . (زين يمل من
	الطرق فيجلس أمام الباب) .
قرقر	: یا نهار أسود ، ده قعد ، ده مبلط خالص ، یعنی مش ناوی یعتقکم
	أبدا .
محمود	: قلت لك يا خال ، النهارده باين من أوله ، يا الله وحياة أبوك بنا
	نزوغ من الشباك ، أنا حلمت الليله اللي فاتت حلم وحش قوى .
	﴿ يَتَّجُهُ إِلَى الشَّبَاكُ وَيَهُمُ بَإِخْرَاجُ سَاقَهُ وَلَكُنَّهُ يَتْرَاجُعُ ﴾ .
	والمروم والظلم الباطرات موكا المجه

: إيه ؟ فيه إيه ؟. سيد : الطريق مقفول . محمود : يعنى إيه مقفول ؟ سيد : يعنى الست بهيه ، بسلامتها واقفه في البلكون اللي تسبص على محمود المواسير ، يعنى حا تكشفنا ، على كده مش حا نقدر ننزل . : وبعدين ؟! سيد : (يتقدم مرة أخرى إلى الشباك) على العموم انا حا نزل ، ميت بهيه محمود ولا واحدام عبده ، يعني حاتعملل إيه ؟ : (يمسك به) مش ممكن .. ما يصحش نتفضح قدامها .. مما سيد يمكنش اخليك تنزل ابدا . : ياسيدي انت مالك ، انا ما يهمنيش . . أنا حا نزل وحدى ، خليك محمود انت ، ما دام مكسوف من الست بهيه (يتقدم إلى الشباك شم يتراجع ثانية في يأس) خلاص ، اتقفلت من كل ناحيه . : في إيه تاني؟! سيد : نوح افندي واقف في الشباك اللي قصادها ، وعم على واقف في محمو د الشارع بعربية الفول والبليله السخنه ، يعني عاملين علينا حركة كاشه ، حصار من جميع الجهات . خلاص . رحت بلاش (يجلس في يأس) . : (لقرقر) وأخينا دا لسه برضه قاعد بره ؟! سيد : (ينظر من الثقب) دا مصمم ، ما فيش فايده . قرقر

سيد : ودا مين تاني ؟! قرقر : عديلة ، لو اعرف انده لها يمكن تسرب لنا اللوح اللي مبلط على

الباب ده ، بس حانده لها ازاى ؟! اهى دى اللي تقدر تنقذنا ، يا نهار اسود دى راحة الأوده التانيه ، استنوا شويه اما نشوف إيه

(يسمع صوت أقدام .. تظهر عديلة في السطوح) .

اللي حا يحصل.

(تتجه عديلة إلى باب حجرة الشيخ عجايب وتطرق الباب) .

الشيخ عجايب: (من الداخل) مين ؟

: أنا عديله . عديلة

: عايزه إيه يا عديله ؟ أم عبده

: الباميه حا نعملها بالسلق و لا بالقوطه . عديله

الشيخ عجايب: انا احبها بالسلق.

أم عبده : استنى انا جايه لك .

(تخرج أم عبده وقد علقت على صدرها حجابا ووراءها الشيخ عجایب) .

الشيخ عجايب : الحجاب ده ، ما تقلعهش أبدا ، انا بقالي تلاث تيام با اعمل فيه ، وان شاء الله النهارده جا نشوف حكاية العمل ، لازم أطلعه بإذن الله . بس انا عايز آخد حته من أترك . اتفضلي جوه شويه .

(يعود الاثنان إلى الحجرة) .

: (يصف ما يراه) أم عبده على الباب .. الشيخ عجايب وراها . قر قر الشيخ عجايب دخل الأوده . أم عبده دخلت وراه . عديله واقفه بتتقصع .. اللوح قاعد زي ما هو ، ما بيتعتمش ، أم عبده خرجت ، الشيخ هباب خرج .

المشهد السابع

(أم عبده تخرج ووراءها الشيخ عجايب) .

الشيخ عجايب: ودلوقت وحياة أبوكي يا ست أم عبده ابعتي لي الفطار.

أم عبده : عنيه يا سيدنا الشيخ ، عنيه .

الشيخ عجايب : بس امبارح كان شويه وانت عارفه ان انا طول الليل سهران

و تعبان

قرقر : (من الداخل) قوى ، الله يكون في عونك .

الشيخ عجايب: وعايزك تبعتى لى أد ست بيضات مقليين واذا كانت عندك حتة قشطه على شوية عسل نحل ، يبقى كويس ، بلاش الفول لأنه يعمللي عسر هضم ، إذا كان تقدرى تبعتى لى رطل بسبوسه علشان احللي بيه ما فيش مانع ، أصلى ما حبش اتقل كده .. طلبات حفيفه .

أم عبده : من عنيه يا سيدنا الشيخ .

الشيخ عجايب : وحكاية الأوده اللي قلت عليها ؟

أم عبده : دلوقت حالاً .. هات الحاجه بتاعتك كلها وانتقل فيها دلوقت ،

دول جماعه نصابین .. حرامیه .. أنا حا عرف اوریهم ازای .

(يدخل الشيخ عجايب لإحضار ملابسه وصندوقه ومعداته وتنجه أم عبده إلى باب الغرفة) .

قرقر : يا نهار اسود .. اسندوني .. خلاص .

محمود : حا تعمل إيه دلوقت ؟ قول قوام .

سيد : أناعارف .

(يجلس الثلاثة في يأس .. أم عبده ترى الشيخ زين) .

أم عبده : وانت مين ؟

الشيخ زين : أنا الشيخ زين .

أم عبده : وعايز إيه ؟

الشيخ زين . : عايز الجماعه اللي هنا .

أم عبده : ما بيجوش .

الشيخ زين : حاستناهم .

أم عبده : مش حاييجوا أبدا .

الشبخ زين : برضه حاستناهم .

أم عبده	: خليك مستنى (إ لى عديله) بت يا عديله انزلى قولى للأسطى
	احمد النجار ييجي يكسر لنا الباب ده .
عديلة	: حاضر یا ست .
	(الشيخ عجايب يحول مهماته أمام الباب) .
محمود	: يا جماعه لازم نشوف لنا حل احنا حا نفضل قاعدين كده
	لازم نستخبي في حته .
سيد	: ما فیش فایده ، دی حا تخش تدعبس هنا وهنا وحا نتکشف لو
	استخبينا في أي حته ومش حا ينوبنا غير الكسفه .
فخرقو	: (ينظر إلى الشوالات الفارغة) اسمعوا يا جماعه أنا عندى فكره
	کویسه .
محمود	: إيه هي ؟
قرقر	: كل واحد منكم يدخل في شوال واربط عليه واركنه جنب بقية
•	الشوالات ومش معقول أبدا حد حا يفكر في فتح الشوالا دي .
سيد	: بقى معقول اننا نتحبس في الشوالات ؟
قرقر	: مش معقول ليه ؟! خمس دقايق لغااية ما تنزل ام عبده وبعديس
	اسرب لكم الشيخ عجايب وتزوغوا بعد كده .
سيد	: لكن بس حكاية اللشوله دى !.
قرقر	: ما فيش حل غير كده .
سيد	: أنا كان عندي انزل احسن على المواسير .
بحمود	: ما خلاص حكاية المواسير دي ما فيهاش فايده كل الطرق مقفله
	الظاهر ان حكاية الشوالات دي ما فيش منها مفر هي الطريق
	الوحيد لإنقاذ ما يمكن إنقاذه .
سيد	: یا ناس کل ده علشان تلاته اربعه جنیه ، تلاته اربعه جنیه نسد
	بيهم بق الوليه ، وتخلينا بقيمتنا بدل البهدله في الشوالات .
محمود	: طب ما نحط العفش ورا الباب زي ما كنا حا طينه ؟!
۔ قرقر	: ما فيش فايده دي بعتت تحيب النجار ومصممه على الاستيلاء على

الأوده ولو أدى الأمر انها تخلع الباب .	
: طب وانت حا تعمل ايه ؟!	محمود
: ولا حَاجِه حا اعملُ نفسي بردت بالليل من أودة الفراخ ولقيت	قوقو
باب الأوده مفتوح فدخلت وسكيته ونمت .	
(تحضر عديله ومعها النجار الذي يبدأ في كسر الباب).	
: يَا الله يا جماعه .	قرقر
(يدخل كل منهما في شوال ويربط عليه ، ويضعهما بجوار بقية	33
الشوالات ، ثم يرتمي على الفراش ويغط في النوم) .	
: (تدخل فترى قرقر على الفراش) . يوه ودا إيه دا كان ؟!	أم عبده
: دا قرقر یا ستی .	عديلة
: ينيلك يا قرقر إيه اللي جابك هنا ؟ دا انا دخت عليه ، ولسه نايم	أم عبده
لغاية دلوقت قوم فز قامت قيامتك وانتصب ميـزانك	
متمطع قوى على السرير تقولشي في بيت ابوك .	
: ﴿ يَقَفُّ وَيَفُوكُ عَينِيهُ ﴾ هوا إيه ده ؟! يعني انا كفرت ؟!	قرقر
: أخرج يا الله ، فضى الأوده لسيدنا الشيخ .	أم عبده
: طب والناس اللي ساكنين فيها ؟	قرقر
: دول نصابین .	أم عبده
: والعفش بتاعهم ؟	قرفر
: أنا احجز عليه لغاية ما يدفعوا الفلوس ، حا نزلوا عندي في الشقه ،	أم عبده
إذا ما دفعوش حا بيعه أما اشوف يا أنا ياهما .	
: تنزليه في الشقه ؟! مش ممكن .	قرقر
: مش ممكن ليه يا عمرحا يستعصى ؟!	أم عبده
: لا بس مش شایف انه یستاهل کله شویة کراکیب علی کام	قرقر
شوال .	
: أحسن من عنيهم اللي ييجي منه أحسن منه . أنا ما يتكلش حقى	أم عبده
أبدا .	

: بس طولی بالك ما تبقیش كده یا ست طبعك حامی كل	قرقر
حاجه بالذوق كويسه . : ذوق ؟! سلامات يا ذوق هما فاكرين إيه . عاكرينها تكيه فاكرينها أردغانه فاكرينها شفط فاكرينها نهب أنا لازم أفرجهم لازم ادوخهم زى مادوخوني لازم افضحهم في الحي	أم عبده
كله وافرج عليهم اللي يسوى واللي ما يسواش . : يا ست ما فيش لزوم . دول ناس طيبين وطول عمرهم ما حدش سمع لهم حس ولا خبر .	قرقر
: اخرس أنت ما حدش عملك محامى . خش يا سيدنا السيخ ،	أم عبده
(إلى عديله) وانت يا بت يا عديله خشى حولى العفش ده مع قرقر ونزلوه تحت (قرقر وعديله يحملان الشوال الذى به سيد) .	·
: هوا ماله تقيل كده ؟ حاطين فيه زلط ؟	عديلة
: شیلی من سکات بلاش غلبه لازم تنسحبی من لسانك . حاطین زلط حاطین زفت احنا مالنا .	قرقر
حاصين رنط محاصين رفت احما مانها . (قرقر وهو خارج ينظر فيجد الشيخ زين ما زال جالسا فينظر إليه في تهكم وغيظ) .	
: وانت يا أخينًا مستنى إيه ؟	قرقر
: مستنى الجماعه .	زین
: جماعه ؟! جماعة مين ، قوم ، قوم ، ما فيش لزوم الجماعــه	قرقر
خلصوا خلاص الجماعة بقوا عفش والعفش انشال .	
: يعنى إيه ؟! عزلوا ؟	زی <i>ن</i>
: بيعزلوا دلوقت ، ما شيين قدامك اهم .	قرقر
: طب واروح لهم فين ؟!	زين
: ما فيش فايده . ما فيش داعي تروج لهم أبدا . مش حا تعرف تا حد	قرقر
منهم لا حق ولا باطل دول ما حيلتهمش اللضا . مش حا يدوك	
ولا مليم .	

: ما حيلتهومش اللضا ؟ هو انا جاي اشحت ؟ هو انا محتاج ؟. وهو زين انا عايز منهم حاجه ، أنا جايب لهم قرشين من البلد ، معايا عشرين جنيه عايز اديهم لهم . : ﴿ يتوك الشوال يسقط من يده من فرط الذهول ﴾ يابن القديمه !! قرقر معاك إيه ، عشرين جنيه ؟! الله يخرب بيتك بحق جاه النبي .. وقاعد المده دي كلها ما بتقولش حاجه ؟! طيب هات الفلوس ، هات ، إيدك . : أجيب الفلوس ؟ ليه أهبل ؟.. عبيط ؟.. أديك الفلوس ازاى ما زين يمكنشي ، لازم اسلمهم لهم يدا بيد . وبعد فحص وبحث وتمحيص و تدقيق و إثبات الشخصية و الذي منه. : ما فيش لزوم لحكاية الفحص والبحث دلوقت . . اديني الفلوس الله قر قر يسترك و بعدين ابقى افحص وابحث زى ما انت عايز. !? It les ?! زين : لأن الفحص والبحث مش ممكن دلوقت .. لو بحثت عنهم دلوقت قرقر حا تلاقيهم هما والرز والفاصوليا والفول المدشوش واحد . هات الفلوس تكسب فيهم ثواب. : أنا اديك الفلوس ؟ ليه ؟ اتهبلت ؟ اتخبطت في نافوخي . عايز زين تضحك عليه . فاكرى غشيم . . يا ضلالى يا نصاب . . يا محتال . . يا حرامي .. أديك الفلوس علشان تضرب عليهم عسواف .. فاكرني هفيه ، دا انا او ديك البحر وأجيبك عطشان . . دا أنا او ديك في داهيه ، : وعلى إيه ما فيش داعي ، أنا مالي ، خليهم هم اللي يروحوا في داهيه . قر قر أنا عملت اللي على وهم سامعين وشاهدين . شيلي يا بت يا عديله شیلی ، الحکایه مش باینه حا تنتهی علی خیر أبدا ، شیلی ، خلینا نخلص شيل ، السلام عليكم .

الفضل الثانك

صالة الجلوس والأكل في شقة أم عبده ، على اليمين باب يؤدى إلى السلم ، وعلى اليسار باب يؤدى إلى داخل الشقة ، وفي الواجهة نافذة مسمرة بقطعة من الخشب حتى لا يمكن فتحها ، وفي الركن الأيمن البعيد أثاث سيد ومحمود الذي أنزل من غرفتهما وبعض الشوالات وبينها الشوالان اللذان وضعا بهما ، وفي الركن الأيسر البعيد أريكة عليها عود وأمامها قانون ، وفي وفي الركن الأيسر البعيد أريكة عليها عود وأمامها قانون ، وفي مقاعد متفرقة ودولاب للصنى والزجاج والطعام الجاف أشبه بنملية ، وفي الركن اليمين القريب منضدة صغيرة عليها جراموفون وأسطوانات ، وفي الركن اليسار القريب راديو على منضدة صغيرة أخرى .

المشهد الأول

أم عبده

: بس .. خليهم محطوطين كده لغاية ما يدفعوا الاربعة جنيه اللي عليهم .. إذا ما جوش بعد جمعه ، حابيعهم لبتاع الروبابيكيا .. زى ما يحيبوا .. ان شا الله يجيبوا تلاته أبيض ، أحسن من حبابى عتيهم ، الضلاليه النصابين .

بهية

: ليه بس يا نينه .. هم عملوا حاجه ؟

أم عبده

: عملهم اسود ومطين على دماغهم ، مش كفايه مدوخينى على الأجره بقالهم أربع تشهر ، عايزاهم يعملوا اكتر من كده إيه ، يسرقونا ، ينهبونا ، يدبجونا ويشربوا دمنا .

: يا نينه الحكايه مش مستاهله دا كله ، يمكن مزنوقين ، يمكسن بهية : المعذور ما يسكنش في بيوت الناس .. ويدو خهم على الأجره . أم عبده : أمال يعني يعملوا إيه ، يناموا على الرصيف ؟ بهية : أيوه حقيقي .. يناموا فين ؟ قر قر أم عبده : انسد انت ، ما تتحشرش في اللي ما لكش فيه ، خلاص انتهنا .. مش حا يعتبوا الأوده يعني مش حا يعتبوها .. مفهوم .. رجليهم مش حا تتمد فيها . : مفهوم قوى .. هم يقدروا يمدوا إيدهم لما حا يمدوا رجليهم . قر قر : ما يمدوش ليه ، دول يمدوا إيديهم ورجليهم ، أمال بيتشعبطوا عديلة از ای . أم عبده : بيتشعبطه ا ؟ : قصدها بيتشعبطوا على الترماي ، ما تاخديش على كلامها يا ست ، قر قر . هم وراها إيه غير الهلوسه ، روحي اقلي البيض للشيخ عجايب ، خلى الراجل يشوف شغله . : أيوه حقيقي ، مستنيه إيه ، أنا مش قلتلك تحضري له الفطار ، هو ا أم عبده انت كل حاجه تقفى تطقسي عليها وتحشري نفسك فيها .. فوتى انجرى اقلى البيض وحضري طبق العسل والقشطه ، يا الله قوام احنا ورانا حاجات كتير، أديكي شايفه، البيت يضرب ويقلب. : (شامتا) أهو كده ، أمال إيه ، الحكاية لعب . قر قر : (تنظر إلى العفش وتتنهد) بس انا صعبانين على الجماعه دول . بهية : ما يصعبش عليكي غالى .. فوتى يا الله انتي كان شوفي شغلك ، أم عبده إحنا ما وراناش فضا ، شوفي المقلوب ابوكي قام والالأ ؟. : قام ونام تانى . بهية ة قام ليه ؟ . . و نام تاني ليه ؟! إلمي تعدلها له . أم عبده

: قام علشان يشرب . بهية أم عبده : يشرب إيه ؟!. : انا عارفه بقي ، يشرب م القزازه اللي حاططها جنب السرير . بهية : طبعا ، هو ا و راه إيه غير كده . وراه إيه غير البصبصه والشرب ، أم عبده لكن معلهش مسيري امشيه على العجين ما يلخبطوش ، مسيري ادشدش القزايز اللي هو مخبيها لي تحت السرير. (تبدو حركة من أحد الشوالات فيلحظها قرقر ويبدو عليه الاضطراب ويتنحنح بصوت عال) . : إيه أصله ده ؟! إيه اللي جرالك ؟. أم عبده : أصلى ، أصلى شرقت ، حكاية القزايز اللي حا تدشدش دى قر قر شرقتني . : وانت مالك ، إيش حشرك . أم عبده : أبدا ما فيش حاجه (تعود الحركة ويعود إلى التنحنح) ما بلاش يا قر قر ستى حكاية دشدشة القزايز ، لحسن باين عليها مزعلاه خالص . : مزعله مين ؟. أم عبده : مزعله سیدی ، سیدی نوح افندی . قر قر : وانت مالك انته يا بارد .. إيه دخلك .. اشتكالك ؟! أم عبده : أنَّا مالي .. أنا قلبي على القزايز الفاضيه .. خساره تتدشدش وتروح قر قر هدر ، نبيعها احنا لبتاع الروباييكيا نستفيد بتمنها احسن . : بقى كده ؟! القزايز الفاضيه بس هى اللي مزعلاك ، طب فوت يا أم عبده الله شوف شغلك ، هات لي السبرتو وكنكة القهوة والبن . (تهم بالجلوس فيبدو القلق على وجه قرقر) . : ما تتفضلي يا ستى تعمليها في المطبخ علشان ننضف هنا ، بعدين قر قر التراب يطلع عليكي . : مالكش دعوه .. فوت اعمل زي ما بقول لك . أم عبده

(تجلس على الكنبه).

قرقر : يا ست انا حاشيل الشلت والبياضات .

أم عبده: أكنس الأرض قبله .

(يسمع صوت نوح افندي ينادي بهية) .

نوح : بهیه . . بهیه .

بهية : أيوه يا بابا (تخرج) .

قرقر : قومی یا ستی شوفیه .. صبحی علیه ، یمکن یکون عایز حاجه .

أم عبده : أصبح عليه ، الله لا يصبحه ولا يربحه .

قرقر : يعنى حا تسبيه كده لغاية ما يبص من بلكونه و لا شباك ، تقع عنيه على و احده من الجيران .

أم عبده : (تقفز من مكانها كمن لدغتها عقرب) تقع عنيه ؟ ياخي جه قلع عنيه ، ما يوعي يبص بيها لا يمين ولا شمال ، ما انا عارفاه ، راجل دفي ورمرام ، والنبي لانا مسنكراله بقيت الشبابيك والبلكونات ، أما اشوف حا يبص منين ، هو خلا حد في الحته ما يبصلوش ، دا فاضحني في و سط الجيران .

(تخرج أم عبده .. يتبعها قرقر حتى الباب) .

قرقر : الله يكون في عونك يا ست ، حدى بالك منه كويس ، امسكيه جامد . سنكرى الشبابيك قوى .

(قرقر يرد الباب وراءها .. ويعود وهو يفرك يديه فرحا) .

قرفر : بس ، ولا كلمه ، يا سلام على حداقتك يا واد يا قرقر ، يا اللي ما فيش منك في الاربعتاشر مديرية ، (يقترب من الشوالات ويوجه إليها الحديث) إيه رأيكم بقى ، مش برضه عرفت ازوحهم . أهو لو ما كانش ربنا ألهمنى حكاية نوح افندى دى . ما كانتش عنيكم حا تشوف النور أبدا ، كنت حا تخدوها تأبيده جوه الشوالات .

لكن ربنا ستر ، أصل نيتكم كويسه ، دلوقت بقى ، فين سيد افتدى ، وفين سي محمود . أظن ده سى محمود . (يحدث الشوال) كنت متأثر أوى على قزايز الويسكى وعمال ترفص كنت حا تودينا فى داهيه . اتفضل (يفتح الشوال فيخرج منه راس سيد افتدى ، أمال كنت بتقلب قوى ساعة ماجت سيرة الويسكى ليه ؟.

سيد : ويسكى إيه يا سى قرقر ، أنا كنت با اهرش ، معرفش فيه إيه في الشوال بيقرصني .

قر قر

قر قر

قرقر

قرقر : طب مش وقته اطلع قوام . لما اسیب سی محمود راخر . (یهم بالذهاب إلی محمود ، ویهم سید بالخروج عندما یسمع صوت بهیة مقبلة) .

بهية : حاضريا نينه ، حاضر ، انا حا قطفها .

: یا نهار اسود . خش یا سید افندی خش ، خش احسن ست بهیه جایه ، (ی**ربط علیه**) ما تتقلبش بقی لحسن تودینا فی شربة میه ، ابقی استحمل القرص .

(تدخل بهيه متقدمة إلى قرقر الذى يقف بينها وبين الشوالات وقد تناول مكنسة كانت مستدة على الحائط) .

بهية : (فى عجلة ولهفة) اسمع يا قرقر . انا عايزاك فى حاجه ضرورى .

: (فى قلق) حاجه ضرورى ؟. طيب بس اما اخلص الصاله دى ، عن إذنك شويه لحسن العفار يطلع عليكى (ويأخذ فى الكنس) .

بهية : يا أخى استنى شويه ، الدنيا ما طارتش على الكنس .

: ما طارتش على الكنس ؟! لكن حا تطير على ابن الهرمه اللي فوق ، دلوقت حالا يرقع بالصوت ، عايز الفطار ، وبعدين عايز الجدى الاحول والفرخه الزعلانه ، والقله ، والكفته والكباب والسم اللي يهرى مصارينه ، كل دا دلوقت يطلبه ، وانا لازم اخلص من الأوده واللي في الأوده . مش معقول أبدا أسيبها وامشى .. دى تبقى مصيبه . مصيبه . : هو انه أصله ده . انت اتحنت ؟ اسمع الكلام الله حاقه له ملك ده من

بهية : هو إيه أصله ده . انت اتجننت ؟ اسمع الكلام اللي حا قولهو لك ده من سكات .

قرقر : سمعت . اتفضلي .

بهية : الجماعه راحوا فين ؟.

قرقر : أنهى جماعه ؟.

بهية : سيد افندي وسي محمود .

قرقر : وأنا إيش عرفني .

بهية : انت مش كنت في الأوده معاهم ؟.

قرقر : لا ، لا يا ست بهيه ما تلخبطيش في الكلام لحسن الست ام عبده تسمعك توديني في داهيه .

بهية : توديك في داهية ازاى . انت مش كنت في الأودة قدامها ؟

قرقر: كنت في الأوده أيوه ، لكن معاهم لأ.

بهية : ازاى ؟! إذا كانوا هم كانوا فى الأوده ، تبقى ما كنتش معاهم ازاى ؟.

قرقر : وايش عرفك بقى انهم كانوا في الأوده ؟

بهية : وايش عرفني ؟ أصل . . .

قرقر : أصل إيه !؟.

جهية : أمال يعنى حا يباتوا فين الا فى الأوده ، ما هم لازم يكونوا فى الأوده .

قرقر: يعنى استنتاج كده ؟

بهية : أيوه .

قرقر : اذا كان كده تبقى غلطانه ما كانوش في الأوده .

بهية : بقول لك كانوا في الأوده يعني كانوا في الأوده ، أنا متأكده

خالص . : متأكده منين بس . إذا كنت انا نايم في الأوده لوحدي طول الليل . قر قر : كداب . أنا شفتهم بعيني ، شفتهم في الأوده وانت ما كنتش فيها . بهية : يا نهار اسود . شفتيهم بعينك ؟. قر قر : أيوه شفتهم . وعايزه اطمن عليهم ، راحوا فين ؟ جرالهم ايه ؟. بهية : راحوا فين ؟. إيش عرفني !! هم لازم ، خرجوا يشطحوا زي قرقر عوايدهم . : مشعكن . بهية : ليه بس يا ست بهيه ؟ مش ممكن ليه ؟! إيه عدم إمكانيتها ؟. قرقر : لأن سي محمود كان راقد ، كان عيان خالصِ . بهية : محمود إيه ؟. راقد .. عيان . لا . دى انت بقى اللي ما عندكيش قر قر فكره عن الموضوع خالص . : إزاى ؟. بهية : لأن محمود صحيح اربعه وعشرين قيراط ، صحته زي البمب . قرقر : بحب ازاى ، إذا كنت انا شايفاه بعيني دى ، راقد وتعبان . وبيقول بهية . Is 21. قر قر : أيوه . بهية : يمكن .. قادر ربنا يعييه ويعيى أبوه ، لكن على العموم اطمني قوي قرقر ربنا خد بيده خالص ، آخر لحظه شفته فيها ما كانش بيقول آه . : ازای بس ! دا کان عیان قوی ، یا تری راح فین ؟ وحا یرقد فین ؟ بهية اسمع يا قرقر ، أنا عايزاك تسيب الأوده دلوقت وتخطف رجلك تسأل عليهم ، تشوفهم راحوافين ، وجم منين . : أسيب الأوده. قر قر : أيوه . بهية

(أمرتيبة)

: ما يمكنش ، دا انا قتيل الأوده ، ما سيبهاش أبدائم .. حكاية السؤال قر قر عنهم دی . . مش عايزه لا خطف رجل ، ولا سيبان أو ده . . اسمعي . يا ست بهيه . . إنتي يهمك أمرهم قوى ؟ . : أوى وبس .. أوى خالص . بهية : يعنى تخافي عليهم ، وتحبى مصلحتهم ؟. قر قر بهية : والله انك أميره وبنت حلال ، طيب حيث كده .. انا حا اقول لك قرقر على الحقيقه .. يمكن تقدري تساعديني . : بس قبل كل حاجه انا عايزاك تسأل عنهم .. تشوفهم راحم فين بهية وجم منين . : حاضر .. من عنيه .. اطمني .. هم لا راحم ولا جم . قرقر : يعنى مستخبيين فوق ؟. بهية : لا .. مستخبيين تحت .. ومن جهة السؤال حاساً ل لك حالا عليهم قرقر (يتجه إلى أحد الشوالات ويربت عليه) ازيك يا سيد افندي . : (من داخل الشوال) زي الزفت البتاعه لسه نازله فيه قرص . سيد قر قر : معلهش .. تقدر تهرش شویه .. ما فیش حد غریب هنا .. (يربت على الشوال الآخر) وانت ازيك يا سي محمود .. لسه يتقول آه ؟. : (من داخل الشوال) آه . محمود : ليه بقى .. ما انا حطك في الشوال سليم اربعه وعشرين قيراط لا قرقر بيك ولا عليك .. إيه اللي بيخليك تقول آه دلوقت ؟. : الجوع .. جعان قوى .. حتة الجبنه الرومي اللي كنت شايلها من محمود امبارح . . لقيت الفيران و اكله تلات ارباعها . : والربع الباقي ؟. قرقر

: نصه واكله الصراصير والربع واكله النمل . الظاهر كان عندهم

محمود

عزومة حشرات .. آه .

قرقر : طب بس ما تزعقش كده .. لحسن الست ام عبده تسمعك اصبر شويه انا حا افتح لك دلوقت .. اصل ست بهيه عرفت خلاص .. بقت مننا و علينا .

بهية : (ق ذهول) إيه ده ؟ إيه اللي عملته فيهم ، ازاى ترميهم الرميه دى ؟.

قرقر : آل إيه اللي رماك على المر ، قلت له اللي أمر منه .. قال إيه اللي رماك في الشوال ، قلت خوفي لاقع في إيد ام عبده عرفتي بقي يا ست بهيه ، ما كانش فيه وسيله للهروب من فتك الست والدتك غير الحكايه دى ، وأظن دلوقت ما فيش داعي نضيع وقت في الأخد والعطا .. المهم اننا نفرج عنهم ونخليهم يطيروا قبل ما تيجي ست ام عبده وتقفشهم .

بهية : طب وبعدين حايرو حوا فين ، ويناموا فين ؟.

قرقز : يا ستى يحلها الحلال .. المهم دلوقت ان احنا نطلق سراحهم .. نخليهم ياخدوا نفسهم ، نخليهم يشموا النسمه .

بهية : طب ومحمود ؟.

قرقر : ماله محمود ؟.

بهية : مش بيقول لك انه جعان . . حا نسيبه كده جعان ؟.

محمود : (من داخل الشوال) أيوه جعان .. جعان قـوى واقـع مــن الجوع .

قرقر : يـا جـدع أسكت انت الله لا يسيئك .. لحسن أم عبـــده تسمعك .. ابقى شوف لك اى حاجه بره ، انشأ الله حتى لقمه بجبنه .. المهم بس انكم تخرجوا .

(يهم بفتح الشوال عندما يسمع صوت نوح افندي قادما) .

المشهد الثاني

: (من الخارج) دى ما بقتش عيشه دى بقت جهنم الحمرا	وح
واديا قرقر قرقر .	
: لا الظاهر ان اليوم ده مش حايتم على خير أبدا ما فميش	ر قر
فايده باينكم حا تخدوها تأبيده أصل لو نوح افندي اترستاً في	
الأوده دي ما حدش حا يعرف يطلعه منها ولا بالطبل البلدي	
الحقيه يا ست بهيه حوشيه شويه لغاية ما اخرجهم .	
﴿ تَهُمَ بَهِيةَ بَالْحُرُوجِ عَنْدُ مَا يَدْخُلُ نُوحٍ مُرْتَدِياً الْجُلِبَابِ ، وَقَدْ	
أمسك زجاجة ويسكى في يده وارتدى فردة حذاء ، وأمسك	
بيده الفردة الأخرى) .	
: ما بتردش ليه يا قرقر الكلب ؟.	وح
: ﴿ فِي يِأْسُ ﴾ نعم يا سيدى أفندم .	نر قر نر قر
: فين فردة الشراب الشبيكه ابو نقره واحده ؟.	وح
: أمال إيه اللي في إيدك دى ؟.	نر قر
: دي بنقرتين واحده عند الصباع وواحده في الكعب ، لكن انا	وح
فاكر ان التانيه كانت بنقره واحده عند الصباع ، تبقى راحت	
فين .	
: تبقى برضه هى اللي فى إيدك بس ربنا أنعم عليها بنقره زياده ،	ار قر ار قر
و بكره كان تبقى بتلاته وأربعه .	
: طب بلاش الشبيكه ، هات لى ابو حربه أنا آخر مره قلعته كان	وح
بحربه واحده ، دلوقت حلاقيه بحربتين والإ إيه ؟.	
: وافرض انك لقيته بحربتين ، تزعل ليه ؟! أهه زياده في التسليح	ر قر
حد لاقى .	

نوح	: طيب زي بعضه حربه حربتين هاته والسلام .
بهية	: تعالى يا بابا أنا اجيبلك اللي انت عايزه تعالى معايا
نوح	: لا مش جاي ، أنا مش عايز اشوف وش الوليه امك دي مره تانيه
	أبدا أنا حا سيبلها البيت أنا حافرجها أنا وهي والزمان
	طويل .
بهية	: ليه بس يا بابا ؟ هي عملت حاجه ٠
نوح	: عملت حاجه ؟ كُلُّ اللَّي عاملاه فيه ده وما عملتش حاجه ؟.
C	عايزاها تعمل إيه اكتر من كده هي مخلياني عارف اتنفس
	حاشره نفسها فی کل شؤونی دا مش جواز ، دا أسر ، لکن
	معلهش هانت ، فوت يا واد يا قرقر هات الشراب والبدله (يجلس
	على الأربكة) .
قرقر	: (يَنْظُو مُتُودُوا إلى بهيه) حضرتك حا تقلع هنا ؟.
نوح	: أُيُّوه إِيه المانع هوا انا حا قلع في الشارع ؟.
بهية	: طب ما تتفضل في أو دتك يا بابا و إنا اجيب لك اللي انت عايزه .
نوخ	: أو دتى ؟! هي بقت أو ده ، دى بقت زنزانه ، انت عارفه عملت فيه
C	إيه ؟.
بهية	: عملت ایه ؟.
نوح	: أنا لسه بقول يا فتاح يا عليم لقيتها لك من غير مناسبه هاجمه زى
	الغول وفي إيدها الشكوش وشوية مسامير وهات يا دق في باب
	البلكونه والشباك قال إيه علشان ابطل البصبصه للجيران هوا
	انا لسه فتحت عيني ؟. الوليه دي لازم اتجننت اتخبلت ومع
	كل هي البصبصة حرمت . طيب أُديني خارج دلوقت اماً
	اشوف حا تقدر تمنعني من البصبصه ازاي ؟.
بهية	: طيب يا بابا قوم البس هناك و بعدين اخرج زى ما انت عايز .
نوح	: ﴿ فَيَ إِصْوَارَ ﴾ لا إنا حلفت ما إنا داخل الأوده لاجل خاطرها
_	

فوت يا واد يا قرقر هات لي البدله والشراب ابو حربة ، وحمالة الشراب ، وهات علبة السجاير من فوق المكتب .. بس اوعى تلطش منها حاجه . : (تشير إلى قرقر أن يبقى مكانه) خليك انت يا قرقر شوف شغلك بهية أما أروح ادور انا على الحاجات اللي هوا عايزها . (تخرج بهية). : ﴿ وَهُو يَدْنُدُنْ عَلَى الْعُودُ ﴾ وبعدين يا واد يا قرقر ، وأخرتها ؟. نوح : ﴿ وَهُو يَكْنُسُ حُولُهُ مِثْيُرًا الْغَبَارِ لَمُضَايَقَتُهُ ﴾ آخرتها في إيه ؟. قر قر : في إيه ؟! في ستك أم عبده .. هوا ربنا مش حا يتوب علينا منها .. نوح ده مش عدل أبدا . . دانا أعرف واحد قتل قتيل خد فيه عشرين سنة سبجن ، واليومين دول طلع م السجن ، بقى حر .. يعمل زى ما هو عايز ، يبصبص للجيران زي ما هو عايز .. ويروح الببت وقت ما هو عايز ، ويشرب ويسكي زي ما هو عايز ، ويغني زي ما هو عايز ، وانا اللي ما قتلتش ولا حاجه .. لغاية دلوقت في السجن ، مش عارف اتفلفص .. تقدر تقوللي بقى ليه أفضل أنا ويخرج : لازم كان حسن السير والسلوك . قر قر : والله لو أعرف إني بقيت حسن السير والسلوك . ربنا يتوب على نوح منها .. لكنت صليت من بكرا لكن انا عارف ما فيش فايده .. يقى لا انبساط ولا حريه ؟. : معلهش يا سي نوح .. استحمل ، أدحنا كلنا مستحملين . قرقر : انا كنت زمان با استحملها .. لكن دلوقت ما بقتش تنطاق أبدا .. نو ح في حد في الدنيا يستكر الشيابيك كلها كده زي ما هي عامله ؟! هوا دا بقي بيت يتسكن . والنضافه اللي هي طالعالي فيها دي ..

اقوم من النوم افتح عيني على طاخ . . طاخ . . يتهيأ لي ان التنظيم بيهد

البيت وبعدين الاقيها بتنفض الشباييك . ما يحبكش مسح السلالم إلا الساعه اتنين وانا جاى .. علشان مية المسح كلها تنزل على نفوخى ، هوا انا عمرى شفت البيت في حاله طبيعيه أبدا .. لازم السجاجيد فوق الكراسي ، والكراسي فوق الترابيسزات ، والترابيزات جنب الحيط والأرض مبلبطه ، تزحلق بلد بحالها ، ده بيت ينقعد فيه ده .. أنا اقدر اقعد قاعده هاديه .. أشرب لى فيها كاسين و لا اتنتن لى تقسيمتين .

قرقر : هوا انت یعنی بتقعد یا سی نوح افندی ؟.

نوح : أقعد فين .. هوا فيه حته ينقعد فيها ، دى حاجه تخلى الواحد يهج ، وآخر المتمه .. الشيخ اللي جايبهولي فوق السطوح .. تقدر تقوللي جايباه ليه ؟.

قرقر: عشان يطلع العمل.

نوح : عمل ؟! يعني إيه العمل ؟.

قرقو : أصل فيه ناس قالوا لها ان الحاله اللي انت فيها نتيجه عمل اتعمل لك .

نوح : حالة إيه اللي انا فيها ؟.

قرقر : ولا مؤاخذه .. البصبصه والعربده ، وفروغية العين ، والشرب والمهيصه والهججان بره البيت ، وال

نوح : مفهوم .. مفهوم .. ماله ده كله ؟.

قرقر : كله ده صايبك .. علشان حد متغاظ منها فعمل لك عمل علشان يطفشك منها .

نوح : وبعدين ؟.

قرقر : ولا قبلين ، قالوا لها على الشيخ عجايب انه راجل مجرب واحجبته ما تنزلش الأرض .

نوح : يعنى حا يعمل ايه ؟.

قرقر : حا يطلع العمل .. ويعمل شوية تعازيم واحجبه ..

: والنتيجه ؟. نوح : النتيجه إنك تتلم ، وتبطل الشرب والسنكحه والبصبصه وتقعد في قرقر البيت .. وتحب ست ام عبده وما تبصش لغيرها . : (منزعجا) يا مغيث .. يا حفيظ .. الراجل ابن اللئام اللي فوق ده نوح حا يعمل فيه كده ؟. : دا المفروض . قر قر : دا انا اقتله ، ودى تبقى أنهى عيشه دى .. أنا اقعد في البيت ولا نوح اشر بش ولا اهبصش ، وما اعملش حاجه غير ان انا ابص لام عبده .. يا هوه .. الراجل المجرم ده عايز يعمل فيه كده ، وتفتكر انه يقدر يعمل الحاجات دي يا قرقر ؟. : مين يعرف . أهو اذا ما كانش ده يقدر غيره حا يقدر . . هي يعني قر قر حا تسكت .. حا تسيبك كده لغاية ما تطير من إيدها .. أهى حاتنها وراك كده .. لغاية ما تسنسلك . : فال الله ولا فالك يا شيخ . . على العموم الحمد لله ، اللي ربنا ألهمني نوح المشروع اللي انا ماشي فيه دلوقت هوا الوحيد اللي حا يتقذنا من المصيبه دى . : مشروع ؟! مشروع ايه ؟. قر قر : قرب .. قرب هنا .. اديني ودنك .. (يقترب منه قرقس) نوح مشروع جمعیه سریه. : جمعيه سريه ؟!.. بتاعة إيه ؟.. وعلشان إيه ؟.. واسمها إيه ؟. قر قر : اسمها جمعية قتل الزوجات . نوح : يا ساتر .. مره واحده كده ؟. قرقر : أيوه ما فيش طريقه لإنقاذ العالم من السيطره النسائية ولإعطاء نوح الرجل حريته غير كده. : ودى خلاص عملتها ؟. قر قر

: امال ! دا انا ما شي فيها جد قوى .. انا لازم اجيب خبرها . نوح : هي إيه دي ؟.. الجمعيه ؟. قر قر : لا .. أم عبده .. لازم اقضى عليها هي وأمثالها ، قبل ما يضيعونا في نوح شربة ميه ، أنا فكرت فيها من زمان ، وكل الشله اللي باقعد معاها وافقتني على المشروع ، وقالوا لي دي فكره هايله ، وكنت بادرس الموضوع شويه على مهلى ، لكن حكاية الشيخ عجايب واللي ناوي يعمل فيه خوفتني أوى ، المسألة دلوقت لازم نمشي فيها بجد ، دي مسألة حرب ، يا هم يلمونا في البيوت ، يا احنا نجيب داغهم ، دا صراع على تقرير المصير ، انا اقعد في البيت ولا ابصش لغير أم عبده .. يا هوه .. يا جاه النيم . : على العموم ما فيش داعي للخوف كده .. الحكايه مش مستعجله قر قر أوى . . والجماعه دول اللي زي الشيخ عجايب معظمهم نصابين ، يعني هي أول مره تجيبهمأهي بقالها سنين تترقي وتشبشب وتلبس في احجبه وتطلع في عمل ، علشان ربنا يتوب عليك وتتهدى ، ما بتتهديش ، هي تتنقل من شيخ لشيخ ، وانت تنتقل من واحده لواحده ، ما فيش حاجه بتحوق فيك أبدا ، لغاية ما رسيت على الشيخ عجايب وانت رسيت على زكية ولعه . أما نشوف مين اللي حايغلب ، الشيخ عجايب والاالست ولعه ؟. : إيه يا واد ده انت اتجننت ؟ وطي صوتك ، انت عايزها تسمعك نو ح تيجي تطلع على جتتنا البلي!!. : انت لسه بتخاف منها بعد الجمعيه اللي عملتها ؟ دا انت رئيس جمعية قر قر قتل الزوجات على سن ورمح ؟.

نوح : قولتلك متزعقش ، دى جمعيه سريه ، لازم تفضل مستخبيه كده ، تعمل فى الخفاء .. انت عمرك ما اشتركتش فى جمعيه سريه أبدا ؟!. قرقر : أبدا ، لا سريه ولا علنيه .

: على العموم تقدر تشترك .	.ح
: لكن انا مشر متجوز ؟.	_قر
: مش مهم ، الجمعيه حا تجوزك . وبعدين هي نفسها تتولى أمر	
الله الله الله الله الله الله الله ال	۲.
: وعلى إيه اما اتجوز ، يبقى يحلها ربنا .	1
: ما تضيعش الفرصة من إيدك ، واسمع نصيحتي اشترك من دلوقت	_قر
أحسن لك ، دى أحسن طريقه لضمان حريتك ولتأمين حياتك ،	رح
احسن لك ، دى احسن طريقه لطيمان طريت وسايين سيات	
وللقضاء على ام عبده وأمثال ام عبده .	
(يتحرك أحد الشوالات ويصدر الآخر صوت آه) .	
: ﴿ فِي فَوْعِ ﴾ يا نهار أسود وهوا فيه حاجه حا تنجينا من ام عبده ؟!	رقر
وُلا ميت جمعيه سريه ، ولا انقلاب كامل ، (تستمر الحركة)	, ,
اصبر شویه یا و یکا .	
: أصبر اكتر من اللي صبرته ، مش ممكن ، أنا لازم اقضى عـليها	وح
خالص ، بس عايزين أعضاء ، عايزينها نكبر ، لازم تشتـرك ،	ر
فاهم .	
: حاضر حا اشترك ، بس عن إذنك شويه ، أنا عايز انفض الكنبه اللي	أرقر
انت قاعد عليها ، تسمح تتفضل في أو دتك شويه .	3 2
: انت كان بتجيب سيرة التنفيض ، إخص ، إخص عليك ، يا خيبة	وح
أملي فيك ، خلاص مش حا تنفع أبدا معانا .	ري
: ليه بس يا سي نوح افندي ؟.	نر قر نر قر
: عايز تدخل الجمعية وانت بتنفض ؟ عايز تبقى عضو ، وإيديك	وح
ملوثه بجريمة التنفيض ؟.	ري
: وفيا أنه يعنى ؟ مش جمعية قتل ؟.	ن ق

: أَيُوه قَتْل ، لكن مش تنفيض ، قتل بطرق شريفه نضيفه مش قتل

بإثارة الغبار ، مش قتل بتحطيم الأعصاب ، دى من أول الحاجات

نوح

اللى بتنادى بيها الجمعية ، المطالبه بحرية الوساخة ، وحق الكُزّكبه والفركشه واللخبطه واللخفنه ، تقوم تيجى حضرتك وتقوللي قوم علشان انفض .. اتفو عليك .

قرقر : الله يسامحك ، طب بلاش التنفيض ، قوم عشان تفطر .

نوح : مالياش نفس ، انا حاخد بق م القزازِه كفايه (يشرب) الله .. بالصحة والعافية .. بالهنا والشفا .

قرقر : قوم بقى يا سى نوح افندى الله لا يسيئك ، قوم الله يستر عرضك .

نوح : مشحا قوم خلاص انا عايز ادندن شويه عندى كيف للغنا ، ناولني العود ، ناول .

قرقر : عود ؟ الا ، الظاهر انها حا تطبل على دماغنا (يناوله العود) ما دام مسك العود يبقى مش حا يطلع من هنا أبدا .

نوح : تعرف تشتغل معايا على الرق ؟.

قرقر : رق ؟ رق انت شویه ، وقوم .. قوم الله یجبر بخاطرك انا لالیه فی طبله ولا فی رق .. انت عایز ستی تیجی تلاقینی ماسك الرق تقطع عیشی ، انت یا سیدی بتقدر علیها ، لكن انا غلبان ، علی قد حالی .

نوح : (يبدأ في ضرب العود والغناء) يا سبدى زعلان ، يا روحى زعلان (قرقر يمد يده تحت الأريكة ويخرج منها لافتة يعلقها أمام نوح مكتوب عليها : « بمنوع الغناء بأمر أم عبده » فلا يكاد يواها حتى يصيبه الذعر ويصمت ثم ينهض ويقلبها فيبدو عليها « بمنوع البصبصة بأمر أم عبده » فينتزعها ويقذف بها تحت الأريكة ثم يعاود الغناء) . يا سيدى زعلان . . يا روحى زعلان . (يتحرك سيد ويتأوه محمود) .

(قرقر يزداد ارتباكا ويقترب من الشوالات ويربت عليها في غفلة من نوح افندي) .

— , , _	
: (للشوالات) حاضر اصبر شویه دلوقت اجسیب لك ساندوتش جبنه ، بس لما أخرج الكاینه دی حالا ، ربنا یسهل	قرقو
ن (ملتفتا إلى قرقر)انت بتعمل ايه عندك بتكلم مين ؟! : لا ما فيش حاجه دانا بس بدندن .	نوح قرقر
: بتدندن ؟! انت جنسك إيه حيوان تدندن وانا با اغنى انت ما عندكش إحساس انت جماد لما انا اغنى يبقى لازم	نوح
الدنيا كلها تسمع وإيه اللشوله اللي عندك دي إيه دا كله ؟!.	
: دا عفش الجماعة اللي كانوا ساكنين فوق السطوح . : وإيه اللي جابه هنا ؟.	قرقر نوح
: ست أم عبده نزلته . . ماه اد ان ؟	قرقر
: علشان إيه ؟. : حا تبيعه .	نوح قرقر
: تبيعه ؟ واصحابه راحوا فين ؟. : طردتهم .	نوح قرقر
: كده على طول وليه تطردهم ؟.	نوح
: علشان تسكن الشيخ عجايب . : أما وليه دون تطرد الناس الطيبين الأمرا علشان تقعد الراجل	قرقر نوح
النصاب المحتال طب وحا تبيع عفشهم ليه ؟. : علشان تاخد أجرة الأوده من تمنه .	قرقر
: إخص على السفاله والإجرام تبيع عفش الناس علشان تاخد الأجره .: لا أنا ما اسكتش على كده أبدا .	نوح
: (فرحًا) إيه ! أطلعه تانى ؟. : لا لا ما فيش فايده لو طلعناه حا تنزله تانى .	قرقر نه ۳۰
: أمال إيه ؟! نعمل ايه ؟.	نوح قرقر

: نعقد جلسه غير عاديه .. جلسه مستعجله .

: جلسه !.. لإيه ؟.

قر قر

: للجمعيه .. ما فيش غير .. نوح : (مقاطعا بخيبة أمل) دا كل اللي تقدر تعمله ؟. قر قر : وده شويه .. لازم نجمع الجمعيه .. لاتخاذ قرار ضدها . نوح : (ييأس) طب ؛ اجمعها . قرقر : لكن ، لكن حاتجتمع ازاى اذا كان ما فيش أعضاء ، عايزيسن نو ح أعضاء ، لازم تشترك . : حاضر .. حا اشترك . قر قر : وتجيب كان حديشترك . نو ح : حاضر .. حا جيب لك حد يشترك . المعلم عضمه الجزار لسه قر قر متخانق مع مراته وراقعاه علقه لما قطعت نـفسه .. اجبهولك يشترك ؟. : أيوه ، ده ينفعنا كويس ، مش يعرف يدبح ؟. نوح : قوى .. دى شغلته .. بس .. عن إذنك بقى دلوقت .. خمس قرقر دقايق .. حل عن الأوده شويه . : علشان إيه ؟. نوح : أصلي .. أصلي .. عايز انكشها شويه .. وفيه شوية زباله بره .. قرقر عايز أدلقها على الكنبه . علشان القعده تحلى . : لا .. ما فيش لزوم .. ما تتعبش نفسك .. أنا اقدر استحملها نوح كده .. ناولني العود ناول .. واقعد جنبي هنا لما اشنف و دانك . : أنا عارف .. ما فيش فايده أيضا .. اتفضل يا سي نوح افندى قر قر (يناوله العود) وآدي قاعده (يجلس على الأرض بجواره ، وهو يلتفت إلى الشوالات) أنا عملت اللي عليه و فوق اللي عليه . لكن أعمل إيه .. لازم يشنف و داني ، اتفضل شنف . : ﴿ يَأْخُذُ فِي الْعَرْفُ وَالْغَنَّاءُ ﴾ يا سيدى زعلان .. يـا روحـــى نو ح

زعلان .. لان .. لان .. آه یا سیدی زعلان .. یا عینی زعلان .. یا روخی زع .. لان یا .. عینی زع .. لان یا .. یا .. یا .. سیدی زعلان .. و کمان زعلان ..

قرقر : (يصيح فجأة متفجرا بالبكاء) آه . . ياني . . آه .

المشهد الثالث

(تدخل أم عبده مهرولة .. ونوح افندى منهمك في غنائه) .

أم عبده : إيه .. مالك يا واد .. انطق قول ؟.

قرقر : آه .. ياني .. آه .

أم عبده : مالك .. بتعيط ليه ؟.

قرقر : با اعیط علی سی نوح افندی .. بقاله نص ساعه .. زی مانتی شایفه کده .. لا بیسکت .. و لا بیقول زعلان لیه .

أم عبده : طب بس انسد .. قوم شوف شغلك .. وانت التاني ما كفاكش غنا .. جايب الواد مقعده جنبك و معطله عن شغله ؟.

نوح : يعني وراه إيه .. المفاوضات ؟.

أم عبده : انتهينا . . قوم بقى من فضلك كفايه غنا .

نوح : ليه .. الغنا حرم ؟!.

أم عبده : ما حرمش ولا حاجه .. بس مش وقته .. قوم بقى علشان تلبس وتروح تشوف شغلك .

ح : وانت مالك .. عملوكي وصيّه على .. أما دى مصايب .. يا ستى انا مِش قلتلك ميت مره ما لكيش دعوه بي . هو انتي لكي عندى حاجه ؟.

أم عبده : بقى اسمع اما اقول لك .. أنا العفاريت بتتنطط فى وشى .. وإذا .. (تصدر فجأة صيحة من محمود وهو داخل الشوال) .

محمود : آه .

أم عبده : (تتلفت حولها في ذعر) إيه ده ؟! انتم سامعين ؟.

قرقر : يا نهار اسود ، جالك الموت يا تارك الصلاة .

أم عبده : إيه ده ؟.

قرقر : ده . . ده (يتلفت حواليه في حيرة) دول دول لازم العفاريت

أم عبده : أنهو عفاريت ؟.

قرقر : الغفاريت .. اللي كانوا بيتنططوا في وش حضرتك .. الظاهر .. ان واحد منهم ، طب وقع في الشوال .

محمود : آه .

قرقر : يا نهار اسود .

أم عبده : الحقونى ، أنا جتتى حا تتلبش ، الحقونى بالشيخ عجايب .. أنا بقالى ليلتين حاسه ان فيه حاجه فى الشقه .. اندهولى الشيخ عجايب قوام .. ما فيش حد حا يطلعهم غيره .

نوح : هم إيه دول اللي حا يطلعهم ؟

أم عبده : العفاريت اللي ماليين البيت .

نوح : عفاریت ایه یا ولیه ، انت مش حا تبطلی بقی شغل الهفه دی ، مش حا تعقل أبدا ؟

أم عبده : اسكت انت .. ما تتداخلش في اللي ما لكش فيه .. اطلع يا قرقر نادى لي الشيخ عجايب .. الحقني بيه .

قرقر : أيوه ، علشان تكمل ، ما هو مفيش غير هوا اللي ناقصنا ، علشان ينبسطوا ، أنا مالي ، انا خاسس على حاجه ، أنا واقف على رجلي ، الدور على القرفصين جوا الشوالات .

أم عبده : هم مين ؟.

قرقر : العفاريت .

أم عبده : يا هوه ، يا مغيث ، ما تفسرش بقي لحسن جتني بتتلبش . . اجرى

الحقني بيه .. مد شويه .

(يخرج قرقر .. وترتمي أم عبده وهي تلهث .. وفي اللحظة نفسها تدخل بهية) .

المشهد الرابع

: (في دهشة) إيه ؟ في إيه ؟، مالك يا نينه ؟ بهية

> أم عبده : هس ، ما تزعقیش .

> > : ليه ؟ جراليه ؟ بهية

: قولتلك ما تزعقيش كده ، لحسن بعدين يتفزعوا ، خليهم مكنونين أم عيده زى ما ھىم .

: هم مين دول ؟ بهية

: اللي في اللشوله .. أصل الدنيا ضاقت بيهم .. مالاقوش حته يطبوا نوح

فيها غير اللشوله .

: ﴿ فِي فَوْعَ ﴾ إِنتُوا عَرِفْتُم ؟ بهية

: وانتي كان كنت عارفه ؟ أم عبده

: أيوه يا نينه عرفت ، وصعبوا على قوى ، والنبي دول غلابه . بهية

: هم إيه دول الغلابه ؟! عفاريت غلابه ؟! حلوه دى ، أول مره اسمع نوح على عفاريت غلابه.

: عفاريت ؟. (تتنهد في راحة) أيوه برضه فيه عفاريت غلابه . بهية

> : (من الداخل) آه . محمود

: يا مصيبتي ، يا وقعتي .. متفسروش بقي .. كفايه ، أنا خلاص ما أم عبده بقاش فيه نَفس ، فين هوا ده الشيخ هباب يلحقني قبل ما اروح فطيس .

> : هو الشيخ عجايب حا يطلعهم ؟ بهية

: أيوه قرقر طلع ينده له . أم عبده : (في فزع) طلع ينده له ؟.. وبعدين .. وبعدين لما يطلعهم بهية حقیقی ، پروحوافین ؟ : يطلعوا على جتنا .. يشاركونا في عيشتنا .. علشان تنبسط امك نوح ويهدا بالها .. أمال .. العفاريت بتنطط في وشها ، ويطبوا في الشوالات ، وبعدين تطلعهم على جنتنا ، هي وراها إيه غير تطلع على جتتنا التراب والعفاريت. : يا راجل اسكت بقى وانسد ، ما تقعدش تجيب سيرتهم وتهيجهم . أم عبده : أنا برضه اللي بهيجهم ؟ . . أنا اللي بعت أجيب لهم الشيخ عجايب نوح علشان يطلعهم من اللشوله ؟.. مالك ومالهم إذا كانوا قاعدين في اللشوله مستريحين تطلعيهم ليه ؟ : أيوه يا نينه حقيقي .. تطلعيهم ليه ؟! ما تخليهم قاعدين مستريحين! بهية : انتوا اتجننتوا ، أخليهم كده قاعدين معانا ؟ باركين على نفسنا ؟ أم عبده : مش بـاركين على نفسنـا ولا حاجـه ، النـاس مكتـونين جــوا نوح الشوالات ، والشوالات مش بتاعتنا يبقى حا يخس علينا إيه ؟ : يعنى حايفضلوا كده قاعدين ؟ أم عبده : أيوه يفضلوا .. لغاية ما يزهقوا ويمشوا من نفسهم ؟ بهية : واذا ما زهقوش ؟ أم عبده : نعتبرهم ضيوف ، يعني حا يكلفونا إيه غير لقمة بجبنه ، والا شوية بهية خضار . : و كان حيا كلوا ..؟ أم عبده : (من داخل الشوال) آه . محمود : يا مصيبتي ، الحقوني ، يا ناس ، أنا مش قادره ، يا واد يا قرقر ؟ أم عبده ﴿ يَدْخُلُ قَرْقُرُ وَمُعُهُ الشَّيْخُ عَجَايِبٌ حَامَلًا كَيْسٌ فَي يَدُهُ أَشْبُهُ بالخرج). (أمرتيبة)

المشهد الخامس

: آدى الشيخ عجايب .. اتفضل .. اتفضل يا سيدنا الشيخ قرقر اتفضل. : يا ساتر . عجايب : اتفضل يا سيدنا الشيخ .. اتفضل . أم عبده : بسم الله الرحمن الرحم . عجايب : الحقنا يا سيدنا الشيخ .. الحقنا . أم عبده : يا أرحم الراحمين ارحمنا .. يا لطيف الطف بنا .. يا لطيف الطف عجايب بنا .. فيه إيه يا ست هانم ؟ فيه إيه ؟ : عفاريت يا سيدنا الشيخ . . يعني حا يكون فيه إيه غير كده . . انت نوح لك اختصاص في إيه غير العفاريت ؟ : هم فين ؟؟ هم فين ؟ عجايب : جوه هنا في اللشوله .. مع العفش المحجوز عليه .. أصل الست ام قرقر عبده حجزت على العفش بالعفاريت اللي فيه .. لكن دلـوقت استغنت عن العفاريت .. يعني ممكن انك تطلعهم ؟ : بس تاخدهم معاك .. مش تطلعهم من اللشوله على جتنــاً .. نوح مفهوم ؟ : مفهوم يا سيدنا الافندي مفهوم . عجايب : إذا كنت عايزهم فوق معاك .. ما فيش مانع خدهم يونسوك . نوح : لا .. لا .. دول صنف بطال ما ينفعنيش ، أنا حا اطلعهم واوديهم عجايب في داهيه . : (منزعجة) في داهيه ازاى . . يا سيدنا الشيخ !! حرام عليك . بهية

: ما يمكنش .. انا لازم أفتك بيهم .. لازم أفنيهم ، أبيدهم .

عجايب

: تفنيهم ؟ حرام .. حرام عليك (تبكي) . بهية : هوا إيه أصله ده .. إيه اللي جرالك يابت ؟ أم عبده : مش سامعه يا نينه بيقول ايه ؟.. بيقول انه حا يفنيهم .. يعني حا بهية يموتهم . : يا ستى بهية .. بس لما يطلعهم يبقى يحلها ربنا .. هوا طلسو ع قرقر العفاريت بالساهل ، دول لما يتبتوا في الشوال ما يطلعوش أبدا .. دول يطلعوا حبابي عنين اللي حا يطلعهم . دول يطلعوا على جتته البلاقبل ما يطلعهم . . اسأليني انا يا ست بهيه ، دول لما يقرفصوا في الشوال ، ما يطلعوش ولا بالطبل البلدي ، يبقوا وحشين قوى و خطرین .. بعضوا ویشنگلوا ، ویعملوا حاجات و حشه قوی . : اللهم احفظنا . عجايب : اسألوني انا عنهم ، انا اعرفهم كويس قوى ، عفاريت اللشوله قرقر دولا. : معلهش ، ربنا يقدرنا عليهم ، اتفضلوا انتوا بقي من غير مطرود . . عجايب فضوا لنا الأوده .. خلونا نشوف شغلنا .. بس ابعتي لنا وأبور سبرتو وطاسه وحله فاضيه. : انت حا تطلعهم ، والا حا تطبخ لهم . نوح : دا شغلنا يا سيدنا لفندى . عجايب : على العموم هم جعانين قوى . قر قر : إيش عرفك ؟ عجايب : باين كده من صوتهم .. يعني لو طلبت لهم كام سندوتش .. حا قرقر يبقوا ممنونين خالص . : سندوتش ؟! الظاهر انك عمرك ما اشتغلت مع عفاريت .. سيبهم عجايب لى انت بس .. أنا حا اطلعهم بالطريقه بتاعتى .

: انت حر ،

قر قر

عجايب : يا الله اتفضلوا .

(تخرج أم عبده ووراءها بهيه) .

عجايب : وابعتوا لنا كان شوية دره عويجه .. أد حفنه كده .

قرقر : عويجه ؟

عجايب : أيوه عو يجه .

قرقر : وليه العويجه ؟ يعنى لازم تصعبها .. ما تخليها دره عاده .. والا .. قمح .. يمكن يعملوه بليله ..

عجایب : انت حا تعلمنی شغلتی ، دی صنعتی یا سی قرقر وانا اعرف الأصول کویس .

قرقر : عدم المؤاخِذه .. عويجه .. أنا مالى ، هو انا اللي حاكله .. انشا الله تطلب قرطم .

عجایب : (ملتفتا إلى نوح الذى أمسك بالعود و أخذ فى تصليحه) وسيدنا لفندى مش حا يتفضل ؟.

نوح : أتفضل فين ؟.

عجايب : شويه كده ، لغاية ما نطلع الكام عفريت .

نوح : واتفضل ليه ؟.

عجايب : بس علشان الشغلانه دى متعبه شويه .. ويمكن أعصابك ما تستحملهاش .

نوح : ما تخافش انا أعصابي تستحمل أبوها .

عجايب : و كان عايزين هدوء تام .

نوح : وآدى الهدوء التام (يلقى بالعود جانبا) هه ولا كلمه .. اتفضل شوف شغلك .

قرقر : ولزومه إيه ياسي نوح افندي .. ما تسيبه لوحده في الأوده .. يمكن يكونوا العفاريت ما بيبانوش على حد غريب .

نوح : يعنى إيه .. عفاريت حريم ؟.

قرقر : جايز

نوح : يبقى مش حا اطلع ابدا . . أنا قتيل العفاريت أموت في العفاريت .

عجایب : معلهش .. تقدر تخلیك زى ما انت ؟.

ر تدخل عديله وهى تحمل السبرتو والطاسة والحله وكوز به الذرة العويجة) .

عديلة : اتفضل يا سيدنا الشيخ .

عجايب : وحياة أبوكي ولعي لي السبرتو.

عديلة : عنيه يا سيدنا الشيخ .

عجايب : تسلم عنيكي .

(عديلة تولع السبرتو) .

عجایب : حطی لی علیه الطاسه ، وحطی فیها حفنة دره وقلبیه لغایة ما یتحمص .

(عديلة تنفذ المطلوب) .

(يفتح الحُرج ويخرج منه بعض أوراق وكتاب أصفر وأحجبة وبخور. يضع بعض البخور فوق الذرة ثم يضع الحجابين في الحلة ويكتب في ورقة بضع جمل ويضعها فيها).

الشيخ عجايب: عايزين أتر من أي حد.

عديلة : يعني إيه ؟.

عجايب : يعنى أى حته من الهدوم بتاعت أى حد من البيت .

نوح : (يقذفه بفردة الشراب) خد الشراب ابو نقرتين ، ما بقاش يلزمني .

عجايب : (يضع فردة الشراب في الحلة) .

نوح : كل ده حياكلوه العفاريت ؟ دا انت متوصى بيهم قوى .

قرقر : متوصى بيهم ازاى ! دى فردة الشراب دى حا تكون القاضيه عليهم . حاتموتهم خنقا بالغازات السامه .

عديلة : هم مين دول ؟

قرقر : العفاريت يا ست عديله .

عديلة : عفاريت ، يا مغيث ، يا منجى . أشتاتا أشتوت ، وهو انا اقدر على طلوع العفاريت قدامى ، عن إذنك يا سيدنا الشيخ ، أنا جتتى ما تستحملش .

عجایب : ما تخافیش یا بنیه اطمنی خالص ، ما دام انا و اقف جنبك ما تحملیش هم .

عديلة : البركه فيك يا سيدنا الشيخ ، بس انا ركبي بتترعش .

عجايب : اقرى آية الكرسي خمس مرات .

عديلة : حاضر ، بس انت فاكر الحاجه اللي طلبتها منك ؟

عجایب : فاکر قوی ، وإن شاء الله حا دیکی حجاب تلبسیه ، واقول لك على وصفه تنفعك خالص .

قرقر : هو إيه دا يا ست يا عديله ؟!

عديلة : اسكت انت دى حاجات ما تعرفهاش .

قرقر : انتى كان بتعملى حاجات عند سيدنا الشيخ . والله عال ربنا يجعلنا من بركاتك يا سيدنا الشيخ ، مش حا تبتدى الشغل بقى . والا عايز لك جدى أحول ؟

عجايب : لا ما فيش لزوم ، الحكايه مش مستاهله . بس عايزك تقرب من الشوالات وتحط الحله على كفك وتمسك ودنك الشمال بإيدك اليمين .

قرقر : حاضر ، من عينيه ، أما شوف آخرتها .

(يضع الحلة التي على المنضدة في كف قرقر ثم يقلب فيها الطاسه والمذره والبخور ويضع عليها الغطاء ويشمر أكهمه ويخرج من الخرج كيسا صغيرا مدلى من خيط ويأخذ في لفه بحركة دايره حول الحلة وهم يتمتم بكلمات غير مفهومه) .

: (في ملل) وآخرتها . أنا دراعي خلاص نمل . قرقر . : (يقوأ) أينك يا زوبعه ، أينك يا لوبعه .. أينك يا صاحب الروس عجايب الأربعة . (يدفعه بكوعه) اسكت . ما تخسرش الشغل . : أصل الحق مش عليك ، الحق على العفاريت اللي ساكتين لك لغاية قر قر دلوقت . : يعنى عايزهم يعملوا ايه ؟ عجايب : يخلوا عندهم نظر ، يشكوك مقلب والا يلهفوك مقص ، والا يعني قر قر حا يفضلوا سايبني كده لغاية ما دراعي ينقطم. أنا مالي ، أهي حا ترسى على دماغهم. (يتحرك شوال محمود في قلقلة بطيئة حتى يقترب من أقدام عجايب ثم يدفعه في قدميه دفعة تلقى به على الأرض). : آه ، آه دماغي ، الحقوني . وسطى انقطم . عجايب : سلامتك يا سيدنا الشيخ ، إيه اللي جرى ؟ عديلة (لا يكاد ينهض متباعدا في خوف حتى يتلقاه سيد فيدفعه في قدميه دفعة توقعه مرة أخرى . فينهض متحاملا ثم يعدو مندفعا خارج الحجرة بأقصى سرعة). (عديلة تنطلق مولولة من الحجرة . نوح افندى يتناول رشفة من الزجاجة ثم يتناول العود) . : إيه يا سيدنا الشيخ ، حد بجرى كده من العفاريت ؟! قر قر : ﴿ وَهُو يَعْدُو فِي الْحَارِجِ ﴾ هم دول عفاريت ، دول بلطجيه . عجايب : أنا مع العفاريت ، فلتحى العفاريت ، لو منهم اتنين في جمعية قتل نوح الزوجات . كنت سويت بيهم الهوايل . يارب اتنين بس . زى دول . . وانا امشى بيهم ام عبده على العجين ما تلخبطوش . (أم عبده تدخل مندفعه على صوت الضجة) . : إيه ؟. حصل إيه ؟. هم طلعوا ؟ أم عبده

: إيه هم دول ؟ قر قر : اللي ما يتسموش . أم عيده : لا ، ده هو اللي طلع . قر قر : هو مين ؟ أم عيده : اللي يتسمى ، الشيخ عجايب . كبير محتالي القطر . قر قر : طلعليه ؟ أم عبده : عاد إلى قواعده ، في السطوح. قر قر : يعنى إيه ؟ مش فاهمه ؟ أم عبده : ﴿ ضَاحِكًا فِي سَخْرِيةً ﴾ ودي عايزه فهم ، عاد إلى قواعده .. يعنبي نوح انسحب . عقب هزيمه منكره ، ارتد بعد خسائر جمه . برضه ما نتيش فاهنه ، بالعربي زاغ بعد ما نقحوه علقه جابت داغه . : هم مين دول ؟ أم عبده : اللي ما يتسموش. قرقر : ضربوه ؟ يوه ، يا مغيث ، يا ساتر يارب والعمل إيه ؟ اذا كان هو أم عيده ما اقدرش عليهم مين حا يقدر عليهم ؟ وانت يا راجل ، قاعدُ ساكت كده ا؟ : أنا مبسوط كده ، أنا مع العفاريت ، نموت وحيا العفساريت نوح (يمسك العود ويغني) يا غائبا عن عيوني ، وساكنا في شوالي . أم عبده : هوا انت فيك فايده .. وبعدين يا قرقر ؟! إيه العمل ؟! : إيه العمل ؟ (مفكرا) إيه العمل .. أقول لك يا ستى خليها على قرقر الله : أخليها على الله ؟! دا اللي قدرت عليه ؟ أم عبده : أيوه خليها على الله هوا في حد بيدبرها غيره خليها على الله ، وعلى . قرقر : عليك انت ؟ أم عبده

: أيوه على انا .. انا حا أعرف ازاى اطلعهم لك .

قر قر

: انت حا تطلعهم ؟! ما بقاش اللي انت يا سي قرقر . أم عبده : يا ستى يوضع سره في أضعف خلقه .. جربي انتى حا يخس عليكي قرقر حاجه ؟ : طب بس انبط .. تعالى معايا نطلع نشوف الراجل جرا له إيه .. أم عبده يكن نقدر ننزله تاني. . : ما فيش فايده يا ست .. دى العلقه اللي خدها ، مش حا تخليه يرجع قرقر هنا أبدا ، دى نوك أوت . أم عباره : يادى النصيبه ، وبعدين ؟ : قلتلك جربيني .. مش عاجبك .. أعمل لك ايه ؟ جربيني يا ستى قرقر انت حا يخس عليكي حاجه ؟ (يزوم محمود من داخل الشوال) . : آه .. آه ياني .. أهم ابتدوا . أم عبده : قلتلك خليني اجرب .. ما نتش راضيه . قر قر أم عبده : طب جرب .. جرب .. زى ما انت عايز . : أيوه .. كده الكلام .. اتفضلي انت بقي من غير مطرود خليني قر قر اشوف شغلي . : (وهي تهم بالحروج) أبعت لك شوية دره عويجه ؟ آم عبده : عويجه إيه يا ست .. أنا حا طلع عفاريت مش كتاكيت . قر قر : أمال ابعت لك ايه ؟ أم عبده : تبعتي إيه ؟! إيه ...؟ قرقر (محمود يزوم) . : أيوه افتكرت ، ابعتي حتة جبنه حلوم .. على طبق فول بالزبده .. قر قر على السبع بيضات اللي كنت حا تبعتيهم للشيخ عجايب المهزوم ، وما فيش مانع تبعتي حتة القشطه وشوية عسل النحل اللي كان حايتسممهم .

: ليه دا كله ؟	م عبده
: مش حاطلع عفـاريت ، يمكـن يطلعـوا جعـانين ابقـي اخــليهم	فوقو
ياكلونى ؟ والا اسيبهم في البيت يخربوه ويلهفوا اللي فيه ؟ مش	
برضه الاستحراص أحسن ؟!	
: برضك أحسن ، حالا حابعت لك اللي انت عايزه هي جت على	م عبده
كام بيضه أهو بجملة .	
· (تخرج أم عبده) .	
: وانت یا نوح افندی مش تنفضل شویه . عــلشان نشوف	قرقو
شغلنا .	
: شغلك ؟! انت كمان ناوى تطلع عفاريت ؟.	نوح
: دانا حاطلع أبوهم ، دول ما يعصونيش أبـدا ، إشاره واحــده	ئے فرقر
تطلعهم .	
: طيب ماتيالله تورينا الشطاره كده .	نوح
: بس لازم أكون لوحدي .	قرقر
: بقى كده انت اتعلمت شغل النصب ، انا مش حاسيب	نوح
الأُوده لازم اشوفك وانت بتطُّلعهم .	C
: ليه بس يا سي نوح افندي . ليه تلخبط لنا الشغل .	قرقر
: ما فیش فایده لازم اشوفهم یعنی لازم اشوفهم .	نوح
: حد في الدنيا يشوف العفاريت ؟	ے قرقر
: كيفي كده . أحبهم ، أنا حاسس ان انا حلاق فيهم حاجه حلوه .	نوح
: لا من الناحيه دى . اطمن جدا ، ما فيش فيهم حاجه حلوه أبدا	<u> </u>
دول دكرين ، زى الحنشات ، الله لا يوريك .	
: برضك حا شوفهم .	نوح
: يادى الواقعه السوده يا سيدى قوم الله لا يسيئك ما تعطلش	ے قرقر
شغلنا ، قوم لحسن بعدين يعملـوا فيك اللي عملوه في الشيسخ	

عجايب .

نوح : ولو .. برضه حاقعد . قرقر : (بعد أن نفد صبره) لا ، الظاهر الحكايه ما فيهاش فايده أبدا (لنفسه) ما فيش طريقه غير اني اقول له الحقيقه ويا طابت يا اتنين عور (لنوح) بقى اسمع يا سي نوح افندى .. انا مش حا حبى عليك .. أنا حاقول لك على كل حاجة ، باختصار القول ..

الحكايه وما فيها ، إن اللي في الشوالات دول مش عفاريت .

نوخ : أمال يبقوا ايه ؟

قرقر: بني آدمين ؟

قر قر

نوح

نوح : بنى آدمين ؟ اللى هبدوا الراجل العلقه دى كانوا بنى آدمين ؟ يا سلام عليهم .. أحبهم .. لا يمنى عليهم ، علشان ابوسهم مسن عنيهم .. هم فين طلعهم لى (يقذف بالعود وينهض مقتربا من الشوالات) .

: طب بس اصبر ما تزعقش كده ، علشان افهمك بقية الشغلانه .

: مش عايز أفهم .. أنا عايز اسلم عليهم وأهنيهم واحضنهم (يهجم على شوال آخر غير الذى به محمود وسيد ويحتضنه) اهنيك ..

اهنيك من كل قلبى ، يا سلام ، أد إيه انت فشيت غليلى ، أما مقص اللى نتشتهوله .. مش بتاع بنى آدمين ، مقص عفاريتى حقيقى ..

إنت خليتنى اتمنى انك تكون بنى آدم علشان اضمك للجمعيه ..

لسه كنت بقول لقرقر ، لو منكم اتنين فى جمعية قتل الزوجات لسه كنت سويت بيكو الهوايل ، إيدك لما أهنيك مبروك (يفك الشوال ويمد يده فيجد به عدس جميه فتبدو عليه الحيبه) إيه ده ؟! إيه ده يا

قرقر : جبه ؟! وجابها منين الجبه دي ؟ ده ما كانش لابس جبه أبدا يمكن لبسها جوه . على العموم معلهش .

واديا قرقر ؟ ده بحيه ؟!

: معلهش ازاي ؟ بقول لك بجبه ؟ يعني لا يعرف يشنكل و لا يضرب نوح مقصات. : ليه بس .. تفتكر يعني ان الجبه حاتجوشه ، على العموم لو حاشته قر قر نيقى نقلعها له. : هوا إيه اللي نقلعها له .. ونلبسها له .. ده عدس بجبه . نوح : عدس إيه ؟! وريني كده (يحد يده) يا سيدى خضتني انت قر قر غلطت في الشوال .. أنا راخر بقوله ماله قاعد ساكت كده .. لا بيهرش ولا بيصرخ ، أصلهم اتنين .. واحد بيهرش علشان حاجه بتاكله والتاني بيصرخ من الجوع. (محموديصرخ). : حالاً .. دقيقه واحده ، لغاية ما يجيبوا الأكل ، أكله على كيفك قر قر عمرك مادقت زيها .. كانت من نصيب الشيخ عجايب .. أهي دى اللي بيقولوا عليها تكون في بقك وتقسم لغيرك. : يا الله يا أخى طلعهم بسرعه علشان نعقد الاجتماع. نوح : اجتماع إيه ؟. قر قر : الجمعيه .. هم مش حا ينضموا ؟. نوح : أيوه حاينضموا .. بس مش كده خبط لزق . ما يصحش تاخدهم قرقر كده على مشمهم. : يعنى إيه مش خبط لزق ؟! الحكايه مستعجله ، ولازم نشوف نوح شغلنا ، ونعقد اجتماع عاجل سريع .. علشان نبت في أمر أم عبده ونتخذ ضدها إجراء حاسم ، والا يعني عاجبك الشبابيك اللي مسنكراها دي ؟!. : لا .. لا ، عاجبانی ازای .. بس انت عندك فكره عن شخصية قرقر العضوين دول .. يعني تعرف هم يبقوا مين ؟!. : مش عايز اعرف .. اللي أعرفه عنهم كفايه جدا ، كفايه انهم رقعوا نوح عجايب الكلب الهدرين اللي خدهم . كفايه مهارتهم في فسن الشنكله ، والمقصات .. كفايه .. : مفهوم .. مفهوم .. بس انا عايز اقول لك .. ان ظهورهم هنا قر قر مستحيل. : ليه ؟. نوح : لأن البيت ده محظور عليهم .. ده يعتبر منطقه محرمه عليهم . قر قر : علشان إيه ؟. نوح : لأن دمهم مباح فيها . قرقر : مين أباحه ؟. نوح : عدوك اللدود .. الست أم عبده . قرقر : وليه ؟ مالها ومالهم ؟ تطاردهم ليه ؟ وتبيح دمهم ليه ؟ هــى نوح متجوزاهم ؟. : متجوزاهم ازاي يا سيدي .. بقول لك ام عبده مرات حضرتك ، قرقر تقول لي متجوزاهم ؟. : أصلك مخولتني ، لأني مش فاكر انها بتبيح دم حد غير جوزها ، نوح مش فاكر ان الخصومه المستحكمه دى تنشأ بينها وبين حد إلا اذا كانت بينهم صلة جواز ، طيب إذا ما كانتش متجوزاهم تبقى مالها ومالهم ، لها عندهم ايه ؟.

قرقر : أجرة الأوده .

نوح : آه .. بقى قولتلى .. يعنى هم دول الجماعه اللي كانوا ساكنين فوق ، والى استولت على عفشهم ؟.

قرقر : أيوه ، أهم هم ، استولت عليهم ضمن العفش .

نوح : وإيه اللي زنقهم الزنقه السوده دى ؟.

قرقر : طبت عليهم ما عرفوش يروحوا فين وكانوا متعودين ينزلوا على المواسير ، لكن حضرتك كنت واقف في البلكونه اللي تطل علي

المواسير فخافوا منك وملاقوش حته يستخبوا فيها غير الشوالات .	
: قلت لي ، طيب يا الله ، اطلق سراحهم حالا .	وح
: بس اصبر شويه ، لغاية ما البت عديله تجيب الأكل ، وبعدين نقفل	رے فرقر
البـاب ونطلعهـم ياكلـوا لقمـه ، والا ياخـدوا الأكل معاهـــم	3 3
ويزوغوا .	
: والاجتماع ؟.	نوح
: تبقوا تتفقوا عليه بعدين .	رے قرقر
(تدُّخل عُديله وهي تحمل الصينية وعليها الفطار) .	7.5
: الأكل اهه .	عديله
ت : حطيه على الترابيزه .	قرقر
: أمال فين الشيخ عجايب ؟.	عربر عديلة
: تعیشی انتی ،	قرقر
: يعنى إيه ؟ جراله حاجه ؟.	عربر عديلة
: العفاريت جابوا له الكافيه . طيروه على فوق .	قر قر
: أمال الأكل دا لمين ؟.	عربر عديلة
: للعفاريت .	عديد قر قر
. تعمريت . : العفاريت بياكلوا عسل وقشطه ؟.	قرقر عديلة
: ما ياكلوش ليه عفاريت ذواتي مش واخدين على التقشف .	قرقر
: بقى كده ؟.	عرور عديلة
: كده والامش كده ، انتي حا تفتحي له محضر سيبي الأكل واطلعي	-
بره خليه يشوف شغله ، هوا حا يطلعك والا حا يطلع العفاريت .	نوح
بره حليه يستوف منعه ، سو. ف يستنف رق و يستنف و . : هو اللي حا يطلع العفاريت ؟ ياخي عفاريت لما بنططوه .	71. 1 a
. همو ابني خا يطلع العصاريت ؛ ياسي طفاريت له بلمستود . (تخرج عديله ويغلق قرقر الباب خلفها) .	عديلة
(حرج ماید ریس تر تر ۱۹۰۰ سه) .	

: يَا الله يَاعِم .. يَا الله قوام ، افرج عنهم حالا ، خليهم يشموا نسيم

الحريه ، وخليني اشد على إيديهم وأهنيهم بعضوية الجمعية .

نوح

قرقر: حاضر .. حافكهم اهه .. بس خد بالك من الباب كويس . نوح ; ما تخافش ، انا حا اسنده بضهرى ، ما فيش حد حا يقدر يخش أبدا ، أنا باعتبر نفسى مسئول عن حياتهم .. دول أعضاء جمعيتى ، دول سندى ، يا الله بقى طلعهم .

المشهد السادس

(يسند نوح الباب الموصل إلى بقية الغرف بظهره) . (يسرع قرقر فيفك الشوال الذى به محمود فيقفز إلى صينية الأكل و يأخذ في التهامه) .

محمود : لو صبرت على دقيقه واحده ، كنت مت من الجوع .. أما حتة صينية يا سلام سلم ، أنا مش عارف آكل إيه واسيب ايه ، أنا قتيل العسل النحل ده .

(يتجه قرقر إلى شوال سيد ويفكه قيخرج سيد وهو يهرش) .

سید : یا سلام یا هوه ، أنا أول حاجه حا انادی بیها هی المطالبه بالحریه الخامسه ، ربنا ما یحرمش حدمنها .

نوح : إيه هي دي الحريه الخامسه ؟.

سيد : حرية الهرش يا أستاذ ، ربنا ما يحرمك منها أبدا .. إنت مجربتش لم تكون حاجه بتقرصك ونفسك تهرش وما نتاش قادر ؟.

نوح : لاوالله ما جربتهاش .

سيد : يعني ما فيش حاجه قرصتك أبدا ؟.

نوح : لا ، بس عمرى ما قدرتش اهرش ، أنا جايب عصايه مخصوص للهرش ، دى يمكن الحريه الوحيده اللي با اتمتع بيها في البيت حرية الهرش ، أما باقى الحريات فممنوعه لا حرية كلام ، ولا حرية غنا ، ولا حرية بصبصه ، ولا حرية وساخه ، ولا حريه لخبطه .. الله لا

	يوريك على العموم دا كله حا نحققه ان شاء الله بالجمعيــه
	يتاعتنا . بس دلوقتي تعالى كل لك لقمه على ما قسم .
	(يتجه سيد إلى الصينية ويأخذ في الأكل) .
نوح	: ما تآخذوناش يا جماعه في الأكل الطياري اللي ع الواقف ده لكن
	نعمل إيه في سي قرقر ، ما دام عملكوا عفاريت .
	(يبتعد من أمام الباب قليلا) .
قرقر	: إوعى الباب ، إوعى ، لحسن القضا المستعجل يطب ويكشف
	الحكايه ، ونروح كلنا في شربة ميه .
محمود	: القضا المستعجل ؟ يا باي ، أنا حازور .
سيد	: أحسن حاجه نعمل ساندويتشات ونا خدها في جيوبنا .
نوح	: ما تخافوش ، أنا سادد الباب كويس ما حدش حا يستجري يخش ،
	كلوا على مهلكم ، علشان بعد كده نقدر نعقد الاجتماع على
	راحتنا .
قرقر	: اجتماع إيه ؟! مش وقته دلوقت ، يا الله يا جماعه اعملوا كل واحد
	ساندوتش ، وزوغوا دلوقت ، ما حدش عارف الظروف بعد كده
	إيه .
نوح	: والجمعيه ؟.
سيد	: ﴿ وَهُو يَحْشُو رَغْيِفُهُ ﴾ نتفق عليها بعدين .
نوح	: بعدين ازاى ؟! المسأله مستعجله خالص .
محمود	: طيب ممكن نتفق دلوقت على حته نتقابل فيها أصل هنا منطقة
	خطر خطر جدا .
قرقر	: أيوه خطر علينا كلنا ، دى لو طبت علينا مش حاتسيبنا الا قتلي .
نوح	: طيب نتقابل فين ؟.
قر قر	: اتقابلوا النهارده بعد الضهر في القهوه اللي على ناصية الشارع .
نوح	: بعد الضهر كتير ، احنا عايزين نشوف شغلنا .

محمود : طيب تخليها الضهر والا الصبح زي ما انت عايز ، بس اظن دلوقت نخرج قبل ما حد يقفشنا !.

قرقر : أيوه .. يا الله زوغوا بسرعه ، وانا حاخبى الشوالات الفاضية ، وانا وانعكش الأوده .. قال يعنى حصلت بيننا خناقه جامده ، وانا انتصرت عليكم .

لا يكادان يهمان بالخروج حتى يفتح الباب المؤدى إلى السلم
 وتندفع منه زكيه ولعه) .

المشهد السابع

نوح : (صارحا فى فزع) زكيه ؟ إيه اللى جابك هنا دلوقت يا زكيه ؟ . محمود : الله !! زكيه !!. عمود : أيوه زكيه ، مالكم بتبصول كده زى اما يكون التقيتوا عفريت ؟.

قرقر : والله العفريت أهون ، أنا لسه دلوقت مطلع عفريتين بشويسة عسل . . لكن انت اطلعك بايه . . إيه اللي جابك يا ست زكيه ؟ .

زكية : اسكت انت انسد يابوز الإخص .

قرقر : حاضر ، انسدیت ، حاسکت خالص ، وانا بقی عندی حاجه ...

کل اللی عندی خلاص قلته .. لغایة ما طلعت العفریتین دول ، لکن

انت بقی ما اظنش فیه فایده منك ، ما کنتش عامل حسابی علیکی

أبدا ، أنا أحسن حاجه اقعد كده واتفرج عی اللی حا يجرى ،

اتفضلی یا ست كبریته .

زكية : ولعه يا روح امك .

قرقر : ولعه ، كبريته ، أهو كله محصل بعضه ، أهمى حاجـه تسلسع وخلاص .

زكية : قلت لك ولعه يعنى ولعه .. يعنى مشعوطه .. بت تلعب بالبيضه (أم رتيبة)

والحجر. : أنا مالي يا سيدتي العبي باللي تلعبي بيه ، أهم كلهم قدامك ، بيض قر قر على حجاره ، العيى زى ما انتى عايزه .. بس خدى بالك بقى يا ست ولعه .. ان فيه ورا الباب ده .. عاصفه .. اسمها ام عبده .. تاخد في وشها ميت ولعه. : وانا مالي يا عمر ، بتخوفني والا إيه ؟! انا ما كلش م الكلام ده . ز کیه : أنا مالي تاكلي ولا ما تكليش ، أنا حبيت بس أعمل اللي عليه ، قر قر ودلوقت عن إذنكم ، أكل لقمه ، على الأقل لما يجرى لي حاجه أبقى ميت شبعان ، حضرتهم يا ست ولعه .. الأستاذ نوح ، والأستاذ محمود والأستاذ سيد . : عارفاهم يا روح ستك . ز كية : يعنى اطلع منها خالص .. حاضر .. حاضر .. اتفضلوا . قر قر : الظاهر ان اليوم ده مش حا يفوت على خير أبدا .. أنا بافكر آخد محمود الرغيف بتاعي وادخل الشوال تاني ، هي حقيقي القعـده مش مريحه ، لكن آهي مأمونه ، بعيد عن الخطر .. والشوال اللي تعرفه أحسن م اللي ما تعرفوش . (يهم محمود بالدخول في الشوال) . : رایح فین یا سی محمود افندی ، اطلع لی بره یا خویا ، أنا لیه عندك ز کیة حساب . : ما تزعقيش كده يا ست زكيه الله لا يسيئك وطي صوتك شويه ، نوح قولي لي بس إيه اللي جابك هنا ؟. : (تكشف عن ساقها) رجليه يا حبيبي ، وحشين ؟! ز کیة : هم من جهة الحلاوه حلوين ، بس يعني جابوكي هنا ليه ؟. سيد : جابونی لیه ؟ علشان اصفی حسابی معاکم ، علشان اشوف لی ز کیة

طريقه ، علشان أرسى لي على بر .

: طیب انت مش جابه لنوح افندی ؟ عن إذنك احنا .	محمود
: اقعد هنا ، انا جايه لكم انتوا لاتنين ، لازم تشوفوا لي خلاص ،	- زكي ة
انتوا فاكرينها إيه ؟! سايبه ، فوضى ؟!.	
: طيب يا زكيه ياختي ، الخلاص ده ممكن نشوفه في أي حته تانيه	نوح
الحكايه ما اظنهاش مستعجله أوى كده وانتي عارفه ان خالتك أم	C
عبده لو دریت	
: حا تعمل إيه يا ادلعدى ، أنا عايزاها تدرى ، لازم اجيبها على	زكية
بلاطه مَا فيش فايده غير كده ، هو كل الطير اللي يتأكل لحمه	
كل ما اجيلكوا من هنا تجوني من هنا الحمد لله اللي قفشتكم هنا	
مع بعض ، علشان نرسي لنا على حل .	
: حل في إيه بس يا ست زكيه ، هوا دا وقته ؟.	سيد
: اسكت انت واتلم بلسانك ما تداخلش في اللي مالكش فيه (توجه	زكية
الحديث إلى نوح) هه قلت إيه ؟.	
: في إيه بس يا زكيه ؟.	نوح
: ما نتاش عارف في إيه ، في اللي في بطني يا عومر .	زكية
: اللي في بطنك ؟! ماله ؟!.	نوح
: عايزه له أب يا حبيبي عايزه له والديا سيدنا لفندي .	زكية
: عايزه له إيه ؟!.	محمود
: أب ، أب ، مش فاهم يعني إيه أب ، زى أبوك ، وأبو أبوك .	زكية
: أيوه أيوه فاهم بس وطي صوتك .	محمود
: ومستعجله قوى ، على أبو لسلامته ، ليه ؟!.	نوح
: مستعجله ليه ١٤.	زكية
: أيوَه حقيقي ، يعني مشٍ كان يبقى أحسن لو تسيبيه لغاية ما ينزل	محمود.
ويكبر ويميز ، ويختار الأب اللي يعجبه ؟!.	
: روهو عضيغ الطعام) أي والله فكره ، أنا شخصيا ، لو خيروني ما	3.3

كنتش اخترت ابويه دا أبدا ، كان شحات ابن شحات ، وكان شكله وحش قوى ومورى أمى الويل . لكن اعمل ايه ، طلعت لقيته الله يرحمه أبويه ، وما قدرتش اقول لهم غيروه ، لكن والله لو كان بإيدى كنت مؤكد نقيت واحدتاني .

نوح : مضبوط . لك حق ، أهى دى حريه جديده م الحريات اللي حا تطالب بيها الجمعية . حرية اختيار الآباء .

زكية : بتقولوا إيه ؟ حرية اختيار الآباء ؟ يا اخى بو لما يشتحك منك له . آل يختار الأب اللى هوا عايزه آل ، خش فى عبى يا خويا خش . استكردنى يا خويا استكرد ، ما انتم أصلكم فاكرينى هفيه ، لا ، أنا ما باكلش من الكلام ده . لازم اشوف له أب حالا .

محمود : ليه بس يا زكيه يا اختى ؟ ليه العند ده ؟ دا مش وقته أبدا ، خلينا بعدين ندبر المسألة سواعلي رواقه .

زکیة : ماکانش یتعز یا حبیبی ، غالی والطلب رخیص یا روحی ، آل علی رواقه آل ، یا ریت کان ممکن یا سی حوده .

نوح : هوا إيه أصله ده ؟!.

زكية : ما انتش عارف أصله إيه ؟! حا نعيده تاني أصل انا عايزه أب للواد اللي جي بعد كام شهر ، عرفت بقي أصله إيه ؟. أصل انا مش عايزاه ينزل يلاقى نفسه يا ضنايا ، من غير أب ، يعني ابن حرام ، فهمت يا روحى ، والا افهمك كان ؟! يعني بالعربي واحد منكم لارم يتجوزني حالا .

سيد : حالا ؟!.

زكية : أيوه حالا ، حالا ، يعنى يطلع معايا من هنا على المأذون ، رجلي ، على رجله ، قلتم إيه بقى ؟.

نوح : يا سئسي زكيسه ، الحكايسه ما تجيش كسده .

زكية : خلاص انتهينا ، كلمه واحده ، أنا مش حادوخ نفسي وراكم بعد

كده ، لازم اطلع من هنا بعريس . فاهمين و الالأ ؟. : إيه هوا دا ؟ هي الحكايه ، عافيه ؟. نوح : عافيه ؟. بقى كده ؟! طيب انا حا اوريك العافيه تبقى ازاى (توقع ز کية بالصوت) يوه . : (قافزا من مكانه في فزع) يا نهار اسود ، انا في عرضك يا ست قرقر زكيه يا اختى ، أنا مفهم الست ام عبده ان العفرتين اللي حاطلعهم لاتنين دكره ، ما كانش عندى فكره أبدا انك حا تشر في هنا كنت عملت مقدمه وقلت لها ان معاهم نتایه ، اعملي معروف وطي صوتك لحسن تطب علينا تجيب أجلنا ، يا الله يا جماعه ، خلصونا شوفوا لناحل قوام. : حل از ای بقی ؟. نو ح : ما نتاش عارف حل ازاي . حبا نعيده تباني ، واحمد منكسم ز کیة يتجوزنى . : أيه ه ، واحد منكم يتجوزها ، ما فيش غير كده . قرقر : أنا ما اقدرش ، ما اقدرش أبدا . دى ام عبده ، كانت تعلق لى نوح المشنقه في وسط ميدان السيده ، دى كانت تاكلني ، اتجوزها انت ياسي محمود ، انت فاضي ، وعلى كيفك . : أنا ؟! أنا اتجوزها ؟! ده برضه معقول ؟! أتجوزها وانا مش لاقى محمود آكل ، أتجوزها وأنا لسه تلميذ ، واروح لهم في البلد بدل ما يكون في إيدى شهاده يكون في إيدى زكيه ولعه ! وياريت زكيه ولعه وبس ، الا وعلى كتفها كان ولد !! ما شاء الله ، دول كانــوا يخنقوني ، لا يا عم ، أنا مالياش في الجوازه دي أبدا ، أنت راجل مقتدر مبسوط ، و كان قدامك في حساب الشرع ، تلاته (إلى زكيه) خلاص يا ست زكيه ، نوح افندى حا يتجوزك ، اتجوزها

یا نوح افندی .

: ما يمكنش ، ما اقدرش ، حرام عليكم يا جماعه .	وح
: ﴿ فِي مَلَلُ ﴾ يا الله بقى خلصونى ، أنا مش فاضيه لكم .	کية کية
: أحسن حاجه ، نعمل قرعه .	- ئوقر
: اعملوا اللي انتوا عايزينه ، بس خلصوني قوام ، شوفوا لي جوز	رکیة
حالاً ، حالاً دلوقت ، فاهمين والالاً .	
(يسمع صوت اَم عبده من الحارج) .	
: خولاص يا قرقر ؟!.	م عبده
(يحدث هرج ومرج ويهم محمود وسيد بالفرار ، فتقف زكيه في	. 1
طريقهما) .	,
ريني . : خليك عندك منك له لحسن ازقع بالصوت .	زكية .
: (مجيباً أم عبده) اصبري على يا ست شويه ، لحسن دول	ر . قرقر
مُعصَلَجِينَ قُوى ، (إِلَى مُعمودُ ونوحٍ وسيدً) يَا الله يَا جماعه	, ,
شوفوا لنا حل بسرعه ، حد منكم يقول لها انه حا يتجوزها ،	
وخلونا ننتهى .	
: يقول كي إيه يا عمر ؟! هو انا باكل من الكلام ده يخرج من هنا	زكية
على المأذون إيده في إيدى هي الحكايه سابيه والا إيه ؟.	- 3
: (يرتمي على الأريكة في يأس) لا الظاهر ان أجلي قرب يا	نوح
خسارة الجمعيه يا خسارة المشروع يا خسارتك يا نوح	بِي
افندی .	
: (يمسك الشوال محاولا إدخال نفسه فيه) أنا يا عم حا ادخل جوه	محمود
الشوال تاني ، ومشحا اطلع منه أبدا .	,
: بقى ده اسمه كلام ؟! يعنى عايزين ام عبده تيجي تموتني انا ؟! يعنى	قرقر .
هي المسأله مالهاش حل ؟! ما فيش حد عايز يضحي ؟.	33
: (بعد تفكير) أقول لكم . أنا حا اضحى . حا اضحى لكن مش	سيد
عُلشان خاطر كم أو خاطر ام عبده ، انا حا اضحى علشان خاطر	•
1 1 -	

مخلوقه واحده .. عارف انها حاتتاً لم لو واحد منكم اتجوز زكيه .. حا اضحى علشان خاطر واحده حا تتصدم لما تلاقى ابوها اتجوز على أمها فى آخر العمر ، وحا تتصدم أكتر لو تعرف ان البنى آدم اللى فاكراه مثل أعلى اتجوز الست زكيه ولعه ، وبقى أب لابن مجهول الأب .. أنا حا تجوزك يا ست زكيه .. وأمرى الله لأن ما فيش حد حاسس بيه ولا حايز عل عليه .

زكية : (في ذهول) انت بتتكلم جد ؟! والا عايز تلفني .. خد بالك كويس انا ما ينضحكش على أبدا .

سيد : أنا ما اعرفش الف .. كل اللي انتى عايزاه حا اعملهولك .. يالله بينا يا جماعه .

(يهمون بالخروج عندما يسمع صوت الشيخ عجايب من وراء باب السلم) .

عجايب : وله يا قرقر .. ما طلعتليش الفطار ليه ؟! انت عايزنى أموت من الجوع .. مش كفايه اللي جرالي .

قرقر : يادى الوقعه السوده .. نعمل إيه دلوقت ؟! حا تخرجوا منين (إلى عجايب) طيب يا سيدنا الشيخ اطلع دلوقت وانا اجيب لك الصينيه .

عجايب : (من الخارج) مش طالع الا لما تديها إلى دلوقت .

قرقر : أعمل إيه في ابن الأروبه ده !! هاتوا يا جماعه الأكل اللي معاكم .. (يحاول جمع الأكل وإخراجه من الأرغفة وإعادته إلى الصينية عندما يسمع صوت أم عبده من وراء الباب الآخر) .

أم عبده : واديا قرقر .. انت حا تضيع اليوم عندك والا إيه ؟.

نوح : خلاص ما فيش فايده رحنا فى داهيه .. الحصار تم من جميع الجهات . وقعنا واللى كان كان . جالك الموت يا تارك الصلاه أشهد أن لا إله إلا الله .

(يقفز قرقر من مكانه وينزع أغطيه الأرائك فيضعها فوق محمود وسيد وزكيه .. ويعطى لكل من محمود وسيد رق .. وزكيه طبلة) .

قرقر : اسمعوا یا جماعه دی آخر محاوله .. دی آخر حاجه نقدر ننفد بیها . بعمرنا .. یا تخیل علیهم یا نروح فی داهیه .. أنا حافتح لكم الباب وانتو .. تخرجوا علی بره جری و كل واحد منكم یدق باللی فی ایده قوی ویفقر .. وانت یا نوح افندی امسك العود بتاعك ، وتنتن لهم .. فاهمین ؟.

(تفتح أم عبده الباب فتذهل كما تراه).

أم عبده : (صارخة) يا حفيظ .. يا مغيث .. دول إيه دول يا واد يـــا قرقر ؟!.

(يبدأ الدق ويندفع الطابور وهو يترنح إلى الخارج) .

نوح : (وهو يعزف على العود) :

ترللي . . ترللي . . ترللي . . ترللي .

محمود : (منشدا) أنا الولى . . أنا الولى .

سيد : (منشدا) وانا ابن عمه الشيخ على .

زكية : (منشدة) وانا اللي بزف الصالحين .

(یفتح قرقر الباب أمام الموکب .. بینها هم یرددون الأنشودة مرارا) . (عجایب لایکاد یری الموکب حتی یصرخ فزعا ویفر هاربا) .

(يسدل الستار)

الفصل الثالث

(المنظر: بعد سنة والوقت قبيل العشاء في ليلة صيف صالة في الشقة العليا المنزل أم عبده التي استأجرها سيد و محمود في الواجهة باب يؤدي إلى شرفة بها بعض قصارى زرع وفي اليمين بابان أحدهما يؤدى إلى شرفة المياه والثاني إلى السلم اليمين بابان أحدهما يؤدى إلى خوفة النوم اوشباك يطل على منور وقد وضعت عليه صينية قلل في الركن اليمين البعيد أريكة استامبولي وفي الركس السلال البعيد بسعض السلال والشوالات في الوكن اليمين القريب بوفيه وفي الركن اليسار القريب في الركن اليسار القريب المنضدة القديمة وعليها كتب وأوراق والمرآة المشروخة وبجوارها غابة أشبه بسنارة الصيد في آخر الدوبارة التي بها مشبك غسيل بيدو سيد جالسا أمام المنضدة وقد أتم كتابة مشبك غسيل بيدو سيد جالسا أمام المنضدة وقد أتم كتابة وبدا في تلاوتها لنفسه).

المشهد الأول

: (يقرأ):

و أكتب إليك يا ساحرة وأنت منى على قيد خطوات ، أكاد لو أنصت أسمع هبة أنفاسك وخفقة قلبك .. أكتب إليك لأنى أشعر عند الكتابة بما يشبه متعة اللقاء ، وأحس أنى أنقل إليك ذوب نفسى وخلاصة روحى ، وأكاد أتوهم وأنت تقرئين ما أكتب أنى طاو ف الصفحات قابع بين السطور ، وأنى أمتع العين بسحر عينيك وأدفئ

الروح بحر أنفاسك .

إنى أحسك يا ساحرة فى كل ما أحس .. أحس بك فى كل زهرة ندية وروضة بهية ، وطير شاد ونجم هاد ، وعطر زكى ولحن شجى . أنت معى دائما .. فى كل صحوة وغفوة .. أنت معى غائبة أو حاضرة ، واصلة أو هاجرة .. أنت باقية فى روحى وفى ذهنى وفى قلبى .. بقاء الروح والذهن والقلب » .

المخلص محمود

(يطوى الرسالة ثم يشبكها بمشبك غسيل المربوط فى السنارة وتحين منه التفاتة إلى شكله فى المرآة فتخرج منه تنهيدة مريرة ساخرة ويحدث نفسه) .

ز لنفسه في المرآة) وآخرتها ؟ وايش بعد دا كله ؟! إيه آخرة الهوى المتنكر ، والحب المقنع ده .. انت .. بخلقتك دى ، وبكيانك ده .. مفيش فايده منك مش حا تحبك مش حاسه بيك ، ولا حا تحس بيك أبدا .. خلقتك كده !! تعمل إيه ؟ طب ما انا عارف انها مش حا تحبنى ، أنا يائس جدا من حبها ، أنا ما بعملش كده علشان تحبنى .. أنا بعمل كده علشان ما اخذ لهاش ، أنا عايز امنحها الأمل اللى انا فقدته ، واعتقد ان انا نجحت فى كده .. أنا عملت كل حاجه علشانها .. أنا كرست جهودى وحياتى كلها علشان اسعدها واحقق لها أملها .. أنا قبلت أضحى بنفسى وأتجوز زكيه ، علشان ما اصدمهاش فى محمود ، ولولا ربنا ستر ، والحكايه طلعت لا حمل ولا حاجه .. كان زمانى جوز ست زكيه ولعه ، وأبو ابن ربنا يعلم مين أبوه .. قبلت دا كله علشان خايف عليها لتناً لم ، وفضلت ورا الحيوان محمود الله من البارات والكباريهات وأذا كر له واسهر بيه اليالى لغاية ما خليته ينجح وياخد الليسانس ، وفضلت أجرى ليل مع نهار وانط من ديوان لديوان .. واجيب فى واسطه ورا

سيد

واسطه لغاية ما ربنا سهلها له و بقي موظف محترم . وقعدت أديق واقتصد واحرم نفسي لغاية ما بقالنا شقه محترمه نظيفه عليها القيمه بعدما كنا مش قادرين ندفع أجرة الأوده اللي فوق السطسوح وخرجتنا منها الوليه على ملا وشنا محبوسين في الشوالات ، وطول المده دي كلها عمال اهدى فيه واحاول ان اخليه يحبها واكتب لها في جوابات باسمه ، واناجيها بلسانه .. أناجيها بلسانه هو ، وبقلبي أنا .. دا المنفذ الوحيد .. اللي بنفس بيه عن مشاعري ، ويخرج فيه حبى ، ويتلقى منها الردود بتاعتها ، اللذيـذه الحلــوه الهايمه .. حقیقی ، مکتوبه له . . لکن بحس منها بعزاء کبیر ، بحس ان ولو انی مش مقصود بيها .. لكن بلاقي فيها الرد على جواباتي ، وعلى هيامي ، وعلى حبي .. أنا حاسس ان الشعور بتاعي مردود ، مش ضايع في الهواء .. هي حقيقي ما تحبش الشكل الظاهر ده (يشيع إلى نفسه في المرآة) ، ولها حق . . لكن منهيأ لي انها بتحب الحاجه المستخبيه .. بتحب القلب والشعور ، والروح ، و دا كله أبقى وأدوم وأحق ، (يطلق تنهيدة مويرة ساخوة) أهو كلام بنعزي بيه نفسنا ، أمال حنقول إيه لو ما كنش كده ، كان الواحد زمانه مات من اليأس .

(ينهض من مكانه ومعه الخطاب والسنارة والدوبارة ، ويتناول الناى من فوق البوفيه ثم يطفئ النور ويتجه إلى الشرفة . يقف بيها .. ويعزف برهة على الناى ، ثم يتقدم من حافتها على أطراف أصابعه ويقذف بالرسالة ممسكا بيده طرف السنارة) .

(فى هذه اللحظة يفتح الباب المؤدى إلى السلم بمفتاح من الخارج ويدخل محمود يحمل لفائف بها سندوتشات ومأكسولات وزجاجات بيره ويفتح النور ويضعها على الترابيزه ويرفع عقيرته بالغناء).

: ما كنش كده طبعك يا غزال ، والنبي انا مقدر على دى الحال . محمود (سيد يفزع خشية أن تفضح بهية الأمر ويحاول إسكاته بإشارات من يده ، ولكن محمود لا يشعر به ويستمر في الغناء ، فيترك السنارة مستندة على سور البلكون ويهرول إلى الداخل) . : هس .. الله يفضحك .. زى ما حتفضحنا ، هو دا وقت غنا ؟ سيد : (يفاجأ ويفزع) إيه ده ؟! انت طلعت منين نشفت دمي . محمود : هس ، وطي صوتك لحسن تسمعك .. تبقى فضيحه ، وتضيع سيد كل تعبنا هدر . اطفى النور لغاية ما تاخد الجواب ، والا يعنى لا منك و لا كفاية شرك. (محمو د يطفئ النور ثم يتسلل سيد إلى الشرفة ويمد يده فيسحب السنارة) . : (هامسا من داخل الحجرة) ها .. غمزت ؟ محمود : (يشير برأسه بالإجابة ثم يعود متسللا إلى داخل الحجرة) كنت سيد حا تودينا في شربة ميه ، مالك جي عيارك فالت قوى ، وداخل فار د قلوعك .. إيه حكايتك ؟ : (يضيعُ الحجرة) حكايتي انا ؟ والا حكايتك انت ؟ إيه الل قعدك محمود انت لغاية دلوقت . . انت مش قلت انك مسافر تجيب قرشين و مش راجع غير بكره بعد الظهر . : دا اللي كان مفروض . سيد : وبعدين ؟ محمود : ما جصلش قسمه .. الحكايه حصل فيها لخبطه واضطربت ألغي سيد السفر ، : (في انزعاج) تلغى السفر ؟ يعنى مش حا تسافر ؟ محمود : مالك بتصرخ كده !! انت مش لسه قابض ، ولا طيرت الماهيه زي سيد عوايدك ، على العموم بكره ربنا يفرجها ويرزقه من حيث لا

يحتسب ،

محمود : قوى . . أنا معاك خالص ، من جهة بيرزق من حيث لا يحتسب فبيرزق أوى . . بي بقى يرزقه بإيه ؟ عمرك ما تعرف بمصايب . . ببلاوى .

سيد : بلاوي إيه اللي رزقك بيها ؟

محمود : فيه أكتر من كده بلاوى ؟

سيد : ما تقوللي بس إيه هي البلاوي دي ؟

محمود : وجودك الليله دى .

سيد : وجودي أنا ؟

محمود : أيوه .. كان لازم تسافر .. أنا كنت عامل حسابي على إنك تسافر الليله دى .

سيد : و لما ما مافرتش حصل إيه ؟ قعدت على قلبك كتمت أنفاسك ؟

محمود : حاجه زی کده .

سيد : يعني إيه ؟

عمود : يعنى بالعربى أنا عارف زكيه هنا الليله دى .. عملت حساب انك مسافر ، وقلت بدل ما اروح اسهر بره أهو أجيب شوية الشرب والأكل ونقعد نمزمز هنا ، جيت انت بسلامتك حليت بى ، وقعدت فى البيت وخسرت لى كل الشغلانه ، تبقى دى بلاوى من حيث لا أحتسب ، والالأ ؟ إيه العمل ؟ مش تقوم تسافر احسن ؟ حيث لا أحتسب ، والالا ؟ إيه العمل ؟ مش تقوم تسافر احسن ؟ سيد : انت بتقول إيه ؟! انت اتجننت ؟ زكيه جيالك هنا فى الشقه عشان

تسهروا سوى ؟ دى آخر أنواع الفضايح اللى عايز تعملها ؟ عايز المجيران يقولوا علينا إيه ؟ انت مش حا تستريح الا لما تودينا فى داهيه . وبسلامتها جايدإمتى ؟

محمود : (ينظر إلى الساعة) أهو كان نص ساعه .

سيد : (في فزع) نص ساعه ؟ انت مجنون ؟ انت مش عارف بعد نص

ساعه مين حا يجيلك هنا .

مين ؟ عين ؟

سيد : مش فاكر قلتلك إيه النهارده الصبح ؟

محمود : لا .. مش فاكر .

سيد : مش فاكر الجواب اللي قريتهولك ساغة ما صحيت من النوم ؟

محمود : أبدا أبدا . . أنا لما باصحى من النوم باقعد بيجى نص ساعه فى حالة غيبوبة تامه . . أنا مش فاكر الجواب ، أنا مش فاكر ان انا شفتك النهارده الصبح خالص .

سيد : يانهارك أسود .

محمود: اسو دليه بس . ما تقول مين اللي حاييجي و تريحني .

سيد : بهيه ؟! افتكرت والالسه ناسي .

محمود : بهيه ؟ وإيه اللي حا يجيبها هنا ؟

سيد : يا محمود يا اخويا .. أعمل فيك إيه ، أكتر من إنى اقرا لك الجواب بتاعها .. وأكد عليك انك تستناها عشان حا تطلع تقابلك ، وأتر جاك انك تبقى لطيف معاها ، وانك توريها انك بتحبها ، وتخليك رقيق وما تقلش أدبك ولا تمد إيدك ، وتقول لها انك عايز تتجوزها ، وانك حا تخطيها من ابوها .

محمود : إيه !! انت قلت لي الكلام ده ؟

سيد : أيوه قلتهولك .. أنا قعدت نص ساعه ألقنك الدرس واحفضك حا تقول لها إيه .

محمود : بس . . هي النص ساعه دي اللي اكون في حالة غيبوبه فيها وقلتلك إيه ؟

سيد : قلت لي حاضر .. حاضر .

محمود : حاضر إيه ؟

سيد : حاضر حاتخطبها .

: لا .. دانا لازم كنت في ذهول تام . محمود : يعني إيه ؟ مش حا تخطبها ؟ سيد : أنا أخطب !. فال الله ولا فالك .. بقى انا سايك تكتب عنى محمود جوابات حب زي ما انت عايز ومديك توكيل تصفر وتغني بإسمي وقت ما تحب . . لكن لغاية الخطوبه . . وفرمل . . ستوب . : إيه ده ! إنت بجنون ؟ أقعد أتعب التعب ده كله .. وبعدين تقول لي سيد كده .. أقعد اربى فيك ، وانجحك واوظفك علشان خاطرها ، والآخر تيجي تخلابيه كده ، مش ممكن ، ما يمكنش أبدا . : إيه هو ده اللي مش ممكن ؟! أنا ما اخطبش ولا اتجوزش أبداً . محمود الشهاده بتاعتك خدها ، مش لازماني ، والوظيفه كمان ، أنا ما أبعش حريتي أبدا ، ولا بالدكتوراه . لا يا خال ، دا حتى حرام عليك . : يا محمود يا خويا ، يا حبيبي ، الله لا يسيئك ، خلينا نتكلم على سيد رواقه ... (يدق الجرس ... يفزع الاثنان ويرتبكان) . : ودى تبقى مين فيهم اللي جايه بدرى ؟ اسمع يا خال : محمو د إذا كانت بهيه ، أرجوك تقول لها ان انا مش هنا . : مش ممكن ، لازم تقابلها بأى طريقه ، مش ضرورى تخطبها ، قل لها كلمتين لطاف وخلاص . وبعدين يبقى يحلها ربنا ، أرجوك علشان خاطرى . : موافق .. بشرط . محمود : إيه هوه ؟ سيد : إنها تنزل بسرعه .

محمود

سيد

محمود

: حاضر .

: طب واذا كانت زكيه ؟

سيد : حا شيلهالك على راسى .. اللى انت عايزه أعمله أسافر لك لمدة شهر ، بس اوعى تزعل بهيه .

محمود : خلاص اتفقنا .

(يدق الجرس ثانية فيذهب سيد ليفتح الباب فيفاجماً بنسوح افتدى . . يدخل مندفعا وهو يحمل حقيبه) .

سيد : (فى **ذهول**) الله !! نوح افندى ؟!

المشهد الثاني

نوح : (وهو يضع الحقيبة على المنضدة) أسعد الله التماسي كيف الحال ؟ سيد : الحمد الله .

محمود : الذي لا يحمد على مكروه سواه .

نوح

نوح : (وهو يخرج أوراق ومنشورات) الليله دى عندنا شغل كتير .. خلاص ابتدينا الجد .. اقعدوا .

(سيد ومحمود يتبادلان نظرات الحيرة والتردد ويسترقان النظر إلى الباب في خوف) .

: (وهو يلبس نظارته ويأخذ في ترتيب الأوراق) الطلبات نازله علينا زى النظره .. المنشور الأول عمل مفعوله .. الظاهر ان الحال من بعضه .. ما فيش حد أبدا راضى عن حاله .. (يرفع بصره فيجد الاثنين مازالا يتبادلان نظرات الحيرة والارتباك) الله .. انتم واقفين ليه ؟! ما تقعدوا احنا ما عندناش وقت .. لازم نفحص كل الطلبات دى . ولازم نراجع قانون الجمعيه .. ونبتدى في تشكيل مجلس الإداره .. وتكوين الشعب .. دى كلها عايزه جهد كبير .. مجلس الإداره حا تكون جلسه تاريخيه كبرى .. إن شاء الله حا تغير وجه التاريخ .. وحا تكون أول خطوه في سبيل إعطاء الراجل كل

حقوقه وحرياته من براثن المرأة وتحريره من قيودها .. اقعدوا .

: لكن .. (يتنحنح) .

نوح : لكن إيه ؟! فيه حاجه ؟.

سيد

نو ح

نو ح

سيد : لا .. ولا حاجه .. بس قصدى اقول ان .. أنا شايف ان الوقت وخرى شويه .. و الدنيا ليَّلت .

نوح : ليَّلت ؟.. أمال عايزنا نعقد اجتماع في عز الضهر .. إيه ده يا أستاذ ده ؟! دى جمعيه سريه .. إنت عمرك ما اشتركت في جمعيات سريه ؟! الجمعيات دى ما تجتمعش الا في ستر الليل . تحت جنح الظلام .. ده عز وقت اجتماعها .. اقعدوا بلاش تضييع وقت .. يا الله خلينا نشوف شغلنا .

سيد : (ينظر إلى الباب في قلق) بس .. ما يمكنش نقدر نأجل ..

: (فى غضب) نأجل إيه ؟! هى لعب ، دى مصالح أزواج ، دى حياه أو موت ، المسألة خطيره جدا يا أستاذ ، إذا ما كناش نلحق نفسنا حا نروح فى شربة مية ، الوليه ام عبده ، خلاص فجرت ، بعد ما خلت الشيخ عجايب يستوطن فى الأوده اللى فوق ، وجوزته البنت عديله ، واستولت عليه ، وطول النهار يشبشب ويسحر ويعمل احجبه ، ويطلع فى عمايل ، خلاص فضى لما ، ما بقالوش شغله غيرنا ، هو وراه إيه ، آكل شارب نايم ، وأشيته رضا مع البت عديله ، يبقى وراه إيه غير خدمة ام عبده وأذيتنا لا ، لا ، الحكايه ما تستحملش التأجيل أبدا ، اقعدوا .

محمود ; اقعد بقى يا خال ، ما فيش فايده، الليله باينه من أولها .

﴿ يَجِلُسُ مُحْمُودُ وَسَيْدُ وَيَضِعُ نُوحٍ أَمَامُهُمَا بَعْضُ الْأُورَاقُ ﴾ .

: دلوقت نقدر نعقد الجلسه .. أنا حاتولى الرئاسه .. انت يا سيد افندى تتولى السكرتاريه .. وانت يا سي محمود .. عضو مجلس الإداره المنتدب .. (مفكرا) لكن بالطريقه دى مش حا يبقى فيه (أم رتيبة)

أعضاء .. لازم يكون فيه ولو عضو واحد .

(يدق الجرس فيقفز سيد من مكانه فزعا و يجرى نحو الباب ويقف وراءه برهه مترددا) .

نوح : (محاولا جمع أوراقه .. ناظرا إلى الباب فى حذر ومتسائلا فى صوت خفيض) انتوا مستنيين حد ؟!

محمود : لا .. أبدا .. ما فيش حد .. أبدا !.

(يدق الجوس ثانية .. فيفتحه سيد ببطء ، ويمد عنقه من خلال الفتحه ليرى الطارق .. يسمع صوت الشيخ عجايب من خارج الباب) .

عجايب : السلام عليكم يا سي سيد افندى . . عدم المؤاخذه . . وحياة والدك اقدر الاق عندك قطنه بصبغة يود احطها على البطحـــه اللي في دماغي .

(سيد يفتح الباب ويدخله) .

: الله .. الله .. إيه اللي جرالك كفي الله الشر ؟

(يرتمى الشيخ عجايب على الأريكة وقد بدت إحدى عينيه
 سوداء من أثر كدمة ووضع يده بالمنديل على جرح فى رأسه) .

المشهد الثالث

نوح : الله .. إيه الحكايه يا شيخ عجايب ؟.

سی

محمود : الظاهر ان عين صابته .. حسدناك والله يا شيخ عجايب .. لسه كنا بنقول عليك آكل شارب نايم .. وأشيتك رضا مع عديله .

عجایب : الله یخرب بیتها بحق جاه النبی .. الحقنی یا سی سید انا فی عرضك لحسن خلاص .. دمی ساح .. إذا ما كانش بصبغة يود .. تبقی بتلقيمة بن ، بس اوقف الدم .

: حاضر .. حالاً .. بس خليك كابسه بالمنديل .

(سيد يخرج من البوفيه زجاجة صبغة يود وقطعة قطن ثم يضمد جرح الشيخ عجايب) .

: إيه اللي جرالك يا راجل .. إيه اللي عمل فيك كده ؟!

: عديله ياسي نوح افندي .. خدتني غدر .. دشدشتني خالص .

: ليه بس ؟! عملت لها إيه ؟.

ولا حاجه والله .. النهارده الصبح الوليه زهره بتاعة الفول النابت فاتت علينا سابت لنا نص قدح فول .. وقالت لى ان بقالها خمس سنين من غير خلفه وان جوزها ناوى يتجوز عليها اذا ما كانتش تخلف .. وطلبت منى وصفه للحمل .. الوليه صعبت عليه قولتلها فوتى عليه آخر النهار أكون عملتلك اللازم وقعدت احضر لها في حجاب كويس عبش ما يخيبش أبدا . وقرب المغربيه خبط الباب ودخلت زهره .. رحت مديها الحجاب . الوليه خدته وقلبته في إيديها وقول زى ما تكون استقلته .. قالت هوا دا يا سيدنا الشيخ اللى حا يجيب الحبل .. قولتلها ياستى البسيه دلرقت واذا ما نفعش نعمل واحد تانى .. برضه لقيتها موسوسه ، حببت اطمنها .. قولتلها يا ستى ما تخافيش اطمنى .. انا مش حاسيك أبدا الا لما تحبل .. غلطت فى كده ؟!

: أبدا .

: انا يدوبك خلصت كلام .. والاقيلك الباب اتفتح وحاجه كده هجمت عليه .. زى اما يكون صاروخ .. أتابى كلامى كان فى دخلة عديله .. وسمعته وهى ورا الباب الظاهر الفار لعب فى عبها خلاها شعللت .. وهجمت عليه .. عاديك .. ما خلتش فيه نفس .. ولا قدرت افهمها ولا اشرح لها ولا آخد منها حق ولا

سيد

نوح

عجايب

عجايب

نوح

نوح

عجايب

باطل .

نوح : ما تخافش ، بكره حا تاخد منها الحق والباطل ، اكتب يا سيد افندى بسرعه ، العضو الرابع ، الشيخ عجايب محمد عجايب ، قوم يا شيخ عجايب قوم ، دانت ربنا بيحبك ، العلقه اللي انت اترقعتها دى ، حا تكون نقطة تحول في حيابك . حا تكون سبب في تخليد ذكرك في سجل الخلود ، دى اللي حا تدخلك التاريخ من أوسع أبوابه . بدال ما كنت حتة هلفوت نصاب دجال محتال ماشي في ركاب شيخة بجرمات الشرق الأوسط ، دلوقت حا تبقى عضو مؤسس في أكبر جمعيه سريه عرفها التاريخ ، أكبر جمعيه حا تقضى على الطغيبان والظلم والاستبداد . قوم يا شيخ عجايب قوم .. انت امك داعيه لك ، صدق من قال ، رب ضارة نافعه . أو كما قال ، تيجي مع العمى طابات .

عجايب : (في دهشة) إيه أصله ده ، أقوم اروح فين ؟

محمود : قوم ، قوم ، انت وقعت والا الهوا رَمَاك ، آل من عديله لنوح يا قلبي لا تحزن ، قوم يا حلو ، قوم خش التاريخ من أو سع أبوابه ، قوم لحسن المسأله مستعجله قوى .

عجايب : بس مش تفهموني إيه الحكايه ؟

سيد : دلوقت تفهم ، بس قوم خد محلك .

نوح : یا الله یا جماعه بقی علشان نبتدی الجلسه ، الوقت کالسیف ، أو کأم عبده ، ان لم تقطعه قطعك .

عجايب : قطيعه ، تقطع ام عبده ، وتقطع الزمن اللي رمانا في بيتها .

نوح : قضاك كدا يا شيخ عجايب . أمال انا اقول ايه ، اللي بقالي عشرين سنه ، أم عبده مع الأشغال ، لكن معلهش ، هانت .

فيا قسلب صبرا إن جسزعت فسربما هوى الزمن على رأس أم عبده بالصرم مكسور البيت شويه يا أستاذ سيد ، معلهش ، مدام مكسور على دماغ ام عبده . ييقى الكسر حلال ، يا الله بينا يا جماعه ، فتحت الجلسه .

سيد : (ينظر إلى الساعة في قلق) احنا حا نطول يا نوح افندى ؟

نوح : احنا والتساهيل ، نبتدى دلوقت نقرا قانون الجمعيه ، انا بقالى شهر باوضع فيه ، واعتقد ان ما سبتش حاجه أبدا ما وفيتهاش حقها ، خد يا سيد افندى باعتبارك سكرتير عام الجمعيه ، اقرا القانون .

سيد : (يتناول الأوراق ويأخذ في القراءة) خطك وحش أوى يا نوح

افندى .

نوح : الله يبشرك بالخير ، دايما العظماء ورؤساء الجمعيات السريه يبقى خطهم وحش كده ، لكن على العموم شويه شويه حتاخذ عليه ، اقرا .

سيد : (يقرأ) قانون الجمعيه السريه لقتل الزوجات .

مادة ٢ ــ الغرض من إنشائها:

(١) وقف استبداد الزوجات .

(٢) المطالبة بالحريات السبع للأزواج وهي:

(أ) حرية البصبصه وشبرقة العينين ، شبرقه بريئه مبدئيا .

محمود : انا معترض .

نوح : علشان ؟

محمود: علشان مسألة البراءه دى ، انا ما احبهاش أبدا .

نوح : یا آخی قولنا ، مبدئیا ، یعنی تبتدی بریئه ، و بعدین یسهلها ربنا ،

والا المساله هبش كده ؟

محمود : إذا كان كده معلهش ، موافق .

نوح : استمریا سید افندی .

سيد : (ب) حرية الفوضي المنزلية ، وتحريم جميع أنواع النظافه من كنس

ومسح وتنفيض في حضور الأزواج ولا سيما أيام الجمع والعطلات الرسميه .

محمود : (يصفق طربا) ، حلوه الفقره دى ، قلها تانى يا خال وحياة والدك ، أصل انا احب الفوضى قوى .

نوح : اقراها له تانی یا سید افندی .

سيد : هو إيه أصله ده ؟ احنا ما ورناش وقت .

نوح : طيب كمل.

سيد : (ج) حرية الغياب عن البيت لدواعي العمل ، مع عدم الاستفسار قطعيا عما هي دواعي العمل هذه ، حتى لا يرهق السزوج في التفكير .

(د) حرية الكذب . مع عدم التدقيق فى الاستجواب حتى لا يكشف الكذب .

(هـ) حرية الاحتفاظ بسرية آثار أحمر الشفاه في المناديل ، والروائح العطرية والشعرات الملتصقه بالجاكتات وعدم الإباحة بمصادرها خشية الحرج .

(و) حرية التصرف في نقوده الخاصة مع تحريم وضع يد الزوجه في حيب الزوج لعدها . أو لسلبها كلها أو بعضها . أو لحسابه عليها .

(ز) حرية انتقاء الخدم ، مع منع طرد الخادمات الجميلات منعا باتا ، ومنحهن حق الالتجاء إلى مجلس الدولة فى حالة الطرد ، والعودة إلى المنزل بحكم مجلس الدولة .

مادة ٣ ــــ

نوح : استنى شويه لما تاخد الرأى ، إيه رأيك في الحريات السبع دى ؟ الشيخ عجايب : ناقصين و احده .

محمود : ایه هی دی ؟

عجايب : حرية التحميل.

: حرية إيه ؟ نوح : حرية التحميل. عجايب : كلام إيه ده يا شيخ عجايب .. ده كلام عيب ، ما نقدرش ننص نوح عليه في صلب القانون. : عيب ؟! واللي فات دا كله مش عيب ؟ عجايب : أصل يا شيخ عجايب .. حرية التحميل .. حاجه مفروغ منها .. سيد كل واحد له الحق فيها .. من غير ما ننص عليها .. فيه حد مالوش حق في تحميل زوجته ؟ : زوجته ؟. زوجته إيه ياسي سيد ؟ انا قصدي زوجات الغير عجايب : يا نهارك اسود ، عايز تنص على كده في القانون ؟ نوح عجايب : أيوه از اي بقي ؟ نو ح : أيوه .. يعني أيوه .. هي دي فيها حاجه ؟. حرية التحميل بواسطة عجايب الأحجبة والشبشبة والسحر والذي منه .. يا تنصوا عليها في القانون ، يا مستقيل .. السلام عليكم (وينهض) . : طيب اقعد بس . نو ح : أَقعد ازاي .. مش كفايه اللي جرالي .. انتو عايزيني اقع فيه تاني .. عجايب هوا اللي جرالي دامش من تحت راس ان الحريه دي مش مكفوله .. أمال إيه بقى فايدة الجمعيه سلام عليكم (وينهض) ؟! : طيب اقعد .. حاننص لك عليها .. اكتبها عندك دى يا سيد افندى نوح واكتب بين قوسين (خاصة بالشيخ عجايب) . : واشمعني بقى الشيخ عجايب .. هوا فيه خيار وفاقوس ؟ محمود : يا أخى دى حاجه تدخل في نطاق عمله .. يعني بياكل منها عيش .. نوح وانت لازماك ليه .. حا تعمل احجبه انت كان ؟ : مين يعرف .. حد عارف الظروف ، خليها ساييه كده من غير محمود

تحديد . : حاضر .. خليها كده عامه ما فيش داعي للتخصيص ، اقرا المادة نوح اللي بعدها . : مادة ٣ : شروط العضوية ... (يدق الجرس فيقفز سيد إلى الباب ، ويبدو الخوف على الجميع يفتح سيد بحذر ولكن الباب يدفع ويدخل منه قرقر لاهثا) . المشهد الرابع : (مندفعا في الحديث قبل أن يرى الموجودين) الحق يا سيد قر قر افندى ... عرفت إيه اللي حصل .. مش دلوقت (يلمح نوزح افندي فتصيبه دهشة وفزع ويقف الكلام على شفتيه) الله .. هو سیدی نوح افندی هنا ؟! : إيه الحكايه يا واديا قرقر .. مالك ؟ نوح : لا .. ما فيش حاجه .. دا انا بس .. أصلي .. قر قر : أصلك إيه ؟! فيه إيه ؟! حصل حاجه ؟! سيد : (يغمز سيد بطرف عينيه ويقترب منه هامسا) حصل كارثه .. قر قر الست ام عبده قفشت الجواب اللي كان مدلدل من البلكون لأن ست بهيه ما كانتش موجوده وهي اللي كانت قاعده في البلكونه .. واستقرته .. وعرفت اللي فيه .. وعامله هيجان وحا توديكو في داهيه .. شوفولكوا طريقه بسرعه . : (مذهولا) طريقه ؟! طريقه ؟! دى اتنيلت خالص . : بتتوشوشوا بتقولوا إليه ؟! قرب هنا يا واد يا قرقر .. قرب ؟! إيه

: (يقترب مرتبكا) ما فيش حاجه .. ده موضوع كان كلفني بيه قر قر

نوح

سيد افندى . : طب اقعد . نوح : أقعد ازاى ؟ قر قر : اقعد . نو ح : أنا و رايا شغل. قر قر : قلت لك اقعد بعني اقعد . نو ح : والست ام عبده ؟ قرقر : ولا تهمك .. انت مصيرك بقى في إيدى حسب قانون الجمعيه .. نوح المادة (٢) الفقره (ز) .. للأزواج حرية انتقاء الخدم .. اقعد .. اكتب اسمه عندك يا سيد افندى .. أهو دلوقت بقى مجلس إداره محترم .. إحنا ممكن كان نعمله سكرتير عام مساعد .. ده ينفعك أوى يا سيد افندى .. يقدر يساعدك ، في كنس الجمعيه .. في رشها ، برضه الأمر ما يخلاش . : (یکتب) عبد الجلیل الجرجاوی وشهرته قرقر سکرتیر عـــام سيد مساعد لشؤون الكنس والرش. : ما بلاش حكاية الكنس والرش .. خليها عايمه .. يمكن تمتاجولي في قرقر حاجه تانيه . : برضه أحسن ، اشطبها يا سي سيد ، كمل قرايه . نوح : المادة ٣ : شروط العضوية :

محمود

(١)أن يكون إنسانا عاقلا محترما . : (صائحا) إيه هوا ده ؟! عاقل إيه ومحترم إيه ؟ الظاهر انكم مش عايزين حد ينضم للجمعيه أبدا .. دى شروط معجزه .. دى هى دى الشروط اللي يجب انها ما تتوفرش في العضو .

> نوح : ازای بقی ؟ محمود : لأنه إذا كان عاقل .. مش حا يتجوز .

سيد : وإذا كان محترم ؟

محمود : مشحا يخش الجمعيه .

نوح : طيب شيل الشرط ده .. اقرا اللي بعده .

سيد : (۲) اتنين .

نوح : خليها (١) واحد على طول .

سيد : طب (١) واحد .. أن يكون زوجا تعيسا .

قرقر : الله ؟! واذا ما كانش متجوز زى حالاتي .

نوح : الجمعيه تجوزه .

قرقر : طيب واذا ما بقاش تعيسا ؟

نوح : الجمعيه تتولى إتعاسه .

قرقر : ما اتتعسش ؟

نوح : تطلقه وتجوزه واحده تانيه تتعسه .

قرقر : برضه ما اتتعسش .

نوح : يبقى طابور خامس .. يجب فصله .

قرقر : وإذا ..

سيد : إحنا مش حا نخلص والا إيه ؟! بس بقى يا سى قرقر خلينا نكمل .

قرقر: يعنى ما استفهمش؟

سيد : ابقى استفهم بعدين .. خلينا نخلص دلوقت ، (ناظرا إلى الباب ف

قلق .. ثم إلى نوح في استعطاف) أظن كفايه كده النهارده ؟

نوح : كفايه ازاى .. انتوا إيه ؟ مش حاسين بخطورة الحالة .. إحنا لازم نشتغل ليل نهار .. الحالة وحشه جدا . إحنا اذا ما كناش ننقذ نفسنا .. حا نروح في داهيه .

(دقات متواصلة من الجرس .. طرقات متوالية على الباب .. ويسمع صوت أم عبده من الحارج) .

أم عبده : افتح ياضلالي منك له ، والنبيي لاوديكوا النيابة ياخبـاصين

ياهلاسين .

نوح : (قافزا من مكانه وهو يلم الأوراق في الحقيبة) يانهار اسود دى ام عبده .. الحقوني .. لازم فيه وشايه بالجمعيه ، خلاص ، روحنا في داهيه .

(يهرول بحقيبته وأوراقه مندفعا إلى باب الحجرة وخلفه الشيخ عجايب) .

قرقر : جمعية إيه وبتاع إيه ؟ إيه العمل دلوقت .. حا تقولوا لها إيه على الجواب اللي بعته سي محمود م البلكونه ؟

محمود : أنا ياخويه ما بعتش حاجه .. حد الله بينى وبينهم ، حد فى الدنيا يحب بنت ام عبده !! يحب بنت طوربيد ؟ بنت بركان !! يا ساتر يارب .. أنا حا زوغ يا خال واصطفل انت معاها .. أنا طول عمرى لا با احب حدولا حد بيحبنى ..

(يتجه إلى باب المطبخ) .

قرقر : وانا إيه اللي يخليني اقابلها .. هو انا مستغنى عن نفسي .. خُدْنى معاك يا سي محمود .. أنا مش حملها .

(يختفي وراء محمود) .

(يزداد الطرق والدق فيتجه سيد إلى الباب مرتجفا ويفتحه فى تردد فتدفعه أم عبـده وتندفع ثائرة إلى الداخـل وفى يدهـــا الجواب) .

المشهد الخامس

أم عبده : هوا فين هوا ده ، الضلالى الخباص اللى ما يختشيش .. هوا فاكرها إيه ، سايبه ؟ وكاله من غير بواب ؟ مال من غير صاحب .. عايز يتلف البنت ويخيب أملها ويخسر أخلاقها ، لا يا حبيبى .. لا يا عومر .. إحنا مش من أهل ذلك .. إحنا ناس أحرار ، مش بتوع مسخره .

سيد : هدى نفسك بس يا ست ام عبده .. هو لا سمح الله حد قال عليكوا حاجه ؟.

أم عبده : يقدر . . دا انا كنت قصفت رقبته ، واطلع البلاعلي جتته . سيد : طيب امال مزعله نفسك ليه ؟.

أم عبده : مزعله نفسى ليه ؟! على اللي حصل ، هوا اللي حصل شويه .. عايزني أتحزم وارقص .. هي دى عامله تتعمل هوا ما فيش خشا ما فيش حيا دا احنا ناس أشراف .

سيد : هوا فيه حدقال انكم مش أشراف ؟! دا انتم أسياد الناس .. دا انتم سمعتكم زى الجنيه الدهب .

أم عبده : ولما انتوا عارفين كده .. يبقى لزومه إيه ده (تشير بالخطاب) لزومه إيه المسخره وقلة الأدب . . .

سبد : يا ست ام عبده ، هوا فيه مسخره وقلة أدب !.

أم عبده

: لا .. فيه وعظ ، حوش يا خويه الآيات اللي بتنقط منه حوش ، حوش الأدب اللي بيخر حوش ، آل فيه إيه ؟.. فيه انت معى دائما ، في كل نومه وقومه ، ياخي ان شا الله ينام ما يقوم ، معاه أزاى الضلالي اللي ما يختشيش على عرضه .. بنت زى دى لسه عنيها ما اتفتحتش يقول عليها انها معاه في كل نومه .. ازاى !! دا انا او ديه

النيابه ، دانا ابيته في السجن .

سيد : ليه بس يا ست ام عبده .. الراجل قصده برىء ونيته طيبه .

أم عبده : طيبه !؟ ياخى ماطاب له عيش ، آل طيبه آل ، بعدما يقول لها انت نايمه معايا دايما .. يبقى برضه طيبه ، أمال كان ناقص يقول لها إيه ؟.

سيد : يا ست دا قصده توريه .. يعنى فى ذهنه دايما ، وهو نايم وهو صاحى .

أم عبده : لا يا حبيبي .. لا يا نضرى .. احنا مش من بتوع التوريه ، احنا ناس جد .. ناس أصله .

سید : احنا عارفین یا ست ام عبده .. احنا عارفین قیمتکم کـویس خالص ، ومحمود قصده شریف .. محمود بیحب بهیه ، وعایز یتجوزها .

(تسمع نحنحة محمود من وراء باب المطبخ) .

أم عبده : (تلين بعض الشيء) والل عايز يتجوز الناس يا سي سيد يقوم يتجوزهم بالسنانير والحبال ومشابك الغسيل من الشبابيك والبلكونات .. برضه دا يصح ، هي مالهاش أب .. مالهاش أم ، افرض حد من الجيران كان شافه ، يقولوا إيه .. يقولوا البنت دايره على حل شعرها ، يقولوا مالهاش حد يلمها .. إنت عارف الناس لسانتها وحشه ازاى يا سي سيد ، وما حدش بيقدر ولا بيعرف .

سيد : معلهش يا خالتي ام عبده .. حقك عليه .. امسحيها فيه انا ، محمود برضه معذور أصله بيحب بهيه قوى وييموت فيها .. يتمنى التراب اللي بتدوس عليه ، والنسمه اللي بتمر بيها .. هي حياته ، هي روحه .

أم عبده : حيلك .. حيلك يا سي سيد ، احنا مش بتوع حاجات زى دى .. احتا ما نعر فش الحب .. احنا ناس جد .

سيد
أم عبده
سيد
_
أم عبده
سيد
اًم عبده
سيد
أم عبده
سيد
-
أم عيده
، سيد
عديلة
•
أم عبده
عديلة

سيد : (مذهولا) إيه ؟ فيه إيه ؟.

الضابط : خلیکوا زی ما انتو کده .. ما فیش حد یتحرك .. فیه واحد هنا اسمه نوح افندی ؟.

أم عبده : (في ذعر) ماله نوح افندى ؟! جراله إيه ؟ فيه إيه ؟!.

الضابط: هوا فين ؟.

سيد : هوافين ؟.

الضابط : أيوه هو فين ؟.

سيد : إيش عرفني .

الضابط: مشردي شقته ؟.

عديلة : لا يا حضرة البيه .. شقته تحت .. و دى الست بتاعته .

الضابط: حضرتك ؟.

أم عبده : أيوه انا .. ماله نوح افندى ؟ مش تقوللي يـا حضرة الضابـط وتريحني .

الضابط : متهم بعمل جمعيه سريه لقلب نظام الحكم .

أم عبده : قلب إيه ؟!.

الضابط: نظام الحكم.

أم عبده : ياخى ان شا الله تنقلب دماغه ويتوجع قلبه . هوا ده يعرف يقلب نظام حكم .. ودا مين بقى بسلامته اللى قال لك عليه الحكايه دى ؟.

سيد : وتفتشوا هنا ليه ؟ إذا كان نوح افندى مش ساكن هنا ؟.

الضابط : لأن المعلومات اللي عندنا ان الاجتماعات بتاعته مع أعضاء الجمعيه يعقدها هنا .

أم عبده : بقى كده ؟! نوح افندى بيعمل جمعيه واجتماعات !! طيب

اتفضلوا فتشوا. ان شاء الله حاييجي نقبكم على شونه.. هوا نوح افندي فاضي الاللبصبصه والغنا . خشوا فتشوا .. الشقة أهي قدامكم .

سيد : (مرتبكا) لكن ..

الضابط : (للمخبرين) يا الله ابتدوا ..

(يأخذ الخبران في تفتيش الصالة ويتجه هو إلى باب الحجرة) .

الضابط : (مشيرا إلى الباب) وهنا فيه إيه ؟

سيد : (مرتبكا) هنا فيه .. لا مافيش حاجه ، مافيش حاجه أبدا .

الضابط : متأكد ؟.

سيد : جدا .

أم عبده : ياخويا خش شوف وريج نفسك .. آل نوح افندى آل .. داتلقيه زمانه سطيحه في السكر .. هوا ييفوق لنفسه لما حا يفوق للجمعيات .

(الضابط يدفع الباب فيفاجأ بنوح افندى واقفا خلفه تمسكا بالحقيبة والأوراق فيتراجع في دهشة) .

الضابط: الله ؟! إيه ده ؟.

آم عبده : (تضرب على صدرها) نوح افندى .. يا نهار مهبب ومنيل .. انت بتعمل إيه هنا يا راجل !.

الضابط : هوا دا نوح افندى .. هه .. بقى كده !! ما فيش حاجه أبدا ؟! زمانه سطيحه من السكر !! اطلع يا نوح افندى .. اطلع .

(يدخل نوح افندى فيبدو وراءه الشيخ عجايب وهو معصوب الرأس) .

: و دا ایه کان ؟.

الضايط

عديلة : (تشهق من فرط الدهشة) الشيخ عجايب ، ينيلك انت كان بتعمل إيه هنا ؟.

: خش خش وانت تبقى ايه يا شيخ عجايب عضو مجلس	الضابط
إدارة منتدب ؟.	
: أبدا والله أنا عضو عادى عضو مستجد ، بقالى خمس دقايق	عجايب
بس ، ولولا العلقه اللي اترقعتها دلوقت ، ما كتتش دخلتها أبدا	
الله يخرب بيتك يا زهره بحق جاه النبي ، انت اللي كنت السبب .	
: يا ناس ، يا هوه ، أنا في حلم والا علم نوح افندي والشيخ	أم عبده
عجايب يعملوا جمعيه ، لقلب نظام الحكم ؟ حقه بطلوا ده واسمعوا	
. ده .	
: ياما تحت السواهي دواهي الواحد يشوفهم يقول عليهم غلابه	عديلة
وعلى نياتهم .	
: ﴿ لَأَحَدُ الْخَبْرِينَ ﴾ خد منه الشنطه حطها على الترابيزه ، وطلع اللي	الضابط
فيها .	
(يهم المخبر بأخذ الأوراق والحقيبة ولكن نوح يتشبث بهما) .	
: اديها له .	الضابط
: ما يمكنش .	نوح
: (ڧ ﺩﻫﺸﺔ) ﻣﺎﻳﻤﻜﻨﺶﻟﻴﻪ ؟.	الضابط
: ما يمكنش يطلع اللي فيها قدام الحريم دول (ويشير إلى أم عبده	نوح
وعديله) .	
: ليه بقى ؟ فيها قباحه ؟.	الضابط
: وهم الستات يكرهوا القباحه ؟.	نوح
: أمال فيها ايه ؟.	الضابط
: بعدين اقول لك ، بس أرجوك تأمر بإخراج صنف الحريم اللي هنا	نوح
علشان نعرف نتفاهم على رواقه .	
: أنا اخرج ؟ يا اخي ان شا الله تخرج على ضهرك يا بعيد وايش	أم عبده
عجب أنا اللي اخرج بس . أنا لوحدي من دونهم كلهم اللي	
(أم رتيبة)	

تخاف منى ، أنا اللي مستحملاك طول العمر ، ومستحمله همك وبلاويك .

الضابط : طب يا ست اتفصلي بره شويه ، أما نشوف آخرتها معاه .

أم عبده : أتفضل بره .. ليه عدوته ؟! ضبابه على عينه ؟! والنبى ما اخرج الا ما اشوف إيه الحكايه .. أنا عارفاه ، وعارفه و حايده ، المسأله لازم فيها سر .

الضابط: يا ستى خلينا نشوف شغلنا.

أم عبده : دابيتي . ما اخرجش ولا اتحركشي .

الضابط: طب يا مي نوح افندي ، اديله الشنطه .

نوح : (متشبثا بها بشدة) أبدًا . . هوا انا مجنون اوريها اللي فيها ايه . . أنا قتيل الشنطه .

الضابط : طيب خليها معاك (للمخبرين) كملوا تفتيش ، خش انت فتش في بقية الأود (يشير إلى باب المطبخ) و دايايه ؟.

سيد : المطبخ و دورة الميه .

الضابط: وفيهم إيه ؟.

سيد : عضو مجلس الإداره المنتدب . . والسكرتير العام المساعد . . لشئون الكنس والرش .

(يفتح الباب .. ويخرج قرقر منفعلا) .

قرقر : ماقولنا اشطبوها دى .. سكرتير عام مساعد بس .. ما فيش لزوم للفضايح دى .

أم عبده : یابن الصرمه القدیمه .. انت کان بتشتغل فی الجمعیات السریه ؟! دی لازم جمعیه وقیع خالص .. سیبهم یا حضرة الضابط سیبهم بلاش تضییع وقت .. دول جماعه مخابیل .. أنا عارفاهم كویس .. ما فیش فیهم عاقل غیر سی محمود افندی .. لو كان هنا كنا قدر نا نعرف منه الحكایه و ما فیها .

(محمود يخرج متنحنحا) .

محمود : السلام عليكم .

أم عبده : يا نهار اسود .. انت كان معاهم !! لا .. أنا خلاص .. برج من عقلي حا يطير .. لازم اعرف إيه الحكايه ؟! إيه السر ؟!.

الضابط: وده إيه كان ؟.

نوح : عضو مجلس الإداره المنتدب .

أم عبده : منتدب ؟! يا اخى إلهى يندبوا عليك .. يا راجل يا شايب يا عايب .. مش حا توريني إيه اللي في الشنطه دى ؟.

نوح : ما يمكنش ، أنا مجنون أودى نفسي في داهيه !.

الضابط: انت لسه حا تودى نفسك في داهيه .. دانت حا تروح اللومان .

نوح : معلهش لومان لومان .. برضه أهون من اللي حا يجرالي لو شافت اللي في الشنطه .

أم عبده : آه يا نارى .. لو اتلم على اللي فيها .. لاوريك نجوم الضهر .

نوح : شفت .. مش قلت لك .

الضابط : على العموم اتفضلوا قدامي كلكم .. كده بحالكم بمالكم .. اتفضلوا على المحافظه .

نوح : يا الله بينا .

محمود : یا الله بینا ازای ؟! هوه إیه أصله ده ؟!.. انت عایز تودینا ف توکر .. لازم نقول لهم علی الحقیقه .

نوح : حقيقه ؟.. إنت مجنون ؟.. دى هى دى اللى حا تودينا فى توكر .. اسكتوا انتم من فضلكم أنا الرئيس وأنا مسؤول عن كل حاجه .. يا الله بينا .. اتمسى بالخيريا أم عبده .

أم عبده : الله لا يمسيك ولا يصبحك بالخير زى ما انت محيرنى ومفرج على الناس .

(يتجهون نحو الباب ويهم أحد المخيرين بفتح الباب عندما يدق

الجرس فجأة) .

سید : (منزعجا) وده بیقی مین ده کمان ؟!.

محمود : واحده من الفردتين .. هم اللي فاضلين .. ما بقاش حد تاني بره أبدا .

(يفتح الباب فتبدو زكيه ولعه) .

محمود : مش قلت لك .. آدى فرده .. يبقى فاضل التانيه .

زكية : (فى ذهول) يا نصيبتى ؟ . . . إيه الحكايه ؟ ! . . إيه أصله ده ؟ ! . . جرى إيه كفى الله الشر . . إحنا جايين نتعشى ونسهر وننبسط و الا جايين نفتح محضر .

أم عبده : بقى كده .. قولتولى .. يا خباصين يا هلاسين ياولاد الصرم .. هى دى الجمعيه السريه بتاعتكم . بقى كلكم ملمومين علشان .. تقعدوا تسكروا وتهيصوا .. وتعملوها أردغانه .. خشى ياختى خشى .. خشى سمى عليهم .. قبل ما يروحوا التخشيبه .. هوا دو قلب نظام الحكم .. ياخى إلهى تتوجع قلوبكم .. من أولكم لآخركم .. بقى كلكم ملمومين علشان خاطر البت المفعوصه دى .. اللي زى عصاعيص النقاريه .

زكية : نقاريه مين يا حبيبتي .. ما شبهش والا إيه ؟! دانا ولعه والأجر على الله .

أم عبده : ولعه لما تقيد في نافوخك ونافوخهـم .. اتلمـي يــا بت لحسن والنبي ..

زكية : والنبي إيه يا ادلعدى ؟! حا تعملي فيه إيه .. حا تقطعي الراتب اللي بتجريه عليه .. حا تحوشي عنى الخيرات اللي مغرقني فيها بسلامته نوح افندى .. آل اللي يفرقه العويل يسفه .

أم عبده : سامع يا سي نوح .. سامع .

الضابط : كويس قوى .. كويس خالص .. بلاش نشوف شغلنا ونقف

نتفرج على ماتش الردح اللي بينكم . بس خلاص .. انتهينا .. فوتو قدامي كلكم . : يفوتوا قدامُك انت ؟ إ . . دول يفوتوا قدامي انا . . انت لسه برضك أم عبده فاكر انهم عاملين جمعيه سريه وحا يقلبوا نظام الحكم ؟! بقي بعد اللي انت شايفه ده عايز برضه تاخدهم معاك ؟! دا انت لازم على نياتك .. سيبهم لي انت .. انا اشوف خلاصي معاهم .. اتفضل انت وأنا حا اشوف شغلي. : إوعي يا حضرة الضابط .. إوعي تسيبنا .. لو سيبتنا أنا حا بلغ نوح عنك . حا يبقى إهمال في تأدية وظيفتك .. آديني بقول لك اهه . : طيب فوت انت قدامي يا شيخ قطران . عديلة : أبدا .. انا مع نوح افندي .. الحقني يا حضرة الضابط . عجايب : هو إيه أصله ده .. انتم إيه حكايتكم ؟. الضابط (يدق الجرس). : وادى الفرده التانيه .. أهي خلاص كملت . أظن بعد كده مش حا محمود يبقى فيه خوف أبدا . وآدى قعده (يجلس متربعا على الكنبة بعد أن يأخذ زجاجة بيرة ويفتحها) تاخد لك شفطه يا خال ؟. : ﴿ وَهُو يَتَجُهُ لِيُفْتُحُ البَّاكِ ﴾ يا أخى احنا في إيه والا في إيه . أما سيد نشوف اللي حا يجرالنا. : يعنى حا يجرالنا إيه اكتر من كده ؟ آل ضربوا الاعور على عينه آل محمود خسرانه خسرانه . (يفتح سيد الباب فتبدو به بهه) . : (في ذهول وهي تهم بالتراجع) الله ؟! وإيه جابكم كلكم هنا ؟. بهية : (موتبكا) لا مؤاخذه يا ست بهيه ، أصل فيه شوية سوء تفاهم ،

> أنا متأسف قوى ، اتفضل استريحى . (تقف بهيه في الباب حائرة وجلة) .

بهیة : (وهمی تنظر إلی المخبرین) ودول بیعملوا ایه هنا ؟! وإیه اللی شایله بابا ؟.

سيد : ما فيش حاجه . ما فيش حاجه أبدا (يتقدم نحو نوح افندى ويأ خذ منه الشنطة) هات يا سي نوح افندى الشنطة بتاعتى واتفضلوا انتوا على تحت . يا حضرة الضابط ، أنا اللي مسؤول عن كل حاجه ، نوح افندى كان جاى بيطالبنى بالأجره . فعرضت عليه انه يشترك معايا في جمعيه عاملها ، اسمها جمعية قتل الزوجات .

الضابط: قتل إيه ؟!.

سيد : الزوجات ، الزوجات ، انت مش متجوز ؟!.

الضابط: متجوز.

سيد : يبقى المشروع لازم يهمك قوى .

الضابط: (ضاحكا) بس لسه متجوز جديد .

سيد : يبقى كان شهر واحد حا تحتاج لنا ، واتفضل شوف الأوراق علشان تصدق ، أهه اقرأ .

(يقرأ الضابط ثم يقهقه) .

الضابط : دى الجمعيه بتاعتكم ؟ وعلشان كده خايف تورى الاوراق للست بتاعتك يا نوح افندى ؟!.

نوح : انا مالیاش دعوه یالجمعیه ، أنا رفضت خالص اشترك فیها . أنا راجل با احب مراتی موت ، موت .

أم عبده : إيه ؟ بقى كده ؟!.

الضابط : طيب عن إذنكم يا جماعه ، أنا متأسف أوى لسوء التفاهم اللي حصل ، الظاهر ان المعلومات اللي جت لنا كانت مبنيه على مجرد شكوك كاذبه متأسف جدا ، سلاموا عليكم .

(يخرج الضابط والخبرين ويحاول نوح الحروج في أذيالهم) .

أم عبده : (**توقفه**) بس ، رايح فين ؟.

: مش خلاص خلصنا ؟ الحكايه طلعت فشوش ؟. نوح أم عبده : فشوش عندهم هم ، لكن مش عندي أنا ، إنت فاكر أنا ينطلي على الكلام ده ، أنا لسه لي حساب معاك . الست ولعه هانم إيه اللي جابها هنا .. جايه لمين ؟. : أنا عارف ، هو انا صاحب الشقه . نوح : والشرب والمزه دي مين اللي جايبهم ؟. أم عبده : أنا مالي با ست . نوح : مالك ؟! جاك مله على جنابك ، دا انا حاسود عيشتك . ما بقاش أم عبده كان غير تجيب لي النسوان الهلافيت لغاية البيت ، أنا ابقى قاعده تحت مستنياك على نار ، وانت قاعد تسكر وتبيص وتفرفش مع الست ولعه (تمسك بتلابييه وتهم بضربه) . : يا ست والله العظم إنا ما اعرف إنها جايه . نوح : أمال يعنى جايه لمين ؟ (تشدد الحثاق عليه) . أم عبده : جايه لي أنا يا ست أم عبده ، سيبي الراجل بقي ، ده مظلوم . محمود أم عبده : (تستدير إلى محمود) جايه لك انت ؟! وكان بتقر بلسانك يا خباص يا ضلالي . انت اللي عامل بتحب وعمال تحدف جوابات الغرام من الشبابيك والبلوكونات . انت اللي عمال تضحك على عقول البنات . انت يا نصاب يا فلاتي ، والنبي لاو ديك في داهيه . شايفه يا ست بهية شايفه السافل الدون الجرم . اللي عمال يضحك على عقلك .. شايفه الرجاله . : (في غضب شديد) إيه ده ياسي محمود الكلام الفارغ اللي بتقوله ده ، ما تصدقهش یا ست ام عبده ، ما تسمعیش کلامه یا ست بهيه ، دا بيحبك قوى .. دا بيموت فيك . دا ما بينامش الليل من التفكير فيك ، داحا يخطبك حالا دلوقت .

: (صارحه) ؟! الخاين ، اللي ما عندوش ضمير!.

ز کنة

: بقى اسمع يا خال ، لحد هنا وبس ، كفايه اللخبطه اللي حصلت دي محمود كلها ، أنا قلت لك أنا لا با احب و لا با اخطب. : ما تصدقیش یا ست بهیه ، دا بیکذب . : (تطرق برأسها) لا ما بيكدبش ، اللي بيكذب انت . . أنا عارفه بهية مين اللي بيحبني ، وعارفه مين اللي بيكتب لي الجوابات . أنا عارفه مين اللي بيقعد طول الليل يصفر الألحان الحزينه الجميله . أنا عارفه مين اللي قلبه جميل ومشاعره رقيقه ونفسه طيبه ، عارفه كل حاجه . وحاسه بالجرح اللي سببتهولك أول مره شفتك ، وعرفت بعدها ان انا اخطأت الشخص اللي بحبه ، وابتدا شعوري يتجــه اتجاهـــه الصحيح ، وحاولت كام مره أقول لك ان انا عارفه ، لكن كنت ما بتدنیش فرصه ، کنت بتهرب ، کنت خایف ، واظن دلوقت أحسن فرصه اقول لك فيها الحقيقة قدامهم كلهم . واقول لك كان انا مستعده إنى اتجوزك. : (مذهولا) مش معقول ، انا مش مصدق ؟! أنا ، أنا ، انتي ، انتى ؟. : ما شاء الله ، ولك عين تقولي كده قدامنا ؟. أم عبده : يا خالتي ام عبده ، أنا مش قادر اقول إيه .. أنا ما كنتش فاكر ان ربنا سيد حا يكرمني للدرجه دى .. أنا ما كنتش متصور أبدا أن صبرى الطويل ده ينتهي بتحقق الحلم اللي كنت يائس منه . . أنا طالب القرب منك في بنتك . . أنا طالب القرب منك يا نوح افندى . : وجمعية قتل الزوجات ؟. نوح : فلتسقط جمعية قتل الزوجات .. ولتحي الزوجات . سيل : واذا عملت فيك زي امها ما بتعمل فيه ؟. نوح : ما افتكرش ، ما فيش أسهل من مرضاة الزوج ، الحكايه ما

تستوجيش جهد كبير أبدا . كل الحكايه أن الزوجه تكيف مزاجها

على مزاج جوزها .. اذا كان ما يحبش الخروج تبقى تحاول هي انها تحب البيت ، واذا كان يكره التنظيف ، يبقى مش لازم تنظف قدامه .. ده بيته اللي يستريح فيه .. وأظن أقل ما فيها انها تهيأ له فيه الحاجه اللي ترضيه حتى ولو كانت غلط ، ومش ضروري تضيق عليه ، وتسنكر عليه الشباييك .. لازم تديله شوية حريه ، وشوية هوا ، يخلوه يحس بقيمتها . . ما فيش داعي تشتغل له بوليس ميري ، المهم انها هي تكون كويسه . ومسيره اذا كان بييص كده والاكده انه يقارن بينها وبين غيرها ، ويحس بفضلهـا ويعـرف ان هـــي الأحسن ، وانه ما لوش غيرها ، ما فيش داعي للشبشبه والسحر والكلام الفارغ . . كل ده نصب واحتيال .

عجايب

: أيوه ، والله يا بنتي لك حق ، أنا عمرى ما فلحت في حاجه عملتها أبدا .. الاحاجه واحده ، اللي هي كانت طالباها بنت الصرم ..

عديله .

: كانت طالبه ايه ؟.

محمود عجايب

: كانت عايزه اعمل لها حجاب علشان تتجوز . عملت لها الحجاب ، وبعد جمعتين اتجوزتني ، ووقعت انا في شر أعمالي .

عديلة

: بقى كده ، طيب بس لما تطلع فوق .. وانا اسود لك العين التانيه .

محمود

: ودلوقت خلاص وافقتم ؟. : أنا ما عنديش مانع .

نوح أم عبده

: أما نتفق في الأول على المهر والشبكه .

نوح

: طيب ، بعدين يحلها ربنا .

آم عبده

: أبدا .. دلوقت لازم ننهي كل حاجه .

سيد أم عبده

: أيوه برضه أحسن .. أنا مستعد لكل حاجه .

: خمسين إيه ؟. محمود

: أنا عايزه خمسين جنبه شبكه .

أم عبده : خمسين جنيه .

محمود : طيب خلينا بقي لما يبعتو لنا فلوس من البلد .

أم عبده : بلد ؟ بلد إيه يا عمر .. أنا عايزه الفلوس دلوقت حالا .

نوح : حالا ازاى بس يا ست ام عبده . . هي الحكايه إيه ؟ قفش !.

أم عبده : أيوه قفش .. أنا لازم اربطهم .

سيد : بس ، وبعدين .. يا جماعه .

(يدقى الجرس) .

محمود : و دا يبقى مين دا كان ؟

(يفتح قرقر فيجد بالباب الشيخ زين) .

الشيخ زين : يا ساتر .. السلام عليكم .. هي دى شقة سيد افندى الفنط ..

قرقر : (فرحا) شيخ زين !! أهلا وسهلا .. جيت في وقتك يا شيخ زين .. اتفضل .. اتفضل (يدخله ويجلسه على أحد المقاعمة باحترام وترحيب شديدين) أهلا .. وسهلا .. أهلا .. اتفضل .

(يجلس الرجل صامتا والجميع ينظرون إليه فى دهشة ويتسلل قرقر إلى المطبخ ثم يحضر مقشة غليظة ويقف وراءه ثم يهوى بها على رأسه فيخر مغشيا عليه) .

سيد : (صارحا) إيه ده ؟! إيه اللي عملته ده ؟ انت اتجننت ؟.

قرقر : (يفرك يديه) بس فرجت (يدخل يده في جيب الوجل ثم يخرج الحفظة مليئة بالنقود) عايزين كام (يعد) عشره .. عشرين .. تلاتين .. اربعين . خمسين .. يدوبك يكملم (يعطى النقود لأم عبده) .

أم عبده : إيه اللي عملته ده ؟..

قرقر : خدى بس دى فلوسهم .. جايبها لهم م البلد .

نوح : طيب وما سبتوش ليه لما يديهالهم ؟.

قرقر : أسيبه ؟ هوا انا اتجننت .. حا يقعد يقول .. بعد فحص وبحث

وتمحيص وإثبات شخصيه ، وموت ياحمار لما يجيلك العليق .

زكية : (تهم بالخروج) طيب اخرج انا بقي .

محمود : تخرجی ازای ! دول هم اللی یخرجوا .. یا الله یا جماعه انفضلوا

كلكم من غير مطرود .. يا الله يا الله .

أم عبده : يا الله بينا ، فوت قدامي يا سخام البرك ؟.

سيد : اتفصّل يا نوح افندى .

قرقر : (يتقدم هو) ولا مؤاخذه سخام البرك .. دا يبقى انا .. نوح

افندى يبقى هباب الطين.

أم عبده : اتفضل يا سي هباب الطين .

نوح : ما فيش فايده .. اللسان الزفر .. حا يفضل طول عمره زفر .

محمود : فلتسقط الزوجات ولتحي زكيه ولعه .

(يسدل الستار)

ختام

ــ ۲٦٨ ــ للمــؤلف

(قصص قصيرة ١٩٤٧)	أطياف
(روایــة ۱۹٤۷ ،۰۰۰ ۱۹۶۷)	نائب عزرائيل
(قصص · قصيرة ١٩٤٨)	اثنتا عشرة امرأة
(1984)	خبايا الصدور
(1984)	ياأمة ضحكت
(1989)	اثنا عشر رجلا
(رواية ۱۹٤۹ ،۰۰۰ ۱۹۶۹)	أرض النفاق
(قصص قصيرة ١٩٤٩)	في موكب الهوى
((((1981)	من العالم المجهول
(190.)	هذه النفوس
(روایــة ۲۹۵۰ ، ۱۹۵۰)	إني راحلة
(قصص قصیرة ۱۹۵۰)	مبكى العشاق
(1901)	بين أبو الريش و جنينة ناميش
(1901)	أغنيات
(مسرحية ۲۹۵۱ ،۰۰۰)	أم رتيبة
(قصص قصیرة ۱۹۰۱)	هذا هِو الحبِ
(1901)	صور طبق الأصل
(رواية ۲۰۰۰۰ ۱۹۵۲)	بين الأطلال
(1907))	السقا مات
(قصص قصيرة ١٩٥٢)	سمار الليالي
(1907))	الشيخ زغرب
(1907)	نفحة من الإيمان
(مسرحية ۲۹۰۲ ، ۱۹۵۲)	وراء الستار
(قصص قصيرة ١٩٥٣)	ست نساء وستة رجال
(1907))	هذه الحياة

(رواية ۱۹۵۳ ، ۱۹۵۳)	البحث عن جسد
(مسرحية ۱۹۵۳ ، ۱۹۵۳)	جمعية قتل الزوجات
(روایهٔ ۱۹۵۳ ، ۱۹۵۳)	فديتك ياليلي
(قصص قصيرة ١٩٥٣)	ليلة خمر
(1907)	همسة عابرة
(رواية في جزأين ١٩٥٤)	رد قلبی
(نصص قصيرة ١٩٥٥)	ليال ودموع
(رواية ۲۹۵۲)	طريق العودة
(مقالات ۲۹۵۷)	أيام تمر
(1904)	من حياتي
(1909)	لطمات ولثات
(رواية في جزأين	نادية
(((((////)	جفت الدموع
(مقالات ۱۹۲۱)	أيام مشرقة
(1971)	أيام وذكريات
(()	أيام م <i>ن عمرى</i>
(رواية في جزأين	ليل له آخر
(مسرحية ۱۹۲۲ ، ۱۹۲۲)	أقوى من الزمن
(رواية في جزأين ١٩٦٩)	نحن لا نزرع الشوك
(رواية ۱۹۷۰ ، ۱۹۷۰)	لست وحدك
(مقالات ۲۹۷۰ ، ۱۹۷۰)	من وراء الغيم
(1971)	أيام عبد الناصر
(رواية ۱۹۷۱)	ابتسامة على شفتيه
(رحلات ۲۰۰۰ (۱۹۲۱)	طائر بين المحيطين
(قصة ١٩٧٣)	العمر لحظة

الإستاذ يوسف السباعي

```
- اثنا عشر رجلا
                - اثنتا عشرة امرأة
           - ست نساء وستة رجال
                 ــ الىسـقا مات
              - طسريق العسودة
                 - بين الأطلل
                  - لست وحدك
 - جفت الدموع (الجزءالأول)
 - جفت الدموع (الجزء الثاني)
                 ۔ لیل لہ آخسر
( الجزء الأول )
- ليل له آخـر (الجزء الثاني)
      _ هذه النفوس _ هذه الحياة
  - من العالم المجهول - خبايا الصدور
           ـ لياى ودموع ـ اطياف
- نفحة من الإيمان - صور طبق الأصل
           - ليلة خمر - من حياتي
  ـ مبكى العشاق ـ في موكب الهوى
                ح سحمار الليالي
                _ هذا هو الحب
```

طائر بين المحيطين
 من وراء الغيم

ابنسامة على شفتيه
 غنيسات _ الشيخ زعرب

- بين أبو الريش وجنينة ناميش - يا أمة ضحكت

نائب عزرائيل _ البحث عن جسد

۔ وراء الستار ۔ اقوی من الزمن ۔ ام رتیبة ۔ جمعیة قتل الزوجات

_ ناديــة (الجز الأول)

ـ ناديــة (الجزء الثاني)

ــ رد قلبى (الجزء الأول)

رد قلبى (الجزء الثاني)

ــ نحن لا نزرع الشوك (الجزء الأول)

_ نحن لا نزرع الشوك (الجزء الثاني ا

_ إنى راحلة

۔ إنى راحله ۔ أرض النفاق

ندیتك یا لیلی

رقم الإيداع ١١٨/ ٨٧٨ الترقيم الدولي ٥ – ٣٤١ – ١١ – ٩٧٧

مكت بتىمصيت ٣ شارع كامل صكرتى - الفحالذ



دار مصر للطباعة سيد جرده السحار رفر كاه